

للحب وجوه

نور الهدى رمضان

للحب وجوه
نور الهدى رمضان
تدقيق لغوي : محمود عوض الله
تصميم الغلاف : عمرو علاء
رقم ايداع: 2020/3866
ترقيم دولي: 978-977-6594-93-7

دار فصله للنشر والتوزيع
العزيزيه - منيا القمح - مصر
٠٠٢٠١٠٦٧٠٠٠٧٠١
fasla.pub@gmail.com
Www.FaslaPub.Com



جميع حقوق الطبع و النشر محفوظة
الطبعة الأولى يناير ٢٠٢٠



جميع حقوق النشر محفوظة لدار فصله للنشر و التوزيع
إن أي تصوير أو اعادة طباعه أو نشر بشكل ورقي أو الكتروني أو ترجمته أو تسجيله
صوتيا بدون إذن كتابي مسبق من الدار يعرض صاحبه للمسائلة القانونية

للحب وجوه

نور الهدى رمضان



فصلة

للنشر والتوزيع

Fasla Publishing & Distribution

إهداء

لكل واحد بيدور على نفسه لكل واحد فضل السكوت عن الكلام فيه حكاية تشبهلك
هنا ممكن تكون انت بطلها!!؟ هتلاقى نفسك فى حكاية من الحكايات او فى سطر
من السطور المهم انك هتعيش مغامرة هتكتشف نفسك فيها من اول وجديد انت
وحدك هتحدد انت بطل انهي حكاية .

مقدمه

الحب! الحاجة الى بتديك القوة لحظة ضعف، اللحظة اللي ممكن تضحي عشانها بسنين من العمر، الحاجة اللي بتخلينا نستحمل قرف الحياة، الحب حلو مفيش كلام والاحلى بقى انك تتحب وتحس الحب ده، كلنا لينا طريقتنا فى التعبير عن الحب ده، نفسنا نحب ونتحب بالطريقة اللي رسمناها فى خيالنا ونعيش احلى قصص الحب.....بس لازم نعرف اننا زى ما بندوق حلاوة الحب هندوق وجعه، ولو فتشنا جوه كل واحد فينا هنلاقيه عايش الحياة دى مستخبي وراء وجه من وجوه الحب.

فى فىلا هانى زىن الدين بالمعادى.....

صحيت فريدة من النوم مفزوعة على نفس الكابوس اللى بيطاردها من 3 سنين....فجأة سمعت صوت دادة
سميحة بتنادى عليها عشان تصحى، خبطت دادة سميحة على الباب ودخلت...

سميحة: اصحى يا بنتى بقى

فريدة: صاحيه اهو يا داده

سميحة: ولما انتى صاحية منزلتيش ليه على الفطار!؟

فريدة: لازم اصبح عليكى وتبقى اول حاجة افتح عليها عيونى يا جميل

سميحة: اه يابكاشة انتى، طيب يلا بقى الكل مستنى

فريدة: حاضر يا دادة نازلة اهو

جهزت فريدة نفسها ونزلت وكان والدها ووالدتها واخوها على السفرة بيפטروا.....

فريدة: صباح الخير على عيونكوا

هانى: صباح الفل يا حبيبة بابا

سحر: صباح الفل يا قلبى، نور أوضتك كان منور لوقت متأخر ليه!؟

فريدة: مكنش جايلى نوم وقعدت اقرأ شوية

سحر: يا بنتى ارحمى عيونك، مش كفاية مش بتنامى كويس وكفاية شغلك عليكى

فريدة: ماما انتى عارفة ان الشغل ده حياتى، وقد ايه بحبه وكمان بيسلبنى

هانى: خلاص بقى يا سحر فريدة مش صغيرة، وكمان عارفة هى بتعمل ايه

فريدة: الله عليك يا هنوش ياللى ناصفنى دايمًا

سحر: بقى كده بقيت عازول يعنى!؟

فريدة: لا طبعاً يا قلبى مقدرش

سحر: يا بكاشة، طيب يلا عشان تفطرى

هانى: طيب هقوم اروح انا على الشركة، عشان عندى اجتماع مهم

سحر: توصل بالسلامة يا حبيبى

ادم: استنى يا بابا، خدنى معاك للكلية

فريدة: اه يا بابا خده عشان هو بيحب يركز

هانى: ادم ويركز سبحان الله

ادم: الله دى القعدة بقت علنيا بقى، خفى يا فريدة

فريدة: يا قلب فريدة حاضر، وانت كمان خد بالك وبلاش مذاكرة التليفون دى

ادم: انتى مش بتسترى ابدًا كده

فريدة: هسكت بس هتحكىلى

ادم: اتفقنا

هانى: طيب يلا عشان منتأخرش

طلعوا هانى وادم وركبوا العربية، وسحر ودعتهم زى العادة واول لما رجعت كانت فريدة لسه بتفطر.....

سحر: انتى اجازة النهاردة ولا ايه!؟

فريدة: لا هخلص فطار واطلع البس أهو

سحر: على فكرة أمانى اتصلت بيكى اكتر من مرة، وانتى نايمة وقالت هتتكلم تانى

فريدة: هخلص فطار واكلمها

وجه جرس التليفون قطع كلامهم.... وكانت أمانى هى اللى على التليفون

عبد: ست أمانى على التليفون يا بنتى

فريدة: جاية اهو ياعم عبده ياسكره

فريدة: وحشاني يا موني، عاملة ايه؟!؟

أمانى: انتى اكتر، الحمد لله بكلمك عشان تيجى اسوان

فريدة: اسوان؟! يعنى انتى مختفية وغايبة عنى عشان بتتفسحى

أمانى: لا بتفسح ولا نيلة انا بجهز للفرح اللي جه فجأة ده، وانتى عارفة ان زياد مجنون وماصدق

فريدة: من جهة الجنون فهو ابو الجنان، بس حلوة اوى فكرة الفرحة اللي فى اسوان ده اهو تغيير جو

أمانى: طيب انا محتاسة ومحتجاكى اوى، الفرحة كمان 5 ايام

فريدة: بس كده هروح الشغل واخد اجازة، واجيلك عالطول واهو اغير جو

أمانى: خلاص هستناكى، هتيجى امتى؟!؟

فريدة: هروح الشغل وأخد اجازة وبكره هكون عندك

أمانى: خلاص ماشى، هستناكى على المحطة اول لما توصلى اسوان

فريدة: ماشى يامونى وألف مبروك

قفلت فريدة السكة مع أمانى، وهى فرحانة جدا بالخبر اللي سمعته ده، اخيرا هتشوف صاحبة عمرها عروسة

سحر: خير أمانى كانت عايزة ايه؟!؟

فريدة: كانت بتعزمنى على فرحتها فى اسوان

سحر: فرحتها واسوان؟!؟

فريدة: ايوه ياماما، يااه انا اتأخرت اوى، هطلع البس واروح الشغل ولما ارجع بالليل نتكلم بقى

سحر: هنتكلم مش هتهربى زى كل مرة؟!؟

فريدة: لا مش هتهرب يا ست الكل

طلعت فريدة اوضتها وجهزت نفسها بسرعة ونزلت عشان تروح الشغل... قابلت فريدة عم عثمان البواب

وكان بيفتح البوابة عشان فريدة تطلع عربيتها

فريدة: صباح الفل على عيونك ياسكرة

عثمان: صباح الورد عليكى يا بنتى

فريدة: شكلك تعبان اوى ابقى، خد بالك من نفسك ياعم عثمان

عثمان: خليها على الله يا بنتى

طلعت فريدة من الفيلا وزى العادة خدت الفل من وردة اللي بتقف فى اشارة المرور وبعدها طلعت على الشركة.... وأول لما وصلت وبصت على المكتب اللي قصاد مكتبها وملقنوش قاعد حمدت ربنا واتأكدت انه لسه مجاش

فريدة: اومال فين مستر هاشم!؟

سالى: عنده اجتماع مجلس ادارة، بتسألنى ليه عايزاه فى ايه!؟

فريدة: يخربيت فضولك اللي هيجننك ده، عايزه اجازة

سالى: فريدة واجازة!؟ انتى تعبانة!؟

فريدة: اشمعننى!؟

سالى: اصل من يوم ما شوفتك هنا من سنتين، واشتغلتنى وانتى عمرك ماخدتى اجازة

فريدة: عندى فرح بقى وسفر وكده عقبالك

سالى: يارب يسمع منك، اهو مستر هاشم خلص الاجتماع

فريدة: طيب هسلم انا بقى رسومات المشروع، واقوله على الاجازة

سالى: هتوحشينى والله

فريدة: وانتى كمان يا مجنونة

قابلت فريدة سكرتيرة مستر هاشم واخذت الأذن عشان تقابله..... دخلت السكرتيرة وطلعت بلغت فريدة ان

مستر هاشم مستنيها فى المكتب

هاشم: ازيك يا بشمهندس فريدة

فريدة: الحمد لله يا مستر هاشم

هاشم:كنت فى اجتماع مع شركة العابدين ، وعجبتهم رسومات وديكورات مشروعاتك

فريدة:ده شئ يفرحنى يا فندم، وان شاء الله اكون عند حسن ظن حضرتك

هاشم:انا اللى يشرفنى، ان مهندسة شاطرة وذكية زيك كده جزء من الشركة

فريدة:ده شرف ليا يافندم شكرا

هاشم:خير يا بشمهندسة طلبتى تقابلينى ليه!؟

فريدة:ده المشروع الجديد اللى هيتسلم كمان يومين، وكنت عايزة اجازة اسبوع كده

هاشم:ايه النشاط ده كله!؟ ، اجازة!؟فيه حاجة!؟

فريدة:لا ابدًا فرح صاحبتى الوحيدة، ولازم اكون معاها وهسافر ليها

هاشم:عموما انا مقدرش امنعك، لان شغلك ومشروعك وخلصتيه، اعتبرى نفسك من دلوقت فى اجازة

فريدة:شكرا جدا لحضرتك، عن أذنك

هاشم:اتفضللى

خرجت فريدة من المكتب وسلمت على سالى وبعدها لمت حاجتها ومشيت برا الشركة وركبت العربية
وقررت تروح تستريح وتجهز نفسها للسفر....بعد فترة وصلت فريدة الفيلا.....

ادم:ايه ده راجعة بدرى ليه كده!؟

فريدة:هو انت ليه بتعاملنى انى مش انسانة، ومن حقى ارتاح لما اتعب!؟

ادم:انتى كويسة اجييلك دكتور!؟

فريدة:لا انا تمام محتاجة ارتاح شوية بس، وهشوفك على الغداء ونتكلم

ادم:ماشى يا ديدا

طلعت فريدة على اوضتها وفضلت تقرأ زى العادة لحد ما عينها راحت فى النوم....وصحيت على صوت
دادة سميحة كالعادة بس المرة دى ردت عليها عالطول ونزلت من غير ما تتأخر.....

هانى: مصدقتش نفسى وادم بيقولى انك رجعتى، بدرى خير يافرى؟

فريدة: قولت اريح نفسى شوية يا هنوش، وادلعها كده قبل السفر

سحر: سفر ايه!؟

فريدة: انتى نسيتى يا سحورة، انا هسافر عشان أمانى محتجاني اوى وبتجهز لفرحها، فلازم اسافر اسوان

سحر: تسافرى ازاي ولوحديك!؟ خدى ادم معاكى

ادم: هو انا شنطة هتاخدها فى ايديها، انا عندي كليه ومحاضرات ياماما

فريدة: هو انا عيلة صغيرة ياماما ايه المشكلة لو سافرت لوحدي!؟

هانى: مفيش مشكلة يا حبيبتي سافرى واهى فرصة تغيرى جو، ادم بعد الغداء روح وهات تذكرة القطر
لأختك ولا تحبى تسافرى طيران؟

فريدة: لا طيارة ايه انا بخاف من الطيران حلو اوى القطر

ادم: حاضر بعد الغداء هروح عالطول

سحر: خلاص، اعملوا اللي انتوا عايزينه

فريدة: ماما انا محتاجة فعلا اغير جو، ودى الفرصة المناسبة

سحر: خلاص يافريدة سافرى بس ابقى طميننى عليكى، وخدى بالك من نفسك

فريدة: حاضر، انا هطلع اجهز الشنطة بقى

ادم: وانا هروح اجيب التذكرة

طلعت فريدة اوضتها ومشى ادم ودخل هانى مكتبه ودخلت سحر وراه

سحر: انت ليه وافقت انها تسافر!؟

هانى: فريدة محتاجة تبعد وتبعد مع نفسها وترتب افكارها من جديد

سحر: انا حاسة انها بتضيع مننا، من يوم اللي حصل وهى لا بتأكل ولا بتضحك زى الاول.... عايشة بس
روحها مش معنا

هانى:كان صعب اللى حصل معاها، بس اكيد هتفوق وهترجع مع الوقت

سحر:انا لازم افرح بيها واكلمها فى موضوع العريس اللى متقدم لها، يمكن ربنا يهديها وتوافق

هانى:زى ماتحبنى، انا نفسى افرح بيها اكتر منك

سحر:انا هطلع اتكلم معاها بقى

طلعت سحر لأوضة فريده اللى كانت بتحضر شنطتها عشان تسافر

سحر:اساعدك فى حاجة يا حبيبتي!؟

فريده:لا انا خلاص قربت اخلص اهو

سحر:هنتأخرى هناك!؟

فريده:لا هما كام يوم كده وهاجى، فرحانه اوى انى هشوف مونى عروسة أخيرا

سحر:عقبالك يا فرى وتكونى احلى عروسة

فريده:مش وقته يا ماما

سحر:اومال امتى وقته!؟يا بنتى انتى بتوجعى قلبى عليكى، وانا عايزة اطمن

فريده:اطمنى انا بخير، وواقفة قدامك كويسة اهو

سحر:لا مش كويسة، مش عايزاكى تكونى لوحدا، ملكيش ضهر وتحسى بالوحدة

فريده:لا ليا ضهر انتوا سندی وعزوتى، انا لما اكون جاهزة للجواز هقولك لكن انا مش مستعدة

سحر:يا بنتى فات وقت كتير واكيد الجرح خف خلاص

فريده:بس فيه جروح بتسيينا مشوهين، وكل لما نبص فى المراية نشوف جرحنا

سحر:وهتفضلى تضيعى من ايديك الفرص دى، عشان غلطة

فريده:مهو احنا لازم نتعلم من الغلطة دى ومنكرر هاش تانى، صدقيني ياماما لما اخف واكون كويسة

هاجى واقولك انى جاهزة ارتبط

سحر:طيب مش تتعرفى عليه يمكن يطلع كويس!؟

فريدة:ملوش لزوم لأنى رافضة الفكرة، وهرفضه حتى لو كويس، خلينى لما ارتاح عشان احكم صح

سحر:زى ما تحبى

فريدة:انا كويسة طول ما انتوا حواليا، بلاش قلق بقى

سحر:هفضل اقلق واخاف عليكى لحد ماتتجوزى

وصل ادم فى اللحظة دى وقطع كلامهم.....

ادم:انا جبت التذكرة يا ديدا اهو

سحر:مش تخبط على الباب بدل ما تدخل كده

ادم:اسف ياسحورة مش قصدى

سحر:ماشى يا حبابيى هروح انام انا

فريدة:تصبحى على خير

ادم:تصبحى على خير يا ماما

مشيت سحر عشان تنام وفضل ادم مع فريدة فى اوضتها

ادم:التذكرة اهى يا ديدا،متنسيش الهدايا بقى

فريدة:يا ساتر طول عمرك كده مادى

ادم:اموت انا فى الماديات

فريدة:طيب هات التذكرة واطلع بقى عشان انام، وروح ركز فى تليفوناتك بقى

ادم:اه صح هروح، ونتكلم الصبح بقى

فريدة:تصبح على خير يا حبيبيى

طلع ادم من الاوضة وفضلت فريدة تفكر فى كلام مامتها....ووقفت بصت فى المرايه

فريدة(بتكلم نفسها):ازاى هبدأ حياتى وانا لسه جوايا من القديم، ازاى هبدأ وانا عيونى لسه مليانة دموع

والضحكة واللمعة اللى فيها اختفوا، ازاى هبدأ وانا قلبى نسى يضحك

تعبت فريدة من التفكير مسكت كتاب تقرأه لحد مانامت....وصحيت على كابوسها المعتاد....بصت فى الساعة كان فاضل ساعتين على معاد سافرها...صليت وقعدت تقرأ قرآن....وسمعت صوت خبط الباب

دادة سميحة:صباح الخير يا حبيبتي، يلا البسى وانزلى عشان تفطرى قبل ماتسافرى

فريدة:حاضر يادادة هجهز اهو،بابا وماما وادم صحيو؟

سميحة:ايوه وشوية وهينزلوا للفطار

طلعت سميحة من الاوضة وجهزت فريدة نفسها واخذت شنطتها وهى نازلة قابلت ادم نازل من اوضته

فريدة:صباح النشاط، صاحى بدرى يعنى؟

ادم:صباح الفل، طبعا هشتغللك سواق واوصلك للمحطة

فريدة:لا كده كتير اوى يا دكتور ادم

ادم:لا دكتور ايه بقى قولى اسطا، هاتى الشنطة دى بقى اشيلهالك

فريدة:وانت كده هتخرجنى، خد شيل

نزلوا وكان هانى وسحر بيפטروا وصبحوا عليهم وقعدوا يفطروا وبعد الفطار....جه وقت السفر

ادم:يلا بقى عشان متأخرش!؟

سحر:يا رخم انت سيبها شوية

فريدة:يلا يا دكتور، هتوحشيني اوى يا ماما انتى وبابا

هانى:خدى بالك من نفسك يا حبيبتي

سحر:هبقى اكلمك كل يوم، ربنا معاكى

فريدة:خدوا بالكوا من نفسكوا، هتوحشونى كلكوا اوى

ادم:طيب انا هطلع الشنطة للعربية، واستناكى هناك

فريدة:طيب وانا جاية وراك اهو

ودعت فريدة الكل ومنهم دادة سميحة وعم عبده وطلعت ركبت العربية....وهما خارجين من البوابة ودعت
عم عثمان

ادم:عايزك تستمتعي اسوان حلوة اوى

فريدة:وانا عايزاك تاخد بالك من بابا وماما ومنها

ادم:منها! قصدك مين!؟

فريدة:اللى مشغول بيها، ويتسهر ترغى معاها فى الموبايل

ادم:طيب ليه الاحراج ده بقى؟

فريدة:هو الحب احراج!؟ بس اوعى فى يوم توجعها، اوعى تخليها تندم انها حبتك، من الاخر كده حب لما
تقدر تشيل مسؤولية القلب اللى قدامك ده

ادم:متخافيش يا ديدا فى عنيا والله

فريدة:انا مش خايفة لانى شايفة فى عينك الحب ده، ووثاقة انك تهترمها

ادم:انا بحبك اوى يا ديدا

فريدة:وانا بموت فيك يا صغنن انت

وصلوا للمحطة ووصلها ادم للقطر اللى هتركبه وودعها ومشى....قعدت فريدة وطلعت كتاب وفضلت
تقرأ وفجأة سمعت صوته.....بصت ولقتها قدامها بيقول...

حسن:اهلا يا بشمهندس فريدة

فريدة:اهلا يا بشمهندس

حسن:مبسوط اوى بالصدفة دى

فريدة:(بتكلم نفسها)صدفة منيلة هو احنا بنطيق بعض فى الشغل، عشان استحمل الصدفة دى، ده انا
حمدت ربنا انك مكنتش موجود على مكتبك النهاردة

حسن:ايه روحتى فين!؟

فريدة:لا ابدأ صدفة سعيدة اوى

حسن: هو انتى رايحة اسوان تعملى ايه!؟

فريدة: رايحة ازور ناس صحابى

وفجأة القطر بدأ يتحرك.... وفريدة عشان تتجنب اى كلام ممكن يحصل طلعت كتاب تقرأ عشان تشغل نفسها.... اصل از اى هتستعمله طول الرحلة وهى مش بتطبيقه اصلا كز ميل ليها فى الشغل؟ وفى الحقيقة هى مش عارفة ايه السبب على الرغم انها متعاملتش معاه قبل كده خالص... واى كلام بينهم كان فى الشغل انها خريجة فنون جميلة ومهندسة دكتور وهو مهندس معمارى.... وفجأة بدأ حسن يتكلم معاها

حسن: ممكن افتح الشباك!؟

فريدة: اتفضل

حسن: قد ايه المنظر جميل اوى، واسوان بلد حلوة اوى، روحتيها قبل كده!؟

فريدة: الحقيقة اول مرة، وممكن بعد اذنك شوية هدوء عشان اعرف اقرأ

سكت حسن وركزت فريدة فى القراءة وفضل القطر يتحرك.... لكن رن موبايل حسن وقطع السكوت ده

حسن: الو ازيك يا يوسف، ها طمنى عملت ايه!؟

سكت حسن وكأنه بيسمع كلام يوسف ومرة واحد صرخ فيه.....

حسن: انت مجنون يعنى ايه مش مناسبة، يعنى عشان هى طريقة لبسها مش على مزاجك تبقى مش مناسبة، يعنى ايه يا بنى منقبة وايه المشكلة!؟ ده مش عيب فيها دى ميزة وفخر لأى بنت، يا بنى افهم المهم تفكيرها وعقلها وروحها مش شكلها

فضل حسن يقنع يوسف ويقول كلام كثير.... بس الغريب ان فريدة كانت مركزة مع كل كلمة بيقولها حسن ليوسف وبعد ما خلص مكالمته.... بصت ليه بأستغراب لدرجة ان حسن حس بده

حسن: فيه حاجة غلط انا قولتها!؟

فريدة: بالعكس انا مستغربة من طريقة تفكيرك يعنى مش باين عليك، او بمعنى اصح اللى بيفكر زيك كده قليلىن اوى، بس السؤال هنا انت مقتنع بالكلام ده ولا بتقوله كده تأدية واجب!؟

حسن: انا مقتنع بكل كلمة قولتها، الحب مش بالمظهر والشكل، ولو هنفضل نحب بالشكل يبقى مش هنحب ابدأ، لان مفيش حد كامل وبعدين ممكن نستحمل حد شكله مقبول بس بيفهمنا وحاسس بينا وروحه نقدر نعيش معاها، ولا انتى ايه رأيك!؟

فريدة: الجمال بيروح كل ما بنكبر ونعجز، لكن الروح بتفضل طفلة وصغيرة دايما

حسن: وايه المشكلة لما تكون منقبة، هو ده هيعزلها عن الحياة!؟

فريدة: بالعكس انت عارف ان فيه منقبات عايشين حياتهم وفاهمين الدنيا صح، صاحبك ده فكرنى بحكاية اعرفها (المتدينة والجاهل)

حسن: ممكن اعرف الحكاية!؟ لو مش هيضايقك يعنى

فريدة: بالعكس وممكن تحكيها لصاحبك

يتعلم منها حاجة ويعرف يختار صح

حسن: طيب اتفضللى احكى

(المتدينة والجاهل)

فى حى السيدة زينب.... فى حارة شعبية فى بيت الحاج عبد المنعم.... رجع الحاج عبد المنعم من صلاة
الفجر هو وابنه نوح وكانت مريم كالعادة خلصت الصلاة وقعدت تقرأ قرآن.....

عبد المنعم: كمان شوية يا دكتور نوح تنزل بقى تجبلنا الفول من عمك حسين

نوح: حاضر يا حاج

طلعت مريم من اوضتها لما سمعت صوت ابوها واخوها برا.....

مريم: صباح الخير يا حاج

عبد المنعم: صباح الخير يا بنتى

نوح: صباح الخير يا مس مريم

مريم: صباح الخير يا دكتور، وايه مس دى هو انت تلميذ عندى

نوح: هو انا اطول المدرسة بتاعتى تطلع حلوة كده

مريم: طيب يلا انزل هات الفول وانا هحضر باقى الفطار

عبد المنعم: ربنا يخليكوا لبعض

نزل نوح يجيب الفول ودخلت مريم تحضر الفطار..... من وقت ما ماتت امها وهى مسؤلة عن البيت كله
فهى الأم والبنت والأخت..... بعد فترة رجع نوح ومعه الفول وكانت مريم بتخلص الفطار.... وجهزت كل
حاجة وفطروا وجه الوقت كله يروح شغله.... الحاج منعم موظف فى الكهرباء ونوح على المستشفى
ومريم على المدرسة....

نوح: يلا يا مريم البسى عشان اخذك معايا فى طريقى

مريم: ثوانى وهجهز.....

دخلت م اوضتها وبعد عشر دقائق خرجت.... اصلها معندهاش وقت تختار هتلبس ايه والجو عامل ازاي وايه اللبس اللي هيليق عليها؟! لانها بتلبس نقاب صيف شتاء هو النقاب ومبسوطة جدا بالنقاب ده والحقيقة انها كانت حورية وجمالها لازم يتخبى عن الكل لانه يسحر اى حد فعلا.....

مريم: يلا عشان عندي الحصة الاولى

نوح: يلا انا جهزت اهو

نزلوا من البيت..... وركبوا تاكس ووصلت مريم للمدرسة فى معادها كالعادة

سعاد: صباح الخير يا مس مريم

مريم: صباح النور يا مس سعاد

سعاد: عرفتى ان مدام ميرفت المديرية فصلت البنت روان، عشان مدفعتش المصاريف ودى كانت اخر فرصة ليها

مريم: لا حول ولا قوة الا بالله، يعنى عشان شوية فلوس نحرم طفلة من تعليمها ونضيع مستقبلها وهى متفوقة

سعاد: ربنا يتولاها بقى

فكرت مريم تتكلم مع مدام ميرفت وتقنعها تدى روان فرصة تانية..... وصلت مريم لمكتب المديرية وخطبت ودخلت.....

ميرفت: اهلا يا مس مريم، ازيك!؟

مريم: الحمد لله، كنت عايزة اتكلم مع حضرتك شوية

ميرفت: بخصوص ايه!؟

مريم: بخصوص روان، ازاي نضيع مستقبلها و حضرتك عارفة انها بتطلع الاولى كل سنة على المدرسة!؟

ميرفت: دى قوانين ولوائح وانا مقدرش اخالفها

مريم: مقولتش حضرتك تخالفها، بس نديها فرصة تانية وخصوصا عشان ظروفها

ميرفت: انا مليش دعوة بظروف حد، ومش ذنبى انها فقيرة

مريم: عمر ما الفقر كان عيب، بس حضرتك عارفة ان والدها متوفى ووالدتها خياطة وعندها اخوات كتير ومن واجبنا نساعدنا

ميرفت: محدش قالهم يدخلوها مدرسة خاصة يحولوا ورقها لمدرسة حكومية

مريم: حضرتك عارفة ان قبل وفاة والدها كانت قادرة تدفع المصاريف لكن دلوقتى لا، ليه نضيع مستقبلها ده بدل ما نشجعها تكون حاجة تنفع المجتمع لكن كده نشجعها تكون فاسدة، ونرجع نسأل مين كان السبب فاللى حصلها!؟

ميرفت: انتى جاية تدينى دروس فى الاخلاق

مريم: لا العفو، وعموما تقدرى تخصصى من مرتبى مصاريف روان

ميرفت: زى ماتحبى، مع ان كده مش هتاخدى مرتب شهرين قدام

مريم: مش مهم انا راضيه بده

خرجت مريم من مكتب المديرية وراحت الفصل لروان.....وصلت الفصل وكان عندهم حصه لمستر على مدرس العربى

مريم: صباح الخير

على: صباح النور يا مس مريم

مريم: ممكن روان فى كلمة يا مستر على

على: اتفضلى طبعاً، تعالى يا روان

مريم: روان ممكن تمسحى دموعك

روان: بس مس ميرفت قالتلى امشى، ومش هاجى هنا يعنى مش هكون دكتورة

مريم: لا مفيش الكلام ده خالص، مفيش حد هيمنعك من المدرسة، وهتطلعى دكتورة زى ما كان بابا الله يرحمه عايز

روان: بس الفلوس مش معايا، وماما مش معاها دلوقت

مريم: احنا مش صحاب انا دفعت الفلوس، المهم دلوقتي تركزي فى دراستك، وتطلعي دكتورة ومع اول مرتب تاخديه ليا هدية منه

روان: انا بحبك اوى يا مس مريم

مريم: وانا كمان اوى، ودلوقتي بقى امسحى دموعك دى، وادخلي على الحصه

روان: حاضر يا مس

دخلت روان الحصه ومستتر على معجب جدا من موقف مريم الانساني مع روان... فى الحقيقه مش بس مع روان لكن مع كل حد يحتاج مساعدة.... مريم مش بتتأخر عنه

انتهى اليوم الدراسى وجه وقت الخروج، لكن قبل خروج مريم وقفت معاها سعاد تتكلم عن موقفها واللى عملته مع مس ميرفت بسبب روان

سعاد: انتى ملاك يا مريم فعلا

مريم: لا انا بشر، بس بحس بالناس وبقدر الظروف

سعاد: ربنا يجازيكى خير

مريم: ويجازيكى خير

فجأة قطع كلامهم صوت مستتر على.....

على: مس مريم ممكن كلمه

سعاد: طيب همشى انا يا مريم

مريم: خير يا مستتر على

على: كنت عايز اشكرك على موقفك مع روان

مريم: ده الواجب اللى كان لازم يتعمل

على: انتى انسانه متدينه ومحترمه جدا وعلى خلق بس.....

مريم: شكرا لحضرتك، بس ايه!؟

على:مش عارف انتى ازاي صديقة لسعاد دى؟!؟

مريم:وايه المشكلة!؟

على:اصلها مش زيك خالص انتى حاجة وهى حاجة تانية.....يعنى شكلها ولبسها

مريم:هو لازم كل صاحبنا يكونوا شكلنا، لبسنا واحد وتفكيرنا واحد، لا طبعا الاختلاف ضرورى ولازم نكمل بعض ونصلح من بعض كمان، وعلى فكرة سعاد طيبة وملتزمة جدا، هى الحكاية مش باللبس لكن الدين فى القلوب

على:عندك حق يا مس مريم

مريم:طيب عند اذن حضرتك لازم امشى

على:مس مريم ممكن اجيب اهلى ونيجى زيارة عندكوا البيت، بصراحة من يوم ماجيتى المدرسة هنا وانا كل يوم اعجابى بشخصيتك بيزيد وكمان تدينك واحترامك، يعنى لو مفيش مانع انا حابب ارتبط بيكى مريم:انت كمان يا استاذ على انسان متدين، وعلى خلق واى واحدة تتمناك، ان شاء الله هحدد معاد مع بابا وابلغك بيه

على:ده شئ يسعدنى، وارجوكى بلغينى عايطول بمعاد الزيارة

مريم:ان شاء الله

مشيت مريم وهى بتفكر فى كلام على زميلها فى المدرسة وانها متعرفش عنه حاجة غير انه زميل محترم ومتدين والكل بيشكر فى اخلاقه وفى عيلته الكبيرة...فضلت تفكر لحد ماتعبت من المشى وركبت تاكسى....بعد شوية وصلت البيت وجهزت الغداء.....وبعد الغداء طلع عبدالمنعم هو ونوح فى البلكونة يشربوا الشاي.....

مريم:بابا كنت عايزة اتكلم مع حضرتك

عبدالمنعم:خير يا بنتى

مريم:فيه زميل ليا فى الشغل كان عايز حضرتك تحدد ليه معاد يجى يزورنا

نوح:طيب نقول مبروك يا حاج

مريم:نوح احترم نفسك

عبدالمنعم:سيبى اخوكى فرحان بيكى، اخيرا يا بنتى هنفرح بيكى، قوليله يجى الخميس الجاى يا بنتى

مريم:حاضر يا بابا

بعد الغداء جه وقت درس القرآن اللى بتديه مريم للولاد وبعده دروس محو الاميه....وبعد ما خلصت مريم كل الدروس زى العادة دخلت اوضتها عشان تنام....لكن فجأة سمعت صوت خبط على باب الاوضة

مريم:مين!؟

نوح:انا ممكن ادخل

مريم:طبعاً اتفضل

دخل نوح وكان فى عينه علامات الاستغراب

مريم:فيه ايه؟!نظرتك وراها حاجة

نوح:كبرتى يا مريم، و غيران من اللى هياخد امى واختى منى

مريم:نوح انت مش بس ابنى واخويا، انت صاحبى وسندى ومفيش حد هياخد مكانك، ولا هيشغلنى عنك مهما كان

نوح:بتحبيه!؟

مريم:انا معروفش كل اللى اعرفه عنه اللى اى زميل وزميلة فى المدرسة يعرفوه، بس تقدر تقول بحترمه وبرتاح ليه

نوح:ربنا يسعدك يارب

مريم:ربنا يخليك ليا

نوح:هسيبك تنامى بقى، تصبى على خير

خرج نوح من الاوضة ونامت مريم وجه الصبح وعدى زى كل صبح عليهم وجهزت نفسها للمدرسة وقررت تبلغ على بالمعاد

وكالعادة وصلها نوح للمدرسة....وفى الفسحة بلغت مريم المعاد لعلى

مريم:استاذ على بابا حدد المعاد على الخميس الجاى يناسبك!؟

على:يناسبني جدا، ان شاء الله هجيب الحاج والحاجة ونيجي

مريم:طيب اتفضل دى ورقة فيها العنوان

على:متشكر جدا

ودعت مريم على ومشيت للبيت....وصلت مريم وحكت لوالدها اللي حصل وبدأوا يجهزوا أنفسهم والبيت
عشان الضيوف

يوم الخميس....فى بيت الحاج عبدالمنعم

عبدالمنعم:البيت منور والله

متولى:منور بصحابه يا حاج ابنى على شكر فى حضرتكوا كتير

سنية:وشكر فى اخلاق مريم وتربيتها، اومال هى فين!؟

عبدالمنعم:نوح روح شوف مريم

نوح:حاضر يا بابا

متولى:انت مجبتش غير مريم ونوح!؟

عبدالمنعم:ايوه مفيش غيرهم، من يوم ما امهم الله يرحمها ماتت، ومريم قامت بكل مسؤوليات البيت

سنية:يعنى ست بيت شاطرة

عبدالمنعم:طبعاً

متولى:ونعمة التربية والله حضرتك عرفت تربى، مريم مدرسة ونوح دكتور قد الدنيا

قطع كلامهم دخول نوح مع مريم اللي كانت شايلة صنية شربات...قدمت مريم الشربات للكل وقعدوا

يتكلموا ويتعرفوا اكثر وبعد النقاش اللي انتهى بالموافقة

عبدالمنعم:على بركة الله نعمل خطوبة الاسبوع الجاى

متولى:الشرف لينا، ومن النهاردة مريم بقت بنتنا

انتهى التعارف وكان فيه انسجام بين العيلتين، واطمن اكثر عبدالمنعم لما سمع ان سمعة العيلة طيبة ومن اصل طيب،خلص اليوم وعدت الايام بسرعة وكل من العيلتين يجهز للخطوبة وجه يوم الخطوبة

فى الخطوبة...الزينة والاغانى فى بيت عبدالمنعم والكل بيبارك للعرايس.....وفى نهاية السهرة وقبل ما يروح على قرر ياخذ رقم مريم عشان يتعرفوا على بعض ويتكلموا اكثر....وفعلا مر شهر وبدأوا كل واحد يتعرف على التانى وبينوا الاحلام وكان كل واحد فيهم بيتشد للتانى عن اليوم اللى قبله وكأن كل واحد لقى نصه التانى وجه وقت اول خروجة بينهم...وكان اختيار المكان على ذوق مريم....وكان المفروض على يفوت عليها...وفى بيت عبدالمنعم

عبدالمنعم:اهلا يا على يا بنى

على:ازيك يا عمى وازاى صحتك!؟

عبدالمنعم:الحمد لله يا بنى

على:او مال فين مريم!؟

عبدالمنعم:بتجهز نفسها وجاية، انا هقوم اعملك كوباية شاي

على:لا مفيش داعى يا عمى، انا هاخذ مريم ونخرج شوية،ده بعد اذن حضرتك

عبدالمنعم:اكيد يا بنى اتفضل

فضل عبدالمنعم و على يتكلموا لحد ما طلعت مريم واخدها على ومشىوا.....وفى الطريق

على:هنروح فين!؟

مريم:مكان بحبه اوى، هو صفهولك

فضلت مريم توصف المكان وتقوله يدخل يمين ولا شمال، وهو بيسوق فى الاتجاه اللى بتقوله عليه وفجأة...

مريم:بس هنا وصلنا

على:فين!؟

مريم:اهو المكان اهو

على: ده كافيه يا مريم

مريم: ايوه وايه يعنى، يلا بينا ندخل

دخلوا وقعدوا على التربييزة وبعد شوية جه جرسون عشان يأخذ الاوردر.....وبعد ماطلبوا الاوردر

على: عرفتى المكان ده منين!؟

مريم: حلو مش كده!؟ بحب اجيه انا ونوح اوى، وقولت اشاركك الحاجة اللى بحبها

على: غريبة اوى مكنتش اعرف انك كده

مريم: كده ازاي يعنى!؟

على: يعنى انك متدينة، ومش بتحبي الخروج ولا تعرفى الاماكن دى

مريم: هو عشان متدينة اتحبس يعنى، بالعكس التدين والدين والنقاب مش بيمنعوا عن الحياة وجمالها بالعكس بيعرفوك تستمتع بالحياة بشكل سليم، وفى الاول والاخر كلنا بشر، وبحب الحياة اوى وكمان المكان كويس ومحترم

على: انا مش قصدى حاجة، انا بس استغربت

مريم: لا متقلش انا عايشة حياتى كويس، وبالطريقة المناسبة ليا، والنقاب مش حابسنى ولا مقيد حريتى وفجأة قطع كلامهم صوت واحدة لابسة جيبية قصيرة وضيقة جدا وعليها قميص شفاف.....

البنات: هاى مش انت عادل بتاع الفيس!؟

على: عادل مين!؟ اكيد حضرتك غلطانة انا معرفش حد بالاسم ده

البنات: سوري بس انت شبه صورته اوى، بس من غير الدقن دى وكمان اللبس مختلف، اسفة على سوء التفاهم ده

على: ولا يهمك حصل خير

البنات: فرصة سعيدة، باى

على: غريبة اوى الناس من النوع ده، فيس ايه وكلام فارغ ايه،! عن اذنك هروح الحمام

مريم: اتفضل

مشى على وساب مريم بتفكر فى شكل البنت اللى شافتها ولبسها وكلامها، وازاى اتغير شكل على وارتبك اول لما شافها، وحتى بعد لما مشيت فضل متلغبط والعرق بينزل منه، وكأنهم يعرفوا بعض فعلا....

على: اتأخرت عليكى انا اسف

مريم: لا ابدأ ولا يهملك، ممكن نروح عشان اتأخرت

على: حاضر، ثوانى بس الحساب

خرجوا من الكافيه وطول الطريق مريم متكلمتش ولا كلمة غير وهى بتودعه

على: خدى بالك من نفسك، اشوفك الصبح فى المدرسة

مريم: ان شاء الله مع السلامة

طلعت مريم البيت وكان والدها نايم ونوح فى اوضته... فاستغلت الفرصة ودخلت اوضتها وفضلت تفكر فاللى حصل والكلام اللى البنت قالتة... وياترى تعرفه فعلا... دخل نوح الاوضة عليها وكانت باصة للسقف وبتفكر وهو قطع تفكيرها....

نوح: الجميل سرحان فى ايه!؟

مريم: ولا حاجة يا حبيبى

نوح: هنخبى من اولها بقى، مش احنا صحاب فيه ايه!؟

حكى مريم الكلام اللى حصل بينها وبين على وحتى كلام البنت ورد فعل على

نوح: مش يمكن توتر وعشان كده ارتبك، عشان متعاملش مع اى واحدة قبل كده

مريم: اتمنى ده، بس ردة فعله كانت مختلفة وعينه كان جواها زى تحذير للبنت، بس يمكن انا اللى مكبرة الموضوع بقى

نوح: عموما اطمنى وسيبى الموضوع عليا، وانا هتصرف واول لما اوصل لحاجة هبلغك

مريم: ماشى يا حبيبى ربنا ميحرمناش منك

نوح: دلوقتى نامى وبطلت تفكير، وانا فى ضهرك دايم

خرج نوح وحاولت تنام مريم لكنها فشلت، فقامت اتوضت عشان تصلى وتقرأ قرآن

عدت شهور والوضع زى ماهو والأيام بتتكرر المدرسة الصبح وبعدها البيت ومكالمات على او خروجة كل فين وفيين، ومهما حاولت تبعد الظن عنها بس احساسها ان فيه حاجة غلط موجود جواها....وفى يوم رجعت مريم من المدرسة منهاره، واتأكدت ان والدها واخوها لسه برا ودخلت اوضتها وفضلت تعيط...ومن كتر الانهيار والعياط مأخذتش بالها ان نوح رجع من برا وانه سمعها....دخل الاوضة لقاها منهاره....

نوح:مريم فيكى ايه!؟

هنا مريم اترمت فى حضنه وانهارت اكثر

نوح:مممكن اعرف فيه ايه!؟طيب اهدى انا وعدتك طول ما انا جنبك مفيش حاجة هتزعلك ابداء، ممكن تمسحى دموعك وتتكلم بقى وتحكىلى حصل ايه!؟
مريم:على....

نوح:ماله زعلك!؟عملك حاجة!؟

بدأت تهدأ مريم وتحكيه على اللى حصل...

مريم:انا روحت المدرسة النهاردة واستغربت ان روان مش موجوده وانت عارف انها مش بتغيب وبتخاف على مستقبلها اوى، ولما سألت تسنيم صاحبته عرفت انها تعبانه اوى....

سعاد:مريم عرفتى ان روان تعبانه اوى!؟

مريم:ايوه لسه عارفة،متعرفيش عنوانها

سعاد:اعرفه تحبى نزورها!؟

مريم:يا ريت واهو نطمئن عليها

سعاد:خلاص بعد المدرسة نروحها

مريم:خلص اليوم الدراسى وروحنا انا وسعاد جنبنا شيكولاته وركبنا تاكسى، ووصلنا عند بيت روان، زورناها واطمنا عليها وواحنا نازلين، شوفت من الجهة الثانية للشارع واحد شبه على ومعاها واحدة وايديهم فى إيد بعض وداخلين كافيه

نوح:طيب انتى بتقولى شبيهه، مش يمكن مش هو!؟

مريم:انت عارف ان شكله متغير حاجات بسيطة اوى، زى ما البنات الللى قابلناها اول خروجه لينا فى الكافيه وصفته، وقالت انها بتكلمه على الفيس

نوح:طيب انا هتأكد من الموضوع ده ولحد ما نتأكد بلاش نضلّمه، يلا بقى اغسلى وشك قبل ما بابا يجى عشان ميقلّش

مريم:ماشى يا نوح

عدت فترة وبدأت مريم تغير تعاملها مع على وهو حس بالموضوع ده.....

على:مريم ممكن اعرف فيه ايه مغيرك كده!؟

مريم:حصل حاجات كتيرة كده عايزة اتكلم معاك فيها، ممكن نتقابل النهاردة

على:طبعاً، خلاص هفوت عليكى بعد العشاء نخرج شوية

روح مريم وطول الطريق بتفكر ازاي هتقوله انها كانت بتشكّل فيه وانه مظلوم لانها مش لاقية دليل وبكده فهو برئ وكل تفكيرها مجرد هواجس مش اكثر.....وصلت البيت وكان نوح مستنيها.....

نوح:كويس انك جيتى، عايزك فى حاجة مهمة!؟

مريم:انا اللى عايزاك، انا هتكلم مع على واقوله انى ظالمته لما شكيت فيه

نوح:انتى متأكدة انك ظلماه وانه برئ

مريم:قصدك ايه!؟

وقبل ماينطق نوح قطع كلامهم عبدالمنعم..

عبدالمنعم:يا ولاد تعالوا هنا

مريم:خير يا بابا

عبدالمنعم:الست ام على تعبانة ولازم نروح نزورها ونطمّن عليها

مريم:طبعاً واحب يا بابا، انا هلبس ونروح

عبدالمنعم: وانا هنزل اشترى شوية حاجات، عشان ميصحش ندخل عليهم بأيدينا فاضية

بعد شوية جهزت مريم ونوح وكان عبدالمنعم اشترى الحاجة وركبوا تاكس وراحوا على بيت متولى.... فى بيت متولى

متولى: اهلا وسهلا نورتوا، مكنش فيه داعى لتعبكوا والله

عبدالمنعم: لا ازاي احنا اهل يا استاذ متولى

متولى: طبعا يا حاج عن اذنكوا هشوف الحاجة وهاجى

وقبل مايدخل الاوضة طلب من هنية الشغالة عندهم تعمل عصير للضيوف... فى الوقت ده طلع على من اوضته يسلم على الضيوف....

على: اهلا وسهلا شرفتوا

عبدالمنعم: ازيك يا بنى عامل ايه!؟

على: الحمد لله بخير، ازيك يا مريم وازيك يا نوح!؟

نوح: الحمد لله بخير

مريم: الحمد لله الف سلامة على طنط

على: الله يسلمكوا

وفجأة قطع كلامهم وصول هنية بالعصير...

على: اتفضلوا العصير

مريم: تسلم ايديك

شاورت ليها هنية بحركات غير مفهومة...

على: معلى اصلها مش بتتكلم، اقدملكوا هنية بنت البواب

مريم: الله اسمك جميل اوى، خدى الشيكولاته دى هتعجبك اوى

ابتسمت هنيه ومشيت....بس فى عينها كلام كثير....بعد ما اطمنوا على والدة على وانها بخير وقضوا وقت معاهم....

عبدالمنعم:طيب نستاذن بقى عشان ترتاحوا

متولى:لسه بدرى

عبدالمنعم:معلش ان شاء الله نيجى مرة تانية

متولى:طيب يا على انزل طلع العربية من الجراج عشان توصلهم

على:حاضر يا بابا

وهما ماشيين سلمت مريم على الكل ومن ضمنهم هنية وهنية المسكينة شاورت بحركات غير مفهومة لمريم وكأنها بتحذر ها من على....بس مريم ملحقتش تفهم حاجة

وصلهم على ودخلت مريم اوضتها وبدأت هواجس التفكير تشتغل تانى....شاف نور اوضتها نوح فقرر يدخل يتكلم معاها....

نوح:انتى لسه صاحية!؟

مريم:اه شوفت هنية النهاردة واحنا ماشيين كانت بتشاور ليا، وبتحذرنى من على وكأنها تعرف حاجة عنه

نوح:ما يمكن بتحذرك عشان عرفت عنه حاجة

مريم:قصدك ايه!؟

نوح:قصدى انك مش هينفع تكلمى مع على

مريم:انت بتقول ايه!؟

نوح:الى سمعته، على ده انسان مش كويس، انا لما قولتلى على حكاية البنت والكافيه قولت عادى اتلغبطت، بس بدأت ادور ولما قولتلى انك شوفتى حد شبه مع بنت فى الكافيه، انا روحته وشوفت حد شبه مع بنت، وفضلت اراقب البنت دى لحد ما بقت لوحدها، واثأكدت منها انه على، وانه اعترف ليها بده وهو سكران، وعامل اكونت على الفيس بأسم غير اسمه، ويعرف بنات عليه واكثر من كده كمان

مريم:مستحيل ده يحصل

نوح: لو مش مصدقانى اتفضلنى شوفى بعيونك الصور دى، والكلام اللى بينهم عشان تعرفى انه بيغشكوا
بوش الواحد المتدين صاحب الخلق والمبادئ

مريم: انا لازم اعرف هنية عارفة ايه، وبتحذرنى ليه!؟

نوح: وهنعمل ايه دلوقت!؟

مريم: اقابل هنية وبعدها اقولك هنعمل ايه

وتانى يوم الصبح اخدت مريم اذن من المدرسة بأنها تعبانة شوية... وقالت لسعاد تقول للمديرة وقررت
تروح هى ونوح تتكلم مع هنية... نزلت مريم ونوح ووصلوا لبيت على... واستنوه لما نزل هو ووالده
وعالطول راحوا خبطوا على اوضة البواب ابو هنية....

عم سيد: حضرتكوا مين!؟

مريم: انا عايزة هنية فى موضوع يا حاج، انا من جمعية النور وجايه اعرف اكتر عن حالتها، ممكن
نشوفها

دخل عم سيد ينادى على هنية وبعد شوية طلعت هنية من الاوضة....

مريم: ازيك يا هنية!؟ انا كنت جاية عايزة اعرف ليه كنتى بتحذرينى من على!؟

هنية: (بتشاور على ابوها اللى جوه)

مريم: متخافيش احنا قولنا له اننا من جمعية، عشان لو حد سألته ونبعد عنك المشاكل متخافيش

نوح: احنا عايزين نعرف انتى تعرفى ايه عنه!؟

فضلت هنية تشاور وتحكى وفى الاخر قالتلهم يجبوش سيرة لحد انها حكى ليهم

وفى الطريق للبيت.....

نوح: اهو اللى قالت هنية يأكد اللى وصلنا ليه، ان على انسان مش محترم وبيخدع اللى حواليه، وبيعرف
بنات، وكمان هنية شافته وهو مغير من شكله قبل ما امله يجوا، وشافته مع البنات كمان

مريم: انا مش مصدقة الحقارة اللى هو فيها دى، معقول يكون قدر اوى كده!؟

نوح: هتعملى ايه!؟

مريم: مش هكمل مع واحد منافق كده

روحوا البيت وبلغهم عبدالمنعم ان على اتكلم هو واهله وجايين يزوروهم.....

وبالليل وصل على معاه ورد وشيكولاته طلع عبدالمنعم رحب بالضيوف وكانت مريم بتجهز نفسها للمعركة والمواجهة....طلعت مريم للضيوف

على: الف سلامة عليكى انتى بخير!؟

متولى: الف سلامة عليكى يا بنتى

مريم: الله يسلمك يا عمى، ممكن يا استاذ على كلمة لو سمحت!؟

على: اه طبعا

وفى البلكونة...سمعوا صوت على وهو بيصرخ يعنى ايه!؟دخلوا الكل يشوفوا ايه الموضوع

متولى: فى ايه يا بنى!؟

على: مريم ادتنى الدبلة وبتقولى مش هكمل، وكل شئ قسمة ونصيب

متولى: حصل حاجة زعلتك يا بنتى!؟

مريم: لا يا عمى بس مش مرتاحة

متولى: طيب يا بنتى اقعدوا واتكلموا

مريم: مش هينفع يا عمى

على: الظاهر يا بابا ان الهانم عندها البديل

نوح: اخرس يا حيوان

مريم: سبحان الله لما الواحد يعمل جميل مع واحد ميستاهاش، وفى الاخر يطلع غلطان، حضرتك عايز تعرف ليه مش هكمل يا استاذ يا محترم!؟ لانى مقدرش اعيش مع واحد بيتلون كل بيوم بشكل واحد لابس قدام الناس وش المثل والقيم والاخلاق، يعنى يلبس لباس الرهبان وبداخله شيطان، لا ده الشيطان يتعلم منه ومن افعاله، على الاقل كلنا عارفين ان الشيطان عدونا وافعاله خسيسه لكن انت بتضحك على الكل باسم الدين

متولى:حصل ايه لكل ده!؟

مريم:الحقيقة ياعمى ان ابن حضرتك بيمثل علينا طول الوقت، اتفضل الصور دى هتثبتلك كلامى، بص فيها كويس وقولى مش ده ابن حضرتك، مش ده انت يا استاذ يامحترم ياقدوة التلاميذ...

على:الصور دى تركيب

مريم:لا مش تركيب، انا شوفتك بعينى وده اللى كان مغيرنى الفترة اللى فاتت، وكنت خايفة اكون ظالمة عشان مفيش دليل بس الدليل اهو،تقدر تقولى معنى صورك دى ايه!؟

على:ده مش انا!؟

مريم:ياريتك كنت انت! ياريت تعيش وتكون نفسك بدل ما انت طول الوقت بتمثل كده، وكنت دايمًا تستغرب من سعاد وانا اقولك انها واضحة وصريحة، يا ريت كنت تعيش بشخصية الشاب اللى بيعرف بنات كثير وتكون واضح وصريح مع نفسك، ولا تكون المتدين الملتزم صاحب المبادئ اللى مش بيعمل بيها حاجة، انت بتغش نفسك ولا بتغش ربنا، انت جاهل فهمت الدين والتدين غلط، فهمت الدين انه بيمنعنا من الحب و الحياة واننا نستمتع بيها ونعشها صح، فاضطريت تعمل شخصية عادية تشبع رغبتها من ملاذات الحياة، ونسيت ان الاتنين بيتحاسبوا، وان تدينك هيمنعك من الحياة، مشكلتك انك اهتميت بالناس وكلامهم وركزت فالصح والغلط بس مركزتش انك تفرق بين الحلال والحرام، انا مش هكمل مع مريض نفسى زيك واتفضل اخرج فى هدوء

وقف الكل مصدوم من اللى سامعه ومن اللى شافوه فى الصور، وقبل مايخرج على مسكه متولى وضربه بالقلم.....

متولى:انا اسف على اللى حصل ده

مريم:حصل خير وربنا يهديه

مشيوا وحضن عبدالمنعم بنته....

عبدالمنعم:انا فخور بيكى اوى وبتربيتك، وربنا يعوض عليكى

مريم:ربنا يخليك ليا

نوح:انا جنبك دايمًا متخافيش

مريم: انا مش خايفة طول ما انتوا جنبى، الواحد بيتعافى باللى بيحبهم وبيهنوا عليه كثير وانا متاكدة انى هنسى واهى تجربه اتعلمت منها كثير

حسن: ايه ده الحكاية خلصت!؟

فريدة: اه خلصت او مال كنا هنعكى للصبح

حسن: يا ريت مبسوط اوى واحنا بنتكلم

فريدة: لا خلاص الكلام خلص

حسن: بس مريم بنت اى حد يتمناها على خلق فعلا، وعارفة ان الدين مش بيمنعنا عن الحياة والحب بالعكس ده الدينامو اللى بيحرك حياتنا بالشكل والطريقة الصح

فريدة: فعلا، وعلى كان مثال على الناس اللى فاهمة التدين غلط، دلوقتى تقدر تقول لصاحبك اللى رافض البنات عشان منقبة الحكاية دى وهيغير رأييه

حسن: اكيد هيغيره ولو مغير هوش انا مبسوط اننا اتكلمنا، احنا اول مرة نتكلم فى حاجة غير الشغل

فريدة: مفيش بينا غير الشغل، ودى كانت حكاية عشان الموقف مش اكتر يعنى

حسن: انتى عارفة انا كنت خايف احسن مريم تضعف وتتجوز وخلص

فريدة: هتكون غبية لو عملت كده، لان لكل ضعيف واحد بيستغل ضعفه ويبجى عليه، وده طبعا لانه ضعيف عمره ما قاوم فلازم الجلاب يستغل قوته دى

حسن: فعلا الضعف وحش بس فى حالات معينة، ولازم نميز بين الضعف واللين

فريدة: اسوأ نوع ممكن تواجهه من الضعف انك متقدرتش تدافع عن حقوقك وتوافق على اى حاجة، حتى لو مش مقتنع بيها، عشان خايف تقول رأيك او بمعنى اصح متعودتش تصرخ بحقوقك، وده اللى حصل فى حكاية (الضعيفة والجلاب)

حسن: اتفضللى انا حابب اسمعها جدا، واعرف ايه اللى يجبر الواحد انه يفرط فى ابسط حقوقه وهو انه يكون عنده شخصية

فريدة: ياه متحمس اوى يعنى!؟

حسن:جدا واهو نستغل الوقت لحد ما نوصل، غريبه انك عندك لكل موقف حكاية

فريدة:مش غريبه على واحدة اختلطت بناس كثير، اتعودت اسمع اكر ما اتكلم، لكن اهو دلوقتى بتكلم

حسن:وانا جاهز اسمع اكيد

فريدة:طيب اسمع بقى

(الضعيفة والجلاد)

فى فيلا شكرى السيد بأكتوبر.....

وقفت هاجر تبص على الحراس اللى موجودين.....حسدتهم انهم بيخرجوا ويمشوا وهى محبوسة....من اول ما جات الفيلا وهى زيتها زى أى كرسى موجود هنا بل بالعكس الكرسى ليه قيمة وهى ملهاش قيمة عند الجلاد اللى سجنها ومنعها من نور الحياة وهو جوزها اللى أكبر من ابوها فى السن....وافتكرت اول يوم دخلت فيه الفيلا دى.....وكلامه ليها...

شكرى:اسمعى بقى يا حلوة انا اتجوزتك احسان ليكى انتى واهلك، مش عشان سواد عيونك، لو على الستات انا اقدر اشترى بفلوسى اللى احلى منك

هاجر:ولما هو كده اتجوزتنى ليه!؟

شكرى:ما انا قولتك شفقة بيكى انتى واهلك، وكمال العشرة اللى بينى وبين ابوكى الله يرحمه، وده ميمنعش انك هنا تحت امرى انا مفهوم

هاجر:حاضر

شكرى:ايوه كده برافو عليكى

وافقت هاجر زى ما بتوافق على كل حاجة من يوم ماجات على الدنيا وهى متعرفش غير كلمة حاضر....ومع الذكريات افتكرت اول يوم عيد ميلاد لما قررت ترتب الفيلا وتزينها على ذوقها وقتها كان شكرى مسافر ورجع من السفر.....

شكرى:ايه ده ايه اللى لغبط الفيلا كده!؟

هاجر:النهارة عيد ميلادى، وقررت احتفل بيه هنا، وقولت ارتب البيت على ذوقى

شكرى:انتى نسيتى نفسك ولا ايه!؟انتى فاكدة انك ست البيت فوقى ياهانم، مش محتاج افهمك انك مش اكثر من شغالة بس بدرجة زوجة، بحذرك تتصرفى من دماغك مرة تانية مفهوم

هاجر:ايوه لكن.....

شكرى: ملكنش ولا حاجة، انا اللي احدد دورك واقول تعملى ايه وامتى!؟

وقبل ما يخرج زفها شكرى على الارض واتخبطت فى الكرسى واتعورت... قومتها الشغالة ومسحتلها الدم.... ومن يومها عرفت هاجر انها زوجة بصفة شغالة وممرضة، وانه اتحكم عليها تقضى باقى عمرها فى سجن شكرى السيد عشان اهلها يعيشوا

فاقت هاجر من ذكرياتها على دموعها اللي نزلت منها، وافتكرت انها فى السجن ده من 3 سنين.... وكان زمانها دلوقت فى 3 جامعة لولا جوازها، اللي دمر باقى احلامها.... حسيت بأيد على كتفها....

شكرى: ايه ده الدنيا ضلمة ليه!؟

هاجر: كنت هنام فطفيت النور

شكرى: هتنامى وانتى قاعدة على الكرسى!؟

هاجر: لا كنت لسه هقوم انام

شكرى: لما اكلمك تبصيلى مش تدينى ضهرك

هاجر: ايه ده انت شارب!؟

شكرى: ايه الجديد يعنى انا كل يوم بشرب، بفلوسى انا حر

هاجر: انا مقصدش حاجة

شكرى: ابقى حضريلى الشنطة عشان مسافر

هاجر: هترجع امتى!؟

شكرى: انتى مش ملاحظة انك بقيتى تعدى حدودك، وتسألى فاللى ملكيش فيه، قولت تحضرى الشنطة يبقى تحضرىها وخلاص

هاجر: حاضر، ممكن ابقى اروح ازور اهلى!؟

شكرى: ليه!؟ انتى مش كنتى عندهم الشهر اللي فات، وادتيهم الشهرية والهدايا اللي جبتها، هما كلموكى ولا ايه!؟

هاجر: لا محدش كلمنى بس هما وحشونى

شكرى: خلاص بعد لما كريم يوصلنى للمطار ابقى خليه يوصلك عندهم، واعملى حسابك زيارة الشهر
الجاى كده بخ

هاجر: بخ....

شكرى: اه يعنى هبعثلهم الشهرية مع كريم وخلاص مفهوم

هاجر: حاضر

فضلت هاجر توضب فى الشنطة وفرحانة انه هيسافر كام يوم، هترتاح وتحس فيهم انها انسانة مش حيوانة
عندها كرامة ومش كرسى ولا تحفة من تحفه اللى بيملكهم.... وفرحانة اكتر انها هتزرور اهلها

تانى يوم الصبح... اخذ شكرى الشنطة وطلب من كريم ياخده للمطار....

كريم: صباح الخير يا شكرى بيه

شكرى: صباح النور، وصلنى عالمطار وابقى ارجع خد الهانم وصلها عند اهلها

كريم: حاضر يا بيه

شكرى: عايزك تحط عينك عليها، ومتتحركش لمكان غير ورجلك على رجلها

كريم: انت تؤمر يا بيه

رجع كريم للفيل من بعد ما وصل شكرى للمطار عشان يأخذ هاجر لأهلها.... خبط على باب الفيل فتحت
ليه سعدية

كريم: صباح الخير يا سعدية ، الهانم فين!؟

سعدية: صباح الخير يا اوسطا كريم، بتجهز هطلع ابلغها انك وصلت

كريم: طيب انا مستنيها فى العربية

وفى اوضة هاجر.....

سعدية: الاوسطا كريم وصل ومستنى تحت فى العربية

هاجر: طيب انا نازلة اهو

نزلت هاجر واول ما شافها كريم جاية ناحية العربية، نزل وفتح ليها الباب مع ابتسامة...كريم لغز حير هاجر من قلة كلامه لدرجة انها كانت فاكرة انه اخرس، لحد ما سمعته وهو بيكلم شكرى وعرفت انه بيتكلم.....مش بس ده اللي حيرها لكن كانت علامة استفهام كبيرة لنظرته ليها....كانت نظرة حقد مع شفقة....نظرة عمرها ما فهمتها....طول الطريق والسكوت سيد الموقف....لحد ما وصلت لبيت اهلها.....شقة فى مكان متواضع

قبل ماتطلع هاجر لاهلها.....

هاجر:اوسطا كريم انا مش هتأخر ساعتين بالطبط وهنزل، لو وراك مشوار عمله وترجعلى

كريم:شكرى بيه بلغنى مسبش حضرتك لحظة

هاجر:اه مفهوم

طلعت هاجر لأهلها....لكن كريم فضل واقف ونظره كله مركز على بيت قديم اوى من كتر مهو قديم العنكبوت غطاه.....

وصلت هاجر لشقة اهلها.....

منيرة:مين؟!؟

هاجر:انا هاجر يا ماما

منيرة:(فتحت الباب مخضوضة)خير يا بنتى حصل حاجة!؟

هاجر:هو لازم يحصل حاجة عشان اشوفكوا، انا ماصدقت ان شكرى سافر وجيت عالطول عشان اقعد معاكوا شوية

منيرة:او عى تكونى مقولتلوش احسن يضربك يا بنتى

هاجر:لا متخافيش ياماما، انا مش حمل ضربة من الكور باج بتاعه تانى، وعشان كده اخدت اذنه قبل ما اجى

منيرة:طيب هقوم اعمل الاكل ونتغدى سوا

هاجر:لا يا ماما متتعبيش نفسك، انا يادوب ساعتين وهروح

منيرة:يا بنتى انا مش بشوفك غير كل فين وفين، وكل مرة عدد ساعات الزيارة بتقل

هاجر: معلى يا ماما عشان مىحصلش مشاكل، وانا مش ناقصة

منىرة: سامحنى يا بنتى انا الى رمتك الرمية دى

هاجر: ملوش لزوم الكلام فى الموضوع ده يا ماما، اومال فىن ابتسام وسوسن!؟

منىرة: فى الجامعة لو يعرفوا انك جاية كانوا قعدوا

هاجر: ربنا يكرمهم، متخليش حاجة تعطلع عن مذكرتهم، خليهم يحققوا الى معرفتش احققه

منىرة: سامحنى يا بنتى كله بسببى

هاجر: ده نصيب يا ماما محدش بياخد غير نصيبه، انا ميهمنىش فى الدنيا دى غير انكوا تكونوا بخير

منىرة: خدنا الكلام ونسيت اقولك، ابتسام اختك جايلها عريس الشهر الجاى

هاجر: الف مبروك والله وكبرت ابتسام

منىرة: هقوم اجبك بسبوسة انا عارفة انك بتحبيها

قعدت هاجر تتكلم مع مامتها ونسيت حكاية الوقت دى، وفجأة قطع كلامهم زمارة العربية الى فضلت

تزمر، وعرفت هاجر ان الوقت عدى

هاجر: انا لازم امشى بقى

منىرة: انتى لحقتى خليكى شوية!؟

هاجر: معلى هاجى مرة تانية، خدوا بالكوا من نفسكوا

منىرة: وانتى كمان خدى بالك من نفسك

نزلت هاجر لقت كريم واقف قدام العربية... مشيت لحد ما وقفت شوية قدام البيت الى غطاه العنكبوت، و

هنا لأول مرة تسمع صوت كريم بيكلمها

كريم: هاجر هانم مش يلا ولا ايه!؟

هاجر: ها اه يلا

ركبت هاجر العربية وبعد ما وصلوا للفيلا... وكريم بيفتح ليها الباب

هاجر: هو انا لو طلبت منك طلب وقولتلك خليه سر بينا هتتفذه!؟

كريم:خير يا هانم!؟

هاجر:انا من زمان مش بخرج، ولا بشوف ناس ممكن تخرجنى بكره!؟

كريم:تحت امرك يا هانم، اكون عندك الساعة كام!؟

هاجر:بس بلاش تجيب سيرة لشكرى بيه

كريم:ايوه لكن.....

هاجر:ارجوك وانا هقول لسعدية متجبلوش سيرة انى خرجت، وانت مش هتقوله وبكده مش هيعرف

كريم:بس لو عرف ممكن يقطع عيشى

هاجر:اوعدك مش هيعرف خالص، ارجوك وافق

كريم:خلاص زى ما تحبى هكون عندك بعد الظهر

هاجر:هكون جاهزة ان شاء الله

كريم:طيب هتعوزى منى حاجة قبل ما امشى!؟

هاجر:شكرا

طلعت هاجر لاوضتها وساق كريم لحد الشقة اللى قاعد فيها مع صاحبه جمال...و فى الشقة

جمال:حمدالله على السلامة،عندى ليك اخبار حلوة عن حبيبك

كريم:فرحنى!؟هخلص تارى منه قريب

جمال:انا بجمع فى الادلة اهو، وانت كمان بتعرف اللى تعرفه طول ما انت قريب منه

كريم:اه مستنى اليوم اللى هتيجى فيه رقبتة تحت ايدى

جمال:قريب يا صاحبى متقلقش، طيب وهى هتعمل معاها ايه!؟

كريم:مش عارف هى ضحية زيتها زى ولا مجرمة زيه!؟

جمال:انت بتحبها يا صاحبى متتكروش ده

كريم:كل ما بيكبر جوايا احساس الانتقام منها، نظرتها البريئة بتخلينى انسى، بحس انها مظلومة زيها زيى، بس ليه تعمل فيا كده!؟

جمال:هنعرف كل حاجة فى وقتها، يلا بينا ننام دلوقت عشان ورانا شغل الصبح

تانى يوم الصبح...وصل كريم للفيلا ولقى هاجر وسعدية وافقين مستنين.....

سعدية:ايه يا اوسطا كريم اول مرة تتأخر كده، دى ست هاجر واقفة من ساعتها مستنياك

كريم:اسف بس الطريق زحمة شوية

هاجر:حصل خير يلا بينا بقى

فضلوا ماشيين بالعربية فى الشوارع وهاجر كانت بتتفرج على الناس والزحمة وكأنها طفلة عندها خمس سنين واول مرة تشوف الدنيا....وفجأة طلبت منه يقف

هاجر:ممكن نقف هنا شوية

كريم:بس ده محل اكل شعبى

هاجر:اه عارفة، بصراحة انا مفطرتش وبقالى كتير مأكلتش الأكل ده

كريم:بس معدتك ممكن توجعك، وخصوصا انك مش متعودة عليه

هاجر:بالعكس مفيش حاجة بتتعبلى معدتى قد الأكل بتاع الفيلا

كريم:تحت امرك يا هانم

هاجر:بلاش هانم دى بما ان فيه بينا سر يعنى بقينا صاحب، وانا بصراحة معنديش صاحب خالص، ممكن نكون صاحب!؟

كريم:طبعاً، انا هروح اجيب السندوتشات

بعد شوية رجع كريم ومعاه ساندوتشات فول وطعمية....قعدت هاجر تأكل وكريم مش بيعمل حاجة غير انه بيتفرج عليها

هاجر:انا مش مفجوعة بس بقالى 3سنين مأكلتش الحاجات دى

كريم:ليه!؟

هاجر:دى محرمات بالنسبة لشكرى بيه

فضلت تاكل شبه الطفل و بعد لما خلصوا الفطار.....

هاجر:مممكن نروح مكان تانى؟!؟

كريم:مش هنتأخر!؟

هاجر:انا عارفة انك خايف من شكرى عشان لو عرف هيقطع عيشك

كريم:وانتى مش خايفة منه!؟

هاجر:لا انا عارفة عقابه ومتعودة عليه كويس، واو عدك مش هنتأخر

فضلوا ماشين بالعربية وهى بتقوله يمشى ازاي وفجأة طلبت منه يقف...بص كريم لقي نفسه واقف قدام دار ايتام...نزلت هاجر وقابلت المديرية وبعدين طلعت للولاد اللي اتلموا حواليتها وقعدوا يلعبوا....فى الوقت ده كريم مقدرش يشيل عينه من عليها وشاف فيها براءة زى الاطفال...

هاجر:كريم تعالى لو سمحت

كريم:خير!؟

هاجر:العب معنا واقف بعيد ليه!؟

كريم:العب!؟ لا مش هينفع

هاجر:عشان خاطرى يلا بقى

فضلوا يجروا ويلعبوا مع الولاد ويحكوا قصص لبعض وبعد ساعتين مروا كأنهم دقائق.....

كريم:لازم نمشى بقى عشان اتأخرنا

هاجر:حاضر، يلا بينا

ودعت الاطفال ووعدتهم انها تزورهم قريب وفى الطريق للفيلا.....

هاجر:مممكن فى طريقنا نعدى على جامعة القاهرة

كريم:بسيطة دى فى طريقنا

وصلوا للجامعة.....وهناك.....

هاجر:ممكن تمشى قدام شوية

كريم:حاضر

فضلوا ماشيين لحد ماطلبت هاجر منه يقف قدام كلية الأعلام....فضلت واقفة حوالى نص ساعة ساكنة مش بتتكلم...كل اللي بتعمله انها بتبص على الطلاب وبس....

كريم:هاجر هانم مش يلا بقى، بقالنا نص ساعة واقفين مش بنعمل حاجة

هاجر:اه يلا بينا

وفى العربية كانت هاجر سرحانه لحد ما قطع كريم شرودها.....

كريم:هو حد من اخوات حضرتك هنا، وكنتى جاية تشوفيه!؟

هاجر:لا حلم حضرتى اللي هنا، وانا اللي كان زمانى هنا

كريم:هو حضرتك خريجة إعلام!؟

هاجر:لا كان زمانى فاضلى سنة واتخرج، بس جوازى من شكرى بقى

كريم:حضرتك ممكن تكملى اخر سنة دى

هاجر:انا مدخلتش الكلية اصلا انا معايا ثانوية عامة

كريم:ايه ده معقولة!؟

هاجر:اه معقولة، ياريت كنت كملت كان زمانى مذيعة كبيرة، بس كان على امى دين وانا اكبر اخواتى

ولازم اسدده فاتجوزت شكرى بيه

كريم:انا مش فاهمة حاجة!؟

هاجر:دى حكاية طويلة اوى، باختصار كده انت شوفت البيت اللي ساكنين فيه، ده اخر حاجة فضلت من ريحة بابا الله يرحمه، هو وشكرى لما كان بالنسبالى لسه اونكل كانوا شغالين مع بعض، وبعد ما اخدت الاعدادية وجبت مجموع على فيها وكنت الاولى، بابا عمل حفلة وعزم كل صاحبه كان منهم شكرى، ممكن مش فاكدة تفاصيل كتير بس اللي افكره لما دخل شكرى على بابا المكتب وفضلوا يتكلموا، وبعدها

طلع شكرى وجات الاسعاف اخدت بابا وقالت ان عنده سكتة قلبية، اخر حاجة وصانى بيها بابا اخذ بالى من اخواتى وادخل الثانوى، بعدها مات بابا وفاكرة الحوار اللى كان بين ماما وشكرى وقتها.....

منيرة:يعنى ايه فلس يا شكرى!؟

شكرى:محسن كان داخل فى شراكة مع شركة وطلعت وهمية، وخسر كل فلوسه

منيرة:طيب والعمل هعمل ايه دلوقت!؟ وهصرف ازاي على البنات!؟

شكرى:متقوليش كده انا موجود، وانا هتكفل بكل حاجة، محسن كان اخويا الله يرحمه بقى

مريم: ده كل اللى فاكراه من الكلام، مرت السنين ودخلت ثانوى، وكان شكرى هو اللى بيصرف على البيت، كنت بقول انه طيب اوى وفى مقام بابا الله يرحمه، عدوا 3سنين بتوع الثانوية، وجه يوم النتيجة وطلعت الاولى زى كل سنة، جه شكرى عشان يبارك ليا او بمعنى اصح يشترينى، يومها فاكراة الكلام اللى قاله لماما.....

شكرى:الف مبروك لهاجر يا منيرة هانم

منيرة:الله يبارك فيك كله بفضلك

شكرى:اومال فين هاجر لما ابارك ليها!؟

منيرة:ثوانى هنادى عليها....هاجر

هاجر:نعم يا ماما

منيرة: تعالى سلمى على اونكل شكرى

هاجرة:ازيك يا اونكل!؟

شكرى:الحمد لله،ياه كبرتى اوى ياهاجر وبقيتى عروسة

هاجر:شكرا يا اونكل

شكرى:اتفضلى هدية النجاح

هاجر:الله دى ليا انا!؟، شكرا جدا عن اذنكوا

مشيت هاجر و فضل شكرى باصص عليها وعينه منزلتش.....

شكرى:ياہ ہاجر كبرت وبقت عروسة

منيرة:محدث بيفضل صغير يا شكرى

شكرى:طيب يا منيرة هانم البنات بتكبر والمصاريف بتكتر، وانتوا محتاجين سند ليكوا وانا بصراحة مش هفضل اصرف كتير، لكن لو فيه بينا صلة قرابة ماشى

منيرة:صلة قرابة ازاي يعنى!؟

شكرى:بصراحة كده انا عايز اتجوز هاجر

منيرة:هاجر!؟ لكن دى لسه عيلة

شكرى:ولا عيلة ولا حاجة كل البنات بنتجوز فى سنها، كلميها انتى بس وانا مستنى الرد بكره، عشان لو موافقتش هيبقى ليا تصرف تانى وابقى شوفى غيرى يصرف عليكوا

نزل شكرى وفضلت منيرة تفكر فى كلام شكرى وخصوصا لو موافقتش مين هيصرف عليهم....مفيش حل غير انها تتكلم مع هاجر وتقنعها تتجوزه عشان يعيشوا....

منيرة:هاجر تعالى عايزاكى فى موضوع

هاجر:نعم يا ماما خير

منيرة:تعالى اقعدى عشان نتكلم

هاجر:فيه ايه يا ماما!؟

منيرة:جالك عريس

هاجر:عريس مين!؟

منيرة:شكرى السيد

هاجر:اونكل شكرى ده اكبر من بابا، ازاي اتجوزه يعنى!؟

منيرة:بس يا بنتى هو اللى بيصرف علينا، ولو رفضنا هيزعل وهنجوع كلنا، انتى عارفة اللى احنا فيه

هاجر:لو على الفلوس، انا هشتغل وهسدد ليه كل اللى صرفه علينا، وهصرف عليكى انتى واخواتى

منيرة: وهتجيبى كل الفلوس دى منين؟! وعلى كام سنة هتسددي فلوسه؟! وهتشتغلى ولا هتتعلمى!؟

هاجر: هعمل اى حاجة يا ماما بس مش هتجوز راجل قد ابويا، حضرتك ممكن تبيعى الشقة دى وناخد اوضة نقعد فيها، وبفلوس الشقة ندفعله فلوسه كلها

منيرة: مش بالسهولة دى يا بنتى البنك كان هيجز على الشقة، وشكرى اللى دفع الفلوس يعنى حتى الشقة دى بتاعته مش بتاعتنا، و انتى لو اتجوزتیه هتتقدينا كلنا

هاجر: انتى بتقولى ايه يا ماما؟! طيب ومستقبلى وكليتى واحلامى!؟

منيرة: هتشتراط عليه انك تكملى

هاجر: حاضر يا ماما لو ده اللى هينقذنا

تانى يوم الصبح جه شكرى ومعاها الهدايا عشان يعرف رأى هاجر.....

شكرى: ها طمنينى يا منيرة هانم ايه الاخبار؟! عايز افرح

منيرة: اطمن يا شكرى بيه، الف مبروك

شكرى: اومال فين العروسة!؟

منيرة: هتجيب الشربات وجاية اهى، بس فيه شرط واحد طلبته هاجر

شكرى: شرط ايه بقى!؟

منيرة: البنات نفسيها تكمل تعليمها

شكرى: تعليم!؟ ده انا بفلوسى اشتريتها مليون شهادة، بس ماشى موافق

منيرة: هاجر هاتى الشربات وتعالى سلمى على عريسك

هاجر: اتفضل يا اونكل شكرى الشربات

شكرى: لا اونكل ايه بقى ياحلوة!، قوليلى شكرى بس

هاجر: حاضر

بعدها بأسوع جه شكرى ومعه هدايا وفستان الفرح وبعدها جه المأذون واتجوزنى وبعد اسبوع من الجواز قولتله على الكلية واكمل تعليمى....فاكرة كلامنا يومها.....

هاجر:باب التقديم للجامعة هيفتح بكره وعائزة اروح اقدم بقى

شكرى:لا مفيش مرواح، ايه اللي ناقصك؟! لو على الشهادة اشتريهالك بفلوسى

هاجر:بس انت وعدتنى قبل الجواز و.....

شكرى:وغيرت رأى، مش انا اللي بصرف انا حر، ومش عايز وجع دماغ

هاجر:من وقتها عرفت ان كل حلم جوايا مات، وانا مت معه، كان لازم اعرف كده وانا ببيع نفسى لراجل قد ابويا، عشان اشترى حرية امى واخواتى، كان لازم ارضى بسجنى واتجوز سجانى، من وقتها ولحد دلوقت وانا زى زى اى تحفة فى بيته عجبتة واشتراها، كان زمانى زى البنات اللي خارجين من الكلية دول

كريم:ياه بس شكلك ميقلوش كده خالص

هاجر:ده بس لانى اتعودت قدام الناس اضحك وامثل السعادة، وهو كمان يمثل انه زوج مثالى بيعامل مراته كويس، لكن من وراهم حيوان ولو غلطت بنضرب

كريم:ايه بيضربك!؟

هاجر:بالكرباج، وعشان اهرب من وجع الكرباج بقيت اوافق على كل حاجة عشان منضربش

كريم:وليه مش بتتطلقى!؟

هاجر:عشان ضعيفة ولو عملت كده عيلتى هتكون فى الشارع، وهو مش هيرحمنى

كريم:انا اسف جدا لو فكرتك

هاجر:لا متعتذرش انا عمرى ما نسيت عشان تفكرنى، انا دايم فاكرة سجنى

كريم:طيب احنا فيها،قدمى فى الجامعة المفتوحة وكملى دراستك

هاجر:لا مستحيل لو شكرى عرف هيفتلتنى

كريم: هو مش هيعرف، قدمى ومش هيعرف وذاكرى فى البيت، وروحى على الامتحانات وبكده مش هيعرف

هاجر: طيب والمذاكرة والكتب....

كريم: احنا الصبح نروح نقدم فى الجامعة، وانا هشتريك كل الكتب اللي لازماكى

هاجر: طيب ازاي هذاكر؟! وامتى؟!؟

كريم: هو مش بيبكون موجود دايم معاكى، نشترى الكتب ونخليهم فى اوضة سعدية، وتبقى تذاكرى لما يخرج، وسعدية مش هتمانع لانها بتحبك وتهتب تساعدك

هاجر: بس لو عرف؟!؟

كريم: متقلقيش مش هيعرف، المهم تكملى دراستك، وانا هفوت عليكى الصبح ونروح نقدم فى الجامعة

هاجر: شكرا اوى على تشجيعك ليا ووجودك معايا

اتحرك كريم بالعربيه لحد ما وصلوا للفيللا وقبل ماتخرج من باب العربيه.....

كريم: هكون هنا الساعة 9 عشان نروح نقدم

هاجر: ان شاء الله مع السلامة

كريم: خدى بالك من نفسك

ودعها كريم ومشى على شقته وطلعت هاجر على اوضتها وهى مش مصدقة ان فيه حد هيساعدها ويخليها تكمل.... فى نفس الوقت وصل كريم شقته وكان جمال مستنيه....

جمال: ايه التأخير ده كله؟!؟

كريم: كان يوم طويل

جمال: شكلك مبسوط خير

كريم: اخيرا عرفت الحقيقة، وانها ضحية زى وانا كنت ظالمها

جمال: ماشى يا عم الحبيب، بس اوعى تنسى اللي جايبين عشانه

كريم:ها طمنى فيه جديد!؟

جمال:اتفضل بص فى الورق ده وانت هتفهم كل حاجة

كريم:الله عليك ده ورق يوديه فى داهية

جمال:استنى بس عليا، فاضل كام مستند ولو وصلنا ليه هنقضى عليه تماما

كريم:او عى حد يكتشفنا

جمال:متخافش ربنا يستر، يلا نتعشى بقى

فى فيلا شكرى السيد.....

سعدية:احضر لك العشاء ياستى

هاجر:لا مش جعانة

سعدية:ليه زمانك مأكلتيش حاجة من الصبح!؟

هاجر:لا اكلت انا وكريم، واتفقنا انه هيساعدنى اقدم فى الجامعة المفتوحة واشيل الكتب عندك لو معنديش مانع!؟

سعدية:ده يوم الهنا، لا طبعا معنديش مانع، انا اخدمك برقبتي ياست هاجر

هاجر:ربنا يخليكى ليا،يلا بينا ننام

تانى يوم الصبح، وصل كريم عشان يوصلها للجامعة واول لما شافها.....

كريم:صباح الخير، جاهزة!؟

هاجر:صباح النور، ايوه جاهزة

كريم:طيب يلا عشان متأخرش بقى

وصلوا للجامعة ودخلوا قابلوا رئيس الجامعة....وقدموا لهاجر فى كلية الإعلام لكن فى كليه مفتوحة لان سنها اتاخر، وقال كريم لرئيس الجامعة ان فيه ظروف هتمنع هاجر عن المحاضرات وهتيجى لو قدرت تحضرها لكن غير كده هاتيجى على الامتحانات....والرئيس قبل ده وفهم الظروف كلها....وبعد ما خلصوا كل الاجراءات راحوا يشتروا الكتب...وبعد ما خلصوا كل المشاوير...قرر كريم يعزمها على الغداء برا

كريم:فيه مانع لو عزمك على الغداء برا!!؟

هاجر:ياريت، بس اخاف حد من صحاب شكرى يشوفنا

كريم:لا متخافيش انا معاكى

راحوا لاقرب مطعم، وبعد الغدا طلّعوا على الفيلا وقبل ما تنزل هاجر من العربيه.....

كريم:الكتب اهى، وارتاحى وذاكرى بقى

هاجر:حاضر مع السلامة

وصل كريم لشقته وقعد يفكر مع نفسه، فى نفس الوقت كانت هاجر بدأت تذاكر وسعدية عملالها كافتيريا، شاي وقهوة ونسكافيه.....

هاجر:كفاية بقى يا سعدية شربت حاجات كتيرة

سعدية:لازم عشان تركزى بقى

هاجر:الساعة بقت 2الصبح انا هنام بقى

سعدية:طيب هاتى بقى الكتب عشان اشيلها عندى

هاجر:طيب يا ستى اتفضلى، والصبح نكمل مذاكرة بقى

سعدية:طيب تصبى على خير

هاجر:وانتى من اهله

تانى يوم الصبح....صحى كريم على تليفون من شكرى بيه

شكرى:صباح الخير يا كريم، انا فى المطار بخلص شوية اجراءات، ولما تخلص تكون جيت عشان توصلنى للفيلا

كريم:تحت امرك يا بيه انا جاى فوراً

نزل كريم وفى طريقه للمطار، فكر يبلغ هاجر ان شكرى راجع عشان تخبى الكتب، لكنه مش معاه رقمها
فرن على رقم الفيلا

سعدية:الو مين!؟

كريم:انا كريم يا سعدية، هاجر هانم فين!؟

سعدية:بتذاكر فى اوضتها

كريم:طيب بلغها ان شكرى بيه رجع، وانا رايع اجيبه من المطار اهو

سعدية:حاضر هبلغها، مع السلامة

قفلت سعدية مع كريم وطلعت لأوضة هاجر عشان تبليها بوصول شكرى، وكان عندهم مهمة صعبة انهم يخبوا الكتب من غير مايلمحها شكرى ولو عن طريق الصدفة، وفى المطار استقبل كريم شكرى بيه....

كريم:حمدالله على السلامة ياوبيه

شكرى:الله يسلمك، حط الشنط فى العربية بسرعة

كريم:حاضر يا بيه

شكرى:طمنى، المدام كانت بتخرج ولا حاجة!؟

كريم:لا يا بيه المرة الوحيدة اللى خرجت فيها كانت عند والدتها، ونزلت فى معادها

شكرى:طيب كويس اوى

وصلوا للفيلا.....وقبل ما كريم يمشى كان بياخد اوامر من شكرى.....

شكرى:تقدر تمشى ياكريم، انا مش هروح لمكان النهاردة هرتاح فى البيت

كريم:تحت امرك

مشى كريم ودخل شكرى لأوضته كانت سعدية بترتبها.....

سعدية:حمدالله على السلامة يا بيه

شكرى:الله يسلمك، اعملى قهوة وخلي المدام تطلعها هى

سعدية:حاضر يا بيه

بعد شوية طلعت هاجر بالقهوة،وكان ساند راسه على الكرسي.....

هاجر:اتفصل القهوة

شكرى:حطيتها عندك، انا مبسوط منك اوى، خصوصا انك سمعتى الكلام ومخرجتنيش من يوم ما سافرت،
عشان كده اطلبى اى حاجة وانفذهالك

هاجر:بجد اى طلب!؟

شكرى:ايوه انا هسترى اى حاجة مهما كان التمن ولا يهمك

هاجر:انا عايزة ادخل الجامعة واكمل فيها

شكرى:لا تعليم ايه!؟ احنا اتكلمنا فى الموضوع ده وانتهى، لو على الشهادة اشتريها ليكى من برا لكن غير
كده مفيش خروج من البيت

هاجر:مش انت قولت اى طلب هتنفذه!؟

شكرى:اى حاجة غير الكلية والكلام الفاضى ده، زى مثلا اى خاتم ولا زيارة لأهلك، لكن غير كده لا، وده
كان اتفاننا متخلنيش از عل منك بقى، وانتى عارفة ان زعلى وحش

هاجر:حاضر خلاص مش مهم، هسيبك ترتاح بقى شوية

شكرى:اه عشان تعبان من السفر اوى

خرجت هاجر من الاوضة وحمدت ربنا انها رجعت فى كلامها، ومقلتلوش انها قدمت فى الجامعة
المفتوحة،فى نفس الوقت كان كريم فى شقته وقاعد يفكر مع نفسه.....

كريم:يا ترى شكرى عمل ليها حاجة!؟يا ترى عرف بحكاية الجامعة المفتوحة وممكن يضربها!؟ انا
هروح اشوفها

وهو قايم قابل جمال صاحبه.....

جمال:انت رايح فين كده!؟

كريم:رايح الفيلا عند شكرى

جمال:فى الوقت ده!؟فيه حاجة!؟

كريم:انا خايف على هاجر منه، افرض عرف انها رجعت الجامعة، ومد ايديه عليها

جمال: للدرجة دى بتحبها كده!؟

كريم: انا خايف عليها مش بحبها، ده وحش مش انسان ومعدوش رحمه ممكن يقتلها

جمال: بص لنفسك و عيونك لما بتيجى سيرتها، وانت تعرف انك بتعشقها مش بس بتحبها

كريم: اعمل ايه قلبى ماشى فى طريق عارف ان اخرته خطر ليا وليها، بس هى حب حياتى وانت عارف

جمال: مهمو باين عليك، بس انت لو روح ليه دلوقت هتعرض حياتها وحياتك للخطر، شكرى مش بيرحم

استهدى بالله دلوقت ونام، والصبح هتعرف لو عملها حاجة ولا ربنا سترها

تانى يوم الصبح وصل كريم للفيللا، وعرف من سعدية ان شكرى معرفش حاجة عن موضوع الجامعة، وقطع كلامهم نزول شكرى للشركة.....

شكرى: صباح الخير يا كريم

كريم: صباح الخير يا بيه

شكرى: يلا بينا على الشركة، عشان فيه اجتماع مهم وبعدها ترجع للفيللا، عشان لو الهانم احتاجت حاجة تكون معاها

كريم: تحت امرك

وصلوا على الشركة وبعدها راح كريم الفيللا، وقرر يطمئن على هاجر، فسأل سعدية عنها....

كريم: صباح الخير، هاجر هانم هنا!؟

سعدية: ايوه هنا ثوانى هناديها

بعد شوية نزلت هاجر لكريم.....

هاجر: صباح الخير، حصل حاجة!؟

كريم: صباح النور، ابدأ كنت بطمئن لو شكرى بيه عرف حاجة عن موضوع الجامعة!؟

هاجر: وتفتكر لو عرف كنت هبقى واقفة قدامك وبكلمك، ده كان دفنى مكانى

كريم: طيب يلا عشان تذاكرى شويه

هاجر:طيب عن اذنك بقى

دخلت هاجر الفيلا، وراح كريم الشركة لشكرى عشان يوصله....

شكرى:اطلع بينا على مصنع اكتوبر

كريم:حاضر يا بيه

بعد شوية وصلوا على المصنع، دخل شكرى ووقف كريم يسرح فى ذكرياته، ويفتكر كل اوضة فى المصنع وازاى كان بيقد فى المكتب المدير ويحلم باليوم ده، فاق من احلامه على ايد جمال صاحبه

جمال:اهلا يا اوسطا كريم

كريم:اهلا بحضرتك يا بشمهندس

جمال:ايه اللي جابك هنا!؟

كريم:جيت اوصل شكرى بيه

جمال:طب تعالى ورايا....

وفى مكتب جمال.....

كريم:لقيت الورق طمنى!؟

جمال: قلبت عليه الدنيا ودورت فى كل الخزن، مش هنا ولا فى المصنع التانى ولا حتى الشركة كده مفيش غير البيت ممكن يكون شايله هناك، بس ازاي هنوصل للبيت وخصوصا خزنته!؟

كريم:لا دى عايزة خطة، عشان اى غلطة هنموت فيها، نتكلم بالليل

عدى اليوم وكل واحد مشغول باللى بيعمله، هاجر فى مذاكرتها، كريم فى خطته، شكرى فى توهانه مع الخمرة والسئات، لحد ما انتهى اليوم، جه شكرى على الفيلا وهو سكران، فى نفس الوقت اللي نسيت فيه هاجر نفسها مع المذاكرة ومأخذتش بالها من رجوعه، وفجأة حست بيه واقف قدامها.....

شكرى:ايه ده انتى صاحبة لحد دلوقت ليه!؟ غريبة يعنى اول مرة تسهرى كده

هاجر:لا ابدأ مكنش جايلى نوم مش اكرر

شكرى:مش جايلك نوم!وايه الكتاب اللي فى ايديك ده!؟جبتيه منين!؟

هاجر: (ردت في خوف) ده كتاب اخدته من ابتسام اختي، قولت اتسلى فيه بدل ما انا قاعدة كده يعنى، انت عارف انا بحب الكتب ازاي

شكري: طيب سيبى الهبل ده بقى، وروحي نامى احسنك، عشان انا مزاجى عنب ومش عايز عكنه

هاجر: حاضر تصبح على خير

خرجت هاجر من الاوضة وهى مرعوبة، وبدعى ربنا تكون كدبتها دخلت عليه، وميعرفش الحقيقة ولا يمنعها من حلمها

فى الوقت نفسه كان شكري بي فكر فى حكاية الكتاب دى، خصوصا انه عارف انها من يوم مادخلت البيت ده وهى ممنوعة من الكتب، والأهم بقى من ده كله انها تربيتها وييعرفها لما تكذب عليه، وهو شاف الكذب فى عيونها، وحس ان فيه حاجة مخبياها عنه وصمم يعرفها.....

تانى يوم الصبح، فى فيلا شكري وهما بي فطروا رن جرس التليفون

سعدية: دى الست والددة حضرتك اللى على التليفون يا ست هاجر

هاجر: انا جاية اهو

خلصت هاجر المكالمة مع مامتها ورجعت للفطار....

شكري: خير فيه حاجة!؟

هاجر: ماما بتقولى ان ابتسام خطوبتها كمان اسبوع ولازم نكون موجودين

شكري: طبعا عايزين فلوس، وعشان تلاقوا حد منظر زيبى تترسموا بيه مش كده!؟

هاجر: لا مش كده، هما مش محتاجين حاجة، كل اللى محتاجينه انى اكون معاهم وعلى فكرة العريس زميلها فى الكلية، عارف كل الظروف ومقدرها

شكري: انا مش فاضى، مسافر لو كده خلى كريم يبقى يوصلك تقعدى يومين معاهم، وهبعت معاكى هدايا وفلوس عشان الكل يعرف انتى مرات مين!؟

هاجر: مسافر تانى!؟ طيب مش ممكن تيجى معايا وتبقى تسافر بعدها!؟

شكري: واعطل نفسى عشان التفاهات دى، واضيع منى ملايين بقى، انا مسافر كمان يومين وهرجع بعد اسبوع

هاجر:زى ماتحب

خرج شكرى وطلب من كريم يوصله على الشركة، ويروح يحجزله تذكرة على طائرة بيروت....وصله كريم الشركة وراح يحجزله التذكرة....

جمال:الو ياكريم عرفت ان شكرى مسافر بعد يومين وهيقعد اسبوع

كريم:ايوه عرفت، ودى فرصة حلوة اوى عشان ندخل الفيلا

جمال:طيب وهاجر وسعدية!؟

كريم:هتصرف فى الموضوع ده، بس لازم منضيعش الفرصة دى مننا

جمال:طيب انا هقفل دلوقت واكلمك اول لما اشوفك

كريم:خلاص نتكلم بالليل

وصل كريم على الشركة عشان يأخذ شكرى على الفيلا.....

شكرى:حجزت التذكرة يا كريم!؟

كريم:ايوه يافندم، اتفصل اهى

شكرى:طيب وصلنى على فيلا اسماعيل بيه، واعمل حسابك هتستنى معايا هناك

وصل شكرى عند صديقه إسماعيل، اتغدوا سوا وفضلوا يتكلموا عن الشغل وعن السفر، وفضل كريم مع سواق إسماعيل يتكلموا بعد ما خلصوا غداء هما كمان، وبالليل وصل شكرى على الفيلا والمرة دى كانت هاجر عاملة حسابها طلبت من سعدية تقف تشوف العربية لما توصل وتبلغها عشان تخبى الكتب....

سعدية:وصل يا ستى وصل

هاجر:طيب يلا بسرعة، خدى الكتب دى خبيها عندك بقى

دخلت سعدية تخبى الكتب وبعدها بثوانى دخل شكرى الفيلا....

شكرى:لسه صاحبة يعنى؟

هاجر:اه مهو لسه بدرى اوى على معاد نومي

شكرى:طيب اعمليلى فنجان قهوة، وهاتيه على المكتب

هاجر:حاضر

عملت القهوة ودخلتها المكتب، بس هو كان باين انه مشغول لدرجة انه محسش بدخولها عليه.....

هاجر:اتفضل القهوة

شكرى:اقعدى شوية عايز اتكلم معاكى

هاجر:خير!؟

شكرى:خدى الظرف ده فيه فلوس اديها لأهلك، وممكن تنزلى تشتري هدايا ليهم، وكام فستان ليكى

هاجر:هدايا ليهم وفساتين ليا انا!؟

شكرى:اه مستغربة ليه كده!؟،او مال عايزة الناس تقول انى بخيل، وبعدين هتجيبوا منين فلوس لازم
انا اللى ادفع

هاجر:لا ابدأ مش مستغربة ولا حاجة، انا فهمتك انهم مش محتاجين ليك، والعريس عارف كل الظروف
ومقدرها

شكرى:مش عايز كلام فاضى،خدى الفلوس واطلعى، انا مشغول دلوقت اتفضللى خدى الباب وراكى

هاجر:حاضر

فى يوم السفر وقبل مايطلع شكرى على المطار.....

شكرى:انا هسافر وهقعد اسبوع فى بيروت لحد ما اخلص الشغل

هاجر:ترجع بالسلامة

شكرى:سعدية انتى ممكن تاخدى اجازة، وتشوفى اهلك فى البلد.... الهانم مش هتحتاجك الفترة دى عشان
هتقضيها عند اهلها

سعدية:حاضر يا بيه

هاجر:ليه سعدية اجازة،مش انت قولت هقعد يومين بس، وانت عارف انى مقدرش اقعد لوحدى وسعدية
بتسلبنى

شكرى:يعنى دى غلطتى انك هسيبك تقعدى مع اهلك فترة، و لا كده عاجبك ولا كده امنعك ميعجبكيش
اقولك روحى ترفضى

هاجر:لا طبعا مش برفض بس مستغربة

شكرى:متستغريش عشان هتشوفى كتير

هاجر:قصدك ايه!؟

شكرى:ولا حاجة انا لازم امشى عشان متأخرش على الطائرة، جهزى نفسك عشان يرجع كريم يوصلك
لبيت اهلك

خرج شكرى وركب العربية وساب هاجر فى ذهول من كلمته ياترى قصده ايه؟! وناوى يعمل ايه!؟

فى المطار وقبل ركوبه للطيارة.....

شكرى:ابقى روح على الفيلا، عشان توصل هاجر هانم عند اهلها ياكريم

كريم:حاضر يا بيه هوصلها واستناها

شكرى:لا هتوصلها وتروح، وتكون تحت امرها لو احتاجت لأى حاجة، اصل الهانم هتقعد عند اهلها فترة
السفر بس

كريم:ترجع بالسلامة يا بيه

مشى كريم وقبل ما يركب شكرى الطائرة اتصل بمجدى.....

شكرى:الو يا مجدى عايزك تراقبها، وتجلى اخبارها كلها

مجدى:تحت امرك يا باشا

فى نفس الوقت كانت سعادة كريم ملهاش حد فى ان الفرصة جاتله على طبق من ذهب والفيلا هتكون
فاضية وهيقدر يدخلها اتصل بجمال عشان يبلغه..... بيبص فى موبايله لقى 5مكالمات من جمال.....

كريم:الو يا جمال عرفت هندخل الفيلا ازاي

جمال:ازاي!؟

كريم:شكرى مسافر وسعدية فى البلد، وهاجر هوديا عند اهلها اهو ونقدر ندخل نجيب الورق

جمال:حلو اوى، بس انا مسافر دلوقت دلوقت حاولت اكلمك مليون مرة عشان ابلك ان شكرى بعتنى عشان
اخلص شحنة من الجمارك،لكن تليفونك كان مقفول

كريم:طيب هترجع امتى؟!ولا اخلص الموضوع ده لوحدى!؟

جمال:يا عم كلها يومين وارجع ان شاء الله

كريم:ماشى يا جمال ربنا معاك

قفل كريم السكة وهو محبط لان كل دقيقة تأخير ممكن يدفعوا حياتهم مكانها....وصل كريم للفيلا وهاجر
كانت مستننية.....

كريم:اسف على التأخير

هاجر:ولا يهكم، انا بس خايفة اوى

كريم:من ايه!؟

حكى ليه هاجر على اللى حصل من اول ما شاف شكرى الكتاب فى ايديها لحد الكلام اللى قاله ليه قبل
السفر.....

كريم:انتى خايفة يكون شك فى حاجة!؟

هاجر:بصراحة اه مرعوبة اوى، بس لو كان عرف حاجة كان موتتى

كريم:بعد الشر

وصلوا لبيت اهلها وقبل مايمشى كريم وقفته هاجر.....

هاجر:مممكن تفوت عليا الصبح!؟ عايزة اروح كام مشوار

كريم:الساعة 9الصبح هكون عندك

هاجر:تمام مع السلامة

ودعته هاجر وطلعت عند امها واخواتها اللى مكنوش مصدقين نفسهم ومخضوضين.....

منيرة:ايه شنطة الهدم دى!؟

هاجر:شكرى مسافر وراضى عنى، عشان كده قالى اقعد فترة سفره هنا

منيرة:طيب عمل معروف لأول مرة فى حياته

هاجر:وحشتونى اوى، انا جاييلكوا حاجات كتيرة حلوة معايا

طلعت هاجر الهدايا وفضلت توزعها عليهم وفضلوا كلهم يضحكوا ويتكلموا، معاهم بس هاجر بتحس انها طفلة ولسه عايشة....جه وقت النوم ودخلت هاجر لاوضتها اللي كانت مقفولة من زمان اوى كل حاجة زى ماهى ماعدا عروستها اخر حاجة باقية من ريحة حبيبها (عمر)....اخذتها وقررت توضعها مش معقول تسببها تضيق منها فضلت تنضفها وتصلح فيها بس عرفت ان مفيش فايده فيها.....زى حاجات كتيرة صعب ترجع زى الاول وكأنها اتكسرت معاها....نامت هاجر من التعب

تانى يوم الصبح....فضل يزمر كريم لكن مفيش فايده فاضطر انه يطلع يخطب....طلع كريم على السلم وهو ببشم ريحة ذكريات جميلة عايش لسه عليها و كل حاجة زى ماهى كأنه لسه سايبها امبارح...وصل لشقة هاجر وفضل يخطب ففتحت منيرة....

منيرة:ايوه جاية اهو، انت مين؟!وعايز ايه؟!

كريم:انا السواق ومدام هاجر كانت قالتلى افوت عليها، عشان تشتري حاجات

منيرة:طيب اتفضل يا بني ادخل

كريم:لا انا هستنى هنا

منيرة:لا ميصحش اتفضل ادخل يا بني، انا هصحبها اهو

دخل كريم وقعد وبعد شوية طلعت هاجر من الاوضة بس مش لوحدها معاها عروستها....الى اول ماشافها كريم وقف فى مكانه متسمر ومركز نظره عليها.....لكن هاجر جات فوقته من شروده.....

هاجر:اسفة اوى اتأخرت بس فى النوم ومعرفتش اصحى

كريم:ها، ولا يهملك يلا بينا

هاجر:ايوه يلا بينا

منيرة:اتفضل يا بني الشاى

كريم:لا متشكر اوى

هاجر: معلى يا ماما عشان متأخرين ولازم نمشى

منيرة: وهتنزلى كده بالعروسة !؟

هاجر: اه نسيت وحياتك يا ماما خديها، بس براحة عشان اتبهلت خالص

نزلت هاجر مع كريم وكان عندهم يوم طويل الاول راحوا على الجامعة تجيب كتب وورق ناقصها وبعدها راحوا اشترت شوية حاجات لأختها والبيت.... وبعدين اتغدوا سوا وفى الآخر راحت تشتري حاجات لنفسها...

هاجر: انت عارف ان دى اول مرة اشترى حاجة لنفسى

كريم: معقولة!؟

هاجر: اه والله اتعودت اشترى للكل، ومش مهم انا، المهم هما وبس

كريم: تعرفى ان اهلك ناس بسيطة اوى

هاجر: شكرا لىك

كريم: وايه بقى العروسة دى والدك اللى جابهالك، اصل اكيد مش هتكونى محتفظة بيها وهى مبهدلة كده إلا لو غالية عندك او من حد غالى

هاجر: انا مقدرش اعيش من غيرها، تقدر تقول روحى مرتبطة بيها اوى، دى ليها حكاية كبيرة عندى

كريم: ممكن اعرفها!؟

هاجر: بعدين ممكن نروح دلوقت

كريم: حاضر

هاجر: ممكن تيجى خطوبة ابتسام هفرح اوى لو جيت، ده لو معندكش مانع!؟

كريم: لا طبعا معنديش اكيد هاجى

هاجر: طيب لو كده هستناك بقى

وصلت هاجر لبيتها وفرجتهم على الفساتين، ودخلت اوضتها تذاكر عشان تلحق اللى فاتها كله.... وكمان الامتحانات قربت، فى نفس الوقت كان كريم عمال بيفكر فى العروسة وفى هاجر.... مرت الايام وجه

وقت خطوبة ابتسام....وبدأت هاجر تجهز نفسها والبيت مع والدتها واخواتها....ونزل كريم يجيب هدية للخطوبة....يوم الخطوبة، اتعرفوا العيلتين اكثر على بعض والكل فرحان والزينة والاغانى مالية الشارع كله، والكل عمال يبارك ويهنئ....ووصل كريم وهو فى منتهى اناقته سلم على العرايس وبارك ليهم وقدم الهدية....وفضل بعيونه بيدور على هاجر.....وشافها وكأنه شاف حورية من الجنة....

كريم:الف مبروك

هاجر:الله يبارك فيك، مبسوطه اوى انك جيت

كريم:كان لازم اجى، على فكرة شكلك حلو اوى

هاجر:ميرسيه وانت كمان شكلك حلو

كريم:دى اقل حاجة عندى

قضوا اليوم مع بعض والكل فرحان ومبسوط، والبسمة على وش الكل وبعد الخطوبة.....عزمت منيرة كريم على العشاء

منيرة:انا حسيتك ابنى، وكأنى اعرفك من زمان ولازم تتعشى معنا

كريم:مش هينفع والله

هاجر:عشان خاطرى خليك اتعشى معنا،دى أول مرة اطلب منك حاجة متكسفنيش

كريم:حاضر

راحت منيرة تحضر العشاء وفضلت هاجر مع كريم بيتكلموا عن دراستها ومذاكرتها ، ومواضيع كثيرة
تانية...

هاجر:انت انسان طيب اوى، وربنا بعثك ليا، شكرا بجد انا مديونة ليك

كريم:طيب سددي الدين

هاجر:ازاى بقى!؟

كريم:مش ناوية تحكىلى حكاية العروسة

هاجر:اه دى بسيطة اوى تعالى معايا

خرج كريم مع هاجر للبلكونة، وبدأت تحكى.....

هاجر: شايف البيت اللي التراب والعنكبوت مغطيه ده، وكأنه مهجور

كريم: ايوه اللي كنتى واقفة قدامه مرة وسرحانه

هاجر: البيت ده ليا فيه ذكريات كتيرة اوى، حياتى كلها فيه، ولما اللي فيه راحوا انا رحت معاهم

كريم: مش فاهم حاجة

هاجر: البيت ده بتاع عمو محسن صاحب بابا، وكمان كان شريكه مش بس كده كان اب تانى ليا، وحتى طنط نادية مراته كانت ام تانية ليا كنا دايمًا مع بعض وعند بعض، العروسة دى من ابنهم عمر مقدرش اقول انه اخويا لا ده اخويا وصاحبى وكمان حبيبى، اه كنا بنحب بعض من واحنا صغيرين دايمًا كان ببساعدى ويدافع عنى هو الوحيد اللي كان بيقولى متكونيش ضعيفة، كان ببشجعنى اتعلم ويذاكرلى كمان، ولو كان موجود مكنتش اتجوزت شكرى وكان حمانى منه

كريم: ليه بتقولى كان!؟

هاجر: لانه مات، فاكدة اليوم ده وكأنه النهاردة كان عمو محسن وطنط نادية وعمر مسافرين، ووعدنى عمر انه هيرجع مش هيتأخر عليا، وعرفنا انهم عملوا حادثة، اول مرة يكذب عمر عليا وعدنى انه هيرجع ومرجعش، راح بعيد عنى للأبد، بعدها بشهرين مات ابويا وبعدهم مت انا لما اتجوزت شكرى

كريم: اسف لو فكرتك بحاجة زعلتك

هاجر: انا عمرى ما نسيت ده عشان افكر

قطعت كلامهم منيرة.....

منيرة: يلا العشاء جاهز

قعدوا يتعشوا ويتكلموا ويضحكوا، حس كريم انه وسط عيلته واول مرة يضحك من قلبه كده، بعد العشاء مشى كريم، ودخلت هاجر اوضتها تعيش وسط ذكرياتها، فى نفس الوقت فى شقته لقي كريم الباب بيتفتح ودخل جمال عليه.....

جمال: ايه ياعم، أما انت هنا قاعد فى الضلعة دى ليه!؟

كريم: مفيش بفكر بس

جمال: فى ايه؟! لو على الفيلا هنروح بكرى ونخلص الموضوع، ولا فيه حاجة تانية؟

كريم: هاجر لسه بتحبني يا جمال، عمر لو مات فى نظر الكل فهو عايش معاها وجواها، بتحسه فى كل مكان

جمال: او مال زعلان ليه؟! دى حاجة تفرحك

كريم: انا فرحان، بس زعلان من نفسى اوى مكنش لازم اخبى عليها الحقيقة، كان لازم اقولها ان كريم وعمر واحد

جمال: هتعرف بس مش دلوقت، كله مع الوقت لكن دلوقت ممكن شكرى يعرف ويقتلكوا انتوا الاثنين، احنا هنروح الفيلا امتى؟!

كريم: بكرى بالليل على الساعة 7 ونص

جمال: طيب يلا ننام بقى والصبح ربنا يحلها

تانى يوم الصبح..... فى بيت هاجر.....

منيرة: يلا يا هاجر اصحى بقى، الفطار جاهز اهو

هاجر: تسلم ايديك يا ماما، انتى لابسة ورايحة فين كده؟!

منيرة: لازم اسافر انا واختك ابتسام عند خالتك عشان تعبانة شوية، تحبى تيجى معنا نستناكى؟!

هاجر: لا ياماما انتى عارفة جوز خالتى، وكلامه الى زى الحجر، وبصراحة مش هعرف اتحمل

منيرة: ولا يهملك يا بنتى احنا هنبات، وهنرجع الصبح ان شاء الله، عايزة حاجه؟!

هاجر: لا يا ماما تسلميلى

فى نفس الوقت فى شقة كريم كان قاعد مع جمال، بيرتبوا الخطة اللي هيدخلوا بيها الفيلا وياخدوا الورق

عدى النهار وهاجر قاعدة بتذاكر وتعبت من المذاكرة، مسكت عروستها وفضلت تتكلم معاها، وجاءت الساعة 7 بالليل... افكرت هاجر انها نست كتاب مهم جدا فى اوضة سعدية فى الفيلا، ولازم تروح تجيبه عشان هتمتحن فيه بعد يومين.... وقررت تروح الفيلا... دخلت تلبس وتجهز ونزلت من البيت.... اخدت تاكسى وطلعت على الفيلا وفى الطريق، وقفت العربية فى زحمة المرور.... بصت فى الساعة كانت

8 ورعب؁ فى الوقت ده كان كريم وجمال جوه الفيلا؁ وكان من السهل دخولها لان عم عبدالصمد البواب راجل كبير فى السن ونايم دايماء؁ والحرس فى اجازة؁ وصلوا لمكتب شكرى وفضلوا يدوروا فى كل حته فيه على الحزنة ولقوها بس كانت المشكلة فى رقمها السرى؁ وده اللى معمولوش حسابه.... وفجأة سمعوا باب الفيلا بيتفتح... طفوا نور المكتب واستخبوا؁ دخلت هاجر على اوضة سعدية ودورت فيها على الكتاب ولقته.... وهى طالعة من الاوضة سمعت صوت خبط فى المكتب؁ والصوت كان صوت فارة وقعت لما جمال اتخبط فيها... خافت هاجر وفضلت تتسحب لحد مادخلت اوضة المكتب... دخلت ونورت النور وشالت الفارة وفضلت تدور؁ وهى خارجة الكتاب وقع منها تحت المكتب نزلت تجيبه لقت آثار رجلين قدامها.... صوتت بصوت عالى فأضطّر كريم يكتّم نفسها عشان متصحيش عبدالصمد؁ او تلم عليهم الناس.....

كريم: ششش انا كريم يا هاجر ؁ انا هшил ايدى بس اوعى تصرخي

هاجر: انت بتعمل هنا ايه؟! انت جاي تسرق الراجل اللى مشغلك وبيأكلك عيش؟! انت تعمل كده اخص عليك

كريم: انا جاي ارجع حقى من الراجل اللى سرقه منى؁ وقتل اهلى وسرق حبى

هاجر: انا مش فاهمة حاجة خالص

كريم: تعالى اقعدى وانا هفهمك كل حاجة؁ بس ثوانى بس الحق جمال اللى مستخبي ورا الكنبه احسن هيتخفق....

كريم: جمال تعالى متخافش دى هاجر

جمال: لو كنت سبتنى اكثر من كده كنت هموت

هاجر: انت! انا شوفتك قبل كده!؟

جمال: ايوه انا سكرتير خاص ومدير العلاقات العامة عند شكرى

هاجر: انا مش فاهمة حاجة خالص....

كريم: انا ابويا كان شريك لشكرى او بمعنى اصح شكرى شغال عنده؁ وبابا اكتشف اختلاس وسرقت شكرى ليه؁ فقرّر يفض الشركة ويسلم كل الورق اللى يدين شكرى للشرطة.... لكن شكرى ممثل شاطر مثل دور الندمان التاييب واترجى بابا انه يفض الشركة من غير ما يبلغ الشرطة؁ وبابا وافق لكن شكرى

تعبان كبير اتفق مع السواق بتاع بابا انه يفك فرامل العربية وواحد مسافرين، وقبل ما تنقلب العربية نط السواق وفضل انا وبابا وماما لكن من خوفهم عليا وقبل ما العربية تنقلب زقوني منها، عشان ينقذوا حياتي وشوفت ابويا وامى بيموتوا وانا مش قادر انقذهم....شعور العجز موتنى وكبر الانتقام جوايا مع كل يوم قضيته فى ملجأ الاطفال، قابلت هناك جمال وبقينا صاحب وقرر يساعدنى فى انتقامى منه

هاجر:معقولة اللى بتحكيه ده؟!طيب انت عرفت منين انه السبب!؟

كريم:عرفت من السواق، اول حاجة عملتها لما خرجت من الملجأ، انى سألت على السواق وقبل ما يموت اعترف ليا

هاجر:اسمها ايه الشركة دى

كريم:العالمين للاستيراد والتصدير

هاجر:بس الشركة اللى انت بتتكلم عنها دى بتاعة عمو محسن، اصل شكرى مدخلش غير فى شركة معاه هو وبابا، ولا هو دخل فى شركة تانية وانا معرفش!؟

كريم:لا مدخلش هى الشركة دى

هاجر:قصداك ايه؟! معقول تكون انت.....

كريم:ايوه انا عمر يهاجر، عمر صاحبك وحبيبك من واحد صغيرين، صورتك فى الملجأ مكنتش بتفارق خيالى، واول لما طلعت قولت هاجى وازورك وعرفت انك اتجوزتى، كانت صدمتى كبيرة، والاكبر لما عرفت مين هو جوزك، الرجل اللى قتل اهلى حسيت انى اطعنت منه مرتين، مرة من قتله لأهلى ومرة من خطفه لحبيبتى، منكرش انى كنت عايز انتقم منك ومنه، بس لما شوفتك ضعفت، قررت انتقم اشتغلت عنده سواق عشان اعرف كل كبيرة وصغيرة عنه، وكنت عايز انتقم منه ومنك بس لما عرفت الحقيقة وانك ضحية لومت نفسى، وطلبت من جمال انه يكون قريب منه فى الشغل عشان نعرف نوقعه، وجمعنا كل الورق وناقص الورق اللى يدين شكرى، فجينا ندور عليه هنا فى الفيلا

هاجر:(وهى بتحضنه)عمر وحشتنى اوى، انا مش مصدقة نفسى يا عمر كنت حاسة انك هترجع ليا، عمر خدنى بعيد عن هنا، انا مش عايزة اعيش تانى فى ذله ولا عايزاك تبعد عنى تانى، مستعدة اساعدك فى اى حاجة تطلبها منى

عمر:انتى كمان وحشتينى اوى ياملاكى واسف على اللى حصلك وانى شكيت فيكى ولو للحظة، واوعدك بس اجمع الدليل ونكون لبعض، بس المشكلة دلوقتى ان الخزانة مش راضية تفتح من غير الرقم السرى

هاجر:رقم سرى!؟ انا معرفوش بس تعالى نجرب

كريم:مطلوب 3محاولات بس، بعدها الخزنة هتدى انذار ونتكشف

هاجر:طيب نفكر، ممكن يكون تاريخ ذكرى او مناسبة اى حاجة متنسهاش

جرب كده يوم افتتاح الشركة مع والدك

كريم:لا مفتحتش...

هاجر:طيب يوم ما عمل افتتاح تانى للشركة انها بتاعته

كريم:لا الرقم غلط والمحاولة الجاية دى اخر محاولة مفيش غيرها، لازم نفكر

هاجر:بس لقتها جرب تاريخ جوازنا، اليوم ده قال انه اسعد يوم فى حياته، لانه اشترى تحفة وضمها لبيته
وانى بقيت بتاعته

جرب كريم التاريخ واخيرا فتحت الخزنة، ودوروا فى الاوراق ولقوا كل الورق للعمليات المشبوهة اللى
بيعملها والدليل على انه قاتل وغيره....خدوا كل الورق ده وخرجوا من الفيلا...وصل كريم هاجر
للبيت،وقبل مايمشى قالها.....

كريم:ممكن دلوقت تركزى فى امتحانك اللى قرب، وسيبى الباقي عليا

هاجر:حاضر، انا مطمئة طول ما انت جنبى

كريم:هفضل دايما جنبك ومعاكى ومش هنفترق ابدا

طلعت هاجر البيت وهى بتفكر فاللى بيحصل وكأنه حلم من الاحلام وربنا بعثها القشة اللى هتنقذها من
الغرق....وفى نفس الوقت كان كريم وجمال فى الشقة بيخبوا الورق...مرت الايام وكان كريم كل يوم
يتصل بهاجر ويطمئن عليها وعلى مذاكرتها....وجه يوم الامتحان

كريم:صباح الخير،مستعدة!؟

هاجر:اه بس خايفة اوى

كريم:مش ذاكرتى كويس!؟ متأكد انك هتحدى كويس وهتعزمينى كمان لما تحلى كويس

هاجر:ياه انت طماع اوى، بس ماشى يا عمر

كريم:ياہ وحشنى اسمى وخصوصا لما يطلع منك

هاجر:طيب انا هنزل بقى عشان متأخرش على الامتحان

بعد الامتحان طلعت هاجر، جريت على كريم اللى كان مستنيها بره الجامعة.....

كريم:ها عملتى ايه طمنيلى،هاتى لما نراجع

هاجر:حليت كويس اوى، نراجع ماشى يامستر يلا

كريم:تسمحى اعزمك على الغداء بقى!؟

هاجر:طبعاً، يلا بينا

بعد الغداء رocht هاجر ووصل كريم على شفته....وفجأة لقي اتصال من شكرى.....

شكرى:انا فى المطار يا كريم، ياريت تيجى تاخذنى ومتأخرش

كريم:حاضر يا بيه جاى اهو

فضل كريم طول الطريق يفكر ليه شكرى رجع بدرى!؟ وليه صوته كان عصبى كده!؟....فى المطار كان قاعد شكرى مع راجل اول مرة يشوفه كريم، بس ميعرفش انه الراجل اللى طلب منه شكرى يراقبه هو وهاجر.....

شكرى:ها يا مجدى طمنى وصلت لأيه!؟

مجدى:مدام هاجر بتدرس فى كلية الاعلام، والسواق بتاع حضرتك يعرف كده كويس، كمان الصور دى انا اخدتها ليهم

شكرى:طيب امسك الشيك ده، وامشى دلوقت عشان زمانه جاى

مجدى:لو عايزنى اخلصلك عليه انا رقتى سداة، واهو كله بحسابه

شكرى:قريب بس مش دلوقت

وقف كريم مسمعش اى حاجة من كلامهم، ولا عرف ايه الظرف اللى اخده شكرى منه،وبعد شويه ظهر كريم قدام شكرى.....

كريم:حمدالله على السلامة

شكرى:الله يسلمك، يلا اطلع على الفيلا، وبعدها تروح تجيب هاجر هانم

كريم:حاضر

فضل طول السكة يفكر كريم فى الراجل اللى شافه مع شكرى، وسبب سكوت شكرى وغضبه الواضح فى عيونه....وصل شكرى للفيلا، وبعدها مشى كريم واخذ هاجر من بيتها وفى طريقهم للفيلا....

هاجر:رجع بسرعة ليه؟!طيب قال حاجة عنى؟!طيب ممكن يكون عرف حاجة عنى!؟

وكريم:ممكن تهدي، واتأكدى طول ما انا معاكى مش هيلمس شعرة منك

وصلوا للفيلا... وقبل مايمشى كريم لشقته.....

كريم:انتى معاكى رقمى، لو حصل اى حاجة كلمينى هاجى فورا

هاجر:حاضر ربنا يستر

دخلت هاجر لقت الفيلا مضلمة، والنور الوحيد اللى جاى من المكتب...دخلت المكتب وشكرى كان قاعد فيه،لمحها شكرى فقال.....

شكرى:تعالى ادخلى، عايز اتكلم معاكى

هاجر:حاضر

شكرى:اخبار الخطوبة ايه؟!واهلك كويسين؟!وابتسام والكتب اللى بتديها لك مفيش منهم واحد كده!؟

هاجر:قصدك ايه!؟

قام شكرى من على الكرسي ومسك ايديها لفها ورا ضهرها،وقال فى غضب.....

شكرى:قصدى انك استغفلتيني وخرجتى عن طوعى، وقدمتى فى الجامعة، وكمان عملالى غراميات مع السواق

هاجر:انت فاهم غلط

شكرى:(وهو بيرمى الظرف فى وشها)والصور دى كمان غلط، انتة عارفة اللى بيخرج عن طوعى جزاءاه ايه!؟

رماها على الارض.....وهو مشغول فى كلامه معاها رنت على كريم اللى فتح وسمع كلامه....

شكرى: انا هميكي من على وش الارض، ومحدث هيعرفلك طريق ومش هأخذ فى واحدة زيك يوم واحد
سجن.... انا هقتلك هدفك حية من غير اكل وشرب لحد ماتموتى.... قومى معايا يلا

هاجر (فى خوف): على فين!؟

شكرى: على قبرك ياحلوة، هريميكي فى الاوضة الللى جنب الفيلا

فضل شكرى يجرجر هاجر وهى محاولتش تقاومه عشان فى عصبية ممكن يعمل اى حاجة، وكان عندها
امل ان كريم هيجى ينقذها.... فى نفس الوقت نزل كريم يجرى بس جمال وقفه.....

جمال: انت رايح فين!؟

كريم: حياة هاجر فى خطر، ولازم الحقها

جمال: وانت لما تروح بتعرض حياتك للخطر

كريم: مش مهم انا المهم هى، اطلع بالورق الللى معاك على الشرطة ، بلغهم وتعالوا على الفيلا

جمال: طيب يلا بينا

نزلوا من شقتهم.... كريم على الفيلا وجمال على البوليس... وصل كريم على الفيلا واول مكان راحه
الاوضة المحبوس فيها هاجر... فتح الباب بعد محاولات وفضل يدور على هاجر الللى كانت مستخبيه
ومر عوبة... واول لما شافته...

هاجر: انت اتجننت!؟ امشى من هنا ده بيدور عليك وهيقلك

كريم: انا ميهمنيش حاجة غيرك انتى، يلا بينا نخرج من هنا

مسك كريم ايد هاجر وهما خارجين من الاوضة، لقوا شكرى قدامهم بمسدس...

شكرى: اهلا اهلا، كويس انك جيت برجلك لحد هنا، وفرت عليا المشوار الللى هروحه عشان اقتلك،
كويس هقتلكوا مع بعض واهو مبقاش فرقت بينك وبين عشيقتك

كريم: اخرس متتكلمش عنها كده، دى اشرف منك ومنى، وبعدين انت حسابك معايا انا، هى ملهاش دعوة

شكرى: الللى غلط لازم يتحاسب، وانا هحاسبكوا وهدفعكوا التمن غالى

كريم:لو كده يبقى انت اللي لازم تدفع الحساب، حساب لكل جرايمك واولهم لازم الحق يرجع لصحابه
وترجع مرمطون تانى، ترجع الحق لأبن محسن عبدالنواب

شكرى:ههههه وهو فين ابنه ده؟!ابنه ده مات ياشاطر معاهم فى حادثة العربي، وانا اللي اتفقت مع
السواق يفك فرامل العربيه

كريم:بس ابنه ده لسه عايش وواقف قدامك، وجه يأخذ حقه منك

شكرى:ها انت فاكرا لما تقولى كده انا هخاف طيب بسيطة لو ربنا كتبلك عمر جديد هخلصه على ايدى
واقترلك دلوقت، ومش هتقدر تثبت عليا حاجة

كريم:غلطان ياشكرى كل الأدلة اللي تدينك معايا وزمانها دلوقت مع البوليس

شكرى:ها انت فاكرا لما تقولى الكلام ده هخاف، مستحيل توصل للورق

كريم:لا وصلت وحتى الورق اللي كنت مخبيه فى الخزانة هنا فى الفيلا معايا

شكرى:ولا يهمنى انا هقتلكوا واهرب برا البلد ومحدش هيعرف يوصلنى، بفلوسى اعمل كل حاجة،
اتشهدوا على ارواحكوا يلا

كريم:انا عايز اعرف ليه عملت ده كله فى ابويا!؟

شكرى:ابوك كان ذكى اوى مش زى ابوها وعرف يكشفنى، وكان هيسلمنى للبوليس فكان لازم اتحرك
اتوسلت ليه انى همشى وبلاش يبلغ البوليس، ولأنه كان طيب سامحنى....بس انا مش طيب وكان لازم
اخلىص منه ودى بسيطة بمبلغ كويس دفعته للسواق فك الفرامل وخلصت منهم...وكنت فاكرا انى هخلص
منك انك كمان بس الظاهر انك زى القطط بسبع ارواح

كريم:فعلا ربنا كتبلى عمر جديد، عشان اجى واخلىص منك وارجع حقى، سنين كتير عشتها فى الملجأ
بسببك عشان اللحظة دى، وارجع فيها حقى منك واخذ تارى، انت دمرت حياتى ودمرت حياة هاجر

شكرى:ابوها اللي كان غبى مش انا، وافق ودخل فى شراكة مع واحد من رجالتى وانا عرفته عليه على
انه اكبر رجل اعمال، وهو بلع الطعم وخسر كل حاجة، وبعدها اخدت فلوسه وشركته وهو مات بحسرتة،
كنت مستمتع وانا طول السنين دى معيشتهم احساس انى بشفق عليهم واشوفهم مذلولين ليا

هاجر:يعنى انت اللي قتلت ابويا وحرمتنى منه!؟ ، وكمان ضيعت مستقبلى

شكرى:ايوه انا عملت كل ده والشركات والفلوس دى بتاعتكوا، بس انا كبرتھا وتعبت فيها ومحدث هياخذھا منى، عرفتوا كل حاجه اھو اتشهدوا على روحكوا بقى

وجه شكرى المسدس نخيته كريم وھاجر اللى كانت مصدومة، عشان يخلص عليهم لكن ھاجر ضربة شكرى بخشبة طيرت المسدس من ايديه، وھجم عليه كريم وفضل يضربه ووقعه فى الارض ومسك المسدس، ولسه هيضربه دخل جمال مع البوليس،لكن شكرى حاول يهرب والظابط وھو بيوقفه حصل ضرب نار ومات شكرى برصاصة فى القلب،بلغ ضابط البوليس كريم ان كل الادلة اللى تدين شكرى معاهم وان فلوسهم وحقهم هيرجعلهم كامل،وحق ھاجر هيزيد باعتبارھا ورثته الوحيدہ

كريم:كدہ بقى ارتاحنا منہ، حقنا رجعلنا، وتقدرى تكملى دراستك وكمان فلوسك وحقك هيرجعولك، تقدرى تعوضى كل اللى فاتك، وتعتمدى على نفسك من غيرى بقى

ھاجر:انا لولاك مكنتش اقدر اعمل حاجة، وبيك ومعاك ھكمل طريقى، ولا هتتخلى عنى تانى!؟

كريم:لا ھكون معاكى دايما وجنبك، ومش هسيبك ابد، ا انا اصلا ماصدقت لقيتك وكلھا كام شهر ونتجوز واكليبشك للأبد ونبدأ من جديد، موافقة!؟

ھاجر:طبعاً موافقة، انا من غيرك ضعفت قصاد حبى لأھلى، ضحييت بنفسى وكرامتى عشانهم، بس ھو ھو الحب اللى لما لقيتہ معاك، قوانى وخلانى ابدأ من جديد وافكر فى نفسى واحبھا

حسن:ياھ مسكينة ھاجر، شافت كتير فعلاً، بس ربنا عوض عليها ورجع ليھا حبھا

فريدة:زى ما الحب بيضعفك ويذلك ويخليك تضحى عشان خاطر اللى بنحبهم، ھو نفس الحب اللى بيقويك ويشجعك ويخليك تبدأ حياتك من جديد وتكتشف نفسك، الحب سلاح ذو حدين، بس المهم اللى بيحب هiestخدمه ازاي وانت هتواجهه ازاي

حسن:ايہ دہ وقفنا ليہ!؟

فريدة:عشان وصلنا خلاص

حسن:ياھ بالسرعة دى، محستش بالوقت ولا بالطريق، تفنكرى الصدفة ممكن تجمعنا مرة تانية!؟

فريدة:مفيش احلى من الصدفة، وزى ما جمعتنا اول مرة ممكن تجمعنا تانى

حسن:طيب تحبى اوصلك للمكان اللى انتى راياها!؟

فريدة:شكرا بس فيه ناس مستنيين، مع السلامة يا بشمهندس

نزلت فريدة من القطر وفضت تدور على أمانى وفجأة لقتها قصاها....

أمانى:وحشانى يافرى، عاملة ايه؟!حمدالله على السلامة

فريدة:انتى اكتر،الله يسلمك

أمانى:اخبار رحلتك ايه!؟

فريدة:كويسة جدا، فين زياد ولا انتى جاية لوحداك!؟

أمانى:لا زياد هنا بس بيستقبل هو كمان واحد صاحبه، اهو زياد هناك اهو

بصت فريدة على زياد وصاحبه اللى معاه واتخضت من الصدمة....

زياد:اهلا يافريدة،حمدالله على السلامة

فريدة:الله يسلمك

زياد:اقدملكوا صاحبى واخويا حسن

أمانى:ازيك يا حسن،ده زياد مبطلش طول السكة كلام عنك

حسن:الحمد لله، اسف بقى دوشتك بسيرتى، ويارب تكونى سمعتى عنى خير

أمانى:لا اطمن كل خير، اقدملك صاحبتى فريدة

حسن:اهلا بيكى

فريدة:اهلا بيك

زياد:طيب يلا بينا بقى، عشان اكيد تعبانين من السفر ولازم ترتاحوا

وهما ماشيين اتكلم حسن مع فريدة بصوت هامس.....

حسن:شكل الصدفة والقدر ليهم كلام تانى ومصممين يجمعونا

فريدة:فعلا صدفة غريبة اوى، اتفضل بقى عشان منتأخرش

ركبوا العربية وبعد شوية وصلوا الفندق.....

أمانى:وصلنا، ابيه رأيك فى الفندق يا فرى؟

فريدة:حلو اوى انتوا هتعملوا فرحكوا هنا صح!؟

أمانى:ارتاحى دلوقت وبعدين هوريكى القاعة، وكل حاجة عشان تجهزى الترتيبات للفرح، انا جايياكى هنا عشان استغللك بما انك مهندسة ديكور

فريدة:اه قولتلى، هى الحكاية كده بقى

أمانى:يلا اطلعى اوضتك ارتاحى بقى

قبل ما تطلع فريدة على اوضتها بصت على حسن اللي مكنش موجود حواليتها، واطمنت انها هترتاح منه فترة.....طلعت اوضتها ورتبت لبسها وقررت ترتاح شوية، خصوصا بعد السفر حاولت تنام بس اخدت وقت طويل لحد ما نامت..... صحيت على كابوسها وصرخت كالعادة....فضلت قاعدة فى سريرها وبعد ما حست بالملل طلعت البلكونة تشم شوية هواء...فضلت واقفة وسرحت فى جمال المنظر وحلاوته اللي كان بيطل على الجنينة والورود الكثيرة، وقبل ماتدخل سمعت صوته....

حسن:اهلا انتى هنا كمان يعنى طلعتنا جيران

فريدة:اه شوفت بقى، انت ايه اللي مسهرك دلوقت!؟

حسن:كنت نايم بس صحيت على صرختك

فريدة:هى اى صرخة تبقى بتاعتى انا

حسن:مفيش غيرك اللي اوضته جنبى، مش مهم ده كله، انتى كنتى بتصرخى ليه!؟

فريدة:شوفت صرصار وانا بخاف منه

حسن:صرصار فى مكان زى ده غريبة، بس صرختك كانت مكتومة شوية زى ماتكونى صاحية من النوم، مكنش صوتك واضح فيها زى لو صاحية

فريدة:انت ذكى اوى لدرجة انك تنفع فى المخابرات

حسن:ايه هو كابوسك بقى!؟

فريدة: هو مش كابوس اكثر من انه هاجس، دايمًا بشوفني بجرى وراء قطر، ومش بلحقه ومهما بصرخ محدش ببساعدي، وحتى لو قعدت واستنيت القطر بيمشي ويسيني، وبفضل اعيط

حسن:كابوسك عبارة عن قطر، وز علانة عشان بتفوتيه!؟

فريدة:تفكر يعنى دى المشكلة، مش تفهه انا للدرجة دى، الهاجس اللي عندى ان القطر ده هو حياتى وبتجرى قدامى، مش عارفة الحقها ولا حد بياخذ بأيدى، وده معناه الوحدة وانا بكره الوحدة، كلنا عايزين اللي يكون معنا ويشد على ايدينا اننا نكمل فى الحياة

حسن: ياه ايه التفسير العميق ده!؟

فريدة: ده اللي بحسه، وصدقنى انا مستغربة ليه فسرته على إنه كده، مستغربة اكثر انى حكيت ليك لأن محدش يعرف الكابوس ده غيرى

حسن: ده شرف کبير ليا ياهانم

فریدہ: عشان تعرف بس انا متواضعة ازای

وجه صوت خناق قطع كلامهم....حصلت خناقة بين مديرة قسم الاستقبال والموظفين عشان مكملوش ترتيبات الحفلة اللي فى الفندق.....

حسن: یاساتر یارب، هی الست دی مش بتعرف تعمل حاجة غیر انها تزعل، دی نکدیہ اووی

فريدة: لا تقصد ست شخصيتها قوية، بتخاف على شغلها وبتحبها

حسن: قویۃ ایه بس؟!؟

فريدة: اه نسيت اصل انتوا الرجاله مش بتحبوا الست القوية، وانت كراجل اكيد زيهم

حسن: ولیہ اگرہ الست القویۃ!؟ دی ای راجل بیحلم بیہا ویتمناہا

فريدة: هو اخره يحلم بيهها وبس لكن صعب يرتبط بيهها، الراجل بيخاف الارتباط من الست القوية مع انها وقت الشدة بتكون معاه، وفي ضهره ويقدر يحارب بيهها

حسن:معظم الرجاله بيفهموا ان الست القوية هى الست اللى بتمشى كلمتها على الراجل، وبكده هتهين كرامته وطبعا اللى بيفهموا كده رجالة ضعاف، مش بيفرقوا بين الست المتسلطة اللى عابزة رأيها بتمشى

وبس، لكن الست القوية هى جيش الراجل وقت ضعفه،بس الراجل الضعيف هو اللى بيهرب من حب القوية

فريدة:غريبة اوى اول مرة احس ان حد مقتنع بالست القوية، ومؤمن بيها وبشخصيتها وببدمها
حسن:الراجل المفروض يفتخر بالست القوية، ويشجعها كمان مش يهرب من حبها، مفيش حكاية فى
دولاب حكاياتك ده

فريدة:عندى بس كده هسهرك معايا

حسن:انا مش جايلى نوم ، كمان حابب اسمعك مش يمكن انام بعد الحكاية

فريدة:تنام بعد الحكاية، طيب اسمع يامولاى حكاية (القوية والغبى)

(القوية والغبي)

فى حى الحسين....وخصوصا بيت الاوسطا متولى الميكانيكى....

زينب:حرما يا حاج ربنا يتقبل

متولى:منا ومنك يا حاجة

زينب:الفطار جاهز

متولى:انا جاى وراكى اهو، فاطمة صحيت ولا لسه!؟

زينب:يوه من بدرى، قاعدة بتذاكر

متولى:البنت بتتعب نفسها اوى فى المذاكرة، نفسى افرح بيها

زينب:ده منى عينى انا كمان، بس انت عارف ان كل هم فاطمة هو المذاكرة، انا هروح اندهلها ونفطر
سوا

دخلت زينب اوضة فاطمة تنادى عليها...طلعت فاطمة عشان تفطر....

فاطمة:صباح الخير

متولى:صباح النور، كنت راجع من صلاة الفجر، ونور اوضتك كان منور يا بنتي

فاطمة:ايوه يا بابا كنت بذاكر عشان الامتحانات قربت

متولى:ربنا معاكى واشوفك دكتورة

فاطمة:ان شاء الله...دعواتك يا بابا

متولى:طيب عن اذنكوا بقى هنزل الورشة

زينب:ربنا يرزقك يا حاج

فاطمة:انا هقوم البس بقى

زينب:كملى اكلك يا بنتى،انتى بتتعبى نفسك اوى،ومش بتاكلى كويس

فاطمة:كله يهون ياماما ونستريح لما اتعين معيدة، وبعدها ابقى دكتورة قد الدنيا واريحك انتى وابويا

لبست فاطمة ونزلت من البيت قبل الكلية بساعة عشان تمشى وتوصل للكلية فى المعاد...فاطمة اتعودت تمشى عشان توفر فلوس الاتوبيس لانهم محتاجين كل قرش وكفاية مصاريف الكلية...بعد ساعة وصلت للكلية ودخلت المدرج عشان تستريح قبل المحاضرة...بعد عشر دقائق دخل الدكتور سعد..وده كان معاد مناقشة الابحاث....

سعد:صباح الخير، انا قرئت كل البحوث اللى قدمتها وكالعادة افضل بحث لفاطمة متولى، انا بقالى 10 سنين دكتور واتقدم ليا بحوث مختلفة فى السياسة والاقتصاد لكن مشوفتش حد زيها، ياريت تحيوها على مجهودها ده

سهى:يا خرابى البت دى رخمة اوى

محمد:قصداك دحيحة ومتفوقة اوى

سعد:انتى مثال للطالبة المجتهدة

فاطمة:شكرا لحضرتك يادكتور

خلصت المحاضرات كلها وجه الوقت اللى تروح فيه فاطمة...الى ملهاش اى صاحب خالص فى الكلية لكن اى زميل ليها بيحتاج مساعدة مش بتتأخر عنه...فاطمة ملهاش صاحب لانها فى نظر زميلها فقيرة وفى نظر الباقي هى غريبة الاطوار عشان مش بتتكلم مع حد ولا بتسمح لحد يكلمها....

وصلت فاطمة للحارة وقضت يومها زى ما بتقضيه عاطول بين المذاكرة والدراسة مرت الأيام وخلصت الامتحانات وتفوقت فيها فاطمة زى العادة وطلعت الأولى على دفعتها زى كل سنة...وخلص مش فاضل غير اخر سنة...لكن القدر لعب لعبته وحصلت صدفه غيرت حياة فاطمة...جه خالد على الكلية....اول يوم دراسة....

سهى:خالد عامل ايه؟!وجيت امتى من لندن؟!وبتعمل ايه هنا!؟

خالد:سهى، صدفه حلوة اوى، لا عشان اجاوب على الاسئلة دى كلها عايز قاعدة، تعالى نروح على الكافتيريا

وهناك فى الكافتيريا.....

سهى:ها احكى بقى

خالد:شوفى ياستى اونكلك رفعت زهق منى ومن كتر فشلى، والبنات وكده انتى عارفة طبعا، وقال إيه لندن فسدت اخلاقى اكثر ما هى، عشان كده قالى هكمل هنا معاكوا فى الكلية

سهى:ياه اونكل غريب اوى يخليك تسيب لندن وتيجى هنا، بس مش مهم احنا صحاب وكمان دلوقت بقينا زمايل

خالد:مهو ده اللى مصبرنى والله

سهى:تعالى بقى اعرفك على الشلة

اتعرف خالد على سعيد ومحمد ومريهان صحاب سهى وقضوا النهار مع بعض.....

محمد:طيب انا هقوم على المحاضرة بقى

خالد:الله ده الاخ ملتزم بقى، ومن الناس اللى بتحضر محاضرات

محمد:اصل انا متعودتش افوت ولا محاضرة

خالد:انت زى الفل كده اتفضل

دخل محمد يحضر المحاضرات وبعد ما خلص المحاضرات....طلع كان الكل قاعد برا بيلعبوا ويضحكوا.....مرت 3شهور وقربت امتحانات نص السنة...فى فيلا رفعت خليل.....

رفعت:اسمع يا خالد لو سقطت السنة دى والله لأحرمك من الميراث، واسيبك تتشرد زى الشحاتين

شهيرة:براحة على الولد يارفعت مش كده

رفعت:اسكتى خالص مهى دى نتيجة دلحك فيه ،طلع فاشل ومش فالح فى حاجة، والله لو ملتزمتش وبقيت بنى ادم عدل ماhtطول منى ولا مليم

خالد:حاضر بابا هو عدك انى هذاكر وانجح

فى بيت الاوسطا متولى.....

متولى:تعالى يا بنتى عايز اتكلم معاكى

فاطمة:خير يا بابا!؟

متولى: كل خير، فتحى ابن عمك طلب ايديك يابنتى، وده ابن عمك وهيحافظ عليكى انتى من لحمه ومن دمه

فاطمة: لكن يا بابا انا بحب دراستى ومش عايزة اتعلم واقعد فى البيت، عايزة اشتغل واسافر واشوف الدنيا مش ابقى واحدة عادية وخلاص، فتحى مش هيوافق على كده، وانا مش هتخلى عن حلمى عشان خاطر حد ولا حتى ابن عمى

متولى: بس فتحى بيحبك وشاريكي يا بنتى

فاطمة: يا بابا المشكلة مش فى فتحى، المشكلة فيا انا اللي رافضة الارتباط دلوقت، وحضرتك عارف انا عندي طموح واحلام لازم احققها الاول

متولى: يعنى اقوله ايه يابنتى!؟

فاطمة: قوله انى مش بفكر فى الجواز، ومركزة على دراستى وبس

متولى: ماشى يا بنتى زى ماتحبي

فاطمة: عن اذنك بقى يا حاج عشان الوقت اتأخر ولازم انام، تصبح على خير

متولى: وانتى من اهل الخير

زينب: ها طمنى وافقت!؟

متولى: لا قالتلى مش بفكر فى الموضوع ده دلوقت، اهو الصبح ابقى ابلغ ردها لفتحى

تانى يوم الصبح وفاطمة رائحة الكلية...سمعت صوت بينادى عليها.....

فتحى: استاذة فاطمة

فاطمة: استاذة ايه يا فتحى!؟ احنا ولاد عم

فتحى: لا ازاي العين متعلاش عن الحاجب، انا كنت كلمت عمى فى موضوع عايز اعرف رأيك فيه!؟

فاطمة: اه كلمنى، انا اسفة بس صدقنى مش بفكر فى الموضوع ده دلوقت، انا مركزة على دراستى وشغلى

فتحى: انتى رفضتى عشان دراستك ومستقبلك، ولا عشان انا مكملتش تعليمى ومش قد المقام!؟

فاطمة: ايه اللي انت بتقوله ده!؟ انت ابن عمى ومقامك من مقامى متقولش كده

فتحى:بس انتى مش بنت عمى وبس انتى الوحيدة اللى بتمنى اكون جنبها

فاطمة:عن اذنك عشان اتأخرت اوى

مشيت فاطمة وسابت فتحى واقف فى حيرة مش عارف يصدق كلام قلبه ويكمل فى حبها ولا عقله اللى ببشوفها اهانة لكرامته لانه اقل منها، وصلت فاطمة لأول مرة متأخرة ربع ساعة عن معاد المحاضرة... لكن الدكتور سعد سمحها تدخل... دخلت لأول مرة متقعدش فى مكانها قعدت جنب خالد، فضل الدكتور سعد يشرح ويتكلم عن الاقتصاد وفاطمة بتكتب وراه وتناقشه... وبعد ما المحاضرة خلصت كان لازم الكل يستنى عشان محاضرة دكتور اشرف اللى معادها كمان ساعة.....

سهى:ايه ياخالد بقيت تحضر يعنى!؟

خالد:عمك رفعت بقى الله يسامحه، زعل منى وحلف لو منجحتش وذاكرت وبقيت محترم كده هيشردنى

سهى:ياه للدرجة دى!؟

خالد:واكثر من كده كمان، انا قولت اعمل هدنة واسمع الكلام عشان سفيرة لندن متروحش منى، واول حاجة عشان انجح انى احضر المحاضرات، واعوض اللى فاتنى كله بقى وربنا يستر

محمد:كويس انك بدأت تلتزم وتحضر، ابقى روح لدكتور سعد، واتكلم معاه يمكن يشيلك غياب اعمال السنة

خالد:طيب فين مكتبه ده!؟

محمد:تعالى اوصلك ليه

خالد:ياريت، ويبقى شكرا

وصل خالد لمكتب دكتور سعد... ودخل لقي فاطمة بتتناقش معاه فى كام نقطة من المحاضرة بتاعة النهاردة....

سعد:ايوه خير فيه حاجة!؟

خالد:انا اسمى خالد رفعت

سعد:مش محتاج تعرف نفسك، كشف اعمال السنة بيقول كل حاجة عن غيابك

خالد:انا جاى اطلب فرصة تانية من حضرتك، ويعنى لو ينفع الغياب يتشال

سعد:موافق...بس بشرط

خالد:ايه هو!؟

سعد:انك تحضر كل المحاضرات وتتنظم فيها، لو عملت كده هشيل الغياب

خالد:انا اوعد حضرتك بده

سعد:ربنا يوفقك واى حاجة تقدر تيجى تسألنى عنها، وانا هساعدك وحاول تعوض المحاضرات اللى فاتتك

فاطمة:طيب اجى لحضرتك وقت تانى

سعد:اى وقت يافاطمة انا تحت امرك

خالد:طيب مين يقدر يساعدنى انقل منه المحاضرات اللى فاتتني

سعد:فاطمة انتى تقدرى تساعديه!؟

فاطمة:طبعاً يا دكتور

سعد:ربنا يوفقكوا

خرجوا من مكتب الدكتور سعد.....

فاطمة:حضرتك ممكن تصور المحاضرات فى مكتبة الكلية

خالد:انا اسمى خالد، وملوش لزوم لحضرتك احنا زمايل

فاطمة:اهلا تشرفنا، ممكن بقى تقولى هتصور المحاضرات ولا هتنقلها!؟ عشان انا اتأخرت

خالد:طيب لو كده افضل انى انقلها منك لو مش هيعطلك يعنى!؟

فاطمة:لا ابدا مفيش حاجة، اتفضل المحاضرات اهي

مشيت فاطمة وفضل خالد ماسك المحاضرات وسرحان فى فاطمة اللى شايفها مميزة...

سهى:ايه يا خالد مالك!؟

خالد:ها، لا ابدا بس البننت دى مميزة اوى

سهى:تقصد غريبة اوى،دى فاطمة دحيحة الدفعة، وكل الدكاترة بيحبوها وملهاش صاحب ابدا

خالد:هى فعلا غريبة، يمكن عشان مختلفة

سهى:لولا عارفة انها مش زوقك، مش زى البنات اللى تعرفهم كنت قولت انك معجب بيها ولا حاجة

خالد:فاكرتيني انا عندى معاد مع ميمى ولازم الحقه، سلام

سهى:سلام يا مجنون

ركب خالد عربيته وراح الكافيه....فى نفس الوقت اللى كانت فيه فاطمة بتذاكر واول ما الساعة دقت 6
نزلت من البيت لمكانها المعتاد اللى من صغرها وهى فيه.....تانى يوم فى الكلية وبعد المحاضرات ما
خلصت....

خالد:فاطمة، اتفضلى كشكول المحاضرات اهو، واسف لو عطلتك معايا

فاطمة:لا ابدأ مفيش حاجة

خالد:مممكن اعزمك على حاجة فى الكافتيريا!؟

فاطمة:اسفة معنديش وقت

خالد:اصل انا بصراحة كده نقلت المحاضرات بس معرفتش افهمها، فلو معنديش مانع ممكن تساعدنى
وتشرحلى اللى فات!؟، ارجوكى ساعدنى

فاطمة:موافقة، بس مش النهاردة ممكن من اول بكره نتقابل بعد المحاضرات!؟

خالد:موافق طبعا، شكرا على مساعدتك

فاطمة:العفو عن اذنك

مشيت فاطمة وفضل خالد واقف مكانه مش عارف ايه اللى بيحصله وليه اعجابه بشخصيتها بيزيد يوم
عن يوم....

سهى:ايه ياخالد مبقتش اشوفك خالص، وكل لما اشوفك الاقايك واقف مع البنت دى

خالد:لا ابدأ كنت بطلب منها المساعدة، وانها تشرحلى اللى فات

سهى:طيب ما تيجى تسهر معايا النهاردة، تعالى نروح السينما!؟

خالد:موافق طبعا، هفوت عليكى بالليل

فى الوقت اللى كان فيه خالد وسهى فى السينما كانت فاطمة بتذاكر وفجأة سمعت صوت خبط كثير على الباب.....

زينب:ايوه جاية اهو، متسرعب كده ليه ياللى على الباب

فتحى:ازيك يا مرات عمى!؟

زينب:اهلا يا حبيبى خير حصل حاجة!؟

فتحى:لا ابدا اطمنى، اومال فين فاطمة!؟

زينب:ثوانى هندهالك اهو، واعملك شأى

دخلت زينب الاوضة على فاطمة بلغتها ان فتحى ببسأل عليها.....وبعد شويه طلعت فاطمه.....

فاطمة:خير يا فتحى فيه حاجة!؟

فتحى:عايزك تباركىلى قبل اى حاجة

فاطمة:مبروك بس على ايه!؟

فتحى:قدمت وهرجع اذاكر تانى واخذ الثانوية، انتى عارفة انى طلعت من الثانوية، مكملتش اخر سنة
عشان ابويا تعب وكان لازم اصرف على اخواتى البنات، مخليهوش يتحوجوا لحد

فاطمة:الف مبروك وربنا يوفقك، واى حاجة تقف معاك انا هساعدك

فتحى:يعنى مبسوطه انى هكمل!؟انا عملت كده عشانك!؟

فاطمة:غلط، انت لازم تعمل كده عشان نفسك، وعشان يكون معاك شهادة، مش عشان اى حد ولا حتى انا

فتحى:طبعا انتى عارفة انى كنت عايز اطلع مهندس بس الظروف، عن اذنك بقى عشان عندى شغل

فاطمة:اتفضل، ربنا معاك

قفلت فاطمة الباب وقفت مستغربه من تصرف فتحى، لكن فرحتله، وفجأة قطع شرودها خروج امها.....

زينب:الله فتحى راح فين!؟انا عملتله الشأى، هو جه فى ايه ومشى فى ايه!؟

فاطمة:كان جاى يقولى انه هيذاكر ويكمل تعليمه من تانى

زينب: والله ابن حلال ويستاهل كل خير، والأهم بقى بيحبك

فاطمة: ماما انتى عارفة انه بالنسبالى مش اكتر من ابن عمى، وعارفة انى مش بفكر غير فى دراستى
وبس

زينب: ماشى يابنتى، ربنا يقدملك اللى فيه الخير

فاطمة: عن اذنك عشان رائحة اذاكر بقى

زينب: ربنا يوفقك يابنتى

تانى يوم الصبح وفى الكلية بعد المحاضرات ماخلصت.... فضل خالد ماشى جنب فاطمة وهى مش
بتتكلم....

خالد: تحبى نقعد فى الكافتيريا؟!

فاطمة: لا هنقعد فى المكتبة، يلا بينا

راحوا المكتبة لكن للأسف كانت قافلة....

خالد: المكتبة قافلة، كده مفيش قدامنا حل غير الكافتيريا

فاطمة: امرى لله اتفضل

راحوا الكافتيريا وفضلت قاعدة فاطمة تشرح ليه وخالد بدأ يركز ويسأل.... وقطع كلامهم صوت سهى.....

سهى: الله انت هنا ياخالد

خالد: اهلا يا سهى

سهى: ازيك يا دكتورة فاطمة

فاطمة: اهلا

سهى: ياترى بتعرفى تشرحى حلو بقى على كده، ولا قاعدين بتتكلموا وخلص؟!!

فاطمة: اظن ده ميخصش حضرتك، إلا لو كنتى ولى امرى وانا مش واخدة بالى

خالد: فيه ايه ياسهى مالك؟!!

سهى: مفيش عن اذنكوا

خالد: انا اسف على الكلام اللى قالته سهى

فاطمة: ولا يهمك حصل خير

خالد: يعنى مش ز علانة!؟

فاطمة: واز عل منها ليه!؟ هى مش مهمة بالنسبالى عشان از عل منها

خالد: طيب نكمل بقى!؟

فاطمة: لا بكره ان شاء الله عشان اتأخرت

خالد: تحبى اوصلك!؟

فاطمة: شكرا مع السلامة

مشيت فاطمة وبعدها ركب خالد عربيته....ولسه هيمشى ظهرت سهى قدامه فجأة وكان هيخبطها....

خالد: انتى اتجننتى!؟

سهى: اه اتجننت، ممكن اعرف فيه ايه بينك وبين فاطمة!؟

خالد: ولا اى حاجة، مجرد زميلة وبتشرح ليا اللى فاتتى عشان الامتحانات قربت

سهى: يعنى مش بتحبها!؟

خالد: ها... انا احب!؟ و مين فاطمة!؟ لا طبعا مستحيل، دى مش من النوع اللى بحبه وكمان انا عمرى ما
حببت

سهى: انا بستغرب من قربكوا لبعض الفترة دى، الكل بيتكلم فقولت اطمن

خالد: لا اطمنى مفيش حاجة من اللى فى دماغك دى، يلا بينا نروح نتغدى

فى الوقت اللى كان خالد وسهى بيتغدوا كانت فاطمة قاعدة مع فتحى بتشرح ليه.....

فاطمة: ها فهمت كده المعادلات، اللى كنت بتسأل فيها ولا اعيدها تانى!؟

فتحى: لا بالعكس اول مرة افهم كده، يمكن عشان انتى اللى بتشرحيلى

فاطمة:طيب الحمد لله انى طلعت مدرسة شاطرة كده.

فتحى:مفيش اشطر منك، وعشان كده جبتلك هدية

فاطمة:هدية ليا انا!؟

فتحى:اه...مستغربة ليه دى حاجة بسيطة اوى، خصوصا ان النهاردة يوم مميز اوى

فاطمة:يوم مميز ازاي!؟

فتحى:كل سنة وانتى طيبة وعقبال مليون سنة،اتفضللى هديتك اهى

فاطمة:ايه ده انا نسيت خالص، شكرا ليك انت افكرت وكمان جبت هدية، افتحها ولا هتزعل!؟

فتحى:لا افتحها عايز اعرف رأيك فيها!؟

فتحت فاطمة الصندوق لقت البوم صور ليها من وهى مولودة لحد ما كانت فى الثانوى ومش بس كده لقت انواع الشيكولاته الللى بتحبها كلها.....

فاطمة:الله يافتحى دى اجمل هدية جاتلى فى حياتى، شكرا بجد

فتحى:انا اهم حاجة عندى انى اشوف الضحكة الللى على وشك دى، احلى من مليون كلمة شكر، وعموما العفو انا همشى بقى عشان عندى شغل

فاطمة:ربنا معاك ويوفقك،هستناك بكره عشان نكمل باقى الدروس

فتحى:حاضر يا مس فاطمة،مع السلامة

مشى فتحى وفضلت فاطمة تتفرج على البوم الصور وتفتكر ذكرياتها....دخلت امها عليها الاوضة.....

زينب:كل سنة وانتى طيبة يا فطومة

فاطمة:وانتى طيبة ياماما

متولى:كل سنة وانتى طيبة يا استاذة

زينب:الله انت جيت امتى يا حاج!؟

متولى:لسه واصل حالا عشان احتفل بعيد ميلاد فطومة

فاطمة:ربنا يخليكوا ليا يارب، ومنحرمش منكوا ابدا

احتفلوا بعيد ميلادها بالكيكة اللى زينب كانت عاملها ودى كانت هديتها...لكن متولى هديته كانت احلى

متولى:اتفضللى هديتى انا بقى!؟

فاطمة:ايه ده يا بابا!؟

متولى:افتحيها وشوفى

فتحت فاطمة الكيسة لقت فستان كان نفسها فيه.....

فاطمة:الله يا بابا الفستان حلو اوى، بس ده شكله غالى جدا ليه كلفت نفسك!؟

متولى:مفيش حاجة تغلى عليكى ابدا، وانا معنديش اعز منك عشان اجيبه

فاطمة:ربنا يخليك ليا يا احلى واعظم اب فى الدنيا دى كلها.

متولى:يلا بقى طفى الشمع يا فطومة

احتفلت فاطمة بعيد ميلادها وفرحت اوى بالهدايا وفرحت اكثر ان عيلتها افكرتها....

وبعد ما خلصت الاحتفال بعيد ميلادها دخلت عشان تذاكر محاضراتها....تانى يوم الصبح فى الكلية

وصلت فاطمة ودخلت المحاضرة وبعدها بشوية دخل خالد وعلى غير العادة قعد جنبها....وبدأ يركز

ويكتب المحاضرات اول باول....وبعد ما خلصوا المحاضرات....

خالد:ازيك النهاردة!؟جاهزة للدرس

فاطمة:الحمدلله، جاهزة جدا،يلا بينا

راحوا للكافتيريا وفضلت تشرح وبعد ما خلصت.....

فاطمة:على فكرة انا مبسوطه اوى، انك بدأت تحضر المحاضرات وتركز فيها

خالد:انا من يوم ما عرفتك وانا اتغيرت خالص، بقيت احس بشكل جديد للحياة

فاطمة:دى حاجة كويسة انك تتغير للاحسن، عموما احنا فاضل لينا 3محاضرات شرح بس وتبقى

عوضت اللى فاتك كله.

خالد:بس دى حاجة متفرحنيش،دى حاجة تزعلنى عشان مش هعرف اقعد معاكى، ولا اكون قريب منك

فاطمة: يااه انا اتاخرت اوى لازم امشى بقى

مشيت فاطمة وجات سهى تشوف خالد.....

سهى:ايه مش هنخرج النهاردة!؟

خالد:لا معلنش لازم اروح اذاكر، انا همشى تحبى اوصلك!؟

سهى:لا انا خارجة مع صحابى

مشى خالد وهو بيفكر فى فاطمة وازاى غيرته وبدلت احواله كلها وبقى انسان تانى هو نفسه مستغربه.....وقطع تفكيره مكالمة والده.....

خالد:ايوه يا بابا

رفعت:عايزك تيجى على الشركة دلوقت

خالد:طيب انا جاى فورا

بعد شوية وصل خالد الشركة وفى مكتب السكرتيرة.....

خالد:سوزى هو بابا فاضى

سوزى:اه فاضى، بس معاه مكالمة مهمة هدخل اشوفه

دخلت سوزى وبعد شوية طلعت.....

سوزى:اتفصل هو مستنيك

رفعت:اهلا يا خالد، اخبارك ايه!؟

خالد:الحمد لله يا بابا

رفعت:مش محتاج تطمنى عنك، انا شايف احوالك بتتغير للاحسن، لا سهر ولا بنات زى الاول وفرحان بده

خالد:انا فعلا اتغيرت اوى، حاسس انى انسان جديد وبشوف الحياة لأول مرة

رفعت:طيب ياسيدى انا جبتيك هنا عشان افرحك، واقولك لو ذاكرت كويس ونجحت هجبلك العربية اللى كنت عايزها

خالد:يجد يا بابا،اوعدك انى هنجح

رفعت:طيب يلا يابطل نتكلم فى البيت، عشان عندى شغل بقى

خالد:طيب عن اذنك بقى

خرج خالد من الشركة وهو مبسوط اوى...فى نفس الوقت اللى كانت فاطمة فيه بتشرح لفتحى وتساعده....

فتحى:تفتكرى هقدر اجيب مجموع يدخلنى هندسة؟!ولو دخلتها الناس مش هتتريق!؟

فاطمة:لو ذاكرت وعملت اللى عليك اه تجيب مجموعها، وكلام الناس ولا يهمك انت بتعمل الحاجة اللى بتحبها وهتوصلك لحلمك، اللى عشانه لازم تحارب، بعدين كانوا فين الناس دى وانت بتشتغل وتصرف على اخواتك؟!ليه محدش ساعدك لحد ماتكمل!؟هيجوا دلوقت ويتكلموا بأى عين واى حجة وبأى حق اصلا

فتحى:انتى قوية اوى يافاطمة، و احلى حاجة انك بتحبى الحاجة اللى بتعملها، ومصدقها اوى

فاطمة:لو مصدقتش حلمك مش هتقدر تحققه ويهرب منك

فتحى:عندك حق، طيب انا هستاذن بقى عشان اذاكر، وانتى كمان تذاكرى عشان امتحاناتك قربت

فاطمة:مع السلامة

نزل فتحى وقعدت فاطمة تذاكر وهى بتذاكر بصت على رسمة البطة اللى كان خالد رسمها وهى بتشرحه....فضلت تفكر فيه ولأول مرة تحس بقلبها بيدق لكن هى عارفة ان حبها ممكن يكون من طرف واحد وخصوصا انها مش من مستواه....تانى يوم الصبح فى الكلية بعد المحاضرات.....

خالد:يلا بينا على الكافتيريا!؟

فاطمة:لا هروح الاول لمكتب دكتور سعد

خالد:انا شايف انك بتحببه اوى

فاطمة:قصدك بحترمه اوى فيه فرق

خالد:طيب انا هسبفك على الكافتيريا

فاطمة:طيب ماشى

راح خالد على الكافتيريا....وفاطمة فى مكتب دكتور سعد وبعد ما اتكلمت معاه خرجت للكافتيريا.... وفى الوقت اللي وقف محمد فاطمة فيه....كانت سهى مع خالد.....

سهى:مش شايف انك بقيت مشغول معاه، ومبقتش معايا خالص!؟

خالد:نعم!؟وده يخلصك فى ايه!؟، تكونيش مراتى وانا مش واخد بالى

سهى:لا مش مراتك بس بحبك

خالد:سهى خلىنا نتكلم بصراحة، انتى مش بتحبينى قد ما عايزة تنتقمى لكرامتك، وانى فضلتها عليكى وانشغلت بيها عنك ونسيتك، انتى بتغيرى منها

سهى:اغير من دى عشان ايه!؟انا فين وهى فين!؟ بص كويس وانت تعرف انها مش زى

خالد:لا قصدك انتى اللى مش زيها، فعلا هى غيرك، هى احسن بأخلاقها واحترامها وقوتها وكل حاجة فيها تخليها تتحب من اول مرة،لكن انتى فاضية من جوه مش زيها خالص

سهى:بقى كده ماشى ياخالد هتندم على كل كلمة قولتها

مشيت سهى وقعد خالد مستنى فى الكافتيريا....فى نفس الوقت اللى محمد كان مع فاطمة.....

فاطمة:خير يامحمد!؟

محمد:مممكن محاضرة النهاردة!؟ عشان فوت منها حاجات

فاطمة:بس كده تقدر تاخذها تنقلها

محمد:شكرا بجد ليكى انتى جدعة اوى

مشيت فاطمة وراحت لخالد وقعدت شرحت ليه كالعادة....وبعد ما خلصت.....

فاطمة:كده انت عوضت كل اللى فاتك

خالد:ايوه انا متشكر ليكى اوى يافاطمة

فاطمة: على ايه بس، انا عملت الواجب عليا، ركز عشان الامتحانات فاضل عليها شهر، لازم تركز شوية
خالد: انا مش بشكرك على المحاضرات وشرحك وبس، انا بشكرك على انك خلّيتنى انسان تانى، انا لقيت
نفسى من بعد لما كنت تايه، فاطمة انا...

فاطمة: انا لازم امشى بقى

خالد: طيب مش هشوفك تانى ولا هتشرحلى تانى!؟

فاطمة: اى وقت تحتاجنى هكون موجودة

مشيت فاطمة وهى فرحانة بالكلام اللى سمعته وعرفت بأن مشاعرها مهما تخيبها اكيد هتتكشف وهى
متعودتش تهرب واتعودت على المواجهة.... بس ليه خيفة وليه بتهرب منه مش عارفة....

عدى الشهر اللى قبل الامتحانات والكل بيركز.... فاطمة فى المحاضرات وبتروح من وقت للتانى لمكتب
دكتور سعد.... وخالد من الكلية للبيت وبيستغل اى فرصة عشان يتكلم مع فاطمة ويعترف لها بحبه
وشعوره نحيتها... عدت الامتحانات على خير وجه اخر يوم امتحانات.... وقرر خالد انه يصرح لفاطمة
بمشاعره نحيتها...

خالد: فاطمة ممكن اتكلم معاكى

فاطمة: ازيك ياخالد!؟ عملت ايه فى امتحان النهاردة!؟

خالد: الحمد لله حلّيت كويس، كنت عايز اخد من وقتك شوية لو مش هعطلك!؟

فاطمة: خير ياخالد!؟

خالد: انا من ساعة ماشوقتك وانا متلغبط، وحسيت انى معجب بيكى، وزاد اعجابى بيكى لما عرفتك وزاد
يوم عن يوم لحد ما اتحول لحب، انا بحبك يا فاطمة

فاطمة: ايه!؟ انت متأكد انه حب مش مجرد اعجاب وبس!؟

خالد: متأكد انا لقيت نفسى معاكى، اتغيرت 180 درجة اول مرة احس انى عايش من يوم ماعرفتك، بدأت
اشوف الحياة على ايديك انا فعلا بحبك ومش شايف غيرك، انا عايز اعرف انا بالنسبالك ايه!؟

فاطمة: انت انسان دخل حياتى وغيرها، كل لما افتكرك اضحك، منكرش ان فيه احساس جوايا نحيتك بس
انا متلغبطة مش عارفة الاحساس ده اسميه ايه!؟

خالد: خدى وقتك وردى عليا، انا المهم عندى قولتك على اللي جوايا، ومبسوط ان جواكى شعور ليا

فاطمة: طيب عن اذنك بقى عشان اتأخرت

خالد: اتفضللى، خدى بالك من نفسك

مشيت فاطمة وخالد وصلها برا البوابة.... لكن مأخدوش بالهم ان سهى سمعت كلامهم.... وحلفت انها تندم فاطمة، مرت الاجازة على خالد وهو بيشتغل فى شركة والده اللي كان سعيد بأبنة وان احواله اتغيرت وبقي احسن من الاول كثير، فى نفس الوقت كانت فاطمة بتركز مع فتحى وتذاكر ليه من اول اليوم لكن اول ما الساعة بتيجى 6 بتنزل كالعادة، مرت الاجازة وبدأت الدراسة.... وكانت فاطمة سعيدة انها هتشوف خالد وتقوله انها بتحبه زى ما هو بيحبها واكثر كمان... لكن الغريبة عدت المحاضرات وخلص اليوم وهو مجاش.... فضلت تدور عليه وقررت تسأل عنه....

فاطمة: محمد مشوفتش خالد!؟

خالد: لا مجاش النهاردة

فاطمة: طيب شكرا

مشيت فاطمة وقررت تتكلم معاه بكره اول لما تشوفه.... قعدت تذاكر لكن بالها مشغول عن خالد... واياه اللي حصله!؟ قطع تفكيرها دخول امها عليها بالشاى....

زينب: مالك يا فاطمة احوالك متغيرة اليومين دول فيه ايه!؟

فاطمة: ماما انتى عارفة انك صاحبتي الوحيدة، مش بس امى، انا متلغطة اوى وجوايا حاجات كثيرة مش عارفة افسرها واسئله مش لاقيها اجابات

زينب: انتى بتحى يا فاطمة!؟ الحب وحده اللي يلغبطك كده، ويخليكى متعرفيش حقيقة مشاعرك وانتى اول مرة تحبى وده احساس جديد عليكى، فأكيد هتكونى متلغطة ومش عارفة تتصرفى ازاي!؟ ها بقى احكىلى هو مين!؟

فضلت فاطمة تحكى لأمها عن خالد وازاي اتعرفت عليه.... وازاي حسنت انها معجبة بيه وانه كمان صارحها بحبه ومستتنى ردها

زينب: انا مقدرش احكم عليه من الكلام، لازم اعرف تصرفاته اكثر، هو لحد دلوقت كويس معاكى وقال انه بيحبك، وهو مش صغير عشان يكون بيقول كلام وخلص

فاطمة:يعنى ايه!؟

زينب:يعنى لو خايفة ان مشاعره تكون مؤقتة،احب اقولك انه مش صغير وقادر يحدد نوع مشاعره وحقيقتها، انا واثقة فيكى وفى اختيارك كويس وعارفة انك مش هترضى لقلبك بالقليل،اى علاقة هتهلك هتبعدى عنها، انا مش خايفة عليكى واقعدى مع نفسك، وشوفى انتى عايزة ايه عشان انتى قوية ومش صغيرة واى حاجة احنا صحاب وانا معاكى

فاطمة:ربنا يخليكى ليا يا احلى ام فى الدنيا، انا هروح انام بقى

زينب:تصبحى على خير يا حبيبتى

دخلت فاطمة اوضتها وارتاحت انها حكت لأمها لأنها مش بتخبي عليها حاجة...ولأنها محتاجة حد يسمعها وهتلاقى مين غير امها اللي هتنصحتها وتخاف عليها اكتر من نفسها....مرت الأيام عليها وهى مشغولة مع فتحى وبتذاكر ليه....واخيرا هتقابل خالد وتتكلم معاه بكره فى الكلية

وصلت قبل المحاضرة وفضلت تدور عليه لكن ملقتهوش....بعد المحاضرات راحت سألت عليه محمد.....

فاطمة:محمد مشوفتش خالد!؟

محمد:لا مشفتوش النهاردة، شكله مجاش، فيه حاجة ابلاغهاله!؟

فاطمة:لا شكرا عن اذنك

روحت فاطمة وفضلت تفكر عن السبب الللى خلى خالد مجاش....عدى اسبوع وكل يوم تدور عليه وتستناه يمكن يجى لكن مبيجيش خالص....قلقت يمكن يكون حصل حاجة ولعنت الظروف انها مش معاهها رقمه، روجت وقررت تانى يوم فى الكلية تطلب رقمه من محمد وتطمئن عليه....وتانى يوم فى الكلية بعد المحاضرات قررت تتكلم مع محمد لكن المفجأة لقت خالد واقف معاه ومعاهم نهى....

فاطمة:ازيكوا عاملين ايه!؟

محمد:ازيك يا فاطمة

لكن تصرف خالد كان غريب مقدرتش تفهمه اخذ ايد نهى ومشىوا سوا.....

محمد:اسف يا فاطمة على الللى حصل ده

فاطمة:لا ولا يهكم، عن اذنك

روح فاطمة وكل تفكيرها فى خالد وتصرفه وليه عمل كده؟! وهى مغلطتش معاه؟! معقولة يكون كان بيتسلى بيها!؟

وقررت لما تشوفه هتحاول تكلمه وتفهم منه.... فى نفس الوقت كان خالد مقضيها سهر وبنات ورجعت ريماء لعادتها القديمة... وصل البيت متأخر وكان فاكر ان الكل نايم زى العادة رفعت: اهلا يا بيه، كنت فىن؟!؟

خالد: كنت مع صحابى

رفعت: صحابك الفاسدين اللى رجعوك تانى لفشلك وهيدمروك، اسمع يا خالد لو متعدلتش هطردك ومش هتطول منى ولا ملهم، انا مش بصرف فلوسى فى الهوا، اطلع على اوضتك تانى يوم الصبح فى الكلية قابلته فاطمة على البوابة وهى خارجة... دير وشه ومشى لكن هى وقفته... فاطمة: خالد، ممكن افهم حصل ايه؟! وليه بتهرب منى!؟

خالد: واهرب منك ليه!؟

فاطمة: متردش على سؤالى بسؤال، انا اللى عايزة افهم انت متغير ليه!؟

خالد: لأنى عرفتك على حقيقتك، وعرفت انك راسمة وش الملاك وانتى شيطان

فاطمة: انت بتقول ايه!؟

خالد: بقول الحقيقة اللى لازم تعرفيها، انك غشاشة وبمليون وش وانا كشفتك على حقيقتك، عن اذنك عشان معنديش وقت

مشى خالد وفضلت فاطمة مذهولة من الاتهامات اللى سمعتها منه واللى زعلها انها مش عارفة تدافع عن نفسها لأنها مش عارفة ايه التهمة اصلا... روح ودخلت اوضتها وفضلت تعيط....

زينب: فاطمة مالك يا حبيبتي!؟

حكى فاطمة لامها على اللى حصل كله وعن اتهامات خالد ليها وموقفه منها...

زينب: اسأليه ليه بيتهمك!؟ ومن حقك تدافعى عن نفسك عشان توضحى الامر وسوء التفاهم، اللى حصل ده، وبعدين قررى الاتهام ده يستاهل غضبه، مع ان اللى بيحب بجد مستحيل يسىء الظن فاللى بيحبه

فاطمة:حاضر ياماما

زينب:يلا قومى اتغدى بقى

قامت فاطمة تتغدى وتذاكر فى نفس الوقت كان خالد بيجهاز لسهرة مع صحابه...نزل ليهم راح الديسكو
وفضل يشرب وافتكر كلام نهى عن فاطمة يوم الحفلة اللى كان عاملها والده للشرابة بينه وبين والد
سهى،فى الحفلة.....

سالم:مبروك عليك يا صديقى الشرابة

رفعت:مبروك عليك انا يا صديقى،يلا نحتفل بقى

سهى:ازيك ياخالد!؟

خالد:الحمد لله اخبارك ايه!؟

سهى:تمام، تعالى نشرب حاجة

خالد:لا معلش مش هينفع

سهى:ياه اتغيرت اوى وكل ده عشانها

خالد:سهى، ارجوكى بلاش نتكلم فى الموضوع ده، احنا صحاب وبس بلاش نخسر بعض

سهى:ياه نخسر بعض!؟لدرجة دى بتحبها!؟ بس هى بقى تستاهل الحب ده!؟

خالد:اه تستاهل طبعاً، غيرتنى وبقيت معاها حد تانى، دى ملاك فعلاً ربنا بعتهالى عشان اتغير

سهى:ملاك!؟انت مخدوع فيها اوى

خالد:قصدك ايه!؟

سهى:اقصد ان الملاك بتاعك كل يوم الساعة 6بتدخل شارع، والشارع ده مفيهوش غير فيلا دكتور سعد

اللى عندنا فى الكلية تفتكر بقى هتكون بتعمل ايه هناك!؟ وليه دايماً بتروح مكتبه!؟

خالد:اخرسى، انتى كدابه

سهى:لو مش مصدقنى، خد العنوان وروح اتأكد بنفسك

تانى يوم اخذ خالد الورقة اللى فيها العنوان وراح الساعة 5 ونص وفضل مستنى وقرر يمشى لما الساعة جات 6 وربع ومكنتش جات.... بس لسه هيتحرك بعربيته لقاها قدامه.... معقولة فاطمة تطلع كده معقول تكون على علاقة بدكتور سعد... فضل ماشى بالعربية يشوف هتوصل لفين ولأن الشارع اللى دخلت فيه مفيش غير فيلا دكتور سعد.... فهو اتأكد انها عنده دلوقت... فاق من ذكرياته على ايد سهى....

سهى: ايه يا خالد مش هنرقص!؟

خالد: يلا طبعاً

خلص خالد سهرته وروح بالليل وكان والده مستنيه كالعادة....

رفعت: استنى عندك، انت رايح فين!؟

خالد: طالع اوضتى يا بابا

رفعت: انت فاكرك انك فى فندق، وانى هصرف عليك وانت بتصرف فلوسى على الزبالة اللى تعرفهم، امشى اطلع برا ومتدخلش البيت ده غير وانت بنى آدم محترم، بتعرف تتحمل المسؤولية

مشى خالد وراح بات عند محمد... ورفعت فضل قاعد ندمان انه دلعه وكان بيحبليه كل طلباته من غير نقاش، بعد اسبوع لما جه خالد الكليه شاف فاطمة طالعة من مكتب دكتور سعد... بص ليها بصة احتقار ومشى.... لكن فاطمة وقفته

فاطمة: خالد ارجوك عايزة اتكلم معاك

خالد: مش فاضى

كان لسه هيمشى.... بس فاطمة وقفته....

فاطمة: انت بتعمل فيا كده ليه!؟

خالد: انتى اللى عملتى فيا كده ليه!؟ لما انتى بتحبى غيرى ومعاه مقولتيش ليه!؟

فاطمة: انت بتقول ايه!؟

خالد: يقول عن علاقتك بدكتور سعد

فاطمة: انت اكيد اتجننت، جبت الكلام ده منين!؟

خالد: انا شوفت بعنيا، مكنتش مصدق سهى بس اخدت العنوان وروحت، لقيتك داخلة الشارع اللي مفيهوش
غير فيلا دكتور سعد

فاطمة: سهى شافت اللي هي عايزة تشوفه وبس، وحتى انت كمان شوفت اللي انت عايزه وبس، كلكوا
شوفتوا الشارع اللي فيه فيلا دكتور سعد، لكن محدش اخذ باله من ورشة الاوسطا متولى ابويا، اللي بنزل
اساعده فى الورشة عشان اخفف عنه

خالد: طيب وليه مقولتليش؟! ولا حتى لسهى!؟

فاطمة: عشان انت مسألتنيش، انت اتهمتنى وحكمت عليا ومسبتنيش ادافع عن نفسى، وسهى مش هتفهم
معنى انك تشتغل وتتعب وتتحمل مسؤوليه، كل اللي تعرفه الفستان ده بكام واهلك مين وهتسهرى فين!؟
يهمها المظاهر لكن مش الشخص اللي قدامها

خالد: طيب وليه تعرضى نفسك للكلام!؟

فاطمة: كلام الناس، الناس اللي بيشفوك من برا لكن محدش بيعبس بيبك، لو موجوع ولا تعبنا ولا حتى
جعان ونمت من غير عشاء، انا ابويا اتحدى الكل عشانى لانه صعيدى، وكان صعب انه مجبش ولد
والاصعب لما قرر انى اتعلم واكمل، ابويا ادانى ثقة وعارف انى قدها، تفتكر بعد كل ده معملش المستحيل
عشانه

خالد: بس الشغل متعب عليكى!؟

فاطمة: كان فى الاول بس متعب لكن اتعودت عليه، بقيت اساعده واصلح معاه العربيات، وابويا بيفتخر بيا
مش بيحط رأسه فى الارض انه جاب بنت ولا هجبله العار

خالد: انتى تشرفى اى حد تكونى فى حياته، انا اسف انى شكيت فيكى بس والله من حبى وغيرتى
عليكى، ارجوكى سامحينى وادينى فرصة ثانية

فاطمة: هديك فرصة ثانية بس بشرط

خالد: ايه هو!؟

فاطمة: ترجع زى الاول، تذاكر وتاخذ بالك من مذاكرتك ومستقبلك وبلاش سهر، يلا دلوقتى اتفضل روح
ارتاح

خالد: لا مش هروح دلوقت

فاطمة:إليه انت شكلك تعبان اوى

خالد:اصل انا قاعد عند محمد الفترة دى، ولازم استنائه نروح سوا

فاطمة:إليه!؟

خالد:اصل بابا زعل منى لما شافنى كده

فاطمة:اه مفهوم، طيب اسمع عندنا اوضة فوق السطح يعنى لو ينفع وتيجى فيها، لو مش هيزعلك عشان بسيطة وكده

خالد:اكيد موافق، هو انا لاقى عشان اتأمر واهى فرصة اكون جنبك

فاطمة:طيب اسمع انا هتكلم مع بابا واقولك الرد بكره،مع السلامة

خالد:خدى بالك من نفسك، سلام

روحت فاطمة وحكت لأمها كل اللى حصل والسبب اللى كان وراء تصرفاته...وانه حاليا مش لاقى مكان يسكن فيه

زينب:اه وتفكرى اللى بيحب بجد بيشك فاللى بيحبه!؟

فاطمة:يعنى ايه!؟

زينب:يعنى اللى بيحب بجد لو شاف حبيبته فى حضن حد تانى هيكذب عيونه ويصدقها، وانتى اللى بكلمة صدق عنك، مع انه المفروض يدافع عنك وقت ما الكل يكون ضدك ويكون هو سندك، عموما مش موقف واحد اللى يوضح الظروف هتورينا

فاطمة:طيب ممكن نكلم بابا ويأخذ الاوضة اللى فوق السطح، واهى مقفولة مش بنعمل بيها حاجة

زينب:هتكلم معاه واقولك رده الصبح

عدى اليوم وتانى يوم الصبح وقبل ماتنزل بلغتها امها انه ابوها وافق...وممكن يجى من النهاردة فيها وهى هترتبها....وفى الكليه بعد المحاضرات.....

فاطمة:بابا وافق وتقدر تيجى من النهاردة، العنوان فى الورقة دى

خالد:انا بجد متشكر جدا، هروح اخذ هدومى من عند محمد واجى

روح فاطمة وكانت امها رتبت الاوضة وجهازت كل حاجة....وجه معاد درس فتحى وهو قاعد مع فاطمة سمعوا خبط الباب...قام فتحى يفتح....

فتحى:حضرتك عايز مين!؟

خالد:مش ده بيت الاوسطا متولى

هنا طلعت فاطمة....

فاطمة:اهلا يا خالد، اقدملك فتحى ابن عمى وده خالد زميلى فى الكلية

فتحى:اهلا اتشرفت بيبك

خالد:اهلا بيبك، انا اللي اتشرفت

دخل خالد وقعد معاهم وحس انه واحد منهم واتغدوا كلهم سوا ومعاهم الاوسطا متولى....عرف فتحى ان خالد هيسكن فى الاوضة اللي على السطح...وكان مستغرب ان شكل خالد ولبسه بيقولوا انه غنى....

بعد الغداء طلعت فاطمة وامها يوصلوا خالد لاوضته....

زينب:معلش بقى الاوضة مش قد المقام

خالد:لا بالعكس دى جميلة اوى، شكرا ليكوا

زينب:طيب نسيبك ترتاح وهنستاك على العشاء بقى

خالد:لا معلش انا هنام وارتاح بقى

زينب:طيب عن اذنك يابني

نام خالد وكأنه منمش من سنين رغم بساطة الاوضة لكنها مليانة بالحب والحنان وفاطمة كانت فى اوضتها فرحانة اوى انها قدرت تساعد وتقف جنبه...أما فتحى كان قلبه مليان بالغيرة من نظرات الحب اللي شافها فى عيون خالد لفاطمة...بس هو مش متأكد لو فاطمة بتبادلله الحب ده...

مر شهر وخالد ملتزم بالمحاضرات ونزل اشتغل كمان وبقي يصرف على نفسه... وفاطمة كانت بتذاكر وتنزل الورشة وكل يوم بيمر بيعرفوا بعض اكثر وبيقضوا اوقات اكثر بيرحوا الكلية مع بعض وبيرجعوا مع بعض....وبيأكلوا ويشربوا مع بعض وسهى كان بيزيد غلها وحقدھا على فاطمة وراحت بلغت رفعت باللى عرفته....

سهى:حضرتك مينفعش تسيب خالد يتبهدل كده، لا مركزك ولا اسمك يسمح بده

رفعت:حصل ايه!؟

سهى:ده ساكن فى حى شعبى وفى اوضة فوق السطح، كمان شغال وبيقبض كام مليم وشكله اتغير خالص

رفعت:الكلام ده يفرحنى، انه بدأ يعتمد على نفسه ويكون قد المسؤولية فعلا

قربت امتحانات الكل فاطمة وخالد وحتى فتحى....استنتى رفعت لما الامتحانات خلصت وراح لأبنه فى شغله....

رفعت:ازيك يابنى وحشتنى

خالد:بابا، وانت اكتر

رفعت:مش هترجع البيت بقى، انا عملت كده من خوفى عليك، وعشان تتعلم الدرس

خالد:اطمن يابابا انا اتعلمت واتغيرت فعلا، البركة فى فاطمة

رفعت:دى البنات اللى غيرتك،انا عايز اشوفها، روح دلوقت هات هدومك وارجع الفيلا، وابقى كلمها حددلى معاد معاها

خالد:حاضر يابابا

وصل خالد للبيت وحكى لأوسطا متولى على اللى حصل وان والده عايزه يرجع

متولى:وماله يابنى عمر ما الضفر يطلع من اللحم، ده ابوك مهما يعمل ربنا بخليكوا لبعض، وای وقت احنا بيتنا مفتوح واحنا عيلتك الثانية

خالد:طبعا ياعمى ربنا يخليك ليا

قبل مايمشى خالد وهو بيسلم على فاطمة...

خالد:بابا عايز يقابلك، هكلمك احدد معاكى معاد

فاطمة:يقابلنى انا!ليه!؟

خالد:عشان يشوف عروسة ابنه طبعا

مر اسبوع وكانت فاطمة مركزة مع فتحى اللى بيمتحن....وفجأة رن التليفون وكان خالد بلغها بالمعاد
ومكان الشركة بتاعة والده....تانى يوم الصبح راحت الشركة فى المعاد ودخلت مكتب السكرتيرة...

فاطمة:رفعت بيه موجود!؟

سمر:ايوه اقوله مين!؟

فاطمة:فاطمة...

سمر:اتفضلى هو منتظرك

دخلت فاطمة وهى خايفة من المنظر ومن ضخامة الشركة....وخايفة من الحوار اللى هيحصل بينها وبين
رفعت بيه...

رفعت:تعالى اتفضلى، تشربى ايه!؟

فاطمة:لا شكرا

رفعت:اكيد مستغربة سبب المقابلة، اولا حبيت اشكرك على اللى عملتية مع ابنى، وانه اتغير بفضلك، ثانيا
اتفضلى الظرف ده ليكى

فاطمة:ده لأيه!؟

رفعت:ده مقابل مساعدتك لأبنى، ولو محتاجة شغل انا ممكن اساعدك!؟ انا عارف كل ظروفك ومقدرها،
لكن ان تربطكوا علاقة ببعض مستحيل، انا مش هحط ايدى فى ايد ميكانيكى

فاطمة:انا عملت الواجب معاه، وشغل حضرتك ده مش عايزاه، مستحيل فى قاموس حضرتك لكن فى
قاموس الفقراء اللى زى حالتى اتعودوا يدوا الحب دون مقابل، اتعودوا لو هيموتوا من الجوع ومفيش غير
لقمة هيدوها للضيف وهما لا، انا مش محتاجة فلوسك، الانسان مش بفلوسه لكن بأصله وانا اصلى طيب،
والميكانيكا ده اللى بنته عرفت ابنك ازاي يتحمل مسؤولية، الميكانيكى اللى وقف معاه وكان بيساعده عليه
افضل عليه عن اذن حضرتك، وبالنسبة لفلوس حضرتك متلزمينش

مشيت فاطمة من شركته ودموعها فى عينها انه جه على كرامتها....روحت وقابلت فتحى اللى كان طائر
فى السماء....

فتحى:ازيك يا فاطمة!؟

فاطمة: الحمد لله

فتحي: تسمحيلى اعزملك على حاجة، انا حليت فى الامتحانات كويس كلها بفضلك

فاطمة: ده بفضل تعبك، معلى انا تعبانة شوية ولازم ارتاح

فتحي: اجبك دكتور

فاطمة: لا ملوش لزوم، عن اذنك

طلعت فاطمة وفضلت تعيط فى اوضتها... دخلت عليها امها واخذتها فى حضنها....

زينب: اكيد جرحك صح!؟

فاطمة: عايرنى انى فقيرة ومش من مستواه، ولا شرف ليه انه يناسبنا

زينب: طيب وخالد رايه ايه!؟

فاطمة: معرفش حاجة باللى حصل

زينب: طيب قومى اغسلى وشك ونشوف هيقول ايه، رايه بس اللى هيخليكى تتصرفى ازاي!؟، هيكون

راجل وهيتحمل مسؤولية حبه ويدافع عنه، ولا جبان وهيسمع رأى والده!؟

مر اسبوع وخالد متكلمش ولا بعت اى رسالة... وفاطمة دموعها مش بتنشف وتعبت لحد ما رن موبايله

وكان خالد....

فاطمة: الو....

خالد: الو يا فاطمة، فاطمة ارجوكى اسمعيني انا اسف مش هقدر اكمل معاكى، انا اتعودت على مستوى

عيشة وصعب اغيره، اه ممكن استمر فى وضع الاوضة اللى على السطح والشغل بس مش كثير، هزهق

وهمل، انا مش هقدر اكمل وخصوصا انى محتاج لبابا اوى، ومش هقدر ازعل اهلى منى، اسف بس حبنا

كان غلط لاننا مش من مستوى بعض

فاطمة: ها خلصت، احنا فعلا مش من مستوى بعض، انا غنية عنك بالناس اللى بيحبونى، بشغلى بحياتى

مش زيك بعتمد على فلوس ابويا وبستنى المصروف منه، انت فعلا ماستاهلش لا حبي ولا وقتى جنبك انا

كنت ب100 راجل، ساعدتك وانت بعتنى مع اول موقف بينا، انا عملت عشائك المستحيل وانت مقدرتش

تعمل الممكن، انت جبان وهتفضل دايمًا عايش ملكش قرار زى اللعبة فى ايد الكل، بيحركها وواحدة قوية زى متقبلش بواحد ضعيف زيك كده، سلام

قفلت السكة وحكت لامها عن كل اللي قاله وكل اللي هي قالتة....

زينب:برافو عليكى اتصرفتى صح، واوعى تندمى عليه ابدًا وصدقينى هو اللي هيندم

عيطى، اصرخى طلعي كل اللي جواكى

فاطمة:لا كفاية دموع، الدموع متنزّلش غير على الغالى

بعد كام شهر شافت فاطمة صور فرح خالد وسهى فى كل المجالات....والكلمة الوحيدة اللي قالتها...تستاهلوا بعض اصلكوا من طينة واحدة....مرت السنين وفاطمة بقت دكتورة فى الكلية...وليها منصب فى السلك الدبلوماسى....وبعد ما خلصت محاضرات وراحت مكتبها دخل صبحى الفراش عليها....

صبحى:فى واحد عايز يقابل حضرتك

فاطمة:خليه يدخل ياعم صبحى

دخل الضيف والمفجأة انه كان خالد....

خالد:ازيك يادكتورة فاطمة

فاطمة:اهلا، خير فيه حاجة اقدر اساعدك بيها!؟

خالد:انا جاى اعتذر ليكى،انا اسف

فاطمة:ياه الاعتذار متأخر 4سنين، اعتذارك مش مقبول يا استاذ خالد

خالد:ارجوكى بلاش تعذبينى وتعالى نبدأ من جديد، انا هقول لبابا انى هتجوزك واكيد هيوافق

فاطمة:مين قالك انى هوافق، انا يمكن اتغيرت فى اللبس والمكان اللي عايشة فيه، بس فى الاول والاخر ابويا الاوسطا متولى الميكانيكى اللي والدك رفض يحط ايده فى ايده، وقال ان مركزه ميسمحش ايه هستعر من اهلى عشان اكون لايقة بعيلتك الكريمة!؟ انا زى الشجرة العالية اللي جذورها ثابتة وجذورها دول اهلى وانت زمان كنت ريح وجاي توقع الشجرة دى بس جذورها حمتها

خالد:لا بابا هيوافق، انتى اتغيرتى وبقيتى حاجة كبيرة اوى واكيد هيوافق

فاطمة:وانت بقيت صغير اوى فى نظرى، اكلمك بلغة تفهمها احسن انا واحدة دكتورة فى الجامعة وليا منصب فى السلك الدبلوماسى، لفيت بلاد كتير وعندى طموح واحلام، اتجوز واحد بياخذ لسه مصروفه من والده ليه واحد معندوش شخصية ولا طموح، وعلى فكرة انا اتخطبت لواحد من اصلى ويشرفه يحط ايده فى ايد ابويا، واحد مهندس وعنده شركة مقاولات كبيرة، والاهم عنده طموح زىى وببشجعنى وببحبنى جدا، اتخطبت لفتحى ابن عمى وفخورة جدا بأختياري ده، عن اذنك بقى عشان مش فاضية، اتشرفت بزيارتك

خرج خالد من المكتب زعلان وقبل مايتحرك شاف فتحى مستنيها ببوكيه ورد...وبعد شوية خرجت فاطمة وركبت مع فتحى العربية ومشىوا....

حسن:ياه الندم المتأخر اسوأ عقاب فعلا

فريدة:ده غياب مش عقاب

حسن:هو فعلا غبى انه يضيع من ايديه واحدة مليون راجل يتمناها، كل راجل بيتمنى ست قوية تقف فى ضهره وتسنده

فريدة:معظم الرجالة بتخاف ترتبط بالست القوية،فبيحلموا بيها بس، لكن يرتبطوا بالضعيفة اللى معندهاش شخصية، وبينسوا ان القوية وقت الشدة هتكون جيشهم الوحيد وقلبها الحصن اللى هيتخبى فيه عن عيون العدو

حسن:الراجل الضعيف بس هو اللى بيخاف من الارتباط بالست القوية، بس اوقات كتيرة الست بتفهم القوة غلط وبتخليها تفقد جزء من انوثتها، بتكون فاكرة القوة فى الصوت العالى والزعيق للراجل

فريدة:معاك حق، بس الست القوية ذكية جدا بتعرف تكون جيش من الرجالة فى غياب راجلها، وبمليون ست فى حضوره

حسن:عندك حق فعلا

فريدة:ياه، انا سهرتك معايا والشمس قربت تطلع علينا

حسن:محسنتش بالوقت خالص وانا معاكى، بقولك ايه بتحبى الشروق!؟

فريدة:اه جدا

حسن:طيب يلا معاكى ربع ساعة تجهزى فيها عشان نلحقه

فريدة:انت مجنون اكيد، نلحق ايه!؟

حسن:اه مجنون، نلحق الشروق فى اجمل مكان هتشوفيه بعيونك

فريدة:طيب هدخل اجهز واجيلك

بعد شوية كانوا برا الفندق كله.....

فريدة:هنروح فين بقى!؟

حسن:متسألش، امشى وبس ومش هتندمى، قوليلى عمرك جربتى احساس انك تمشى ورجلك تأخذك
لمكان متعرفهوش، المهم ان روحك هى اللى اخذتك وخلص

فريدة:طيب يلا ناخذ تاكس!؟

حسن:بقولك نمشى لحد مانروح لمكان منعرفوش تقوليلى تاكسى، تسمحيلى نتوه مع بعض النهاردة!؟

فريدة:هههه اسمحك

مشيوا مع بعض وعلى الرغم ان المسافة كانت طويلة إلا ان فريدة محستش بالمسافة من كثر
الكلام....اتكلموا كثير مع بعض عن طفولتهم وذكرياتهم.....

حسن:اخيرا وصلنا

فريدة:الله ايه المكان الحلو ده، انا مشوفتش فى جماله

حسن:لا ولسه تعالى معايا

مشيوا مع بعض وقعدوا يتفرجوا على الآثار ويتصوروا كثير اووى

حسن:ورينى بقى الصور بتاعتى دى، عشان عمرى ما طلعت حلو فى صورة اتصورتها.

فريدة:وانا عمرى ما اصور صورة وحشة، او اطلع حد شكله وحش

حسن:اشوف واحكم....

فريدة:اتفضل

حسن:الله اول مرة يطلع شكلى حلو فى صورة، للدرجة دى بتحبنى التصوير!؟

فريدة:جدا، لو مكنتش مهندسة كنت ممكن اكون مصورة

حسن:طيب تسمحيلى الكاميرا بقى!؟

فريدة:هتعرف تصور ولا هتفضحننا!؟

حسن:ربنا يستر، اهو اجر ب

قعد حسن يصور فريدة وهى مش واخدة بالها وهى بتلعب وتجرى زى الاطفال....وهى كانت فاكهة انه
بيصور السماء وشكلها والمناظر الطبيعية....

حسن:تحبى تقطرى فين!؟

فريدة:اى مكان انا جعانة جدا، بس انت عرفت ازاي انى جعانة، ولا عشان انت جعان فقولت تعزم!؟

حسن:حسيت بيكى، قلب الام بقى

فريدة:طيب يلا بينا بقى

راحوا فطروا وكانت فريدة مبسوطه اوى انها بتجرب دنيا جديدة وعالم جديد معرفتوش غير لما قابلت
حسن وشافته بعيونه وزى ماتكون بتكتشف نفسها....

حسن:بعد الفطار بقى هاخذك لمكان هيعجبك اوى

فريدة:فين!؟

حسن:لا دى مفاجأة....

فريدة:انا بحب المفاجآت

خلصوا الفطار وفضلوا ماشيين لحد ما وصلوا لحديقة وفيها بحيرة....الحديقة فيها ورد بألوان جميلة اوى
والفراشات عليه وكان اللي محلى المنظر لعب الأطفال وفرحتهم وصوت ضحكهم....

حسن:ها ايه رأيك فى المكان ده بقى!؟

فريدة:تحفة اوى، انا لو حد كان قالى ان المكان ده فى مصر مكنتش هصدق، لولا انى شوفته بعيونى

حسن:تسمحى بعد كده اكون عيونك اللى تشوفى بيها كل حاجة حلوة بس؟!،و دلوقتى قوليلى تحبى تأكلى
فشار ولا ايس كريم!؟

فريدة:ممممم، ممكن فشار

حسن:طيب عن اذنك مش هتأخر عليكى

مشى حسن يجيب الفشار فى الوقت اللى كانت فيه فريدة بتتفرج على الصور وبين الصور شافت صورها
اللى اخدها حسن وهى بتلعب وبتجرى زى الاطفال...فضلت تضحك على شكلها وعلى شكله...

حسن:اتفضللى ياستى الفشار والايس كريم

فريدة:شكرا، بس ليه جبت ايس كريم!؟

حسن:بصراحة لغبطتك وتفكيرك وانا بخيرك بينهم، عرفت انك بتحبنى الايس كريم

فريدة:بحبه اوى بصراحة، اتكسفت اطلبهم هما الاتنين اكون طفسه

حسن:انا فهمت ده من عيونك وعشان كده جبته

فريدة:شكرا، بس جبته عشان فهمتنى من عيونى؟! ولا عشان اسامحك على جريمتك!؟

حسن:جريمتى!؟

فريدة:اه الصور اللى صورتهالى دى وانا شكلى اهيل كده

حسن:قصدا وانتى على طبيعتك، صدقيني انك تكونى على طبيعتك مفيش احلى من كده، وده اللى عملته
انا،يلا بينا افرجك على باقى المكان بقى ولا تعبتى!؟

فريدة:لا متعبتش،يلا بينا

فضلوا ماشين بيتفرجوا على المكان....ويجروا ويضحكوا زى الاطفال اللى بيلعبوا حوالىهم....وفجأة
وقفت فريدة قدام مشهد غريب اوى....شوية اطفال عمرهم حوالى 12سنة....بنت ولد وقعها على الارض
والحلويات بناعتها وقعت منها،وراح يجرى وبعدها جه ولد تانى يساعدها.....

وليد:متز عlish يازينة تعالى قومى، وانا هضربك هيثم ولو على الفشار، خدى بتاعى اهو، متز عlish بقى

زينة:شكرا ياوليد

قامت زينة وجريت بعيد عنه بعد ما اخدت منه الفشار.....فضل وليد واقف مكانه لحد ما جات اللي تأخذ بايديه كالعادة....

هند:تعالى معايا يا وليد متزعش نفسك،ولا تدافع عنها تانى

وليد:شكرا ياهند، انا هفضل دايما اساعدها

هند:انت كل مرة بتساعدها وهى مش بتحس وبتسيبك

وليد:مش مهم المهم انها تكون بخير،يلا بينا بقى

وقفت فريدة مصدومة من الموقف ومن تصرف الاطفال مع بعض...كملت مشى هى وحسن لحد ما شافت البنبت اللي كانت وقعت مع نفس الولد اللي وقعها والغربية انها قدمت ليه الفشار اللي اخدته من الولد اللي ساعدها وسمعتها بتقوله....

زينة:خد الفشار ده بقى ومتزعش منى

هيثم:جيتيه من وليد المرة دى كمان

زينة:ايوه هو اديهولى وانا جبتهولك، عشان انت احلى منه مش زيه، وكمان عندك حاجات ولعب مش عنده

سمعت فريدة الكلام ده وزادت صدمتها من تفكير البنبت دى....فضلت طول الطريق ساكتة وحسن لاحظ انها متغيرة....

حسن:مالك من وقت ما شوفتى الاطفال دول وانتى متغيرة!؟

فريدة:مش مصدقة تصرف البنبت، ازاي بتخدع الولد اللي ساعدها!؟ واخدت حاجة ملكه وادتها لغيره

حسن:هو فعلا تصرف انانى منها، بس هى لسه صغيرة وممكن تتغير

فريدة:الانانية ملهاش دعوة بالسن، اوقات بنكون انانيين وخصوصا فى الحب، بس الانانية الزيادة بتدمر صاحبها

حسن:الانانية فى الحب انك تكتفى باللى بتحبه ومتشوفش غيره، يعنى نحبه اكثر من نفسنا مش نحب نفسنا اكثر، وقتها بنكون بنظلم نفسنا عشان الحب، ونتجنن لو حد قرب من اللى بنحبه ونخبه عن الكل

فريدة:بس الانانية اللى بتكلم عنها هى انك تشوف نفسك ومصالحتك اهم من الكل، حتى لو على حساب غيرك وهتضحى بأكثر حد حبك، المهم نفسك وانت ومصالحتك وبس

حسن:مفيش حكاية من حكاياتك!؟

فريدة:فيه....تحب تسمع!؟

حسن:طبعاً، بقى عادة انى اسمعك، اسمها ايه بقى!؟

فريدة:الأنانية والمخدوع

(الأنانية والمخدوع)

فى مستشفى يوسف على للتجميل فى المنصورة....الكل واقف عشان يشوف نتيجة العملية وخصوصا انها اول عملية يشارك فيها دكاترة اجانب وده لخطورة الحالة....والنهاردة هيفكوا الرباط من على وشها بعد فترة....

يوسف:جاهزة يادنيا نفك الرباط!؟

دنيا:جاهزة جدا عشان اشوف بقيت ازاي

يوسف:ان شاء الله ترجعى اجمل من الاول

فك الرباط وفتحت دنيا عيونها لكن نظرات الشفقة اللى كانت فى عيون الكل فهمتها كل حاجة وان العملية فشلنت....جريت على المراية تشوف وشها واتصدمت....

يوسف:صدقينى احنا عملنا اللى علينا واول مرة المستشفى تجيب دكتور من براء، لأن الحالة كانت خطيرة جدا، وعملنا كل اللى نقدر عليه لأن فيه النار شوهدت الوش كله

دنيا:يعنى ايه وشى مش هيرجع زى الاول، وكل لما ابص فى المراية هشوف التشوهات دى، كل لما ابص فى عيون الناس هشوف الشفقة والعطف او الاشمنزاز ويقرفوا منى، انا عايزة وشى عايزة ارجع جميلة زى ماكنت

يوسف:صعب لان الوش كان مشوه بالكامل، واللى انتى وصلتيه ده حاليا تقدم،انا اسف جدا عن اذنك

خرج الدكتور وفضلت دنيا واقفة قدام المراية تتكلم مع نفسها.....

دنيا:معقولة دى انا اللى كان الكل بيتجنن لما يشوفنى!؟، معقولة الكل هيبعد عنى ويقرفوا منى!؟ مش ممكن اكون دى انا

مسكت دنيا الفازة وكسرت المراية عشان متشوفش وشها المشوه....تانى يوم الصبح صحيت دنيا على صوت خبط على باب اوضتها وفجأة دخل....

دنيا:انت! ايه اللى جابك هنا!؟انت كنت اخر واحد اتوقع انه يزورنى

هانى: حمد الله على السلامة، انا جيت اطمن عليكى مش اكرر

دنيا: تطمن عليا ولا تشمت فيا وانا مشوهة!؟

هانى: انا عمرى ما كنت وحش معاكى، ولا اتمنيت اشوفك فى الحالة دى، دى حالة متمنهاش حتى لعدوى

دنيا: اطمن هرجع حلوة قريب اوى، واحلى من اللى فضلتها عليا، وانا اللى هرميك زى كل مرة، انا هفضل جميلة انت فاهم

هانى: مهما تعالجى تشوه وشك، هتعملى ايه فى تشوه روحك!؟، انا عملت الواجب واطمنت عليكى ربنا يشفيكى

دنيا: هرجع جميلة يا هانى، واجمل من الاول انت فاهم، وهترجع تجرى ورايا تانى

طلع هانى من الاوضة وفضلت دنيا قاعدة تفكر فى حالها قبل سنتين وانها مكنتش كده كانت اجمل بنت فى الجامعة كلها، قبل سنتين فى جامعة المنصورة كلية الاعلام....وقفت مجموعة من الطلاب وكان منهم دنيا وسيف وهانى وانجى....

انجى: يلا بينا عشان نجهز للحفلة يا هانى

سيف: هى امتى الحفلة!؟

هانى: كمان يومين

دنيا: ربنا معاك وتنجح يارب

هانى: يارب، عن اذنكوا بقى، يلا بينا يا انجى عشان البروفة

سيف: بقولك ايه عايزك فى موضوع مهم!؟، يلا بينا فى مكان هادى نتكلم فيه

خرجوا من الكلية وركبت العربية مع سيف اللى فضل طول الطريق ساكت متكلمش

دنيا: ها يا سيف ايه الموضوع المهم!؟

سيف: انتى بتهربنى منى ليه!؟

دنيا: بهرب ايه يابني ما انا معاك اهو

سيف: لا بتهربى، اكثر من مرة اقولك تحددى معاد مع اهلك وانتى تتحججى بأى حاجة، دنيا انتى بتحبينى
صح!؟

دنيا: ايه الكلام اللى انت بتقوله ده، معقولة تشك فى حبى لىك

سيف: او مال بتأجل فى موضوعنا ليه!؟

دنيا: عشان لسه فاضلنا اخر سنة، لسه الشغل وكده ولا مش عايزنى اشتغل

سيف: و ايه المشكلة لما نتخطب ولما نخلص نتجوز، وانتى عارفة انى مش ممانع موضوع الشغل ده،
وعارفة كمان انى مش محتاج، وشركة بابا تحت امرى، يعنى الشغل بتاعى موجود ومفيش حاجة تمنعنا

دنيا: يا سيف يا حبيبى انا معنديش مانع، بس نستنى لحد ما نخلص اخر سنة دى

سيف: ماشى يا دنيا

دنيا: خلاص بقى متزعلش

سيف: مش زعلان وعشان اثبتلك هاخذك النهاردة ونسهر سوا

دنيا: بجد والله فين!؟

سيف: اى مكان تحدديه

دنيا: نروح نسهر ونرقص

سيف: خلاص الساعة 9 هكون تحت البيت

دنيا: طيب يلا بقى وصلنى، عشان بنت عمى راجعة النهاردة من السفر

سيف: حاضر

وصلها سيف للبيت كالعادة.... وقبل ما تطلع اكد عليها المعاد...

سيف: هكون هنا 9 بالدقيقة بلاش تأخير

دنيا: عيونى يا سيفو

طلعت دنيا وعرفت ان بنت عمها فاتن وصلت....والحقيقة ان فاتن مش بنت عمها وبس لا دى اختها الكبيرة وصاحبيتها الوحيدة اللي عارفة كل اسرارها على الرغم من خلافهم المستمر بسبب اختلاف طريقة تفكيرهم....بس دايما فاتن بتنصحها

دنيا:حمدالله على السلامة ياتونة، وحشاني اوى والله

فاتن:الله يسلمك،انتى اكثر والله، ها طمنيلى عن اخبارك بقى انتى وهانى!؟

دنيا:هانى ايه بس!؟ يابنتى انا سييته من زمان، انتى مش عايشة فى الدنيا

فاتن:لا عايشة بس ميتة فى الدنيا بتاعتك، سييته ليه بقى؟، انا كنت سيباكوا اخر اجازة ليا كنتوا كويسين

دنيا:اه وهو لسه كويس ويحببنى

فاتن:طيب وفين المشكلة؟

دنيا:المشكلة انه فقير، معندوش غير الاحلام والطموح وبس، لكن سيف عنده حاجات كتيرة بتحلم بيها اى بنت

فاتن:وهو الفقر جريمة تمنع من الحب، لما هو كده كنتى ارتبطتى بيه من الأول ليه!؟

دنيا:عشان مكنتش قابلت سيف، ولا كنت اعرف ان مصلحتى معاه، وانه هيحقللى احلامى، فى الوقت ده كان هانى مشهور فى الكلية بصوته الحلو، والبنات كلهم هيموتوا عليه، فكان من المؤكد انه يحببنى انا عشان اجملهم ويفصلنى عنهم وكتب فىا شعر كتير واغانى اكثر

فاتن:هو الحب بالمصلحة، معنى كده ان لو فيه حد احسن من سيف ومصلحتك معاه هترمى سيف وتروحيه!؟

دنيا:طبعاً، المهم يحققللى احلامى

فاتن:وسى سيف ده ايه الموجود فيه مكنش موجود فى هانى!؟

دنيا:الاسم والفلس، وباباه عنده شركة اعلانات، وهيساعدنى اكون ممثلة زى ما بحلم بالظبط

فاتن:طيب وهانى وحبه ليكى؟

دنيا:الحب مش بياكل عيش، لو فى يوم معناش فلوس الحب هيصرف علينا!؟

فاتن: طيب واتعرفتى على سى سيف ده ازاي؟

دنيا: فى نفس اليوم اللى سيبت فيه هانى، بدأت اتقرب انا وسيف من بعض، زى ما كنت مخططة

فاتن: مخططة؟! هو فيه حب بييجى بالخطط؟!

دنيا: اه فيه الحب فى وجهة نظرى انا

فاتن: ازاي بقى؟!

دنيا: هقولك، انا اول ما دخلت الجامعة اتعرفت على واحدة اسمها انجى، كنا دايما مع بعض وبنعمل كل حاجة سوا، فى يوم بعد المحاضرات لقتها بتقولى....

انجى: قوليلى بقى عندك ايه بكره؟!

دنيا: معنديش حاجة بس ليه؟

انجى: هنحضر حفلة لأحلى صوت ممكن تسمعيه فى الدنيا

دنيا: ياه للدرجة دى؟! شوقتينى اسمع صوته

انجى: بكره هتسمعيه ومتأكد انه هيعجبك اوى، هفوت عليكى بكره على البيت، عشان نروح سوا الحفلة

دنيا: خلاص هكون جاهزة

تانى يوم بالليل.... فاتت انجى على دنيا وراحوا الحفلة وكالعادة قعدت انجى فى الصف الاول وجنبها دنيا.... طلع هانى على المسرح وغنى والكل انبهر ووقف وصقف ليه.... وبعد ما الحفلة خلصت الكل راح يتصور معاه وفضلت انجى واقفة مكانها هى ودنيا وفجأة جه هانى عليهم....

هانى: ازيك يا انجى؟! ها الحفلة عجبك؟!

انجى: هايلة ياهانى كالعادة ومستنتية الاحسن، اعرفك على دنيا

هانى: ازيك يا دنيا

دنيا: اهلا بيك، بجد الحفلة حلوة اوى وصوتك احلى

هانى: شكرا ليكى، طيب عن اذنكوا بقى.

انجى:اتفضل

مشى هانى وفضلت انجى واقفة باصة عليه لحد ما اختفى من قدامها....

دنيا:ايه يابنتى خلاص مشى والله

انجى:ايه يابنتى مالك!؟

دنيا:ايه عينك لمعت كده، اول لما شوفتيه وكنتى تايهة كده مع صوته، ده حب كبير اوى بقى، وانا مش
واخدة بالى

انجى:لا ده مجرد اعجاب بصوته

دنيا:اعجاب بصوته ولا بيه!؟،انتى عيونك فضحتك اصلا يابنتى

انجى:بصراحة اه انا معجبة بيه جدا وبصوته وبكل حاجة، ويلا بينا نروح عشان الوقت اتأخر

طول الطريق ودنيا بتلح على انجى تحكيها عن حكايتها مع هانى....

دنيا:قوليلي بقى اتعرفتى عليه ازاي!؟

انجى:بطللى زن بقى، هانى زميلنا فى الجامعة وانا معجبة بيه و بصوته، من اول مرة اتقابلنا فيها، عشان
انا بساعده فى فكرة العروض، وانا معجبة جدا بشخصيته

دنيا:معقولة معانا فى الكلية، طيب قوليلي هو ملمحش انه بيحبك ولا حاجة!؟

انجى:لا مقلش حاجة ولا انا قولت طبعا

دنيا:يعنى متكلمش وانتى قاعدة كده!؟

انجى:هعمل ايه يعنى!؟ كفاية انى هكون معاه وبس ده اللى يهمنى

دنيا:لا ده انتى طموحك قليلة اوى

انجى:اه شوفتى بقى

وصلت انجى دنيا على بيتها....وبعدين وصلت انجى على بيتها وفضلت تحلم بهانى وهى شايفاه نجم كبير
والكل بيشاور عليه، تانى يوم الصبح فى الجامعة وصلت دنيا قبل ماتوصل انجى وكان هانى فى الكلية

والبنات حواليه عايزين يتصوروا معاه...لمح هانى دنيا وهى رايحة على الكافتيريا وبعد لما خلص التصوير...راح عندها....

هانى:صباح الخير، انتى فاكرانى!؟

دنيا:اه طبعا فاكراك، اتفضل اقعد

هانى:مش هضايقتك يعنى!؟

دنيا:لا خالص، اتفضل

هانى:اومال انجى فين!؟

دنيا:لسه مجتش، للدرجة دى بتوحشك!؟

هانى:لا مش قصدى، بس انجى ليها فضل كبير عليا وعلى اللى وصلته

دنيا:انت صاحب الفضل على نفسك، ومحدث ليه فضل عليك خالص، انت صوتك حلو واحساسك احلى

هانى:لا انا لولا انجى وافكارها، العرض مكنش هيبقى ليه قيمة، وشكرا على كلامك ده

دنيا:دى اقل حاجة عليك، انا مكنتش اعرف انك زميلنا غير بالصدفة

هانى:لا انا معاكوا ونفس الدفعة كمان

دنيا:دى حاجة كويسة اوى، ممكن رقم موبايلك بقى ولا مش بتديه لمعجبين!؟

هانى:لا طبعا،اتفضليه

فضلت دنيا تتكلم مع هانى وبيهزروا ويضحكوا لحد ما انجى وصلت...

انجى:اسفة اتأخرت عليكموا، بس كويس يادنيا ان هانى موجود عشان متكونيش لوحدهك

دنيا:من غيره مكنتش اعرف هعمل ايه!؟

هانى:لا متقوليش كده انا معملتش حاجة

انجى:طيب يلا بينا على المحاضرات بقى

بعد المحاضرات اتعدوا سوا ودخلوا السينما وعدت فترة وهما ال3مش بيبيعدوا عن بعض وكل يوم بتزيد صداقتهم....ده اللي انجى كانت فاهماه لكن فى الحقيقة ان دنيا مخططة لحاجة تانية وبدأت تكلم هانى وتقرب منه لحد ما انشغل هانى ودنيا عن انجى ببعض....بقوا يمشوا سوا ويخرجوا سوا ويسهروا بالساعات مع بعض يتكلموا فى الموبايل...لحد ماجه يوم الصدمة اللي عرفت فيه انجى الحقيقة...صحيت على رنت موبايلها....

انجى:الو ياهانى، ايه تقابلنى؟، طيب هكون فى المعاد ان شاء الله

قفلت انجى معاه الخط وهى مستغربة لأن هانى بقاله فترة متغير من نحيثها ومشغول عنها وحتى صاحبها الوحيدة دنيا مبعثش زى الاول هى كمان....جهزت انجى نفسها وراحت المكان اللي هتقابل فيه هانى.....

انجى:اسفة لو اتأخرت عليك

هانى:لا انا اللي جاى بدرى

انجى:خير ياهانى فيه ايه!؟

هانى:خير، تحبى تشربى ايه الاول!؟

انجى:لا مش عايزة، فيه ايه ياهانى شكلك مرتبك؟

هانى:انا مش عارف اتكلم ازاي او ابدأ منين!؟بس قولت انا مش برتاح غير فى الكلام معاكى، وانتى اللي هتساعدينى

انجى:انت كده قلقتنى اكرر، فيه ايه!؟

هانى:انجى انا بحب، ومش عارف اقولها ازاي انى بحبها!؟

انجى:ايه بتحب!؟، قولى مين دى اعرفها!؟

هانى:ايوه هى قريبة منى جدا، واتعرفت عليها بسببك وعايزك تقوليلها

انجى:انت بتتكلم عن مين!؟

هانى:عن دنيا هيكون مين غيرها يعنى، انتوا صحاب وانا عايزك تقوليلها انى بحبها وتعرفى رأيها

انجى:واشمعنى انا، اللي بتطلب منها طلب زى ده!؟

هانى:لأنك اجدع من اجدع صاحب عندى، وبعدين انتى صاحبتها و هتعر فى تتكلمى معاها بقى، وتظبطينى عندها

انجى:حاضر هكلمها بكره ان شاء الله

هانى:لا بكره ايه، ياريت دلوقت

انجى:ياه انت مستعجل اوى!؟

هانى:اصلى بحبها اوى، وعايىز اكون معاها النهاردة قبل بكره

انجى:ولحقت تحبها امتى!؟

هانى:من اول مرة لمحتها فى الكليه،وطول الحفلة مشيلتش عينى من عليها،خطفت قلبى،ممكن بقى تبليغها وتعر فى رأيها؟

انجى:حاضر هروحها دلوقت

هانى:ابقى طمينينى، مع السلامة

مشيت انجى وهى مصدومة مش مصدقة اللى سمعته، ازاي هتروح تقول لواحدة ان اللى بتحبه بيحبها والواحدة دى اعز صاحبة ليها!؟...وعارفة انها بتحبه معقولة تعمل فيها كده...قررت هتتصل بيها وتفهم منها الموضوع كله....

انجى:الو يا دنيا، عايزة اشوفك

دنيا:معلش اصلى عندى مشاوير

انجى:مش هعطلك واقولك عشان اوفر عليكى، الوقت هقابلك فى الكافيه جنب بيتك

دنيا:خلاص هجهز واستناكى هناك

انجى:وانا هكون عندك بعد دقائق

وصلت انجى وكانت دنيا مستنيه....

دنيا:خير يا حبيبتي فيه ايه!؟

انجى: تخيلى يا دنيا هانى مفكر انك بتحبيه؟! وهو كمان بيحبك، تخيلى دى بقى، حاسس انك بتبادلبيه نفس شعوره

دنيا: طيب ومستغربة ليه؟! دى حقيقة

انجى: انتى بتهزرى صح!؟

دنيا: لا بتكلم جد

انجى: انتى ازاي تعملى فيا كده؟! انتى عملتى فيا اللي عدوتى تتكسف تعمله، انتى عارفة انى بحبه يا دنيا معقولة تعملى فيا كده واحنا صحاب!؟، انتى عارفة مشاعرى نحيته، يعنى لو مش عارفة كنت هقول ماشى، بس ليه!؟

دنيا: اه بحبه، وعارفة انك بتحبيه ويمكن ده اللي خلانى احبه، انى بحب المغامرة واحب اخطف الحاجة كده

انجى: انا مش مصدفاكى، انتى بجد وقحة يعنى مش بتحبيه، انتى بس عايزاه عشان فى ايدي

دنيا: اه عادى مش بحب الحاجة السهلة، واه عايزة اخده منك، يمكن الفترة دى عشان مصلحتى معاه وان كل البنات هتموت عليه وابقى انا اللي اخدته، وبعدين عايزاه يبصلك ويسيبنى وانا اجمل منك ازاي!؟

انجى: انا بجد مصدومة فيكى، انتة مريضة ولازم تتعالجى، انا هقول لهانى انه يبعد عنك

دنيا: مش هيصدقك عشان بيحبنى، وهقوله انك بتغيرى منى

انجى: انتى ازاي كده؟! وليه تعملى فيا كده؟! وانا معملتش ليكى حاجة وحشة، طيب ارجوكى هو فعلا بيحبك بلاش توجعيه وحافظى عليه

دنيا: بقولك ايه نصايحك دى خليها لنفسك، انا حرة واعمل اللي انا عايزاه، ومتخافيش عليه ياقلبي طول ما مصلحتى معاه هفضل احبه، لو مصلحتى خلصت هرميهولك تشبعى بيه

انجى: انتى مش معقول تكونى انسانة؟! انتى شيطانة فعلا

دنيا: احترمى نفسك، انا مش شيطانة انا انسانة فاهمة الدنيا صح وبدور على مصلحتى، وهمشى عشان عندي حاجات اهم منك بكثير

مشيت دنيا وانجى مش مصدقة حقارة اللى عملته معاها....الوجع اللى سابته ليها متمنهوش لعدوتها حتى وهى كانت معاها صاحبة واخت...وهى قابلت الحب بالحقارة والحدق وفجأة قطع تفكيرها رنة موبايها

انجى:الو، خير ياهانى!؟

هانى:شكرا اوى يا انجى انتى اجدع من اجدع صاحب ليا، ومش هنسى ليكى موقفك ده بجد، بنا يخليكى ليا

انجى:حصل ايه!؟

هانى:دنيا لسه قافلة معايا وقالتلى انها بتحبني،لولاكى مكنتش هعرف اتصرف فعلا ولا كانت هتعرف.

انجى:المهم انك تكون مبسوط، انت تستاهل كل خير بجد

هانى:طيب عن اذنك بقى، عشان هروح اقابلها كمان شوية

انجى:ماشى، متنساش تأخذ ورد ليها

هانى:حاضر، شكرا يا انجى بجد على مساعدتك ليا

قفلت معاه انجى وهى منهارة من العياط على حبيبها اللى ضاع وراح لمين لواحدة كانت بتمثل عليها طول الوقت انها صاحبته...روحت انجى ودخلت اوضتها وكل تفكيرها ازاى هتتعامل مع الموقف وهى شايفة حبيبها مع غيرها، عدت فترة وانجى بتتعامل على قد الموقف وبس وفى الحقيقة ان هانى محسش بده اوى لأنه كان مشغول مع دنيا.....لحد ما جه الوقت اللى قابلت فيه سيف دنجوان الجامعة...الى كل البنات هتموت عليه وعلى شكله ولبسه وعريته واى بنت بتحلم بأشارة منه...سمعت دنيا عنه وعرفت انه غنى وابن صاحب اكبر شركة دعاية وابنه الوحيد وكل حاجة ملكه....جه الوقت اللى تتخلص فيه من هانى وتكون مع سيف بس لازم هو اللى يتعرف عليها.....فكرت فى الخطة اللى هتقربها منه وبدأت فيها، جه وقت المحاضرة والكل مستعجل عشان يدخل للمدرج وخبطت دنيا فى سيف....

دنيا:ايه ده مش تفتح كده وقعت الكتب!؟

سيف:انا اسف جدا والله، ممكن اساعدك

دنيا:لا شكرا، عن اذنك

مشيت دنيا وهى بتضحك لأن خطتها نجحت واستغلت فيها جمالها وسيف فضل واقف مكانه بيتكلم مع نفسه....

سيف:يخربيت جمالك، معقولة الجمال ده دى حورية وطالعة من البحر، انا لازم اعرف انتى مين؟!وتكونى ليا

عدت فترة ودنيا مش بتترد على هانى رغم اتصالاته المستمرة....واخيرا شافها فى الكلية وجرى وراها لحد ما لحقها....

هانى:انتى كنتى فين؟!بقالك فترة مختفية ومش بتتردى عليا خالص، انتى كويسة!؟

دنيا:اه الحمد لله بس كنت مشغولة مع قرايبنا شوية

هانى:وده يمنع انك تردى عليا!؟

دنيا:ايه كدابة انا يعنى!؟قولتلك كنت مشغولة الله الدنيا اتهدت لما مردتش

هانى:انا مش قصدى اقول انك كدابة، واسف لو زعلتك منى خلاص بقى، انا كتبت اغنية الحفلة الجديدة وكلماتها كالعادة ليكى،انتى هتفضللى دايمًا ملهمتى الوحيدة

دنيا:اه حفلة جديدة، ربنا معاك طيب ياهانى انا همشى انا بقى

هانى:طيب استنى هوصلك!؟

دنيا:لا متتعيش نفسك ورح على البروفة وانا هكلمك لما اوصل

هانى:انتى مش زعلانة منى صح!؟

دنيا:لا مش زعلانة، عن اذنك عشان هشتري حاجات

هانى:طيب خلى بالك من نفسك،هكلمك اطمن عليكى

دنيا:ماشى سلام

راح هانى على البروفة ومشيت دنيا....وفى الطريق قابلت سيف بعربيته...

سيف:ايه الصدفة الحلوة دى، اتفضللى اوصلك فى طريقى

دنيا:شكرا طريقك غير طريقى، عن اذنك

مشيت دنيا وفضل سيف واقف مكانه اول مرة بنت تعامله بالطريقة دي وهو اللي يجرى وراها مش هي اللي تجرى وراه....ودى كانت خطة دنيا انها تعامله بأهمال وكأنه مش موجود وده طبعا هيسفز واحد زى سيف اتعود ان البنات كلها تجرى وراه وتعجب بيه....ودى اول واحدة تحسسه انه هواء وده اللي بيميزها عن غيرها ويخليه يجرى وراها هو، عدت فترة وكل يوم عن اللي قبله خطة دنيا بتنجح وسيف بيجرى وراها ويلحقها فى كل مكان....واهمالها لهانى ووجعها ليه بيزيد عن اليوم اللي قبله....لحد ماجه اليوم اللي ضحت بيه للأبد....كان يوم شتاء بعد المحاضرات ما خلصت.....

هانى:هتروحي ازاي!؟

دنيا:مش عارفة اصلا ازاي همشى فى الجو ده

هانى:استنى عندى فكرة، ايه رأيك لو تمشى معايا تحت الشمسية!؟

دنيا:شمسية!؟

هانى:اه دى حتى بتعمل جو رومانسى

دنيا:جو رومانسى ايه فى الجو ده، مش لو كان عندك عربية كان ارحم من الجو ده والسقعة دى

هانى:خلاص تعالى ناخذ تاكسى

دنيا:وهفضل واقفين فى الجو ده لحد ما يجى تاكسى، انا همشى ياهانى،وخليك انت مستنى التاكسى

هانى:طيب استنى مش هسيبك لوحدك فى الجو ده

دنيا:لا انا عايزة اكون لوحدى، انت خليك مع شمسيتك فى الجو الرومانسى ده

مشيت دنيا وفضل هانى واقف مكانه حاسس بالعجز....دنيا هي الوحيدة اللي بتحسسه بعجزه وفقره وبتخليه يلعن الظروف وانه مش غنى....قرر هانى انه يمشى ويروح يقف قدام بيتها عشان يطمئن انها وصلت بالسلامة....فى الوقت اللي كانت دنيا ماشية فيه وجات قصادها وقفت عربية ونزل منها سيف....

سيف:اظن فى البرد ده مش هتفضلى انى اوصلك!؟

دنيا:مش عايزة اتعبك معايا

سيف:لا ابدًا لا تعب ولا حاجة

ركبت دنيا معاه العربية وبدأ الكلام والتعارف بينهم...نزل سيف من العربية عشان يفتح لدنيا باب العربية....

دنيا:متشكرة اوى انا تعبتك معايا

سيف:تعبك راحة

مشى سيف ودخلت دنيا العمارة وفجأة حسّت بأيد بتمسكها....ادبرت وكان هو واقف قدامها.... كل هدمه بتجيب فيه وجسمه بيرجف من البرد ونفسه بيتقطع من كثر الجرى.....

دنيا:هانى ايه اللي جابك هنا؟

هانى:انا اللي لازم اسأل انتى كنتى معاه بتعملى ايه؟

دنيا:انت اتجننت بقى، كنت معاه لأنه معاه عربية مش شمسية ياهانى بيه،قابلنى وانا ماشية وعرض عليا يوصلنى

هانى:وازى تركبى معاه؟

دنيا:اومال يعنى عايزنى اموت من البرد؟! لو فضلت معاك تحت الشمسية بتاعتك عشان نعيش جو الرومانسية، عن اذنك هدمى مبلولة ولازم اطلع اغيرها،سلام

طلعت دنيا ومشى هانى فى الشتاء ومحسش بالبرد ولا المطرة من صدمة الكلام اللي سمعه منها كان رعد كلامها اقوى من الرعد اللي بيخبط فى جسمه، عدت فترة وهانى مش بيحى الكلية ودنيا علاقتها تطورت اكثر بسيف وبقوا مع بعض دايمًا ونسيت ضحيتها تمامًا....وفى يوم وهى قاعدة مع سيف فى الكافتيريا...

سيف:ايه ده مش هانى اللي جاي هناك ده؟

دنيا:اه هو

هانى:اخباركوا ايه؟

سيف:الحمد لله بخير، فينك الفترة اللي فاتت دى؟

هانى:كنت تعبان شوية

سيف:الف سلامة عليك ياعم هانى، شد حيلك كده عشان تحضر خطوبتى انا ودنيا

هانى:الله يسلمك، ايه خطوبتكوا! طيب عن اذنكوا انا بقى

لسه هانى هيمشى...وقفته دنيا اللى استغلت ان سيف انشغل فى التليفون اللى جاله....

دنيا:حمدالله على سلامتكَ

هانى:الله يسلمك، مبروك ليكى انتى وسيف ربنا يسعدكوا

دنيا:الله يبارك فيك، وشكرا انك مقولتش لسيف حاجة لأنه فاكرنا صحاب وبس

هانى:صحاب!؟ بسهولة كده قدرتى تتخلى عنى واتحول من حبيب لصاحب!؟

دنيا:هانى احنا عمرنا ما كنا حبايب

هانى:ده بالنسبالك انتى، لكن انا حبيتك وعمرى ما اتمنيت من الدنيا غيرك، وانى اكون جنبك وبس، بيت

صغير وبنوته شبهك ده كان كل حلمى

دنيا:هانى احنا احلامنا مش واحدة وحتى طموحك غير طموحى

هانى:وسيف بقى هو اللى هيحقق احلامك دى!؟

دنيا:لا فلوسه هى اللى هتحققها، انا معنديش استعداد يبقى اقصى طموحى انى اتجوز واربى العيال،

وياريت على كده هنعيش فى بيت بسيط، ومع اول شتاء هيجلنا برد من المشى تحت الشمسية، هانى خلينا

صحاب احسن

هانى:انا فعلا فقير ومش هقدر احقق ليكى احلامك، اللى مش بتخلص اللى عندك استعداد تضحي بأى

حاجة عشانها، ويوم ما ضحيتى كان بيا انا، ربنا يوفقك معاه

مشى هانى وهو مكسور...مشى قبل ما يبكى وقلبه بين ضلوعه بيصرخ من الوجع...مشى من غير مايقول

لسيف على حقيقة دنيا...مشى بعد لما اتمنى ليها السعادة من قلبه لأنه حبها بجد...مشى وقرر انهم يكونوا

زمايل وبس وانها بقت ملك لغيره ولازم يتعود انه يشوفهم سوا...كسرت دنيا قلبه وخسرت اكثر قلب حبها

للأبد عشان فقير ومش هيحقق احلامها اللى بتتمناها.....

دنيا:بس بقى يافاتن ومن الوقت ده وانا وسيف مع بعض

فاتن:خسرتى صاحبتك وعملتى فيها اللى الواحدة تستحق عمله فى عدوتها، ومش بس كده انتى خسرتى

اكثر واحد حبك، وعلى كده بقى هتجوزى سيف ولا!؟

دنيا: انا موجعتش حد انا عملت كل ده عشان مصلحتى، وهما لو مكانى كانوا عملوا اكتر من كده، انا بس اخدتهم سلمه لحلمى، احنا فى زمن المصلحة

فاتن: حتى الحب بالمصلحة؟!؟

دنيا: الحب مش بيعرف غير لغة الفلوس والمصلحة، وانا مأجله موضوع الارتباط بسيف دلوقت، مش يمكن الاقى فرصة احسن منه؟!؟

فاتن: لو فضلتي مستتية الفرصة دى بيقى هتدوسى عليه زى هانى، السكة اللى انتى ماشية فيها دى اخرتها وحشة

دنيا: وحياتك ياتونة انا مش بحب جو الخطب والشعارات ده، بعدين انا مش صغيرة وعارفة انا بعمل ايه وهوصل لحلمى ازاي؟!؟

فاتن: مقدرش اقول غير ربنا يهديكى، ويبعد عنك شيطان نفسك

دنيا: طيب عن اذنك بقى هروح اجهاز للسهرة مع سيف

خرجت دنيا وراحت اوضتها... وقبل ماتلبس بعثت رسالة ليه كتبت فيها (ياترى لسه ملهمتك الوحيدة وكلمات الاغانى ليا انا)

راحت تجهز لسهرتها مع سيف وعدى الوقت وكلمها سيف يبلغها انه وصل... نزلت دنيا ليه بعد شوية...

سيف: ايه الجمال ده كله....

دنيا: شكرا يا سيفو، يلا بينا بقى عشان منتأخرش

ركبوا العربية وبعد شوية بدأت سهرتهم فى الوقت اللى كان هانى مشغول فى البروفات ومعاها انجى بتنظم العرض...

انجى: هانى كفاية بروفة كده لازم ترتاح شوية

هانى: لا مفيش وقت عشان الحفلة قربت انتى عارفة

انجى: ايوه ياسيدى عارفة، وعارفة كمان انها اهم حفلة ليك وهيحضرها منتجين كبار كمان، بس انت مأكلتش حاجة من الصبح وكده هنتعب، ومش هتركز، تعالى كل

هانى: حاضر انا جاى وراكى اهو

مسك هانى موبايلاه....لقى مسج من دنيا شافها ومردش...بس للمسج دى قلبت حاله هو لسه بيحبها وكل لما يشوفها يفتكر ضعفه وفقره.....قرر يمشى لكن انجى وقفته....

انجى:انت مزوغ على فين!؟

هانى:معلش انا تعبان شوية ولازم امشى

انجى:طيب استنى هجيب شنطتى واجى معاك، ولا مش عايز توصلنى!؟

هانى:لا ابدأ هستناكى برا

دخلت انجى جابت شنطتها وقالت للفرقة يروحوا وبعدها طلعت لهانى....فضلوا ماشيين وهانى ساكت مش بيتكلم....

انجى:هتفضل ساكت كتير كده!؟

هانى:انا سامعك اهو اتكلمى

انجى:بس انا عايزاك انت اللى تتكلم وانا هسمعك

هانى:معنديش حاجة اقولها

انجى:لدرجة دى التليفون اللى جالك زعلك

هانى:تليفون ايه!؟

انجى:مش عارفة، لكن انت شكلك اتغير بعد المسج اللى جاتلك، ايه كلامها وجعك ولا فكرك بحاجة مش عايز تفتكرها!؟

هانى:ليه دايم بنفكر فاللى عايزين ننساه؟

انجى:عشان الحاجة اللى عايز تنساها هى اكثر حاجة شاغلاك وفى عقلك دايم، ازاي هتنسى حاجة دايم فى بالك!؟لو اتعاملت مع الحاجة دى كأنها عادية، وانك مع الوقت هتنساها صدقنى هتبقى عادى جدا بالنسباك ومش هتيجى فى بالك

هانى:انتى ازاي بتفهمينى كده، وبتعرفى اللى جوايا من غير ما اتكلم!؟

انجى:يمكن عشان بعيش تفاصيلك وبهتّم بيها اكثر ما بهتّم بنفسى، يمكن عشان مقدرش اشوفك زعلان واقف مكانى، يمكن لأنك ابنى وانا امه المسؤلة عنه، لازم اخذك من ايديك للأكل ولو نسيت تأكل افكرك بكل حاجة مواعيدك وبروفاتك، غصب عنى دخلت فى تفاصيلك وعشت جواه، لدرجة انى نسيت حياتى

هانى:انجى انا اسف فعلا

انجى:انا عارفة اللى جواك واللى انت عايشه، مش بطلب منك اكثر من انى اكون موجودة فى حياتك وبس، امك او صديقتك ولا اختك اى حاجة المهم اكون معاً، انا مش عايزة منك غير انى احبك وبس....

هانى:انجى انا اسف فعلا، بس هى لسه مخرجتش من جوايا، لسه عايشة فى قلبى وانا لسه مجنون وعايش على الذكرى، صدقيني انتى اى واحد احسن منى يتمناكى والله

انجى:انا مش بقولك الكلام ده عشان تقولى كده، انا عارفة انك لو حبتنى دلوقت ببقى عشان تنسانى بيها وانا مش هقبل اكون سد خانة فى حياتك، او مسكن تنساها بيه انا عايزاك تحبنى عشانى انا، وكل اللى عايزاه منك انك تكون بخير بس وتأخذ بالك من نفسك، عن اذنك بقى

هانى:طيب هتروحي على فين دلوقت!؟

انجى:محتاجة اكون لوحدى شوية، هنزل هنا بقى

مشيت انجى ومشى هانى هو كمان فى طريقه...بيفتكر كل حاجة حصلت ليه...وازاى ادى حبه للى متستحقش وفضلت جواه لحد ما جات اللى تستاهل الحب ده وهو فاضى...لحد امتى هيعيش بيها طول عمره...لحد امتى هتفضل ساكنة جواه وروحه متشعبطة فيها....وبدأت ذكريات الماضى تناهل عليه زى المطر...وافتكر اخر يوم فراق بينهم، وكل احلامه اللى كانت بتقلل منها.....

هانى:انتى عارفة انا نفسى فى ايه!؟

دنيا:فى ايه؟

هانى:ابقى مطرب مشهور، ويبقى عندى بيت بعيد عن الدوشة مفيهوش غير انا وانتى وبنتنا، ويا سلام لو البيت بجينة فيها ورد كده

دنيا:ياه انت احلامك بسيطة اوى، انا بقى عايزة فيلا بحمام سباحة وعربيات كثير وشاليه فى السخنة وواحد فى مارينا

هانى:ياه كل ده!؟

دنيا: اه او مال ايه!؟ مش هبقى ممثلة مشهورة، والكل بيشاور عليا ويتصور معايا، وكل يوم البس فستان مختلف والى العالم كله، ويبقى عندى فلوس كتير، مش انت واحلامك الصغيرة

هانى: طبعا جنب اللى انتى بتقوليه ده هى صغيرة اوى كمان

دنيا: اتعود تمد ايديك وتكبش تأخذ من الدنيا اللى انت عايزه، اصل الحياة مش هتقدمك احلامك على طبق من فضة، وانت واقف مكانك من غير ما تعمل حاجة

هانى: طيب يلا بينا عشان اوصلك

افتكر كمان اول حفلة عملها وهى معاها.....

هانى: ايه رأيك بقى فى الحفلة!؟

دنيا: مش بطالة، لكن قولى بتكسبك حلو؟

هانى: الحمد لله

دنيا: يعنى حفلة النهاردة دى، هتأخذ فيها كام بقى!؟

هانى: لا النهاردة الحفلة ببلاش، عشان زى ما انتى شايفة دى حفلة افتتاح مستشفى قلب للأطفال

دنيا: يعنى التعب ده كله والغناء ده وببلاش!؟

هانى: اه المهم القيمة الانسانية والفرحة اللى شوفتها فى عيون الأطفال، الحاجات دى كلها اهم من الماديات

دنيا: انا بقى المهم عندى الماديات، وبحسبها بالورقة والقلم، ولو كنت اعرف ان الحفلة دى ببلاش مكنتش خليتك جيت

هانى: لا بالعكس حب الاطفال والفرحة اهم من فلوس الدنيا

دنيا: ياسيدى لما يبقى عندك فلوس الدنيا ابقى اتكلم، يلا نمشى

افتكر كل لحظة ضيعها معاها.... وكل لحظة الحب ذله فيها لما عايرته بفقره.... معاها بس حسسته بعجزه وفقره..... العجز اللى كان بيقتله ويحمله فوق طاقتة.... لحد ماجه يوم الفراق..... كانت الدنيا مطرة بعد المحاضرات ما خلصت....

هانى: يلا بينا عشان اوصلك

دنيا:هنمشى ازای كده فى الجو ده!؟

هانى:تحت الشمسية،دى حتى بتعمل جو رومانسى

دنيا:شمسية ايه بس ورومانسية ايه فى الجو ده!؟بقى مش لو عندك عربية كان زمانها رحمتنا من الجو ده

هانى:طيب استنى نأخذ تاكسى!؟

دنيا:ولسه هستنى لما تاكسى يجى بقى، انا ماشية ياهانى

مشيت وفضل هانى واقف مكانه وخاف عليها من الجو ده وقرر يروح لحد بيتها يطمئن عليها وانها وصلت بالسلامة...فضل ماشى فى الطريق والرعد بيرجف فى جسمه وهو كل همه انه يطمئن عليها...راح واتصدم لما لقاها نزلت من عربية سيف...واتصدم اكثر من الكلام اللى قالته وانها بتعايره بفقره وانه معندوش عربية، مشى هانى ووصل لشقته وهو مبلول وبيرتعش من البرد وكان محمد صاحبه وزميله فى الشقة لسه صاحى.....

محمد:ياخبر ابيض، ايه يابنى اللى عمل فيك كده!؟ ادخل غير هدومك بسرعة، وانا هعملك حاجة سخنة تشربها

هانى:حاضر

دخل هانى غير هدومه ومحمد جهز ليه لبن عشان يدفيه....

محمد:خد اشرب ده واحكيلى ايه اللى حصل؟

حكى هانى ليه كل اللى حصل مع دنيا وكل اللى قالته ليه....

محمد:دنيا مش بتحبك وشايفاك قليل اوى، ومفيش واحدة بتحب واحد بتحسسه بنقصه وعجزه، ده بالعكس دى المفروض تشجعك

هانى:هى طيبة اوى، وتلاقيها قالت الكلام ده فى ساعة غضب، عشان حسنت انى شكيت فيها

محمد:وليه معتبرتتش انها غيرة وافتكرتها شك!؟ وبعدين انت اللى المفروض تزعل، مش هى ودلوقت بقى اتفضل نام

تانى يوم الصبح وقبل ما يروح محمد كليته دخل يطمئن على هانى لقاه سخن وبيخرف...نزل جاب خضار ليه عشان يعمل شربة وجاب الدكتور معاه....عدى يومين ومحمد شغال ممرضة ليه ومش بيتحرك من جنبه خالص لحد ما بدأ يتحسن....

هانى:انا مش عارف لولاك كنت عملت ايه؟

محمد:كنت روحت فى داهيه

هانى:انت بقالك كتير قاعد جنبى ومش بتروح كليتك، روح وياريت تطمئن دنيا عليا

محمد:اه قول كده بقى، انت عايزنى اروح عشان الست دنيا، وبعدين هى لو قلقانة عليك كانت اتصلت بيك

هانى:تلاقيها زعلانة منى من اخر مرة

محمد:والله انا مش عارف مين اللى يزعل من التانى بس هبلغها حاضر

تانى يوم الصبح راح بعد محاضراته يبلغها ان هانى تعبان....لقاها قاعدة بتضحك وتهزر مع سيف وكانوا منسجمين مع بعض

محمد:انسة دنيا...مممكن كلمة بعد اذنك؟

دنيا:خير فيه حاجة...

محمد:انا محمد صاحب هانى لو تفتكرينى، حببت بس ابلغك انه من اخر مرة كان معاكى وهو تعبان اوى

دنيا:طيب وانا اعمله ايه؟!ربنا يشفيه انا مش فاضية ليه خالص

محمد:طبعا واضح على حضرتك انك مشغولة مع الاستاذ، عن اذنك

مشى محمد لكن وقفته انجى.....،،،،

انجى:استاذ محمد، كننت عايزة اعرف منك هانى فين؟وليه مش بيحى؟

محمد:هو تعبان شوية بس

انجى:ايه تعبان، طيب جبته دكتور؟قالك ايه؟طمنى عليه؟

محمد:اهدى طيب عشان اعرف اجاوب، اطمنى هو بقى كويس جدا

انجى:طيب الحمد لله ممكن تبقى تظمنى عليه؟! عشان مكنش بيرد عليا

محمد:حاضر عن اذنك

روح محمد البيت وهو مستغرب كان المفروض اللي تقلق وتكون مخضوضة كده وقلبها بينط من مكانه
هى دنيا مش انجى...لكن نظرة القلق والخوف اللي فى عيون انجى كانت كفيلة تفهم محمد كل الحب اللي
بتحسه ناحية هانى....وصل للشقة وكان هانى مستنيه عشان يظمنه

هانى:ها ظمنى عملت ايه؟قابلتها!؟

محمد:اه قابلتها، بس الحقيقة كانت مشغولة وبتضحك وتهزر معاه

هانى:هى دايمًا بتحب الضحك والهزار

محمد:اه بس مش لدرجة انها متهتمش لأمرك ولا يفرق معاها

هانى:قصدك ايه!؟

محمد:قصدى انها مهتمتش تعرف اى حاجة اصلا عنك، وكل اللي فارق معاها التانى وكان شكلهم منسجم
اوى مع بعض، الغريبة ان اللي تقلق عليك وكأنها امك وكان واضح من عيونها انك غالى عليها هى
صاحبتك اللي بتنظم العروض ليك، شكلها بتحبك اوى

هانى:يمكن دنيا ز علانة منى لسه

محمد:انت مجنون، خليها ز علانة بس اول ماتعرف انك تعبان المفروض قلبها يرجف بين ضلوعها،
وتنسى كل الزعل وتظمن عليك وتكون جنبك، صدقنى يا صاحبى دى متنفعلكش، وشكلها شافت غيرك

هانى:مستحيل تعمل فيا كده، تلاقيه اى زميل من زمايلنا

فضل هانى ماشى وراء قلبه اللي بيقوله يكمل مع واحدة بتذل فيه لكن عقله مقتنع جدا بكلام صاحبه...لكن
مع اول معركة بين القلب والعقل فى الحب بنكون مجانين وبنمشى وراء قلبنا وبس للآخر...وجه الوقت
الى راح فيه الكلية وشافها مع سيف وعرف انهم هيتخطبوا وعايرته بفقره، وقتها بس حس انه اختار
الشخص الغلط وانها متستاهلش كل لحظة ضيعها معاها، فاق هانى من ذكرياته على صوت محمد...

محمد:انت يابنى قاعد فى الضلعة ليه؟

هانى:حاسس انى بظلم انجى معايا، وهى متستاهلش منى كل الوجد ده

محمد: انت اه بتظلمها وهى راضية بالقليل معاك، مستحيلة المهم تكون مبسوط، بس صدقنى هيجى وقت عليها وتمشى لما تحس ان مفيش فايده خلاص منك، وساعتها هتندم عمرك كله انها راحت

هانى: يعنى اعمل ايه!؟

محمد: ادى لنفسك فرصة، واديهها فرصة تطرد اللى قبلها من قلبك وتحتله هى

هانى: حاضر هحاول

فى الوقت اللى كان محمد بيقدم نصايحه لهانى كانت دنيا بتودع سيف عشان تطلع شقتها بعد سهرتهم، مرت الأيام وجه يوم الحفلة.... الكل مشغول بالعرض وخصوصا انجى وبدأت الحفلة والعرض والكل اتسحر بصوت هانى وبعد ما خلص الكل وقف وفضل يصققله وطلبوا منه يغنى تانى.... بعد الحفلة الكل بيتصور مع هانى وانجى كانت فرحانة بنجاحة اكتر من نجاحها.... وبعد ما الكل مشى وفضل هانى وانجى....

انجى: برفو يا هانى كنت تجنن

هانى: البركة فيكى لولا العرض مكنتش هنجح

دنيا: الله بجد كنت تجنن، لازم العرض يطلع حلو كده مش انا ملهمتك ولا ايه!؟

هانى: شكرا ليكى

سيف: ايه يامعلم الحلاوة دى مبروك ليكوا

هانى: الله يبارك فيك

سيف: طيب بالمناسبة الحلوة دى يلا نتعشى كلنا مع بعض

انجى: لا معلش اتأخرت ولازم اروح.

هانى: معلش خليفها مرة تانية

سيف: ايه البواخة دى، ماشى بس المرة التانية دى هتكون قريب بقى

هانى: ان شاء الله

طلعوا الاربعة من البوابة لكن سيف سبق على عربيته اللى كان راكنها صف تانى عشان يجيها ودنيا مشيت وراه وبعدها بخطوات انجى وهانى....وقبل ماتعدى دنيا الطريق ظهرت عربية وكانت هتصدمها لولا هانى انقذها ووقعوا هما الاتنين على الارض....

هانى:انتى كويسة!؟

دنيا:الحمد لله بخير

انجى:انتوا كويسين!؟

هانى:الحمد لله

جه سيف جرى ونزل من العربية...

سيف:انتى كويسة يا حبيبتي!؟

دنيا:اه بخير

نزل من العربية عشان يعتذر ليهم انه صدمهم وكانت الصدمة للكل...فضل يتكلم ودنيا مش مصدقة الصدمة الحلوة دى...معقولة يكون اللى صدمها سامح رشدى المنتج والمخرج الكبير....
سامح:انا اسف جدا على اللى حصل...ومستعد لأى تعويض او اخدها على المستشفى....

دنيا:لا انا بخير الحمد لله،دى حاجة بسيطة كده فى رجلي

سامح:لو تحبى اوصلك!؟ انا سامح رشدى مخ.....

دنيا:المخرج والمخرج الكبير غنى عن التعريف تشرفنا

سامح:طيب ده الكارت بتاعى، لو فيه اى حاجة او اى مساعدة ممكن اقدمها

سيف:شكرا مش عايزين حاجة

مشى سامح واخذ سيف دنيا لعربيته عشان يروحها وفضل هانى وانجى اللى الكل نسيهم خالص...

انجى:مش يلا بينا نروح بقى ولا ايه!؟

هانى:ها، اه يلا

فضلت انجى طول الطريق ساكتة مش بتتكلم وهانى محاولش يكلمها..فى الوقت اللى كانت دنيا بتحلم بمقابلة سامح واستغلال الفرصة اللى جات لحد عندها...فوقها من احلامها صوت سيف...

سيف: احنا وصلنا، قوللى لسه تعبانة؟

دنيا: رجلى بس وجعانى شوية

سيف: طيب اجبك دكتور؟

دنيا: لا انا هطلع ارتاح وابقى كويسة

سيف: طيب وانا هكلمك اطمئن عليكى

طلعت دنيا البيت ونامت عالطول عشان تكمل احلامها وهى بطلة فيلم من اخراج سامح وعرفت ان جه الوقت اللى تودع فيه سيف وتخرجه من حياتها....مرت الأيام والمعاملة بين انجى وهانى اتغيرت....انجى دايمًا ساكتة مش بتتكلم غير فى الشغل وهانى مش عارف ايه السبب اللى مخليها تبعد عنه....فى نفس الوقت كان سيف بيكلم دنيا وهى بتتهرب منه بأستمرار..... وقررت تروح لسامح الشركة، راحت ليه الشركة وهناك قابلتها السكرتيرة.....

شبرى: حضرتك عايزة مين؟

دنيا: عايزة اقابل استاذ سامح

شبرى: فيه معاد؟

دنيا: لا، ممكن تقوليله البنيت بتاعة الحادثة

شبرى: طيب ثوانى....

دخلت شبرى وبعد دقائق طلعت.....

شبرى: اتفضلى مستر سامح منتظرك

دخلت دنيا وهى مش عارفة ممكن تقوله ايه ولا تتكلم فى ايه.....

سامح: اهلا، ازاي رجلك دلوقت؟

دنيا: انت لسه فاكرنى!؟

سامح: انا مقدرش انسى الجمال ده كله، ايه جاية ترفعى قضية عليا؟

دنيا: ميرسيه، لا طبعاً جاية اشكرك على ذوقك يومها

سامح: تحبى تشربى ايه؟

دنيا: ممكن عصير

فضلوا يتكلموا كتير واخدوا ارقام بعض وفضلوا يتقابلوا عالطول.... وسيف هيتجنن ويعرف هى بعدت عنه ليه ومش عارف السبب.... فى الوقت اللي قرر هانى يسأل انجى عن السبب اللي مغيرها....

انجى: اتفضل جدول مواعيدك، عندك النهاردة معاد مع شركة الانتاج اللي هتعملك اول اليوم

هانى: ممكن اعرف انتى متغيرة ليه؟

انجى: مفيش حاجة

هانى: لا فيه وحاجة كبيرة كمان، انا عملت حاجة زعلتك منى؟

انجى: مش انت اللي عملت، ده قلبك ومش ذنبه انه لسه بيحبها

هانى: انا مش فاهم حاجة....

انجى: يوم الحادثة وانت بتنقذ دنيا، لو شوفت نظرة الخوف والقلق والحب اللي كانوا فى عيونك ليها مكنتش قولت كده، انا اقدر استحمل اى حاجة بس مقدرش اشوف فى عيونك نظرة حب لغيرى، مقدرش اشوفك مع غيرى، وعشان كده لازم اعترف بالهزيمة واكون صاحبك وبس، لأن وجودى جنبك بصفتى حاجة تانية هيوجعنى اوى وانت مترضهاش ليا

هانى: ولو قولت انى محتاجك جنبى وعايزك فى حياتى

انجى: هتلاقينى جنبك، مهو انا كنت طول عمرى جنبك وهفضل معاك اى وقت تحتاجنى، عن اذنك

مرت المشهور وسامح ودنيا مع بعض فى كل مكان هو وعدها انها تكون بطلة فيلمه وهى مصدقة حلمها انها هتبقى مشهورة وسيف زى المجنون بيتصل بيها فى اليوم 20 مرة وبيستناها تحت البيت بأستمرار... وزى ما كان الجو خريف على ناس فهو كان ربيع وبيفتح ورده على هانى اللي بدأ يقرب من انجى ويلحقها قبل ما تضيع منه للأبد، بدأ هانى يبقى مطرب كبير ويتشهر اكرت ودنيا مع سامح ونسيت ضحيتها اكرت لحد ماجه اليوم اللي شافهم سيف مع بعض...

سيف: هو ده بقى اللى سيبتينى عشانه ياخاينه؟

سامح: انت مجنون!؟

سيف: لا انا حبيب الهانم اللى قبلك، اللى رميته وراحت ليك، وقبلها هدمت كل احلامه وحطمته، ودلوقتى لما مبقاش ليه لزوم رمته

دنيا: ده كداب، ده مجرد زميل مش اكثر، بيجبنى وانا مش عايزاه، وهو بيطاردنى فى كل مكان بروحه

سامح: اه هى الحكاية كده، طيب امشى من هنا بالذوق بدل ما همد ايدى عليك

سيف: هى بقت كده، ماشى يادنيا انا هوريكى، وانت يا امور هترميك قريب وتروح لغيرك

مشى سيف وضحكت دنيا على سامح بدموع تماسيح من عيونها عشان يصدقها

سامح: ممكن تهدي بقى وتبطل عياط

دنيا: ده هددنى ومش عارفة ممكن يعمل ايه فيا؟

سامح: ولا هيعمل حاجة وانا هخلصك منه

دنيا: ياريت عشان زهقت بجد

فاتت شهور ودنيا مع سامح لحد ما فى يوم دخلت عليه المكتب وكان متعصب اوى...

دنيا: مالك يا حبيبي، حصل ايه!؟

سامح: انا خسرت كل حاجة يادنيا بقيت على الحديد

دنيا: ازاي؟

سامح: فيلمى الاخير خسر وانا كنت حاطط فيه كل فلوسى، وكمان هيحجزوا على الشركة والفيلة عشان الديون

دنيا: انت بتقول ايه؟ مش معقول!

سامح: انا محتاجك الفترة دى جنبى يادنيا

دنيا: طبعا انا جنبك ومعاك

نزلت دنيا من مكتبه وعرفت ان دور سامح فى حياتها انتهى بخسارته لفلوسه وشهرته هتفضل جنبه
ليه...جه الوقت اللى تودعه، رمت دنيا سامح زيه زى غيره بعد ما دمرتهم وقضت عليهم...وفى يوم وهى
بتفتح التلفزيون عرفت ان هانى بقى مطرب مشهور وغنى...فقررت تروحله وترجع لصحتها القديمة
وتضحك عليه بأسم الحب....عرفت دنيا ان عنده حفلة وقررت تروح وتعيط قدامه عشان يضعف
ويرجعها، فى يوم الحادثة....كانت حفلة هانى والكل مستننيه يطلع على المسرح وطلع ولقى دنيا قاعدة
قدامه...وبدا يغنى

هانى:(ماتنفعلكش كلمة وقالو هالى فى كل مكان، مفيش انسان شافنى معاها إلا ندانى وقالى انسائها
ماتنفعلكش، انت رقيق ولسه برئ وقلبك وردة بتفتح وهى سنين دموع وانين من قلب لقلب بتنفسح)

كأن الكلمات مكتوبة فعلا لدنيا توصف غدرها، رغم انها اغنيه للفنان على الالفى بس احساس هانى بيها
كان غير، مطعون من غدرها ليه، ولأول مرة تحس دنيا انها ملهمته الوحيدة وان كل كلمة
بتوصفها....خالصت الحفلة والكل وقف يصقف ليه...وبعد ما الحفلة خالصة الكل اتصور معاه وبعدها
هانى راح على اوضته....دخلت انجى عليه....

انجى:هايل ياهانى، برافو عليك، واحساسك اجمل

هانى:انا من غيرك ولا حاجة، جهزى نفسك عشان نتعشى سوا النهاردة

انجى:حاضر هروح اجيب شنطتى

خرجت انجى وشافت دنيا وهى داخله عند هانى اوضته....

دنيا:الف مبروك يا هانى

هانى:الله يبارك فيكى

دنيا:هانى انا جيت النهاردة وانا ندمانة عشان اقولك انى ب...

هانى:ايه بتحبينى مثلا، انتى اصلا بتعرفى تحبى، انتى عمرك ما حبيتى غير نفسك وبس وعشانها مستعدة
تضحى بأى حاجة وأى حد، المهم تأخذى اللى انتى عايزاه وبس حتى لو هتدوسى على غيرك
دنيا:كفاية تجريح، انا جيت عشان انت...

هانى: بقيت مشهور و غنى وحققت حلمى اللى كنتى بتتريقى عليه، جيتى عشان مصلحتك معايا دلوقت، بعد لما الكل سابك، انتى رجعتى عشان فلوسى مش عشانى ومع اول تعب ليا وصوتى يروح كل اللى عندى هيروح وانتى هتسبينى وترمينى، وتشوفى غيرى زى ما عملتى وانا فقير

دنيا: يعنى ايه؟ انت شايفنى وحشة كده؟

هانى: انا مش شايفك اصلا، انا مش شايفة غير الانسانة اللى وقفت جنبى، وكانت معايا ولولاها مكنتش وصلت للى انا فيه، ومعنديش استعداد اوجعها او اضحى بيها، انا بحب انجى عشان تستاهل حبى واى وقت هضيعه معاكى يبقى بضحك على نفسى، انتى اسمك دنيا وفعل زى الدنيا بتغدر بينا، وبتضحك لينا طول ما معانا، ولما ميكنش معانا تدينا ضهرها ليكى نصيب من اسمك كبير، عن اذنك بقى عشان مشغول

دنيا: انت الخسران، انت مش اخر واحد فيه غيرك كتير يتمنوا جمالى ده

خرجت دنيا وبعدها خرج هانى راح على اوضة انجى اللى كانت سابتله ورقة انها مشيت وميدورس عليها وتتمناله السعادة، جرى عشان يلحقها وفعل وقفها.....

هانى: ايه اللى انتى كتباه ده، معقولة تسبينى كده وتمشى

انجى: انا مليش مكان جواك طول ما هى موجودة

هانى: مين قال انها موجودة؟! هى عشان رجعت افكرتى انى هرجعلها واسيبك

انجى: يعنى بطلت تحبها!؟

هانى: بطلت من اول لما بدأت اقرب منك وتدخلى فى تفاصيلى، بطلت من وقت ما بقى يومى وحياتى كلها بتتعاش ليكى، بطلت احبها لما جات وانا رفضتها لأنها ماتت جوايا وانتى بس اللى عايشة لوحدها فيا، انا بحبك يا انجى ومقدرش اتخيل حياتى من غيرك، تتجوزينى؟

انجى: موافقة طبعاً

فى الوقت اللى هانى وانجى بيبدأوا حياتهم من غير شبح دنيا... كانت دنيا ماشية لحد بيتها بتفكر ازاى هتكون مشهورة ومين اللى هيساعدها وفجأة قدام بيتها... سمعت صوت راجل ملثم بينادى عليها وبيكب حاجة فى وشها... كانت فيه نار شوهتها وريحتها من جمالها اللى دمرها.... فاقت من ذكرياتها على صوت خبط الباب ودخوله ليها على كرسي متحرك

دنیا: انت جای هنا ليه؟!؟

سيف: اكيد مش جای اطمئن عليكى، انا جای اتشفى فيكى واشوفك وانتى مشوهة، انتى خلتنى عاجز مش
هتحرك وانا حسرتك على جمالك

دنیا: يعنى ايه، انت اللى عملت كده؟

سيف: ايوه انا كان لازم انتقم منك، سامح بيه بتاعك عشان يخلصك منى بعلى رجاله فضلوا يضربوا فيا
لحد ما بقيت عاجز، لما فوقت وعرفت انى مش هتحرك، فكرت انتقم منه بس هو ذنبه ايه؟!، كان لازم
انتقم منك انتى سبب المصايب دى كلها، والحقيقة بمبلغ بسيط ادبته لواحد خلاكى مشوهة وهتعيشى طول
عمر كده، انا اكثر واحد حبيتك بس غدرك بيا خلانى مجنون وانتقم منك، دلوقتى محدش هيبص فى
وشك غير لما يقرف، او تصعبى عليه وانتى هتفكرينى طول عمر ككل ما تبصى فى المراية، مع
السلامة

خرج سيف وساب دنيا زى المجنونه بتكسر فى الاوضة، فاضطر الدكاترة يدوها حقنه مهدئه عشان ترتاح.

حسن: ياه نهاية مأساوية جدا، بصراحة متوقعتش كده يعنى، كل اللى توقعته انها تخسر كل حاجة

فريدة: زى ما كانت بتكسب، جه الوقت اللى تدفع حساب كل اللى اخدته

حسن: بس فعلا فيه نماذج بنات كتيرة كده زى دنيا موجودين

فريدة: اه وكثير البنات اللى مش عايزين يخسروا حاجة ابداء، عايزة اللى بيحبها وعايزة الغنى والمشهور
وكل ده من غير ماتضحى بأى حاجة، كل اللى بتدور عليه مصلحتها وبس حتى لو هتدوس على غيرها

حسن: بس النوع ده مثال الانانية، بتخسر نفسها فى الآخر

فريدة: انت عارف مهما كانت جمعت من فلوس وشهرة كانت هتندم انها خسرت الحب، وكانت هتدفع كل
اللى بتملكه عشان تعيش الحب ده ولو لحظة حقيقه

حسن: بس لا الحب ولا القلوب بنشتريها بالفوس، دى الحاجة اللى ملناش تدخل فيها ولا حكم على قلبنا

فريدة: فى النهاية هى خسرت كل حاجة حتى احترامها لنفسها، كان لازم تعرف انها مشوهة من جواها من
زمان ولازم تتغير

حسن:فعلا هنعمل ايه بالشكل الحلو لو القلب والروح مشوهين!؟

فريدة:ولا حاجة لأن الجمال بيروح، واحب اقولك اننا وصلنا للفندق اخيرا

حسن:ياه محستش الوقت معاكى خالص

فريدة:ولا انا بس رجلى وجعتنى اوى

حسن:طيب يلا بقى اطلعى استريحى شوية

فريدة:الله انا باخد أوامر، حاضر يافندم، حسن على فكرة انا مضحككش ولعبت وحسيت انى عايشة من زمان كده غير وانا معاك، شكرا على الخروجة الحلوة دى

حسن:انا اللي شكرا انك كنتى معايا

فريدة:طيب عن اذنك بقى

طلعت فريدة لأوضتها واول حاجة عملتها انها فتحت موبايلها اللي نسيته فى الاوضة ولقت مكالمات ومسجات كتيرة من اهلها، فتحت واول ما عينها جات على مسج من والدها....(فرحتى وحشتينى اوى ومش لاقى حد يرغى معايا زيك...ارجعى بقى)

اتصلت فريدة بأهلها وطمنتهم عليها وعلى احوالها ووعدتهم انها هتطمئنهم عليها دايمًا

استريحت فريدة ونزلت اتغدت وفضلت تدور على حسن لأنها متعرفش غيره وفجأة شافته قاعد على تربيضة على البسين.....

حسن:كنتى فين؟! انا قاعد هنا بقالى ساعة

فريدة:كنت نائمة، هو انت قاعد مستننى؟!؟

حسن:انا لا خالص كنت بتفرج على المكان، انتى كنتى بتدورى عليا!؟

فريدة:لا خالص انا كنت جاية اتفرج على المكان، واقعد شوية على البسين

حسن:والله طيب اتفضللى نتمشى سوا

فريدة:امممم معنديش مانع، انك تيجى معايا واهو بدل ما اسبيك لوحداك

حسن:والله ده كرم اخلاق منك، انا هضيع لو مكنتش قابلتك

فضلوا يتمشوا على البسين وبيضحكوا ويتكلموا عن أنفسهم....وفجأة سابها ونط في البسين عشان ينقذ بنت بتغرق...طلعها وساعدتها فريدة في التنفس الصناعى واطمنوا عليها والناس وقفت تصقف لحسن على شجاعته.....واخيرا فاقت البنت...

فريدة:انتى كويسة!؟

هدى:الحمدلله بقيت احسن، شكرا على مساعدتكوا ليا

حسن:العفو المهم انك بخير...

من بعيد جات الدادة بتاعة البنت....

سنية:شكرا اوى لمساعدتكوا

فريدة:هو حضرتك والدتها؟

سنية:لا انا الدادة بتاعتها، وروحت اجبلها عصير ورجعت لقيت اللي حصل حصل

حسن:ولا يهملك بس ابقى خدى بالك

قطعهم فجأة وجود اهل هدى....

طلعت:انتى ازاي ياسنية مهملة كده وتسيبي البنت لوحدها!؟

سنية:انا بس روحت اجيب ليها عصير

سوسن:انتى اتجننتى ازاي تردى على البيه، وبعدين انتى بتاخدى فلوس عشان تأخدى بالك منها كويس

سنية:والله عنيا كانت عليها، واول ما روحت اجيب العصير لقتها وقعت في البسين

طلعت:انتى كنتى فين ياهانم وسايبة بنتك؟

سوسن:كنت مع سوسو بنرتب لحفلة

طلعت:اهو ده اللي باخده منك، مش فالحه غير في سوسو والحفلات والسهر

سوسن:طلعت... انت بتقول ايه!؟ ، واحنا قدام الناس مش لوحدنا، وبعدين مهو انت مشغول بسفرك وشغلك

طلعت: انا مش فاضى لوجع الدماغ ده، انا عندى مكالمة مهمة جاية من لندن
سوسن: طيب انا همشى يا سنية رايحة لسوسو هانم وانتى خدى بالك من البننت
مشيوا اهل هدى ووقفوا فريدة وحسن مذهولين.... وقطعت سكوتهم سنيه.....
سنية: طب يلا بينا يا هدى، وشكرا على مساعدتكوا ليها بجد

فريدة وحسن: العفو

حسن: معقولة فيه ناس كده!؟

فريدة: شوفت كل واحد فيهم بيرمى الحق فاللى حصل للبننت على التانى، لا وايه الغلطة غلطة الدادة
الغلبانة فى الآخر

حسن: بس دول حتى محاولوش يطمنوا على البننت، وعلى صحتها ازاي ده!؟

فريدة: البننت دى مظلومة معاهم وكانت عيونها فيها ضياع كبير اوى، وذ هول من موقف اهلها بجد، البننت
دى لما تكبر هتحس بالضياع، وهتدور على اللي ناقصها برا يعوضهولها الغريب

حسن: هي لو فضلت كده هتحس بالوحدة، وانها فى متاهة مهما تخرج بتلف تلف وترجع لنفس المكان

فريدة: عندك حق، بس الحمد لله انك كنت موجود وانقذتها

حسن: الحمد لله انى مغرقتش معاها

فريدة: هو انت.....!؟

حسن: مش بعرف اعوم، بس كان لازم انقذها مكنتش هقف اتفرج يعنى

فريدة: انت جدع اوى يا حسن على فكرة، وعشان كده هبهرك هحكياك حكاية...

حسن: اسمها ايه الحكاية دى!؟

فريدة: المتهورة والعشاق

(المتهورة والعشاق)

فى فندق الهلتيون وقف أسعد شوقى رجل الأعمال المشهور يستقبل صاحبه من رجال الأعمال فى نفس الوقت اللى كانت فيه مراته عزة فخر الدين سيدة الجمعيات الخيرية والنوادر تستقبل معازيمها...وبدأ صوت العزف والزفة لأن النهاردة فرح هويدا بنت أسعد وعزة الوحيدة على اكبر دكتور وهو أيمن الحسينى....بدأت الحفلة والكل فرحان وبيغنى ومستمتع وكان العرايس بيرقصوا وفجأة جه محى الدين صديق العريس واخده على جنب وفضلوا يتكلموا واداه ظرف...اول ما فتحه أيمن حصلته حالة من الذهول وفجأة قطع صوت الموسيقى وبدأ يعلن الخبر....

أيمن:أسعد بيه انا ميشرفنيش انى اتجوز بنت حضرتك، ومستحيل الفرحة ده يكمل

أسعد:ايه؟انت اتجننت، انت عارف انت بتقول ايه واياه اللى ممكن يحصل؟

أيمن:ميهمنيح حاجة كل اللى اعرفه انى مستحيل اتجصيبة ومستحيل تشيل اسمى

مشى أيمن هو وصديقه وفضل الكل واقف مذهول من اللى حصل.....الى مشى من المعازيم واللى فضل يتكلم عن العروسة والسبب اللى يخلى عريس يسبب عروسته يوم فرحها وخصوصا بعد كلامه لوالدها...محسست بنفسها هويدا غير وهى بتقع على الأرض وغابت عن الوعى....انتقلت هويدا للمستشفى وحالتها خطيرة....بعد الكشف عليها خرج الدكتور لأهلها.....

أسعد:طمنى يادكتور عن حالتها!؟

الدكتور:هى اتعرضت لصدمة عصبية، مع هبوط مفاجئ فى الدورة الدموية، كويس انكوا لحقتوها فى الوقت المناسب

أسعد:طيب هى هتخرج امتى!؟

الدكتور:هتقعد يومين معانا تحت الملاحظة لحد ما حالتها تستقر

عزة:طيب نقدر نطمن عليها دلوقت؟

الدكتور:اول لما تفوق هبلغكوا وتقدرنا تطمنا عليها

مشى أسعد لأنه كان لازم يقابل أيمن ويفهم منه اللي حصل فى الوقت اللي عزة راحت فيه الفيلا عشان تجيب لبس لهويدا بدل فستان الفرحة اللي عليها.....وصل أسعد الفيلا عند أيمن واول لما وصل وقفته مجموعة من الصحافيين اللي اتسرب ليهم الخبر وأيمن كان رافض يرد عليهم....لكن أسعد موقفه مختلف عنه لأنه رفض يتكلم معاهم عن اللي حصل...دخل أسعد لمقابلة أيمن.....

أسعد: انت عارف المشكلة اللي عملتها دى خلت الكل يتكلم ازاي؟ انت اتجننت عملت كده ليه مش انت بتحبتها!؟

أيمن: انا محبتش غيرها، بس تخيل لما تعرف ان اللي هتشيل اسمك كان تعرف غيرك، وبدل الواحد 4 ازاي هتأمن لواحدة زيها!؟

أسعد: انت بتقول ايه؟ انت ازاي تقول كده على بنتى مش عارف هي بنت مين!؟

أيمن: لا عارف، وعشان تتأكد اتفضل الدليل اهو وابقى اتأكد منه ومن اللي فيه

مشى أسعد وهو معاه الظرف اللي فيه الدليل وقعد أيمن فى مكتبه يفكر فالصور اللي شافها....فى الوقت اللي راح فيه أسعد المستشفى عشان يطمئن على بنته....

أسعد: هويدا فاقت ولا لسه!؟

عزة: اه فاقت بس مش عايزة تكلم حد، والدكتور بيقول حالتها النفسية وحشة، انت روح لايمن!؟

أسعد: اه روح ليه، وادانى ظرف وقالى ده فيه الدليل، البية بيتهم بنتنا انها بتعرف رجالة وعلى علاقة بيهم

عزة: واياه اللي فى الظرف!؟

أسعد: معرفش اخدته منه وجيت على هنا عالطول عشان اطمئن عليها

عزة: طيب هاته لما نشوف فيه ايه!؟

أسعد: طيب هنزل اجيبه من العربيه

نزل أسعد لعربيته وطلع ومعاه الظرف وقعد هو وعزة وفتحوه وكانت الصدمة....صور لبنتهم مع رجالة اللي فى سن ابوها واللى قدها واللى اصغر منها...الصدمة شلت تفكيرهم مستحيل تكون دى بنتهم ولا دى تربيتها واخلاقها وقرروا يدخلوا يسألوها عن الصور دى، دخلوا عليها الاوضة وكانت هويدا فايقة مفتحة

عينها، بس عقلها وروحها غاييين عن الوعي وكأنها ميتة مش حاسة بأى وجع ومش حاسة بأى كلام ولا اسئلة بتتقال ليها وده اللي آثار غضب أسعد....

أسعد: قولتلك ردى عليا، وقوليلي معناه ايه الصور دى؟! واياه علاقتك بالرجالة دول؟

عزة: يا حبيبتي ردى علينا، متسكتيش كده سكوتك ده معناه ان الصور حقيقية

أسعد: اتكلمى، انتى عارفة لو عملتى كده يبقى، انتى مجرمة ضيعتى سمعتى وسط الناس مش كفاية انهم بيتكلموا على الفرع اللي اتلغى، وعريسك اللي سابك ومشى لا كمان هيقلولوا انك بتاعة رجالة لو شافوا الصور دى، اتكلمى بقى

فضلت هويدا ساكتة مش بتتكلم لكن دموعها هى اللي بتتكلم مكانها... وفجأة حسيت بأيد ابوها وهى بتناولها قلم ورا قلم ويبجبرها على الكلام.... لكن هويدا مستحملتش واغمى عليها....

عزة: انت اتجننت يا أسعد هتقتل البنات؟!، دى بنتنا الوحيدة، انا هروح انادى للدكتور

طلعت عزة تنادى للدكتور، بعد شوية جه الدكتور وكشف عليها.....

الدكتور: هى جالها انهيار واديتها حقنة مهدئة، وهتنام للصباح، تقدرؤا تروحوا

عزة: ممكن ابات معاها يادكتور!؟

الدكتور: اه طبعا ممكن

مشى الدكتور ومشى أسعد هو كمان للفيلا ودخلت عزة تظمن على بنتها.... انتشر الخبر بسرعة والناس بتتكلم عن العروسة اللي سابها عريسها يوم فرحهم والصحافة بدأت تتكلم عنه.... ووصلت لأيدها الجرنال... هى بس الوحيدة اللي ممكن تقول الحقيقة وتثبت براءة هويدا.... هى اللي بكلمة منها هتقذها وفعلا رمت الجرنال من أيديها وقررت تحجز على اول طائرة لمصر.... اول لما رجعت راحت على المستشفى عشان تظمن عليها... فعلا راحت المستشفى ودخلت اوضتها.... اول ما دخلت كانت هويدا نائمة ومامتها برا الاوضة.... بدأت تتكلم معاها.....

قسمت: اظمنى يا هويدا انا هنا جنبك، ومش هسيبك ابداء، واعذرينى لأنى هقولهم عن السر اللي بينا، واوعدك ان كل حاجة هتكون بخير قريب اوى

هنا دخلت عزة على قسمت وهى بتكلم هويدا واستغربت اوى لانها متعرفهاش ولا عمرها شافتها ومستحيل تكون صاحبة هويدا لأنها اكبر منها فى السن.....

عزة: انتى مين؟ وبتعلمى هنا ايه!؟

قسمت: دى حكاية طويلة اوى وعشان احكيها، هتعرفوا انكوا غلطانيين فى حق هويدا وانها مظلومة، انا دليل برانتها الوحيد

عزة: انا مش فاهمة منك اى حاجة

قسمت: مش مهم تفهى دلوقتي، ده عنوانى هستاكي بكره انتى وأسعد بيه، الساعة 9ده لو عايزين تعرفوا الحقيقة

مشيت قسمت وعزة مذهولة من الست اللي ظهرت واختفت فجأة بس كان كل اللي يهملها انها تعرف الحقيقة.... اتصلت بأسعد وطلبت منه يجى فوراً..... ولما وصل حكت ليه كل اللي حصل مع قسمت.....

أسعد: وافرضى دى نصابة ولا مجنونة!؟

عزة: مش هنخسر حاجة لما نروح، ونشوف هى عايزة تقول ايه!؟ بقولك معاها دليل براءة بنتنا

أسعد: طيب انا هعمل احتياطي، ونأخذ البودى جاردات معانا واهو نحمل نفسنا

عزة: اعمل اللي تعمله المهم نروح ونشوف هتقولنا ايه!؟

مشى أسعد على الشركة وفضلت عزة جنب هويدا فى المستشفى فى الوقت اللي كانت فيه قسمت بتبعث لأهم شخص اللي كان لازم يعرف الحقيقة للصور اللي شافها وفعلاً فضلت تدور لحد ما وصلت لرقمه وبعثت ليه مسج (دكتور أيمن انت ظلمت هويدا وهى بريئة لو عايز تعرف الحقيقة تعالى بكره الساعة 9 فى العنوان ده..... وانت هتعرف كل حاجة) اول لما شاف المسج كان هيتجنن وقعد يفكر يروح المعاد ولا جواه احساس كبير بيامره يروح لأنه بيحبها وعايز اى حاجة تثبتله عكس اللي شافه فى الصور وان قلبه صح وانها بريئة فعلاً.... فقرر يروح فى المعاد، الساعة جات 9 ووصل الكل أسعد وعزة اللي متعلقين بقشاية عشان تنقذ بنتهم وسمعتها وأيمن اللي بيحركه حبه واحساسه ليها.... وصل أسعد ومراته وكان الباب مفتوح.... وهناك خبطوا فى واحد وده اللي خلى عزة تصوت.... لكن اكتشفوا ان الواحد ده بيقى أيمن.....

أسعد: انت ايه اللي جابك هنا!؟

أيمن: جاتلى مسج بتقول ان هويدا بريئة ولو عايز اعرف الحقيقة اجى العنوان ده

أسعد: انا حاسس ان فيه حاجة غريبة بتحصل وان ده فخ، يلا بينا نمشى من هنا

لسه هيمشوا جه صوتها ووقفهم مكانهم.....

قسمت: اطمن يا أسعد بيه، ده مش فخ ولا حاجة انا جمعتكوا عشان اعرفكوا الحقيقة وهى ان هويدا ضحية

أسعد: انتى مين!؟

نورت قسمت نور الفيلا، وبدأت تكلمهم.....

قسمت: انا قسمت دكتورة امراض نفسية وعصبية، واللى كنت بعالج بنتكوا هويدا

أسعد: انتى اكيد مجنونة، انا بنتى عمرها ما راحت لدكتورة امراض نفسية وعصبية

قسمت: هو حضرتك انت ولا والدتها تعرفوا عنها حاجة، عشان تعرفوا لو عالجتها ولا!؟ اتفضلوا اقعدوا

عشان نعرف نتكلم ده لو عايزين تعرفوا الحقيقة

ديرت وشها لأيمن ووجهته الكلام.....

قسمت: انت أيمن مش كده، انا مبسوطه انك جيت وده دليل على انك بتحبها اوى

دخلوا المكتب فى فيلا قسمت وقعدت وبدأت تتكلم وتحكى.....

قسمت: انا عارفة ان اللى هقوله ده ضد مبادئ المهنة، وان المفروض اسرار المريض متطلعش براء، لكن

الكلام والتجريح اللى وصل للجرايد والصور والتفكير الغلط اللى وصلكوا عن هويدا خلانى اجمعكوا هنا،

عشان احلكوا على الحكاية كلها من اولها لأخرها، من اول مرة شوفتها فيها من سنة ونص لما جاتلى

العيادة وكانت فى حالة انهيار، من سنه ونص.....

قسمت: ايه ده انتى مين وازاى دخلتى هنا؟

هويدا: ارجوكى ساعدنى، انا زهقت من حياتى ولو رفضتى تساعدنى انا هنتحر

قسمت: طيب اهدى واحكىلى مشكلتك

هويدا: انا حاسة انى مش انا، بعمل حاجات ومش عارفة بعملها ازاي!؟ واهلى لو عرفوا هيموتوا وانتى

جيتى نجدة من السماء ليا، لقيت اعلان عن عيادتك على الفيس وعرفت انك دكتور شاطرة، قولت مفيش

غيرك تساعدنى وتقف جنبى، ولو على الفلوس هديكى كل اللى انتى عايزاه بس ساعدنى

قسمت: طيب مش اعرف ايه حكايتك الاول؟

هويدا: انا اسمى هويدا أسعد، وبابا راجل اعمال وماما سيدة مجتمع، والمشكلة بدأت من وانا عندي 7 سنين، لما قرروا يدخلوني لمدرسة داخلية ويبعدوني عنهم، هما اصلا مكنوش عمرهم قريبين منى من يوم ما بدأت امشى واول خطوة كانت بأيد دادة عزيزة اللي كانت بتهتم بيا وده لأن بابا راجل اعمال ومقضيها مشاريع وسفر وشغل وماما بين الجمعيات والنوادي وناسيني خالص ولا كأنى موجودة اصلا....

قسمت: مش يمكن هما دخلوكى المدرسة الداخليه عشان الالتزام وتعتمدى على نفسك!؟

هويدا: أنا كنت فاكرة كده، لحد ماجه اليوم اللي هدخل فيه المدرسة...

أسعد: اسمعى يا هويدا انا مش عايزك تعملى مشاكل، وتفضلى مؤدبة عالطول

هويدا: حاضر يا بابا هسمع الكلام

عزة: هبقى اكتبلك عالطول وكل اجازة هتقضيها معانا انا وبابى

هويدا: اوكى يامامى

عزيزة: هتوحشيني اوى يا بنتى فراقك على عينى والله

هويدا: وانتى كمان يادادة هتوحشيني، انتى وحكاياتك قبل النوم ليا

أسعد: طيب يلا عشان السواق يوصلك بقى

عزة: هو انت مش هتوصلها بنفسك!؟

أسعد: لا مش فاضى عندي اجتماع مهم، لو عايزة تروحي معاها انتى!؟ وانا اتكلمت مع مديرة المدرسة ودفعت المصاريف كلها

عزة: لا النهاردة هقابل صحباتى فى النادى

الكل مشى من حوالين هويدا وفضلت معاها دادة عزيزة اللي وصلتها لحد العربية وهى رافضة تسيب ايديها اللي لمستها اول ما اتولدت واخذتها لأول خطوة تمشيها، فضلت هويدا طول الطريق ساكتة وبتتفرج عليه لأنها مكنتش بتخرج كتير فهى طبيعتها هادية ومتعرفش من الدنيا غير حدود اوضتها وجنية الفيلا وبس ده عالمها، وصلت للمدرسة الداخليه وكان لازم تقابل المديرة مس عفاف....

عفاف: اهلا يا هويدا، اسمعى بقى شكلك بنت مؤدبة وعرفت انك هادية كمان، انا عايزة اقولك ان اهم حاجة عندى هنا الإلتزام بالقواعد والقوانين بتاعة المدرسة، واى إخلال فيهم هتتعرضى للعقاب مفهوم؟!،
الصحيان والنوم والأكل بمواعيد، والزيارات والاجازات كله بمواعيد، ومش عايزة اى شكوى منك

هويدا: حاضر هسمع الكلام

عفاف: شطورة ودلوقتى هتروحي مع مس ناهد هتوريكى الاوضة بتاعتك

ناهد: يلا يا حبيبتي تعالى معايا

مشيت هويدا مع ناهد اللى فضلت تعرفها على المكان وعلى القواعد لحد ما وصلت لحد اوضتها، اللى مكنتش اوضتها لوحدها ده كان زى عنبر السجن اللى فيه اكثر من سرير والمكان مفهوش اى بهجة خالص...مرت شهور على هويدا صعبة فى المدرسة مقدرتش تكون اى صداقات لأنها بالنسبة للبنات صحباتها غريبة هادية ومطبعة دايماء، وكمان مش بتقوم من على الكتب لأنها متفوقة ومن الاوائل....وكانت بتقضى معظم اجازاتها فى القرايه او عزف الجيتار اللى كانت مجنونة بيه وبيفرغ كل طاقتها وزاد حبها للموسيقى وزاد احترام مدرسينها ليها ولأخلاقها وتفوقها....لحد ما جه يوم الاجازة بتاعة نص السنة وحضرت هويدا شنطتها واستعدت، ان اهلها هياخدوها وطلعت على البوابة زى باقى البنات فضلت واقفة بتتفرج على كل اب وأم وهما بيعضنوا أولادهم وأهلهم متشوقين لزيارة ولادهم....الكل مشى والدنيا بدأت تضلم حتى أمل هويدا، أن حد يجى يأخذها كان هينطفى لولا ظهور دادة عزيزة....

هويدا: دادة حبيبتي وحشتيني، اومال بابا وماما فين؟ليه مجوش عشان يأخدوني

عزيزة: وانتى كمان، شوفتى انا جيبالك ايه الشيكولاته اللى بتحبيها

هويدا: اومال فين بابا وماما؟!؟

عزيزة: مشغولين شوية وهما اللى بعنوني عشان اجيبك، ده انتى وحشتهم اوى، يلا عشان منتأخرش بقى عليهم

وصلوا الفيلا واكتشفت هويدا ان دادة عزيزة بتكذب عليها....لما شافت معاملة اهلها ليها لما شافوها.....

هويدا: بابا ماما انا جيت.....

أسعد: هويدا ايه الدوشة دى؟! مش عارف اشتغل ينفع كده

هويدا: انا اسفة يا بابا، بس انت وحشتنى اوى وماما كمان اومال هى فين؟!؟

أسعد: ماما عند طنط سهام صحبتها ومش هترجع دلوقت يلا روحى كلى ونامى بقى

طلعت هويدا على اوضتها تعيط لحد ما نامت ومنزلتش تفطر معاهم والغريبة أن محدش محس بغييها ولا كأنها موجودة اصلا....هى بس اللى حست بيها وطلعتها

عزيزة: منزلتش ليه تفطرى يا حبيبتي!؟

هويدا: مش عايزة افطر وز علانة منك، عشان انتى كدبتى عليا

عزيزة: انا عمرى كدبت عليكى، وبعدين مش احنا صحاب ينفع الصحاب يكذبوا على بعض؟

هويدا: اه كدبتى لما قولتلى ان بابا وماما هما اللى بعثوكى ليا، عشان اقضى الاجازة معاهم وانا من وقت ما وصلت ومحدش فيهم سأل فيا، بابا عالطول ببسافر وماما بتخرج مع صحباتها وانا لوحدى، اتكلم والعب واحكى مع مين انا!؟

عزيزة: معايا انا يا حبيبتي.، بصى انا جبته ايه كل القصص اللى بتحبيبها، وهنقرأها سوا بس الاول تأكلى طبقك كله

هويدا: انا بحبك اوى يادادة وحاضر هأكل

قضت الاجازة كلها بتلعب وتضحك وتتكلم مع دادة عزيزة وببخرجوا ويقروا سوا، خلصت الاجازة ورجعت هويدا للمدرسة ولسه مكوئتش صداقات والكل شايفها غريبة الاطوار ومرت السنين واخذت هويدا الابتدائية وطلعت الاولى على مدرستها، وطول فترة الدراسة وهى بتكتب لدادة عزيزة كل حاجة بتعملها وكل لحظة بتمر عليها وكانت بتقترح لما دادة عزيزة ترد عليها وتحكيها كانت بتحس ان فيه حد مهتم بيها وانها مهمة فى حياة حد.....جات الاجازة والمرة دى ملقتش حد يستقبلها ولا حتى دادة عزيزة....وعرفت انها هتقضى الاجازة لوحدها فى المدرسة....مر اسبوع ودخلت هويدا فى حالة اكتئاب وكان لازم مس عفاف تبلغ اهلها.....

عفاف: يا استاذ أسعد مينفعش كده، انا كلمت حضرتك اكر من مرة، والبت حالتها بتسوء كل يوم عن اللى قبله، ياريت حضرتك تيجى المرة دى فعلا مش زى كل مرة تعتذر بأنك مشغول

ناهد: هو لسه محدش من اهلها جه!؟ مسكينة هويدا فعلا محتاجة وجودهم جنبها، وهما مش هنا خالص، مشغولين فى حياتهم وهى ولا فارقة معاهم اصلا

عفاف:البنت كده هتتعجب اكتر، كفاية انها ملهاش صحاب ولا عايزة تكلم حد ولا تشوف حد خالص، وقافلة على نفسها

ناهد:طيب انا هروح اتكلم معاها شوية

عفاف:ياريت تساعديها

راحت ناهد على اوضة هويدا اللي كانت نايمة لكن دموعها نازلة منها وهى نايمة و عمالة بتنادى بأسم واحد بس وهى دادة عزيزة اللي بتحس بيها ومعاها دايمًا، بعدها بيومين وصل أسعد على المدرسة عشان يأخذ هويدا للبيت سابها تحضر شنطتها وراح مكتب مس عفاف اللي كانت عايزة تتكلم معاها ضرورى....

عفاف:اهلا استاذ أسعد، انا عايزة اتكلم معاك بخصوص هويدا

أسعد:خير حضرتك!؟

عفاف:البنت نفسيتها وحشة اوى، وده لأنها بتحس نفسها غريبة ملهاش صحاب وبتقضى وقتها هنا بين المذاكرة والكتب، وفى البيت مفيش اهتمام منكوا، ياريت لو تهتموا بيها شوية هى محتاجلكوا اوى

أسعد:حضرتك اتجاوزتى حدودك، مش من حقك تقوليلى اتعامل ازاى مع بنتى، وكل اللي يهملك هو المصاريف والإلتزام بالقوانين، لكن معاملتى ليها مسمحكيش تحديهاالى ابداء، او تقوليلى اعمل ايه!؟، عن اذن حضرتك

مشى أسعد هو وهويدا للفيلا فى الوقت اللي كانت فيه عفاف بتتكلم مع ناهد.....

ناهد:حضرتك اتكلمتى معاها عن حالة هويدا!؟ وانه المفروض يهتم بيها شوية

عفاف:مسكينة هويدا محدش حاسس بيها ولو فضلوا كده هتضيع منهم

اخذ اسعد هويدا معاها على البيت،واول ما وصلت جريت تدور علنالدادة لكن.....

هويدا:ماما فين دادة!؟

عزة:تعبانة شوية واخذت اجازة

هويدا:طيب عايزة اشوفها واطمن عليها

عزة:الصبح هقول للسواق يوصلك عندها، ودلوقتى نامى بقى

هویدا: ماما طیب اعدی معايا شویة، ولا انام فی حضنك النهاردة!؟

عزیزة: ایه ده یا هویدا تنامی فی حضنی هو انتی صغیرة!؟ وبعدين انا لازم اخرج لصحباتی ومینفesh اتأخر علیهم یلا سلام

خرجت عزیزة وفضلت هویدا تقرأ لحد ما نامت، وتانی یوم الصبح راحت عند دادة عزیزة عشان تزورها..... فی بیت عزیزة.....

هویدا: دادة وحشانی اوی

عزیزة: انتی اکثر یاحبیبتی

هویدا: الف سلامة علیکی، مکنتش اعرف انک تعبانة، زعلت اوی لما مجتیش تأخذینی

عزیزة: الله یسلمک، مش بأیدی یابنتی والله کنت جیالك بس تعبت بقی

هویدا: ولا یهمک انا مش هسییک خالص، وهفضل جنبک لحد ما تخفی

عزیزة: بس کده هتعبك معايا یابنتی

هویدا: انتی بتقولی انی بننک یقی من واجبی اقعد جنبک، لحد ما تبقی زی الفل زی ما کونتی بتقعدی جنبی وانا تعبانة، وبعدين انتی عارفة انی ملیش غیرک اتکلم معاه واحکیله، واحس انی مهمة عنده

عزیزة: انتی من یوم ما جیتی علی الدنيا وانا مسئولة عنک، اول خطوة کانت بأیدی انا عشان توصلیلی، انتی بنتی فعلا الأم اللی بتربی مش اللی بتحمل وتخلف بس

هویدا: ربنا یخلیکی لیا یا ماما

فضلت هویدا طول الاجازة کل یوم بتروح لدادة عزیزة تظمن علیها ویأکلوا ویحکوا ویقضوا الیوم کله مع بعض.... لحد ما جه وقت الدراسة وقبل ماتروح المدرسة راحت هویدا لدادة عزیزة.....

عزیزة: هتروحي المدرسة خلاص!؟

هویدا: ایوه یادادة

عزیزة: متزعلش یاحبیبتی، عایزاکي دایما تطلعی الأولى وتاخذی بالک من نفسك، وتکتبی لیا دایما تحکیلی، اخبارک زی ما عودتینی علی کده وانا هکتبک دایما

هویدا: حاضر، هكتبك دايمًا عشان انا معنديش غيرك يسمعنى

مشيت هويدا وراحت المدرسة ورجعت للوحدة من تانى.... ملهاش صحاب وقتها كله بيضيع فى المذاكرة والرسم والقراءة، ويبصبرها على وحدتها جوابات دادة عزيزة اللي بتحكيها عن العالم اللي اتحرمت منه، وكانت هويدا بتحكيها كل حاجة بتجرى فى يومها بالتفصيل الممل.... مرت السنين واخذت هويدا الإعدادية وكانت الأولى زى كل سنة وكل يوم إعجاب المدرسين بيها وبذكائها بيزيد.... جات الاجازة وكانت هويدا مستنياها بفارغ الصبر لأنها هتقضيها مع دادة عزيزة.... وفعلا اول لما جات الاجازة وجهزت هويدا شنتها وطلعت من البوابة لقت دادة عزيزة فى استقبالها زى ما وعدتها لكن شكلها كان باين عليه التعب والاجهاد الشديد.....

هویدا: دادة وحشاني اوى

عزيزة: انتى اكثر يابنتى

هویدا: بس انتى شكلك لسه تعبنا، كنتى ارتاحتى وانا جيتك لحد البيت

عزيزة: لا يابنتى انا بخير، وبعدين انا وعدتك فى اخر جواب ان انا اول حد هتشوفيه

هویدا: انا بحبك اوى يادادة

عزيزة: اتفضلى بقى هديتك اهى، وكل سنة وانتى طيبة وعقبال مليون سنة

هویدا: وانتى طيبة يادادة، انا كنت فاكرا ان محدش هيفتكر عيد ميلادى

عزيزة: ازاي انسى اليوم، اللي جات فيه بنتى على الدنيا وبقت كل حياتى

هویدا: يا حبيبتي يادادة، تفتكرى بابا وماما فاكريه ولا نسيوه كالعاده!؟

عزيزة: اكيد فاكريه ده انتى بنتهم الوحيدة، يلا بينا بقى عشان نتفصح ونروح الملاهى ونقضى اليوم مع بعض

هویدا: لكن بابا وماما مش هيقلقوا

عزيزة: متخافيش انا اخدت الأذن منهم

هویدا: طيب يلا بينا بقى

راحوا الملاهى واتفسحوا واتغدوا برا وكان احلى عيد ميلاد لهويدا تقضيه مع الدادة....وبعد ما خلصوا
الفسحة روحوا البيت واكتشفت هويدا الحقيقة.....

هويدا:بابا....ماما انا جيت

عوض:مش هنا يابنتى البيه مسافر، فى شغل والست هانم مع صاحببتها فى شرم

هويدا:شكرا ياعم عوض

عوض:كل سنة وانتى طيبة يابنتى، وعقبال مليون سنة ودى هديتك بقى حاجة كده مش قد مقامك

هويدا:الله ورد، انا بحبه اوى شكرا ياعم عوض ربنا يخليك

طلعت هويدا اوضتها وكانت دادة عزيزة بترتب هدومها فى الدولاب.....

هويدا:انتى ليه يادادة مقولتليش ان بابا وماما مش هنا!؟، ومش فاكرين عيد ميلادى

عزيزة:مكنتش عايزاكى تزعلى يا حبيبتى، وبعدين هما مشغولين بس اكيد هيرجعوا ليكى بالهدايا بتاعتك

هويدا:انا مش عايزة هدية، انا عايزاهم جنبى واحس انى موجودة فى حياتهم، هما مش بيحبونى يادادة
صح

عزيزة:لا طبعاً انتى اعالى حاجة عندهم اوعى تقولى كده تانى

مرت السنين ووصلت هويدا ل2 ثانوى والسنة دى مكنتش سعيدة عليها لأن دادة عزيزة ماتت ولأول مرة
تحس هويدا انها يتيمة وفقدت اهلها كلهم....دادة اللى بالنسبالها كل العالم وبدأت تدخل فى حالة اكتئاب
شديد لكن اهلها مفهموش ده ومحدث كان فاضى ليها...صعبت على كل الشغالين عندهم لأنها مكنتش
بتأكل ولا بتخرج من اوضتها خالص.....

عوض:ست هانم، الست الصغيرة تعبانة اوى مش بتأكل ولا بتشرب، ولا بتخرج وعالطول فى اوضتها
بتعيط، ياريت حضرتك تشوفها وتقعدى معاها

عزة:انت هتعلمنى اتعامل مع بنتى ازاي!؟،امشى و متدخلش فى حاجة متخصصكش

أسعد:ايه فى ايه!؟

عزة:البنت من وقت ما دادة عزيزة ماتت وهى تعبانة اوى، وانت عارف الدادة كانت بالنسبالها ايه!؟انا
خايفة على البنت اوى

أسعد:بسيطة نسفرها تغير جو يومين

عزة:طيب ايه رأيك لو نوديتها لدكتور نفسانى؟! واهو يخرجها من حالتها دى

أسعد:انتى اتجننتى اوديتها لدكتور نفسانى والناس كلها تقول بنت أسعد بقت مجنونة وسمعتى تنتشوه وسط الناس، وانتى سيدات المجتمع صحباتك يتكلموا عنك

عزة:دى تبقى مصيبه، خلاص لو كده نسفرها برا تغير جو شوية، انا هطلع اقولها وانت رتب اجراءات السفر

أسعد:خلاص تمام

مشى أسعد يجهز لسفر هويدا فى الوقت اللى طلعت فيه عزة ليها اوضتها....اول ما فتحت الاوضة كانت ضلمة ولا النور ولا الهوا بيدخلوها وهويدا قاعدة على الارض وحاطة رأسها بين رجلها اللى متنية لصدرها ومش طالع غير صوت شهقتها اللى بتشق انفاسها من العياط.....

عزة:هويدا يا حبيبتى، انا وبابا اتفقنا نسفرك برا، عشان تغيرى جو وتخرجى من اللى انتى فيه

هويدا:انا محتجاكوا انتوا جنبى، محتاجة لحضنك ياماما ووقت بابا مش عايزة اسافر

عزة:يا حبيبتى احنا دايما معاكى وجنبك

هويدا:انا مش حاسه بده وكل واحد فينا فى حته ومش بنتجمع ابدًا

عزة:انتى كبرتى على شغل العيال ده، انا هجهز لك شنطتك وبابا هيجهز لك للسفر

جهزت عزة الشنطة وخلص أسعد الأجراءات وبكده خلصت مهمتهم ومشغوليتهم كانت أكبر من انهم يودعوها حتى....سافرت هويدا وعلى الرغم من ان المكان جميل وجديد عليها بس حزنها منعها من الاستمتاع بيه....كل اللى كانت محتجاه حضن امها وانها تلاقى صديقة...مفيش اصعب انك تعيش ميت ومحدث يحس بيك، خلصت السفرية ورجعت هويدا وشغلت نفسها بالكتب والدراسة وتفوقت تماما وطلعت الاولى فى ثانوية عامة....فى عيادة قسمت....

قسمت:كفاية كده النهاردة يا هويدا، انتى تعبتى اوى ونكمل كلامنا بكره

هويدا:بس لسه حكايتى مبدأتش....

قسمت:نكمل بكره ودلوقتى ترتاحى

روح هويدا ولأول مرة تنام من غير تفكير وتحس ان فيه حد بيسمعها...الوحدة مهما بنتمناها بس بنحتاج حد يخطفنا من نفسنا، تانى يوم الصبح صحيت هويدا والفيلة كانت دوشة واستغربت ان ابوها وامها لأول مرة من فترة كبيرة تشوفهم.....

هويدا:صباح الخير

أسعد وعزة:صباح النور

هويدا:ايه الدوشة والزينة دى كلها!؟

عزة:دى حفلة بابا عاملها لصحابه والبيزنس

هويدا:طيب عن اذنكوا انا بقى

عزة:طيب متتأخريش عشان الحفلة

هويدا:حاضر مش هتأخر

لبست هويدا وخرجت لمعادها مع الدكتورة قسمت اللي كانت مستنياها....فى العيادة....

قسمت:ها ازيك النهاردة!؟

هويدا:الحمد لله، تعرفى انى معنديش حد يطمن على احوالى اصلا!؟

قسمت:احنا اتفقنا اننا صحاب ولازم نسمع بعض، كمليلى حكايتك بقى

هويدا:انا وصلت لفين!؟اه لما طلعت الاولى فى الثانوية وبابا جابلى عربية، وقدمت فى جامعة الفنون الجميلة لأنى بحب الرسم والموسيقى اوى، فأخترت اقرب حاجة لقلبى واول لما دخلت كنت فاكرا انى هلاقى صحاب واكون علاقات، لكن اكتشفت انى لسه غريبة الأطوار والكل بيشوفنى شخصية مملة، حتى كل اللى اتعامل معايا كان فى حدود الزمالة والمشاريع اللى بنعملها وبس، لحد ماجه اليوم اللى عرفته فيه وغيرلى حياتى

قسمت:هو مين؟وعرفته ازاى!؟

هويدا:عرفته على الفيس بوك، مكنش ليا علاقة بالتكنولوجيا ولا افهم فيها، بس كنت مضطرة اتعامل معاها هى والواتس عشان جروبات الكلية والمشاريع وكده، وقولت اهى فرصة بما انه موقع تواصل اجتماعى اتعرف على ناس واكون صداقات جديدة

قسمت:كملى وبعدين حصل ايه!؟

هویدا:لقیت ناس كتير بعثولى، وانا كنت لما اقابل اسم اى بنت ابعتها واقول يمكن نكون صاحب بقى، بس بفشل لأنى معرفش صاحب الاكونات دى از اى هكون صداقة معاهم وحتى تفكيرنا مختلف، لحد ما جه اليوم اللى لقيت ادد، من واحد اسمه فهمى النعيمى وداخل يتعرف عليا.....

فهمى:ازيك انا فهمى

هویدا:انا معرفش حضرتك

فهمى:انا عارف بس نتعرف!؟تقدرى تعتبرينى صديقك او ابوكى

هویدا:هو حضرتك كبير فى السن!؟

فهمى:اه عندى 52سنة، انتى بقى اسمك ايه!؟ عشان نتعرف لأن اكيد مش اسمك زهرة الصبار اللى كتباه ده

هویدا:مش مهم تعرف، مش ممكن نكون اصدقاء من غير اى حاجة!؟ مش شرط تربطنا الاسامى ولا العناوين ولا السن قد العلاقات الانسانية

قسمت:طيب وانتى ليه معملتيش اكونت بأسمك عادى ليه مستعار!؟

هویدا:مكنش هيفرق اصل محدش يعرفنى ولا بيهتم بيا وعجبنى الأسم اوى، اصل انا بصبر نفسى دايمًا

قسمت:طيب كملى، حصل ايه!؟

هویدا:اتعرفت انا وهو على بعض، عمره ما قالى كلمة توجعنى ولا تزعلنى لحد ما جه اليوم اللى فتحنا قلوبنا لبعض فيه

فهمى:انتى عارفة ان الكلام معاكى بقى عادة، ومش عارف لو غبتى عنى هعمل ايه

هویدا:ليه بتقول كده!؟

فهمى:عشان معنديش حد يسأل عليا، من يوم ما المرحومة مراتى توفت وانا بعانى فى غيابها وحتى ولادى كل واحد فيهم انشغل فى حياته، اللى سافرت مع جوزها واللى اتجوز وكون اسرة وانا بقيت برا حسابتهم، اه عندى فلوس ومبسوط بس هتعمل ايه ليا!؟، محدش بيسأل عنى ولا حتى بسماعة تليفون غير كل فين وفيه، مين هيكون معايا ولو تعبت يناولنى كوباية ميه اشربها ولا يدينى العلاج!؟

هویدا: بیاہ انت طلعت زى بالطبط بس انت بقى فيه ظروف بعدتهم عنك، لكن انا اهلى مشغولين عنى بحياتهم ولا كائى موجودة

فهمى: خلاص انا من النهاردة هقولك يابنتى، وحشتنى الكلمة ووحشنى اكثر احساسها وانتى اعتبرينى والدك وفى ضهرك

مرت سنة وهویدا وفهمى كل يوم بيتكلموا هى تحكيه عن يومها فى الجامعة بالتفصيل وهو عن يومه فى الشركة...

قسمت: يعنى ولا مرة حسيتى نحيته بشئ؟

هویدا: لا حسيت، وعرفت ان فيه نوع من العلاقات مش بنعرف نسميه، فبنقول عليه ارتياح ان شخص لا شوفتيه ولا تعرفى عنه غير اللي هو عايزك تعرفيه عنه ورغم ذلك حساه حد قريب منك، وتعرفيه من سنين كتيرة ويومك مش بيكمل غير بيه

قسمت: طيب وهو!؟

هویدا: انا بالنسبale كنت بعوضه عن ولاده اللي حرموه من وجودهم معاه، واتحججوا بالظروف، الحقيقة ان الظروف دى سبب بايخ اوى وعذر ملوش لزوم، عند اللي عايز يبعد عننا او احنا مش مهمين عنده، انا فضلت معاه وجنبه لحد ما اضطريت انى اقفل الفيس فترة عشان ضغط الكلية، ولما فتحته عرفت الخبر، وهو انى بقيت وحيدة تانى فى الدنيا ويتيمة لأنه مات معرفش هو مات من التعب والسن زى مايقولوا، ولا مات لأنه حس بالوحدة حس انه بعد مارتب حياته على وجودى فيها انى اتخليت عنه، واديته ضهرى زى ولاده، يعنى مات من الخيبة، اصل فيه ناس كتيرة بتموت من وجع القلب وكثرة العشم فاللى حوالها

قسمت: طيب وبعد ما مات، عملتى ايه!؟

هویدا: قفلت الأكونت ده، وفتحت واحد جديد يمكن ابدأ من تانى، وكأنه صفحة من حياتى بقفلها وبدور على غيرها، عملت واحد جديد وكالعادة مش بأسمى، اتعرفت عليه، و زى ما كنت محتاجة حد فى حياتى هو كمان كان محتاج حد فى حياته.....

عمرو: اهلا ممكن نتعرف!؟

هویدا: لا مش ممكن، بلاش تضیع وقتك ووقتي في كلام فاضی

عمرو: لكن انا حاسس انك محتجانی، زی ما انا محتاجك بالظبط

هویدا: محتجانی ازای؟!؟

عمرو: نكون صاحب مش اكثر، وبعدين انتی بتتقی في نفسك واكيد مش هنتكلم في حاجة انتی رافضاها خالص، وبصراحة متابع الاكونت بتاعك من فترة وبيعجبني كلامك عليه

هویدا: موافقة بس انا هسمعك، ولو حسيت انی هتكلم هبقى اتكلم

عمرو: انا عمرو عندی 27 سنة ومدرس

هویدا: ياه شكلك من الصورة اللي انت حاططها انك اصغر من كده

عمرو: اهو خلقة ربنا بقى هعترض

قسمت: قوليلي يا هویدا والعلاقة اللي كانت بينك وبين عمرو تحت مسمى الاحتياج ولا اخدت شكل تاني؟!؟

هویدا: مررت الشهور واحنا بنتكلم، وهو بيقرب مني بس مع مرور كل يوم اكتشفت انه مش احتياج وانی زی ای بنت جه الوقت اللي لازم تحب وتتحب فيه، وعمرو كان انسان كويس قبل ما اعرف حقيقته

قسمت: يعنى حبيته؟!؟

هویدا: لا، لكنه صحى جوايا احساس الحب، انی محتاجة حد احبه ويحبني ونكون في حياة بعض، مجرد بس انی نفسى اعيش الشعور، انی اتحب، لكن وجوده في حياتي كان مجرد تعود والتعود زی الادمان، اشد من الحب بكثير ويصيبك بالجنون، انا كنت بتعامل معاه عادى وبسمعه كثير يمكن اكثر ما بتكلم لحد ما اتصدمت فيه

قسمت: ايه اللي حصل منه؟!؟

هویدا: كان يوم عيد ميلاده ودخلت اكتبه كل سنه وهو طيب، لقيت واحدة كتباليه بوست وبتقوله حبيبي، واللى فهمته من كومنات الناس اللي نفسها تفرح بيهم انهم مخطوبين، وعشان كده دخلت عند البنت دى ولقتها كاتبه انها مخطوبة ليه، عشان كده عرفت ان البوست بتاعى ملوش لزوم، وممكن يخلق مشاكل بينهم واكون السبب، اختفيت يومين بفكر فيهم ازای واحد ممكن يخبي حاجة زی دى مهمة في حياته؟!؟ ومهمشها اوى ياترى العلاقة مش مهمة لدرجة انه مش فخور بيها؟!؟ ولا مش بيحب خطيبته اصلا ومكمل

مجبر!؟ بس الراجل عموما يقدر يخلق بدل العذر مليون ويمشى، وببلاقي البديل دايم مش زى الست حياتها ممكن تقف بعده، وتحس بالضياح الكامل وتقل قلبها نهائي، اول لما فتحت لقيت اكر من مسج منه، ولما فتحت كان هو اون لايين ودخل كلمنى

عمرو: عاملة ايه؟ وفينك الفترة دى؟

هویدا: الحمد لله كنت مشغولة شوية

عمرو: عايز احكيلك حاجات كتيرة فاتتك

هویدا: مش من حقك ولا من حقى دلوقت

عمرو: يعنى ايه!؟

هویدا: يعنى الاولى ان اللى تتكلم معاها وتسمعك هى خطيبتك، مش انا وهى اللى المفروض تشاركك كل لحظة بتمر بيها

عمرو: خطيبتى دى ليها دنيته وانا دنيته، اه اتخطبنا عن قصة حب الكل بيتكلم عنها بس بعد كام سنة ملينا من بعض ومن الكلام ومن الحياة، بس بنكمل عشان شكلنا قدام الناس تحت اسم المعافرة والتضحية، واحنا مع اى ظرف بنتالك لبعض وشايفين بعض غلط دايم

هویدا: مش مبرر، لو باقى على الحب ده اقعد واتكلم معاها وقربوا من بعض، وكأنكوا بنتعرفوا من اول وجديد، لو بتحبوا بعض كده فحبكوا يستاهل محاولة كمان، حاولوا تكونوا صحاب وصدقنى وقتها هتس انكوا بتكتشفوا بعض من جديد وبتقنوا فى حب بعض تانى، الصداقة سر نجاح اى علاقة وخصوصا لو الحب، انك تروح ليها وانت مخنوق من العالم وبكلمة منها تريحك، انك تهرب من الدنيا لحضن يواسيك وايد تطبطب عليك، وحتى وقت الزعل تهرب منها ليها، محظوظ اللى يلاقى الحب وغبى اللى يضيعه منه عمرو: بس انا اتعودت على وجودك

هویدا: اديك قولت اتعودت يعنى تقدر تستغنى، وتقدر اى واحدة تحل مكانى وانا مبقبلش على نفسى اكون معاك حتى لو اصدقاء، لان ده حق خطيبتك وبس وانا مبقبلش اكون خاينه لانى بكره الخيانة

عمرو: تتفكرى هتفهم كل ده!؟

هویدا: هتفهم وهتسامحك وهتديك اكر من فرصة عشان بتحبك، ربنا يوفقك معاها ودى اخر مرة نتكلم فيها مع السلامة

قسمت:وقدرتى تتعودى على غيابه!؟

هویدا:منكرش انه كان صعب وخصوصا لما تتعودى على غياب حد كان بيهتم بتفاصيل تفاصيلك، وداخل فى كل تفصيلة منها لكن انا عشت طول عمرى بدور على الحب واستحالة اللى بيدور على الحب يخطفه من غيره، او حتى اقبل حب ملوث بوجع قلب وكسرة غيرى وخطيئته اولى بالحب ده

قسمت:طيب كفاية كده النهاردة عشان متتأخريش بقى

هویدا:تأخر على ايه ولا على مين؟زمانهم مشغولين فى ضيوفهم، هما مش حاسيين بوجودى اصلا عشان غيابى يفرق معاهم ويدوروا عليا

قسمت:هویدا انا عايز اكى تشغلى نفسك بالشغل او الرياضة

هویدا:طلبت من بابا قبل كده، ورفض قالى انتى اتجننتى عشان تشغلى

قسمت:خلاص العبي رياضة، او ركزى على الجيتار او الرسم ولوحاتك، اتفقنا واشوفك الأسبوع الجاى بقى

هویدا:اتفقنا...ان شاء الله

روح هويدا وكانت الحفلة شغالة ووالدها مشغول مع رجال الأعمال صحابه ووالدتها

مع سيدات المجتمع صحباتها...المجتمع اللى رافضاه هويدا مجتمع قايم على الزيف والغش والمظاهر والفلوس اهم حاجة عندهم هى اللى بتقيس الناس...قررت هويدا تطلع على اوضتها لكن كانت جعانة اوى فشافت عم عوض مع باقى الشغالين قاعدين بيأكلوا واول لما شافوها فى المطبخ وقفوا.....

عوض:احضرلك العشاء يابنتى!؟

هویدا:هو انا ممكن اقعد أكل معاكوا!؟

عوض:ده شرف لينا، بس لو الست هانم دخلت وشافت حضرتك كده ممكن....

هویدا:متخافش هى وبابا مشغولين فى حفلتهم ومع الناس اللى معاهم

عوض:طيب اتفضلى يابنتى

قعدت هويدا تأكل معاهم واول مرة تحس بطعم للأكل لانها وسط لمة وعزوة وحاسة ان الكل بيحبها وانها وسط العيلة اللي بتحلم بيها طول عمرها....تانى يوم الصبح لبست هويدا وراحت للنادى وقضت اليوم كله بين الرياضة والموسيقى....وجه معاد جلستها مع الدكتورة قسمت وفعلا راحت

قسمت: اها ايه الحلاوة دى حساكي متغيرة كده وشكلك نشيط

هويدا: اصلى عملت بالنصيحة، بقيت الصبح لعب رياضة، وبالليل ارسوم ولا اعزف جيتار

قسمت: طيب مش هتكملى الحكاية بقى حصل ايه بعد ما سبتى عمرو!؟

هويدا: بعدها اتعرفت على مروان وده كان اصغر منى ب3 سنين، وقتها كان هو اللي محتاجنى اكثر ما كنت محتاجة ليه

قسمت: ازاي بقى!؟

هويدا: هقولك، انا من وقت ما لغيت صداقة عمرو قولت ملوش لزوم اعمل اكونت تانى بقى فخليت الاكونت ده، فى يوم دخل واحد يكلمنى بس المرة دى طريقته كانت غريبة اوى

مروان: انا نسخة منك عايش وحيد زيك وكأنك مرايتى او القشه اللي جات تنقذنى من الطوفان والتوهان اللي انا فيه، ارجوكى اسمعيني وساعديني مش عايز منك اكثر من كده!؟

هويدا: انت مين؟ وعايز منى ايه!؟

مروان: انا مروان عندى 18 سنة ومراقب بروفائلك من فترة وحاسس كل كلمة بتكتبها وحاسس انى عايشها، وكأن حياتك بقاسمك فيها وفى الوحدة اللي عايشها

هويدا: انت ليه بتقول كده!؟

مروان: انا معرفش انتى مين!؟ ولا عندك كام سنة!؟ لكن انا واحد من اللي بيقاسمك الواحلكممكن نكون صاحب!؟

هويدا: موافقة بس تحكيلى حكايتك!؟

مروان: انا كلمتك عشان احكيك، عشان الاقى حد يسمعنى واحس انى مهم عنده

هويدا: انت يتيم ولا ايه!؟

مروان: لا انا وحيد والوحيد اتعس من اليتيم، على الاقل اليتيم بيتحرم من اهله بدافع القدر لكن الوحيد بيتيتم من اهله وهما موجودين

هویدا: بيا تشبیهاتك قاسية اوى

مروان: من اللي شوقته من يوم ماجيت على الدنيا، وخلافات بين ابويا وامى لحد ما اطلقوا، وقتها حمدت ربنا وقولت مش هضيع منهم، ووقتها هيحترموا بعض ومش هشوف ابويا بيضرب ويهين امى، ولا امى بتلعن الحظ والظروف اللي جمعتها بيه

هویدا: وانت دلوقت عايش مع مين!؟

مروان: عايش رحالة بين هنا شوية وهنا شوية، عشان الكل مشغول فى حياته

هویدا: رحالة ازاي يعنى!؟

مروان: بعد الطلاق، ابويا اتجوز وامى شافت حياتها وبعديه اتجوزت هى بقى، وطبعا لا مرات ابويا بتستحملنى ولا جوز امى، وليهم حق عشان انا مش ابنهم ويستحملونى ليه!؟ وانا مش من دمهم واللى دمنا واحنا رمونى ومفكروش غير فى نفسهم وبس

هویدا: وانت دلوقت بتعمل ايه ودراستك؟

مروان: هو فيه ميت بيهمه الحياة ولا بتعنيه شىء!؟ بالعكس انا مستنى الموت

هویدا: اسمع يا مروان اعتبرنى اختك واسمع منى، انت لازم تذاكر وتجيب مجموع وتدخل الكلية وتقدر تشتغل، وانت بتدرس وتعتمد على نفسك وتستقل بحياتك

مروان: شكرا يا اختى يا.....

هویدا: اسمى هویدا وانا فى فنون جميلة

قسمت: اشمعنى ده بالذات اللي كشفني له نفسك وقولتيه انتى مين!؟

هویدا: لأنى شوقت نفسى فيه، ومحبتش يحصل فيه زى ما بيحصل معايا، عشان كده كنت امه واخته وصاحبتة اللي بتشجعه، وفرحت اكثر لما قالى انه جاب مجموع وهيدخل كليه اعلام زى ما كان بيتمنى

قسمت: انتى لسه على علاقة بيه!؟

هویدا: مفیش ام تقدّر تتخلی عن واجبها، وانا القشه اللی انقذته من طوفان الضیاع، مش عایزة اكون القشه اللی كسرت ضهربجانا كنت معاه بحس انی امه وبفرح اوی لما نحكى لبعض عن يومنا بالتفصیل، لكن كان ناقصنی الحب اللی ای بنت بتتمناه وتتمنى انها تعيشه ولقیته معاه هو وبس

قسمت: قصدك مین؟!؟

هویدا: اخر بطل فی حكايتی اللی افكرته بیحبنی بجد، لكنه استغلنی ولعب بمشاعری، من وقت ما عرفت مروان وانا لقیته الصاحب، ومبقتش اعرف حد ولا احاول اتعرف على حد، حتی الكلیة والجروب بدخل فیها بالأكونت الجدید ده، بعد ما قفلت التانى وخلص والحیة كانت روتینیة اوی، لحد ما لقیته مسح كان فیها....(انسة هویدا انا معجب بیكى اوی وبشخصیتك، وانا زمیل لیكى فی الكلیة، ومتابعك على الجروب وفی الكلیه كمان)وقتها اتخضیت انه عرفنی بس فرحت ان فیة حد معجب بیا

هویدا: هویدا مین؟!؟

إسلام: بلاش تهربی منی، انا عارف انك هویدا أسعد، البنّت الساكتة دايمًا اللی بتقعد لوحدها وعیونها احلی عیون فی الكون، تشوفها تسحرك وكأنها الجنه

هویدا: وانت ایه اللی مخليك متأكد انها انا؟

إسلام: اولًا زی ما قولت متابعك، ثانياً واحنا بنشتغل فی الورشة كنت رايح عشان اسألك على حاجة لقیته موبایلک مفتوح على البروفایل ده، واكيد مش هتفتحی بروفایل مش بتاعك یعنی وانتة مكنتیش موجودة جنبه

هویدا: وحضرتك عایز ایه دلوقت؟!؟

إسلام: انا معجب بیكى وحابب نتعرف ونترتبط ببعض لو مفیش مانع؟!؟

هویدا: اسفة انا ملیش فی الكلام ده

إسلام: انا عارف ومتأكد من ده، لكن عالأقل خلینا نتعامل مع بعض كأصدقاء ممكن؟!؟

هویدا: هفكر....عن اذنك بقی

قسمت: ووافقتی بعدها مش كده؟!؟

هویدا: اِه بقینا صحاب و بدأ یدخل فی تفاصيل حیاتی، و قربنا من بعض و حکتله عن حیاتی و عن الوحدة اللى کنت عایشاها، و هو جه وقف جنبى و خرجنى منها، حتى حکیت لیه عن بابا فهمی الله یرحمه و عمرو و کمان مروان، وانى لسه بکلمه و معاه وده طبعا بعد ما اداى الأمان و طمنى منه

قسمت: وکان رده ایه!؟

هویدا: فاکرة رده، کل کلمة قالها لى كأنها دلوقت و استغربت من رد فعله

هویدا: إسلام صدقنى انا اسفة فعلا، و مکنتش اقصد اجرک بس مش حابة اخبى عليك حاجة و انت دلوقت اقرب حد لیا

إسلام: بالعکس انا مش زعلان دى حیاتک وده ماضى، و انا مش من حقى غیر انى احاسبک بس من یوم ما عرفتک، لكن اللى فات مش بتاعى و مش من حقى خالص، و انتى مغلطیش معاهم بالعکس کنتى محترمة و انا اتشرف بحبک ده و انه بیکبر جوايا

هویدا: انت بجد انسان ممتاز و محترم اوى، و ربنا رزقنى بیک عشان تعوضنى

قسمت: و مرتبطیش بیه لیه!؟

هویدا: عشان طلع غشاش و منافق، و کان عایز یستغلنى انا و اهلى وده عرفته متأخر

بعد عنى و غاب لمدة شهر و لما کنت بکلمه ولا ابعتله مسج مش بیرد و حتى الكلية ببیعد عنى و یقولى مشغول.... و فجأة دى

إسلام: انا اسف انى مکنتش بسأل الفترة اللى فاتت دى، بس ظروفى و حشة اوى

هویدا: قلفتنى عليك اوى، حصل ایه!؟

إسلام: مش کویس لما قولت لبابا انى مش هتجوز بنت عمى، وانى معجب بواحدة معايا فى الكلية منع عنى الشهرية، و مش عارف هعیش ازای و اصرف منین دلوقت!؟

هویدا: متقلش خالص انا ممکن اساعدک

إسلام: لا طبعا مقبلش انى اخذ منك فلوس

هویدا: انت لیه اخذتها بالمعنى المادى!؟ انا کنت هکلم حد من صحاب بابا یساعدک فى شغل و بکده محتاجش لحد

إسلام: مش هينفع وهياثر على الكلية، ممكن بس استلف منك مبلغ

هویدا: اه طبعا احنا صحاب ولا يهملك.....

فضل إسلام كل يوم يتحجج بحجة شكل ويأخذ منها فلوس.....

قسمت: وبعدين حصل ايه؟!؟

هویدا: غاب عنى 6 شهور، عرفت انه خطب بنت عمه ولما كلمته عرفت حقيقته كلها

هویدا: انت ازاي تخطب؟! ازاي بتحبني وتكون لغيري، انت غشاش وحرامي وانا هبلغ عنك البوليس فى
الفلوس اللي اخذتها مني لازم ترجعها كلها

إسلام: بلغي وانا هفضحك هقول لكل الناس عن الرجالة اللي عرفتهم، ومش بس كده انا بعثلك هدية حلوة
اوى زمانها هتوكده

هویدا: هدية ايه؟!؟

إسلام: هحرقها لك كده، بس مش مهم بقى هيوصلك صندوق وفيه ظرف هتلاقى صورك مع الرجالة اللي
عرفتهم قبلى وانا كمان معاهم، لو فكرتى تتكلمى هنزلها فى الجرنال وسمعتك وسمعة ابوكى رجل
الأعمال الكبير هتنتشوه، ومش بعيد يموت فمن الأحسن ليكى انك تسكتى

هویدا: انت احقر انسان انا عرفته، الصور دى مش بتاعتى وانت كداب

إسلام: طبعا مش صورك دى متركبة، بس لازم آمن نفسى منك كويس، ومن الأحسن انتسى اننا اتقابلنا ولا
نعرف بعض خالص، سلام

هویدا: دمرنى وعشت فى خوف ورعب وقضتها حبوب مهدئة، عشان انام وبيجلى كوابيس عنه وهو
بيفضحنى، فضلت كتير قافلة على نفسى لحد ما قابلته وحببت من تانى، وفتحت قلبى ليه وبقي كل دنيته،
وعشان كده جيت عشان اتعالج من اللي انا فيه، وابدأ معاه حياتى من جديد

قسمت: مين ده؟!؟

هویدا: أيمن الحسينى، باباه صاحب بابا ورجعوا من برا وقربنا من بعض، وبكتشف نفسى معاه من اول
وجديد، ولأنه بيحبني اوى لازم اكون كويسة واتعالج عشانه

قسمت: انتى حالتك بتتحسن وانا شايفة ده، بس هنكمل مع بعض شوية ولا ز هقتى؟!؟

هویدا: انا عشانہ اعمل ای حاجة، بس احافظ علیه وعلى حبه لیا

خرجت هویدا وفضلت تتعالج فترة وبقت احسن وكان بيشرحها على الحياة وجود أيمن وحبها لیه اللی بیکر کل یوم....لحد ما جات فی العیادة لدکتورة قسمت....

قسمت: اهلا یا هویدا وحشانی اوی، من الواضح ان أيمن اخذك مننا خالص

هویدا: فعلا انا وهو مع بعض دایما، وجایة اعزمك على فرحی انا وهو

قسمت: الف مبروك لكن للأسف انا مسافرة، بس هحاول انزل على الفرح والف مبروك

هویدا: انا كده خفيت واقدر اكمل حیاتی!؟

قسمت: طبعا انتی كویسة واوی كمان، مفكیش ای حاجة وربنا یوفقك، دی كانت اخر مرة اشوفها فیها وسافرت ورجعت لما قریت اللی حصلها.....

أسعد: یعنی ایہ بنتی كانت مجنونة!؟

قسمت: المرض النفسی مش جنون، والدلیل ان كلنا مرضی نفسیین مش مجانیین وبعدين حضرتك والمدام السبب الرئیسی فاللی وصلت لیه

أسعد: احنا ازای بقی!؟

قسمت: الاهل اللی فاكیرین ان الأكل والشرب واللبس والفلوس دی اهم حاجة عند ولادهم تفتكروا انهم كده عایشین؟ وتديكوا الفلوس الحق انكوا تنشغلوا عنهم، العیلة مش أكل وشرب وفلوس، العیلة سند وأمان واهتمام، وانتوا انشغالکوا عنها دفعوها تدور علي الحب برا مع الناس الغرب وتشوفه فی ای حد

أسعد: وغلطتی انی كنت بأمن لیها مستقبلها عشان متتحوجش لحد!؟

قسمت: الفلوس احنا اللی بنعملها، ولو هتاخذنا من اهلنا وتبعدنا عنهم ببقی ملعونة الفلوس دی، بعدين بنتك متستاهلش من وقتك شویة اهتمام وحب

عزة: انا دمرتها وفضلت واقفة مکانی انا السبب فاللی حصلها

قسمت: مش وقته یا عزة هانم، تقدری حضرتك تسیبی سیدات المجتمع وسفرياتك وحفلاتك وتهتمی بیها شویة، بقی بنتك متستاهلش منك عمرک كله!؟

عزة: عندك حق من النهاردة مش هسيبها ابداء، ولا هخلى دقيقة تمر من غير ما اكون معاها وجنبها، او عدك بكده

أسعد: وانا قصرت معاها فعلا، وعشان كده هقضى كل اللي باقى من حياتى لبيتى الاول وبعدين شغلى قسمت: وانت يا أيمن هتعمل ايه؟! وأكيد فهمت ان اللي بعت الصور دى هو إسلام، عشان ينتقم منها او يستغلها، مش كده!؟

أيمن: انا واحد صاحبي وصلى الظرف ده، بعته واحد مجهول ومن غير أسم ولما فتحتة شوفت ده واتصدمت فيها، فى القطة المغمضة اللي كانت معايا

قسمت: حبها ليك كان الدافع انها تتعالج، مش ذنبها انها ملقتش الحب والأهتمام من اهلها، وقررت تدور عليه برا مع الغريب، لكن من اول لما قابلتك وانت الوحيد اللي فى حياتها

أيمن: اسف مش هقدر اكمل، رجولتى متسمحليش انى اكمل مع واحدة عرفت 4 قبلي، وحتى لو سامحتها انا ايه اللي يضمنلى انى لما انشغل فى الشغل وحياتى مش هتدور على الاهتمام برا وتروح تعرف غيرى!؟، واخسر سمعتى

قسمت: حبها ليك هو الضمان، حبها اللي خلاها تيجى تتعالج وتسبب الدنيا عشانك

أيمن: اسف مش هقدر ابص فى وشها ولا اكمل معاها حياتى، رجولتى مش هتسمح

قسمت: انا اللي اسفة لما افكرتك انسان وجبتك هنا عشان اقولك هى بتحبك ازاي، لكن انت متستاهاش ده كله، ولو اتخليت عنها دلوقت كنت هتتخلي عنها وقت ما تحتاجك فعلا جنبها، انت اللي مريض، وانا اسفة انى ضيعت وقتى معاك

خرجوا كلهم من فيلا دكتورة قسمت... أسعد أخذ اجازة وعزة راحت المستشفى لهويدا وأيمن طلع على المطار يكمل حياته برا زى الأول، وبعد 6 شهور... حياة هويدا اتغيرت تماما بقوا اهلها معاها دايمًا ومش ببسبوها ووالدها سمح ليها تشتغل وتكون نفسها وفى عيادة دكتورة قسمت....

قسمت: اهلا بالفنانة الكبيرة، اللي معرضها ورسومتها كسرت الدنيا

هويدا: وحشاني او، جيت اسلمك دعوة للمعرض الجديد، ويارب يعجبك وجاية اشكرك انك غيرتى حياتى فعلا، بابا وماما معايا دايمًا ومش ببسبونى لحظة ودايمًا فى ضهرى وببشجعونى، كمان شغلى خلانى اكتشف الحياة من اول وجديد، وكأنى اتولدت من جديد

قسمت:يعنى خلاص قفلنا على الماضى؟

هویدا:شطبتہ بأستیكة بس معايا منه حاجة واحدة بس، وهو مروان اللی مینفعش اسیبہ واتخلى عنه، وكان لازم اخده هو کمان للنور ویبص للحياة بعیون ثانية

قسمت:الحياة حلوة اوى وخصوصا لما تعملی الحاجة اللی بتحبیها، اى لحظة الم تمرى علیها مرور الکرام، واستمتعی بحلاوة الدنيا اوعى تعيشى الألم بكامل طاقتك، هتلاقى نفسك فلما یجى الفرح متحسیش بیه،لأنك عشتی الحزن بكامل طاقتك، وان شاء الله المعرض ینجح زى اللی قبله

حسن:مسکينة هویدا كانت ضحیة لأهمال أهلها وانشغلهم بحیاتهم، وهى على الهامش ولا فى حیاتهم ولا حاسیین بیها

فريدة:عشان كده دورت على الحب برا لأنها ملقتوش مع اهلها، لكن هى كانت ضحیة الظروف فیہ نوع ثانى العن من كده

حسن:ایه النوع الثانى!؟

فريدة:النوع اللی نفسه یحب بس مش مهم مین!؟ ومناسب ولا؟!المهم انها تعيش قصة حب والسلام، حتى لما بتخرج من قصة حب مش كاملة بتعيش واحدة ثانية بعدها بثوانى، ویاریتها بتدى نفسها فرصة تقیم العلاقة وفشلت لیہ؟، لا بتدخل فى غیرها عالطول المهم انها متقضیش وقت من غیر لا راجل ولا حب فى حیاتها

حسن:بس ده مش صح لاننا لما نخرج من علاقة فاشلة بنحتاج وقت نقعد مع نفسنا، ونشوف قصرنا فى ایہ وضحینا لیہ؟ وبعدها جرحنا یخف ونبدأ من جدید

فريدة:فعلا مش لازم نستعجل الحب، ومش اى حد یستاهل حبنا ولازم ندى نفسنا فرصة عشان نقیم العلاقة صح.

حسن:عندك حق اصل الحب اللی بجد بیجى مرة واحدة

فريدة:ایه ده بص مین جاییین علینا!؟

حسن:انا مش مصدق عنیا زیاد وأمانى

أمانى: ازيكوا عاملين ايه!؟

فريدة: وحسن: الحمد لله تمام

زياد: مبسوطين هنا يعنى!؟

حسن: الحمد لله، فيه ايه يابنى محسنى اننا فى مدرسة بطريقتك دى!؟ تعالى انا عايز اتكلم معاك!؟

زياد: طيب عن اذنكوا

أمانى وفريدة: اتفضلوا

فريدة: مالك يامونى شكلك مضايق ليه!؟

أمانى: انتى عارفة ان الحنة بتاعى بكره، وكنت انا وزيااد عاملين حفلة فى القاعة الصغيرة بتاعة الفندق وكنا متحمسين اوى، ولما شوفناها دلوقت مطلعتش زى ما كنا عايزينها خالص والوقت بيجرى بقى

فريدة: وعشان كده زعلانة وشكل وشك 7*8 على فكرة شكلك بيبقى احلى لما بتضحكى، فوكيها بقى

أمانى: والله انتى رايقة، انا فى مشكلة ومش عارفة اعمل ايه!؟

فريدة: ومروقتش ليه مش فرح اختى!؟، وبعدين تعملى ايه يعنى ايه!؟ هوا انا مثلا مش مهندسة ديكور قد الدنيا وهظبطلك الدنيا كلها

أمانى: بجد يافرى هتقدرى!؟

فريدة: انا اه مهندسة ديكور مش مصممة افراح، بس الحاجة لما تكون خارجة من القلب بتتعمل صح وتتحس اوى كمان، متقلقيش سيبى الموضوع ده عليا وعلى حسن وان شاء الله تطلع كويسة

أمانى: قولتيلي حسن!؟ لا لو حسن هظمن

فريدة: يابنتى انتى فى ايه ولا ايه!؟ ده انتى غريبة والله، عموما زياد جاى هناك أهو فكى التكشيرة دى بقى

أمانى: ربنا يخليكى ليا يافرى

زياد: يلا بينا بقى يامونى عشان نكمل مشاورنا

أمانى: اه يلا عشان متأخرش، مش هوصيكى بقى يافرى

فريدة: أن شاء الله يامونى

زياد: هعتمد على الله وعليك يابو على

حسن: اطمئن يازيزو

مشيوا أمانى وزياى وهما مبسوطين، فى الوقت اللى كانوا فيه فريدة وحسن مختارين كل واحد فيهم عايز يقول للتانى انه يساعده عشان الحفلة بتاعة الحنة....

حسن: انتى عاملة ايه!؟

فريدة: ده على اساس انك مش لسه سايينى من ربع ساعة مثلا

حسن: هى أمانى كانت بتوصيكى على ايه؟

فريدة: ها، ولا حاجة انت قولى زياد هيعتمد عليك فى ايه!؟

حسن: اه مش صحاب لازم يعتمد عليا، فريدة انا كنت عايز اطلب منك طلب؟

فريدة: وانا كمان!؟

حسن: قولى انتى الاول

فريدة: لا انت الاول

حسن: لا ميصحش السيدات اول

فريدة: بصراحة كده بقى انا محتاجة مساعدتك فى الحفلة بتاعة بكره!؟

حسن: هههههههه

فريدة: انت بتضحك على ايه!؟

حسن: اصل انا كنت هطلب منك نفس الطلب، اول لما زياد حكى ليا المشكلة وانا عرضت عليه المساعدة، قولتله ان أنا وانتى هنساعده ونظبط الحفلة

فريدة: هههه طيب الحمد لله، انك مش هتسيبنى اشيل الحفلة لوحدى

حسن: لا اكيد مش هسيبك، غير لما الحفلة تبقى احسن ما كانوا بيتمنوا

فريدة:طيب يلا بينا بقى، نشوف القاعة والتجهيزات اللى هنعملها

حسن:يلا بينا

راحوا للقاعة واول لما شافوها بصوا لبعض وعرفوا ان قدمهم شغل كثير ومجهود أكبر عشان يخلصوا....

حسن:احنا هنبدأ منين دلوقت!؟

فريدة:الاول هنجيب العمال، عشان يساعدونا ونوزع الشغل علينا

فعلا بدأوا يشتغلوا ويرتبوا التربييزات والكراسى والزينة والورد والنور....

حسن:فريدة اطلعى نامى النهار قرب يطلع، وانتى مستريحتيش من امبارح

فريدة:هستريح لما نخلص، وبعدين انت كمان منمتش من امبارح ولازم ترتاح

حسن:انا استحمل لكن كده انتى هتتعبى، اطلعى بس وانا هأخذ بالى من كل حاجة وهتطلع زى ما انتى عايزة

فريدة:طيب هخلص وبعدها هبقى انام شوية قبل الحفلة

حسن:طيب اتفضللى، معايا ثوانى

فريدة:هتفضل معاك، بس لما اخلص الشغل اللى فى ايدى

حسن:لا هتيجى معايا ودلوقت....

فريدة:الله ياحسن، سيبنى انتى واخذنى لفين كده!؟

حسن:امشى وانتى ساكتة

فريدة:لا اعرف احنا رايعين فين!؟

حسن:خلاص وصلنا، اتفضللى ياستى اقعدى افطرى، عشان متتعبيش وبعد كده متنسيش نفسك فى الشغل مرة ثانية

فريدة:طيب وانت!؟

حسن:لا انا هشوف التجهيزات

فريدة: انت كمان مأكلتش من امبارح ولازم تفطر معايا، وبعدين مش بعرف افطر لوحدى لازم حد يعمل
دوشة جنبى

حسن: ده على اساس انك قاعدة جنب حمادة ابن اختك يعنى، بس ماشى هقعد
خلصوا فطار وقاموا بعدها يكملوا باقى الترتيبات واخيرا خلصوا وفاضل على الحفلة 5 ساعات.....

حسن: ياه اخيرا خلصنا

فريدة: قصدك اخيرا هنام، ده انا شربت كمية قهوة النهاردة مشربتهاش فى حياتى

حسن: اه المهم دلوقتى ننام قبل الحفلة

فريدة: طيب تصبح علي خير

حسن: وانتى من اهله

طلع كل واحد على اوضته، دخل كل واحد فيهم على السرير واترمى بجسمه وناموا عالطول من كتر
التعب والأجهاد طول الليل.... وجه وقت الحفلة، والكل موجود وحتى العرايس وصحابهم وقرائهم
اصحاب العريس والرجالة فى مكان بيحتفلوا والعروسة وصحباتها وأهلها فى مكان تانى بيحتفلوا وكان
حسن كل شوية يخرج من الحفلة يبص على فريدة اللى اتأخرت وهى بتجهز للحفلة وقرر انه يطلع
يشوفها....

فريدة: ايه ده هو انا اتأخرت اوى كده والحفلة خلصت!؟

حسن: ايه الجمال والرقه دى كلها

فريدة: ميرسيه بس انت مقولتليش انت جاى هنا تعمل ايه!؟

حسن: مش فاك

فريدة: طيب يلا بينا على الحفلة

حسن: اه الحفلة كنت جاى اخذك عشان الحفلة والناس، ومحدث يعاكسك وانتى زى القمر كده.

فريدة: لا متخافش عليا

راحوا الحفلة وبدأت الاغانى والرقص والاحتفال وبدأت فريدة ترقص وتغنى لفرحتها بصاحبة عمرها واختها أمانى....بعد شوية من الاحتفال الكل بدأ ينشغل وكل مجموعة من الصحاب حوالين تربية وأمانى مع أهلها وقريبها فقررت فريدة تطلع برا تقعد مع نفسها شوية....فضلت قاعدة بتفكر وتسرح مع نفسها وقطع تفكيرها صوته....

حسن:بقى بالذمة مش عيب لما تبقى منظمة الحفلة، وصاحبة العروسة وقاعدة هنا وسايبة الحفلة!؟

فريدة:ده على اساس انك فين دلوقت!؟

حسن:وادی قاعدة، ها طلعتى من الحفلة ليه!؟

فريدة:الدنيا زحمة وانا بتخنى من الزحمة، فقلت اطلع اشم شوية هواء

حسن:الزحمة ولا حسيتى بالوحدة!؟

فريدة:مهو احنا بنهرب من الزحمة بالوحدة، ومن كتر ما بنتعود عليها بنخاف من الزحمة

حسن:تصورى اول مرة اعرف ان زياد بيعرف يغنى!؟

فريدة:انتوا ازاي صحاب من وانتوا صغيرين ومتعرفش حكاية الغناء دى!؟

حسن:انا وزياد صحاب من صغرنا وجيران كمان، وبعد الكلية انا سافرت فترة ورجعت لقيت احواله اتغيرت قابل أمانى وحبها

فريدة:اه يعنى انت حضرت النص الثانى من قصتهم بس!؟

حسن:اه هو انا فاتتى كثير ولا ايه!؟

فريدة:مش اوى يعنى

حسن:طيب بقولك ايه تعالى نتمشى شوية بدل القعدة دى، وكل اللى رايع وجاى يفتكرنا بنحرس القاعة

فريدة:معنديش مانع يلا بينا

ولسه هيقوموا وقفت فريدة مكانها لما صدمها الموقف اللى شافته....مجموعة بنات بيتكلموا عن بنت واقفة لوحدها....

هايدى:اهى هى دى بقى نسرين المعقدة

حنان:معقدة ليه!؟

هايدى:من الحب والجواز والحاجات دى، رفضت عرسان كثير اوى

حنان:يا ساتر يارب وايه اللي جابها مكان فرح زى ده بقى!؟

هايدى:وانتى يعنى مش شايفة هي واقفة كئيبة لوحدها ازاي!؟

حنان:طيب يلا بينا ندخل القاعة

وقفت فريدة تبص على نسرين لقتها نص القمر اللي انشق نصه فى السماء ونصه واقف على الأرض وهى نسرين اللي كانت شاردة فى الذكريات وبعيدة عن الكل....فاقت فريدة على صوت حسن....

حسن:ايه روحتى فين!؟

فريدة:هنا اهو

حسن:طيب يلا بينا بقى

فريدة:على فين!؟

حسن:لا انتى مش معايا خالص، مش قولنا هنتمشى شوية

فريدة:اه يلا بينا

مشيوا شوية لحد ما بعدوا عن القاعة والدوشة وكانت فريدة سرحانة فى نسرين والكلمة اللي اتقالت عليها معقدة....

حسن:ايه هتفضلى ساكتة كده!؟، ده احنا من ساعة ما بعدنا عن الدوشة وانتى ساكتة

فريدة:لا ابدًا مفيش انا سامعك اهو

حسن:بس انا اللي عايز اسمعك، انتى اتضايقتى من اول لما سمعتى البنات، وهما بيتكلموا عن البنات اللي واقفة لوحدها

فريدة:هو ليه لما حد يرفض حاجة او يأجلها يقولوا عنه جبان او مش قد المسؤولية او معقد!؟ والكل يبعد عنه، انت عارف انا بشوف العقدة دى زى الفوبيا، جربت حاجة واتوجعت منها ومش عايزة اتوجع تانى

حسن:بس ده مش صح، أن اول لما نتوجع من حاجة نقفل على نفسنا، ونخاف ان أى حد هيقرب مننا هيوجعنا ويمشى

فريدة:هو غلط، بس اللي بيبقى قافل على نفسه مش بيبكون بمزاجه، صدقنى نفسه يعيش ويلقى حد يأخذ بأيديه، بس يبدأ معاه ازاي وهو جواه مات وانتهى؟! ازاي وهو مفيش جواه طاقة يعافر ويستحمل او حتى يبدأ بيها من جديد!؟

حسن:والحل انه يقفل على نفسه، ويعيش فى سجن ويضيع الحلو منه

فريدة:هو ليه دايمًا الشخص اللي اتوجع هو اللي بيتحاسب عن اختياره الغلط؟! عن حبه وإخلاصه مع أنه دفع التمن ده من عمره ووقته وأعصابه ودموعه وقلبه، بس مطلوب منه يدفع التمن مرة كمان ويتقال عليه معقد وكأنها وصمة عار، هيعيش بيها العمر كله، بس فيه سؤال بننسى نسأله لنفسنا وهو مين السبب فاللى المعقد وصل ليه؟!وايه اللي شافه وعاشه!؟

حسن:عندك حق قبل ما نلومه، لازم نحاسب اللي خلاه يخاف من الدنيا والناس كده

فريدة:فكرتني بكلمات أغنية بتقول(وحكيوا سنينو، قالوا قلوبهم اتقفلت وقالوا علينا معقدين لكن مقلوش سبب واحد لعقدتهم إيه؟! ولا قفلت قلوبهم مين!؟) غريبة الدنيا اوى بتعاقب المظلوم على تهمة مرتكبهاش، وهيعيش شايل ذنبها طول العمر لكن تهمته الوحيدة انه حب بجد

حسن:الحب اللي بجد استحالة تندمى عليه

فريدة:لا بنندم لما يروح للشخص الغلط، ويجى الصح وتكون فاضى من جوه، فكرتني بيها

حسن:بمين!؟

فريدة:بحكاية طبعا

حسن:حكاية ايه المرة دى!؟

فريدة:المعقدة والأناى...تحب تسمعها!؟

حسن:ده سؤال! طبعا احب

(المعقدة والأنانى)

قدام مستشفى الأمل بالمعادى....نزلت فرح من عربيتها ومعها صاحبته أسماء

أسماء:متأكدة انك مش عايزانى انزل معاكى!؟

فرح:هو انا رايحة اتفسح، انا هجيب التحاليل بتاعتى وأجى عالطول

أسماء:طيب خلاص متتأخريش

دخلت فرح المستشفى ووصلت على مكتب دكتور سعيد عبدالهادى.....

فرح:مممكن ادخل!؟

سعيد:طبعا اتفضلى، اخبارك ايه دلوقت!؟

فرح:الحمد لله، كنت جاية اطمئن على نتيجة التحاليل بتاعتى هى ظهرت ولا لسه!؟

سعيد:اه ظهرت واطمنى كويسة عن الأول بكثير، والحالة مستقرة اوى، اتفضلى ياستى تحاليلك اهى

فرح:الحمد لله، شكرا لحضرتك يادكتور وعلى مجهودك معايا

سعيد:ده واجبى، على فكرة الشاب اللى اتبرعتى ليه بدمك من أسبوعين لما كنتى بتعملى التحاليل، سأل عنك وعايز يشكرك

فرح:انا معملتش حاجة انا ساعدته وبس، لما كنت بحلل وعرفت ان فيه حد حالته خطيرة وانى نفس فصيلة دمه قررت أساعده وبس

سعيد:وعشان انقذتى حياته من الموت هو عايز يشكرك بنفسه، هو هنا على فكرة وسأل عنك وعرف انك جاية النهاردة، مستنى برا فى الاستقبال

فرح:طيب عن اذن حضرتك بقى

خرجت فرح وراحت على الاستقبال تسأل عن اللى انقذت حياته وهو كان مستنيها....

فرح:لو سمحتى فين الشخص اللي أنا اتبرعت ليه بدمى من أسبوعين!؟

المرضة:ايوه ثوانى، استاذ دى الانسة اللي كنت بتسأل عنها

أحمد:شكرا

مشى أحمد وجه قرب من فرح اللي كانت مدياله ضهرها.....

أحمد:انا متشكر اوى انك انقذتيني....

هنا اديرت فرح عشان تشوفه وكانت الصدمة ليها.....

فرح:لا العف.....

أحمد:انتى اللي انقذتى حياتى!؟

فرح:مكنتش اعرف انه انت اللي دمي هيجرى فى عروقك، لكن على الاقل دمي محظوظ انه بيجرى فى كل خلية ونسيج جواك لحد ما يوصل لقلبك، المكان اللي معرفتش عمرى اوصله

أحمد:فرح انا فعلا آسف

فرح:آسف على انك ضيعت سنين عمرى جنبك، ولا آسف على كل دمعة نزلت منى، ولا على كل وجع وشهقة نفس شقت صدرى نصين، ولا انك ضيعت اللي فات جنبك ومبقتش عارفة ابص على اللي جاى، ولا على وجع القلب وكسرة النفس اللي سيبتهم ليا ومشيت، اسف دى كلمة صغيرة اوى، مش هتصلح الخراب اللي انت عملته ولا هتصلح اللي اتكسر جوايا

أحمد:طيب ممكن فرصة تانية!؟وصدقيني مش هتندمى او عدك

فرح:فرصة عشان تضيعها زى اللي ضيعتهم، فرصة عشان توعدنى بحاجات مش بتنفذها، صدقنى انا معنديش حاجات اديهالك، لا حب ولا طاقة حتى ابدأ من جديد هبقى بكذب على نفسى، لو قلت انك ممكن تتغير وابقى عبيطة لو صدقتك، غبية الست اللي بتفكر ان الراجل هيغير طبعه عشانها، والأغبي بقى أن الراجل بيفكر ان الست اللي بتحبه دى هتفضل معاه مهما عمل فيها، مع انها بتمشى لما يفيض بيها

أحمد:يعنى ايه!؟

فرح:يعنى أنا مش هعرف اخدع نفسى واعيش فى وهم حبك ده كثير، جه الوقت اللي اقول فيه كفاية حتى لو جات متأخر بس لازم احط حد للمهزلة دى، زمان سبتنى عشان مكنش ليا مكان فى احلامك، وكنت

عايز تحققها النهاردة بقى انت ملكش اى مكان لا فى احلامى ولا حياتى، و عن اذنك عشان معنديش حاجة اقدر اديهالك زى زمان

مشيت فرح والدموع مالية عيونها لحد ماوصلت للعربية ولأسماء صاحبته....

اسماء:مالك يا فرح!؟ انتى كويسة طميننى طيب التحاليل فيها حاجة!؟

فرح:انا عايزة امشى من هنا بسرعة، سوقى انتى

اسماء:مش معقولة بقالى نص ساعة بكلمك وانتى فى عالم تانى، مالك بقى؟ التحاليل طلع فيها حاجة!؟

فرح:لا سليمة الحمد لله وأحسن من الأول

اسماء:الله ولما هى كويسة انتى قالبية وشك ليه كده!؟

فرح:عشان شوفت أحمد، وطلع هو اللي اتبرعت ليه بدمى

اسماء:يادى أحمد وسنينه...مش هنخلص من السيرة دى بقى!؟

فرح:خلاص عدى على الحكاية دى سنتين وانتى عارفة انا اتغيرت ازاي

اسماء:مش ده اللي يستاهل دمو عك افتكرى اللي عمله فيكى كله

فرح:انا عمرى ما نسيت اللي عمله، ومع كل دقيقة بيمر قدام عنيا

افتكرت فرح كل اللي حصل من أول مرة اتعرفوا فيها على بعض فى فرح بنت عم أحمد وكانت صديقة فرح فى الكلية....

أحمد:فرح مش كده!؟

فرح:ايوه، هو انت تعرفنى!؟

سحب أحمد كرسي وقعد جنب فرح....

أحمد:هقولك أنا اصل هبة تبقى بنت عمى، وملهاش سيرة غير فرح بتحب ايه؟ وفرح بتكره ايه!؟ دوشتنا بيكى

فرح:نعم

أحمد: اسف مش قصدى، بس من كتر ما بسمع عنك كان نفسى اشوفك

فرح: وبعد ما شوفتنى لقيت ايه!؟

أحمد: لقيت بنوته زى القمر ضحككتها تجنن، تستاهل انى ادفع عشانها عمرى

فرح: لا وعلى ايه وفره احسن، عن اذنك

مشيت فرح وفضل أحمد واقف يبص على البنت اللى يعرف عنها كل تفصيلة... البنت اللى فضل يحلم كثير بيها وبأختلافها عن باقى البنات وان قلبها مدخلوش حد، روحت فرح وكانت اسماء هتبات عندها وأول لما وصلت حكت ليها فرح عن اللى عمله أحمد معاها واللى قالهولها....

اسماء: ياه ده جرى اوى، شكله ايه!؟

فرح: انا فى ايه وانتى فى ايه!؟

اسماء: الله مالك متلغبطة ليه كده اوعى يكون الحب!؟

فرح: حب ايه بس انا اتضايقت من طريقته مش اكتر، بقولك ايه يلا ننام!؟

اسماء: يلا ياختى

تانى يوم الصبح صحبوا وكانوا رايعين النادى.... لكن للأسف العربية منعتهم

اسماء: يادى النيلة ده وقته الكواتش ينام

فرح: بسيطة يابنتى هشوف الاستبن

اسماء: طيب يلا وانا هساعدك

فرح: يادى النيلة حتى الاستبن نايم

اسماء: يبقى مفيش حل غير التاكسى

فرح: طيب وقفى تاكسى لحد ما اركن العربية واغطيها

فضلوا واقفين اكتر من نص ساعة مفيش تاكسى وفى الآخر جه وعرض عليهم المساعدة....

أحمد: صباح الفلا، يه الصدفة الحلوة دى!؟

فرح:هى فعلا صدفه غريبه

احمد:واقفين ليه كده!؟

فرح:بنشم هواء، سؤال غريب يعنى واقفين عشان مفيش تاكسى

أحمد:هما السواقين اتعموا ولا ايه!؟ لما يشوفوا الجمال ده وميقفوش، طيب انا ممكن اوصلكوا لو تحبوا!؟

اسماء:اه ياريت

فرح:لا احنا هناخد تاكسى، مش عايزين نتعبك معانا يعنى

اسماء:تاكسى ايه بس بقالنا اكرر من نص ساعة ومفيش حد عبرنا

أحمد :طيب اتفضلوا

ركبوا العربية وطول الطريق أحمد بيتكلم وفرح ساكتة وأحمد مش بينزل عينه من عليها وعكس المراية نحيتها....وصوا النادى، وقبل ما تنزل فرح من العربية....

فرح:شكرا على التوصيلة

أحمد:اخيرا اتكلمتى، عموما العفو

دخلوا فرح واسماء النادى فضلوا يجروا وقعدوا شوية وفرح ساكتة خالص...

اسماء:ايه يابنتى ساكتة ليه!؟، من ساعة ما وصلنا، لا من ساعة ما ركبنا مع الشاب اللى وصلنا

فرح:مهو المشكلة فى الشاب اللى وصلنا ده يطلع أحمد اللى حكته عنه

اسماء:الله ما الواد طلع شكله حلو اهو وجنتل كمان

فرح:مش صدفه غريبه اوى انه يجى فى الوقت اللى نحتاجه فيه، وكمان طريقه يكون من طريق النادى

اسماء:قصدك انه...!؟

فرح:اه مرتب لكل اللى حصل

اسماء:طيب يلا بينا عشان نجهز للسهرة، وخدى بالك دى مش اى حفلة دى حفلة لعمر ودياب وانتى

عارفة يعنى ايه!؟

فرح:ايوه عار اتصلويلا عشان متأخرش

وفى الحفلة الكل كان مشغول عن بعضه وحست فرح بالوحدة بعد ما مشيت اسماء مع اخوها اللى جه اخدها....

اسماء:فرح انا ماشية محمد اخويا اتصل، ومستنى برا عشان اروح معاه

فرح:ماشى يا حبيبتى، طمنينى عنك لما توصلى البيت

اسماء:حاضر بس خدى بالك من نفسك

مشيت اسماء وفضلت فرح لوحدها حاسة بالملل وبعدها شافته جاي عليها.....

أحمد:ايه الصدف الحلوة دى!؟

فرح:فعلا صدفتك كترت

أحمد:ده عمرو بيجمع الاحباب بقى

فرح:نعم،!؟، عن اذنك بقى

طلعت من الحفلة وفضلت مستتية تاكسى لكن ظهر شوية شباب وكانوا بيعاكسوها لكن أحمد ظهر قدامها فجأة واتخاّنق مع الشباب فطلعوا يجرّوا....

أحمد:انتى كويسة حد عمك حاجة!؟

فرح:لا ابدأ انا كويسة شكرا

أحمد:طيب اتفضلى اوصلك، انا عارف انك ممعكيش عربية

فرح:مش عايزة اتعبك معايا!؟

أحمد:تعبك راحة، اتفضلى

وفى الطريق فضل أحمد يتكلم كتير.....

أحمد:عجبتك الحفلة بقى!؟

فرح:اه كانت تجنن

أحمد:بتحبي انتى عمرو وكاظم وفيروز!؟

فرح:ياه ده انت عارف كتير عنى بقى!؟

أحمد:اعرف عنك تفاصيل التفاصيل

فرح:ليه!؟

أحمد:عشان معجب بيكى اوى، وبالى بسمعه عنك، ولما شوفتك زاد اعجابى بيكى

فرح:وبعدين.....

أحمد:عايزك تدينى فرصة، ونفهم بعض وصدقينى مش هتلاقى حد يحبك قدى

فرح:غريبة انك متعرفنيش وبتحبنى!؟

أحمد:بصراحة كده انتى بنت اى واحد يحلم بيكى، من عيلة واخلاقك معروفة ومثقفة

فرح:انا مش عارفة اقولك ايه!؟

أحمد:متقوليش حاجة غير انك موافقة تدينى فرصة اكون فى حياتك، مش عايز غير رد منك وهفضل مستنى

فرح:انا وصلت شكرا على التوصيلة

طلعت فرح اوضتها وقعدت تفكر فى كلامه وبدأت تكلم نفسها.....

فرح:انا ليه اما بشوفه قلبى بيدق!؟ليه رغم كل الحصون اللى بنتها عشان تحمينى عرف يوصل ليا ولقلبى!؟ طيب لو انا بحبه هو فعلا بيحبنى ولا بيتسلى!؟

فضلت تفكر وفجأة لقت موبايلها بيرن برقم غريب متعرفوش ولما مردتش لقت مسح...

أحمد:رنيت عليكى عشان اطمئن انك بقيتى احسن، ولما مردتيش قولت شكلك نمتى عشان كده بعثلك مسح

اتصلت فرح فورا باسماء اللى كانت نايمة.....

اسماء:الو...

فرح:الحقينى

اسماء:فيه ايه؟!؟

فرح:هحكيلك اللى حصل.....

اسماء:الله ده فيه تطورات ومسدجات اهو

فرح:انتى بتهزرى انا مش عارفة وبتلغبط

اسماء:انتى حاسة بأيه؟!؟

فرح:اقولك حاجة انا لما بشوفه قلبى بيدق وبتلغبط، ومش بعرف اتصرف وعشان كده ببعد عنه عشان متعلقش بيه، خايفة احبه ويوجعنى خايفة يكسرنى

اسماء:ليه بتقدرى البلاء قبل وقوعه، لو الناس كلها بتفكر زيك محدش هيجب ابداء، وبعدين الواد شكله هيموت عليكى وباين فى عيونه كل كلام العشق، اديله فرصة على الاقل عشان متندميش ان الحب زار بابك وانتى جريتى هربتى

فرح:حاضر هحاول

مر أسبوع وأحمد بيحاول يقرب منها اكثر بمكالمات ومسدجات لكن مفيش فايده...وفى يوم كان الفلاننتين.....

أحمد:مممكن اقول هابى فلاننتين داي، واعتبرينى صديق على الاقل بلاش حبيب

شافت فرح المسج واتهزت من جواها كل نظرة وكلمة منه كانت بتلمس قلبها اللى مكنش يعرف ايه هو الحب وعرفه معاه، وقتها قررت فرح تحسم الموقف وترد عليه لانها بتحبه ومش عايزاه يضيع منها.....

فرح:هابى فلاننتين داي

أحمد:ياه اخيرا رديتى، ده انا شكيت انك مش بتعرفى تكتبى

فرح:أحمد انا عايزة اقولك حاجة مهمة

أحمد:اتفضللى انا سامعك

فرح:انا طول عمرى بحلم انى احب واتحب زى اى بنت فى الدنيا، لكن كنت بخاف اللى احبه ده يلعب بيا او يكسرنى ولما شوفتك حسيت حاجة نحييتك، او عدنى انك مش هتوجعنى ولا هتكسرنى ابداء

أحمد:اوعدك، انتى عارفة بحس انك طفلة ويمكن دى اكثر حاجة حبتها فيكى

فرح:يعنى انا طفلة!؟

أحمد:انتى احلى طفلة شافتها عنيا

فضلوا يتكلموا كثير وكل يوم بيعدى بيقر بهم من بعض اكثر عن اليوم اللى قبله وعدى اكثر من 4شهور عليهم....

أحمد:عاملة ايه النهاردة!؟

فرح:الحمد لله مفيش جديد غير انى مضغوظة عشان الكلية، ومشروع التخرج، انت بقى اخبارك ايه!؟

أحمد:الحمد لله بس فيه مشروع كده شغال عليه وربنا يستر

فرح:انا ممكن اساعدك فيه!؟

أحمد:انتى!؟مستحيل تعرفى طبعاً

فرح:ليه مستحيل!؟

أحمد:المشروع كبير اوى، وفيه تفاصيل مش هتفهميها

فرح:أحمد هو انت ليه مصمم متدخلنيش فى تفاصيلك!؟ليه بتعاملنى على انى تافهة او صغيرة!؟

أحمد:فرح مش وقت خناق، انا جاى تعبان ومش قادر حتى اتكلم، تصبى على خير

فرح:انا اسفة لو زعلتك مش قصدى

أحمد:معلش نتكلم بكره

فرح:طيب خد بالك من نفسك، وابقى كل حاجة عشان زمانك مأكلتش

تانى يوم الصبح اتصل بيها أحمد.....

أحمد:صباح الخير

فرح:صباح النور

أحمد:اطلعى البلكونة كده يامجنونة

فرح:أحمد انت مجنون، وايه الورد ده كله لمين ها!؟

أحمد:رايح ازور واحد قريبي عامل عمليه، ورد وجايلك بيه لحد بيتك، هيكون لمين يعنى غير ليكى يامجنونة، ودلوقتى البسى وانزلى بقى متتأخرش

فرح:مش هتأخر خالص، ثوانى وانزلك

نزلت فرح واخدها أحمد وراحوا فطروا برا وقضوا اليوم مع بعض.....فضل أحمد على كده بيهتم بيها وبتفاصيل تفاصيلها وبقت فرح بتتعلق بيه أكثر وتتعود على وجوده فى حياتها يوم عن يوم....لحد ما فى يوم

أحمد:فرح انتى ممكن تسهرى معايا!؟

فرح:اسهر معاك!؟

أحمد:مالك مستغربة ليه!؟

فرح:لا ابداء، هنروح فين!؟

أحمد:سهرة تبع شغلى، مش انتى ياستى عايزة تعرفى عن حياتى وعن تفاصيلها!؟

فرح:ايوه طبعا، بس هتقدمنى للناس بصفتى ايه؟

أحمد:خطيبتى طبعا، اسمعى بس اجهزى بكره على الساعة 8 وهفوت اخذك

فرح:ماشى هكون جاهزة فى المعاد

قفلت معاه وبدأت تجهز نفسها لبكره وكانت محتارة فكلمت اسماء....

فرح:سمسم الحقيقى

اسماء:مادام قولتى سمسم يبقى هتستغلىنى صح!؟

فرح:اه، أحمد عازمنى على سهرة، وفيه صحابه وكده ومش عارفة اعمل ايه!؟

اسماء:طيب وايه المشكلة، انا واثقة انك هتشرقيه، لأنك مثقفة وماغاك دى الماظ ولو على اللبس يبقى اكيد درس شيك من بتوعك، وميك ابك وظبطى نفسك، المهم ثقتك بنفسك وبس

فرح:تصدقى كده اطمنت، امشى يابت من هنا انا غلطانة انى كلمتك اصلا

قفلت فرح معها وفضلت تجهز نفسها وقبل الحفلة بساعة كانت بتجهز وفات عليها أحمد فى المعاد ونزلت فرح وكأنها حورية من السماء.....

أحمد: إيه الجمال ده كله

فرح: بجد عجبك؟!؟

أحمد: انتى دايما عجبانى

فرح: طيب يلا عشان منتأخرش

أحمد: طيب ما تيجى نخلع من السهرة دى

فرح: معنديش مانع، بس متجيش تقولى علاقاتى بالناس باظت

أحمد: لا لو كده ببقى يلا بينا.

وصلوا على الحفلة وبعد شوية....

أحمد: مالك ساكنة ليه!؟

فرح: حاسة ان المكان ده مش بتاعى

أحمد: ولا يهكم انا معاكى

فجأة قطع كلامهم وصول حاتم الشربيني صاحب اكبر شركة مقاولات....

أحمد: تعالى هعرفك على واحد مهم اوى

فرح: طيب ماتخلينى هنا

أحمد: تعالى بس متخافيش

سحبها من ايديها لحد ماوصلوا لعنده....

أحمد: حاتم بيه ازيك يا باشا!؟

حاتم: اهلا يا أحمد، مين الهانم مش تعرفنا!؟

أحمد: اقدملك فرح خطيبتى

حاتم: اهلا يا فرح

فرح: اهلا بحضرتك

فضل حاتم بيتكلم مع فرح عن المقاولات والاحوال الاقتصادية وحتى الرياضة والغريبة انها كانت بتتناقش معاه فى كل تفصيلة وده ابهر معظم الموجودين....

حاتم: احبيك على ذوقك يا أحمد، بصراحة عرفت تختار واحدة جميلة ومتقفة، وتقدر تعتمد عليها فى كل حاجة، ده انا ممكن اتعامل معاها واسيب شركتك خالص

فرح: شكرا على كلام حضرتك ده، بس انا كل ده عرفته من أحمد ومن كلامه معايا

حاتم: ده حقيقى، اومال مش بيبان عليه انه مثقف اوى كده!؟

أحمد: بقى كده يا باشا ده انا الراجل بتاعك

حاتم: مهو عشان الراجل بتاعى بقولك كده، بس عموما سعيد بمعرفتك يا فرح، طيب عن اذنكوا بقى

فرح: اتفضل حضرتك

أحمد: مش يلا بينا بقى!؟

فرح: اه ياريت عشان متأخرش

طلعوا من الحفلة وطول الطريق وأحمد ساكت وفرح لاحظت ده....

فرح: مالك يا أحمد حاجة زعلتك!؟

أحمد: لا ابدأ هو حصل حاجة!؟

فرح: مهو أنا عشان كده بسألا، بالعكس انا انبسطت اوى والسهرة كانت حلوة

فجأة داس على فرامل العربية ووقفها مرة واحدة وهو بيصرخ فى وشها...

أحمد: معملتش حاجة لا عملتى، لما تقفى تتكلمى مع حاتم بيه وتتناقش معاه ومش عملالى اى اعتبار ببقى معملتش حاجة؟

فرح: انا كنت برد على كلامه، اظن مش من الذوق والاحترام لما يتكلم وأنا افضل ساكنة وبعدين انت كنت واقف جنبى، يعنى انا مكنتش واقفة معاه لوحدى

أحمد: بس مكنش ليه داعى انك تردى عليه؟!، وتتناقش كمان وتدخلوا فى مواضيع كتير

فرح: كنت عايزنى اسكت وهو يقول عليا انى مش مثقفة، وبعدين انا ردبت فى حدود معرفتى يعنى وكنت حريصة على كل كلمة، واطن انت اخدت بالك من كلامه عنى

أحمد: طبعا اشاد بيكى وبذكائك، وانك ازاي اتخطبتى لواحد زىي جاهل ومعدوش الثقافة دى كلها!؟

فرح: وانا مدتلوش الفرصة انه يقول كده، وقولتله ان كل ده عرفته منك

أحمد: وتفتكرى هو صدقك؟! لا طبعا

فرح: أحمد انت بتحاسبنى على حاجة مليش ذنب فيها ومش غلطتى

أحمد: هى فعلا مش غلطتك، دى غلطتى انا انى اخدتك معايا وقولت اعرفك على حياتى

فرح: يعنى ايه!؟

أحمد: ولا حاجة يافرح

وصلت فرح البيت ودخلت على اوضتها وفضلت تعيط وعرفت لأول مرة ايه هو وجع الحب لكنها كتمت عيظها عشان محدش من أهلها يصحى وخصوصا والدتها اللى مكنتش مرحبة فكرة ارتباطها بأحمد لكن والدها كان شايف ان بنته اختارت الراحل المناسب ليها واللى بتحبه وبالتالي رحب بيه عشان خاطر ميكسرش بنته لكن من جواه رأيه زى رأى والدتها، عدى اسبوع وفرح بتحاول توصل فيه لأحمد لكنه مش بيرد عليها وحتى لما بتروح الشركة مش بيكون هناك....

اسماء: لسه مش بيرد!؟

فرح: لسه على الرغم انى بعته اكثر من مسج اعتذرله فيها

اسماء: انتى اتجننتى ازاي تعتذرى وانتى مش غلطانة!؟

فرح: انا وجعته، وهو حس بالنقص من يوم السهرة واللى حصل فيها

اسماء: انتى موجعتهوش ومغلطتش فى حاجة، فبلاش تشيلى نفسك ذنب حاجة معملتهاش وهو حس بالنقص عشان معقد دى حاجة بتاعته هو، وانا شايفة انك حافظتى على شكله اوى لكن هو اللى بيتلكك بقى دى حاجة بتاعته

فرح: انا قلقانة عليه اوى، خايفة يكون عمل فى نفسه حاجة!؟

اسماء: لا متخافيش تلاقيه مسافر ولا حاجة

وهما بيتكلموا قطع كلامهم صوت مسج منه.....

أحمد: معلى كنت مشغول شوية، هكلمك بالليل لما اروح

فرح: ولا يهملك المهم انى اطمنت عليك

اسماء: بقى ده رده على كل مسدجات القلق والخوف، ده ايه البرود ده!؟

فرح: يابنتى مشغول الله يكون فى عونه

اسماء: والله انتى غلبانة اوى

فرح: عايزانى اقولك ايه!؟ ا قوله انه مش مبرر حتى لو مشغول انه ميظمنش عليا، وان مفيش حد بيكون مشغول على حد بيحبه، لأنه لو اتشغل عقله وتفكيره فيا هيجبره يكلمنى، الحاجات دى هو المفروض يعملها من غير ما اقولها، اقولك انا حاسة انه متغير، وقلبي مقبوض بس بكذب نفسى

اسماء: ان شاء الله خير انا بس عايزاكى تكونى كويسة دايمًا

فرح: متقلقيش عليا، انا تمام

اسماء: طيب انا هسيبك ترتاحى واكلمك بالليل نرغى سوا

فرح: ماشى ياسمسم

مشيت اسماء وفضلت فرح مستنية مكالمه أحمد بس متكلمش وعدى يومين ومتكلمش فقررت تكلمه
هى.....

فرح: انت كويس!؟ فيك حاجة!؟

أحمد: لا انا كويس

فرح: او مال ليه متغير!؟ انا عملت حاجة زعلتك!؟ من يوم الحفلة وانت متغير وانا اعتذرت ليك بس انت مش بتترد عليا!؟

أحمد: قولتلك مشغول شوية

فرح: يعنى مش فاضى خمس دقائق، حتى تطمنى عليك وبلاش تطمن عليا

أحمد: اسمعى يافرح انا مش بحب الخنقة، واحنا بينا اتفاق لو نستيه افكر ك بيه، اتفقنا ندخل فى حياة بعض ويا نكمل او لا وده الاحسن ليكى قبل مايكون ليا

فرح: انا عمرى ما شوفت حب بالاتفاق، انت لو بتعرف واحدة من الشارع مش هتقولها كده وهتخترم مشاعرها اكثر من كده، يعنى ايه يانكمل اول ل!؟ ، ا يعنى اضيع عمرى جنبك وابنى الاحلام وانت تيجى تهدها فى لحظة وتقولى اسف مش هكمل، انا اللى اسفة مش هقبل اكون لعبة فى ايديك ولا هذل نفسى ليك، مع السلامة

أحمد: مع السلامة...

قفلت معاه وانهارت من العياط وكانت اسماء بترن عليها وهى مش بتردد فقلقت وراحت ليها البيت....

اسماء: فرح فيكى ايه!؟

فرح: انا سببت أحمد، كرامتى مستحملتش كلامه وذل فيه كثير

حكيت فرح لأسماء على اللى حصل كله وقررت اسماء تبات معاها ومتسبهاش لوحدها فى الظروف دى..... عدى شهر وفرح بتقنع الكل انها كويسة فى بعدها عنه واول ناس فرحوا بالخبر ده كانوا أهلها عشان ظنونهم انه شخص ميستاهلش طلعت صح لكن فرح اتغيرت ملامحها وسكنت الدموع عينها ولسه بتقرأ كل كلمة اتقالت فى الشات بينهم وبتفتكر كل ذكرى ليهم فى كل مكان وحتى كانت بتراقب اخباره من بعيد اخر بوست كتبه اخر لاسيت سين على الواتس.... حالها زى حال كل العشاق لما تحل عليهم لعنة الفراق.... روحك مع حبيبك اللى عايش من غيرك وانت لوحدهك بتعانى وعرفت من بوستاته انه بيعرف غيرها وفيه واحدة دخلت حياته دلوقت....

اسماء: مش معقول كل لما ادخل الاقى دموعك كده ارحمى نفسك

فرح: أحمد بيعرف واحدة غيرى

اسماء: يا شريحة مش معقولة اكيد انتى فهمتى حاجة غلط!؟

فرح: لا انا فهمت صح

اسماء: طيب ممكن بقى تفوقى لنفسك، انتى مش شايعة بقيتى عاملة ازاي!؟ خسيتى النص وعيونك دبلانة

فرح: انا كويسة عن الاول، وعلى الاقل عرفت انى مش مهمة عنده، لانه لو بيحبني كان سامحنى على غلطة معملتهاش، لو بيحبني مكنش جرحنى وراح لغيرى، لو بيحبني كنت وحشته وجه اتحجج بأى حاجة واتكلم معايا

اسماء: بلاش بقى تفكرى كده، وبلاش كلمة لو دى عشان مش بتقدم ولا بتأخر

فرح: عندك حق

عدت الايام على فرح كلها زى بعض بتمثل انها عايشة ومبسوطة عشان اللى حواليتها لكن من جواها زى الطائر المدبوح اللى جناحه اتكسر ومش هيعرف يطير تانى فمهما تحاول تنسى وتفتح صوره على الموبايل وتتكلم معاها وتوعده انها تنساه وتعيش حياته زى ما هو عايش من غيرها بعدها ترجع وتضعف تانى وتحزن وتفضل تعاتب فى صوره وجه يوم عيد ميلاده وهى متعودة تكون اول واحدة معاها وتفتكره وصعب عليها اوى الحال اللى وصلوا ليه وانها مش هتقدر تكلمه حتى لو قلبها عايز ده كرامتها تمنعها من كده وبعد أسبوع صحيت على صوت مسج والمفجأة كانت منه

أحمد: بقى يعدى عيد ميلادى وانتى مش معايا، وحتى متفتكر نيش انتى وحشتينى اوى وانا محتاجلك فعلا هتقفى جنبى ولا؟

فرح ردت عالطول من غير تفكير لان عمرها ما فكرت فى كلام بتقوله معاها كانت اللى بتحس بيه بتقوله وكمان صعب عليه تشوف حبيبها محتاجها وتسبيه

فرح: مقدرش اشوفك محتاجنى ومتكلمش، ولو على عيد ميلادك فأنا افتكرته وكنت هكتبك بس قولت مفيش داعى، لانه مش من حقى وفيه غيرى معاك

أحمد: فرح انا عمرى ما حببت غيرك وكنت بحاول انساكى بيها

فرح: مفيش حد بينسى حد بحد، ولا حد بياخد مكان حد فى قلبنا، دى كدبة بنقولها عشان نضحك بيها على نفسنا ونكمل فى خيانتنا، لكن اللى بيحب بحد مبيعرفش يشوف حد غير حبيبته ولا بيكمل عمره غير بيه

أحمد: الراجل مش زى الست على فكرة

فرح: طبعا الراجل قادر ينسى حب بحب جديد، ويعرف واحدة على حبيبته وكمان يحب اتنين فى نفس الوقت، لكن الست حاجة مختلفة مش بتعرف تنسى حد بحد، وحتى لو حاولت مش بتكمل عشان بتشوفها خيانة، وعشان متخدعش واحد ملوش ذنب، الست قادرة تعيش عمرها كله على ذكرى وجع بتسميه حب

أحمد:المهم انى فوقت ورجعت

فرح:اه رجعت بعد شهرين، من غير ما تعرف فيهم عنى حاجة

أحمد:فرح انا اسف، واوعدك انى هتغير ونبدأ صفحة جديدة

فرح:بس قبل ما نبدأ الصفحة الجديدة، انا لسه شايله القديمة بوجعها جوايا، وانت اللى بأيديك تقدر تشطبها او تقطعها

أحمد:يعنى خلاص سامحتينى!؟

فرح:لو حتى قلب الحبيبة زعلان منك، فقلب الأم هيفضل يسامحك ويحبك دايمًا

أحمد:انا بحبك اوى يا فرح

فرح:الحب مش كلمة بتنتقال خلىنى احس قد ايه انت بتحبنى من افعالك ومواقفك، المهم دلوقتى طمنى عنك!؟

أحمد:الحمد لله مكنتش عايش من غيرك

فرح:وليه مرجعتش قولت الكلام ده!؟

أحمد:كنت بعاند واكتشفت انى بعاند نفسى، وانتى نفسى اللى مقدرش اعيش من غيرها لحظة لكن قوليلى انتى مكنتيش بتغيرى عليا وانا مع غيرك!؟

فرح:بصراحة الأول كنت بغير، واحس بنغزة ووجع فى قلبى واعيط، لكن بعد كده بقيت انا وهى صاحب اوى

أحمد:صحاب!؟

فرح:اه لما كنت بتقف ومش بتفتح كثير، كنت ادخل عندها ادور فى الكومنتات امتى اخر مرة حببت فيها، ولا هزرت معاها!؟فكانت بتطمنى عليك واتحولت الغيرة لصداقة، لكن اللى كان بيوجعنى هى طريقته معاها وانت بتحب فيها وانت بتهزر معاها نفس الكلام اللى كنت بتقوله ليا، وكأنى انا وهى واحد

أحمد:ده عشان كنت بحسها انتى

فرح:اه كان باين اوى، عموما اوعى توجعنى تانى او تبعد عنى تانى

أحمد: اوعذك انى افضل جنبك طول عمرى

فضلوا يتكلموا كتير لحد ما النهار طلع عليهم والعصافير زقرقت.....

فرح: شوفت بقى قعدنا نتكلم وكده مش هتلق ترتاح، وتصحى لشغلك فايق، اتفضل بقى روح نام

أحمد: حاضر يا ماما، تصبى على خير

بعد الظهر جات اسماء تظمن على فرح.....

اسماء: ايه النوم ده كله، اصحى بقى

فرح: لا مش قادرة انا نايمة الصبح، كنت بتكلم مع أحمد

اسماء: ايه أحمد تانى يافرح!؟

فرح: كلمنى وقالى انه محتاجنى مقدرتش مردش، وبعدين لما اتكلمنا حسيت انى خلاص نسيت وجعى

وز على منه بكلمة واحدة بس، وهو طلب فرصة تانية

اسماء: وهنديله فرصة تانية!؟

فرح: اه حبى ليه يستاهل انى استحمل واعافر معاه للنهاية

اسماء: ربنا يستر ويكون اتعدل المرة دى

فرح: هو وعدنى انه هيتغير

اسماء: ربنا يسعدك ويبعد عنك كل وجع

فرح: تعالى بقى نخرج شوية

اسماء: قوليلى طنط واونكل عرفوا انكوا رجعتوا تانى

فرح: لا لسه مقولتلهم مش اصلا، انا خايفة من المواجهة دى اوى ربنا يستر

اسماء: لا اطمنى خير ان شاء الله

فرح: انا مش عارفة لو مكنتيش معايا كنت هعمل ايه!؟ ربنا ربنا يخليكى ليا

اسماء: بس يابت احنا مش صحاب وبس، احنا اخوات ومقدرش مكنش جنبك ولا معاكى

فرح:طيب يلا بينا عشان منتأخرش

اسماء:ايوه وحياة عيالك عندي انترفيو الوظيفة بكره

فرح:ان شاء الله خير انا واثقة انهم هيختروكى

خرجوا وقضوا اليوم كله مع بعض وراحوا اشتروا لبس لأسماء عشان انترفيو الوظيفة

وفى نفس اليوم بالليل....

أحمد:كنتى مشغولة عنى فين!؟

فرح:قضيت النهار كله مع اسماء كنا بنشتري شوية حاجات

أحمد:واشتريتى ايه!؟

فرح:كانوا كام كتاب كده، بس لسه منزلوش بفكر اروح اشوفهم فى معرض الكتاب

أحمد:للدرجة دى بتحبنى القراءة!؟

فرح:انا ممكن انسى نفسى مع كتاب، واعيش جوه حكايته اوى

أحمد:وهى القراءة بقى دى اللى ساعدتك تردى على اسئلة حاتم الشربيني يوم السهر!؟

فرح:طبعاً لأنى قرئت فى مجالات كتيرة زى العلوم والاقتصاد والرياضة والموسيقى وكتب اجتماعية

وعلم نفس، ده انا حتى بفكر نعمل مكتبة كبيرة لما نتجوز

أحمد:اه طبعاً وماله، طيب انا هروح انام بقى عشان عندي شغل الصبح

فرح:طيب خد بالك من نفسك

تانى يوم الصبح كلمتها اسماء.....

فرح:ايوه ياسمسم

اسماء:باركيلي اتقبلت فى الوظيفة

فرح:مبروك ياقلبي شوفتى مش قولتلك، انا عايزة الحلوة بقى

اسماء:طيب ياستى انا هعزمك على الغداء النهاردة موافقة!؟

فرح:طبعا موافقة

قفلت معاها وكان فيه مسدج من أحمد....

أحمد:صباح الخير، وحشتيني وعازمك على الغداء النهاردة

فرح:صباح النور وانت كمان، بس خليها عشاء عشان اسماء عزمتنى على الغداء

أحمد:اعتذرى ليها

فرح:مش هينفع انا اتفقت معاها، ومش هينفع اسيبها لوحدها تحتفل بالوظيفة الجديدة هتزعل منى

أحمد:اه عندك حق تخافى على مشاعرها لكن انا مش مهم

فرح:انت ليه اخدتها كده، انا ادتها هى كلمة ووعد الاول، ومش هعرف ارجع فيه وعشان كده قولتلك خليها عشاء

أحمد:لا وعلى ايه؟! انا اصلا مش فاضى سلام بقى

فرح:طيب ايه رأيك نتغدى كلنا مع بعض

لكن أحمد قفل من قبل ما يقرأ المسج بتاعتها وحتى لما حاولت تكلمه فضل يكتسل وبعدها قفل موبايله....وجه معاد الغداء مع اسماء....

اسماء:ايه يافرح انتى مش معايا خالص!؟

فرح:لا ابدا انا معاكى اهو

اسماء:لا مش معايا، مالك فيكى ايه!؟

فرح:اقولك حاجة بس متقوليش عليا مجنونة

اسماء:لا انتى مجنونة من زمان بس قولى

فرح:انا حاسة ان انا وأحمد مش زى الاول

اسماء:ازاى يعنى!؟

فرح:يعنى الحب اللى بينا قل، بعد اول خناقة ولما سابنى شهور ورجع بعدها، حسيت انه اتغير معايا وبقي يتلكك على اقل كلمة، عارفة انا كل يوم بقول النهاردة هيسينى ويمشى من غير سبب زى ما عمل اول مرة، ولما اليوم يعدى على خير اقول يبقى بكره هيمشى ويسينى!؟، لا بقيت بعرف انام، ولا اعيش طول الوقت معاه مش حاسة بأى امان

اسماء:طيب ما تقولينه كل ده

فرح:حتى كلامى معاه مبقاش يعجبه ولا بقى يسمعنى او يفهمنى خالص

اسماء:جربى تكلميه تانى عن كل اللى انتى حساه ده

فرح:تفتكرى هيفهم احساسى ده ويرجع يطمنى تانى!؟، ولا هيقولى انى بتلكك وعايضة اسيبه!؟

اسماء:وانتى فعلا مش هتكلمى!؟

فرح:حتى دى مش سايبلى ليها اختيار لما بنبعد عن بعض بعيش على الذكريات وانا اللى بتوجع لوحدى، ولما ارجع اقف على رجلي وابدأ من تانى، بيصعب عليه يشوفنى مرتاحة بيرجع تانى يلغبطنى ويمشى تانى

اسماء:طيب انتى لسه بتحبيه!؟

فرح:تخيلى اه بعد كل الذل ده بس لسه بحبه ومقدرش اشوفه موجوع

اسماء:ربنا يريح بالك، يلا بينا نروح عشان ترتاحى شوية

فرح:اه ياريت

فضلت فرح تفكر فى الكلام اللى حكته مع اسماء واول لما روحت بعثت مسج لأحمد

فرح:عايزة اتكلم معاك فى موضوع مهم!؟

أحمد:مش فاضى برتب ورق وحاجات عشان مسافر تبع الشغل

فرح:مسافر!؟طيب هترجع امتى!؟

أحمد:مش عارف لسه هبقى اكلمك

فرح:طيب خد بالك من نفسك

قفل أحمد معها وعدى شهر وهو لسه مرجعش من السفر والغريبة انه مش بيرد علي مسدجتها ولا مكالمتها خالص وده قلقها فقررت تكلم هبه يمكن تعرف اخباره

هبه:وخشاني يافرح اوى

فرح:انتى اكثر والله، اخبارك ايه!؟

هبه:ده انتى ما صدقتى وخلصتى منى بق، ى كده كل فين وفين لما تسألى عنى

فرح:غصب عنى يا حبيبتي والله، ولو كده ياستى تعالى نقضى بكره مع بعض

هبه:لا مش هينفع خالص اصلنا مشغولين، بأفراح فى العيلة عندنا ياستى أحمد ابن عمى هيخطب بنت خالته

فرح:أحمد!؟أحمد مين!؟

هبه:ابن عمى يابنتى هو انا عندى غيره، ده انا كنت مصدعاهم بيكى

فرح:اه أحمد افكرته، الف مبروك

هبه:الله يبارك فيكى وعقبالك

فرح:طيب انا هقفل دلوقتى واكلمك بعدين

قفلت فرح معها عشان تلحق دموعها وشهقة نفسها قبل ما تلاحظ هبه ولقت نفسها بتبعث ليه مسج....

فرح:الف مبروك يا عريس يعنى ينفع اعرف من برا مش منك، ولا كنت فاكر انى مش هعرف!؟. عموما مكنش ليه لزوم تهرب منى، كان ممكن تقولها لى انك مبقتش تحبنى ولا عايزنى فى حياتك خالص، وان وجودى جنبك حمل عليك، بس خلاص هعفيك منى ومن مسؤوليتى خلاص واوعدك مش هتشوفنى تانى ولا هز عجبك ابدا

قفلت موبايلها وفضلت تعيط لحد ما وقعت من طولها ونقلوها على المستشفى والدكتور بلغهم ان جالها هبوط حاد فى الدورة الدموية نتيجة صدمة شديدة....

اسماء:حمدالله على سلامتكم

فرح:الله يسلمك، انا فين!؟

اسماء: انتى بتدلعى وقلقتينا كلنا عليكى

فرح: انا الحمد لله بخير وعازية اروح البيت، انتى عارفة انى مش بحب المستشفى

اسماء: طيب هشوف الدكتور واجيلك

طلعت اسماء طمنت اهل فرح وطلبت الدكتور.....

الدكتور: حمد الله على السلامة

فرح: الله يسلمك انا ممكن اخرج من هنا؟

الدكتور: اه ممكن بس تيجى بعد اسبوع العيادة اطمن عليكى

فرح: حاضر ان شاء الله

عدت فترة على فرح وهى بتحاول تقف على رجليها لأن صدمتها كانت شديدة اوى فيه.... لأنه الوحيد اللى ممكن يضحي بحياته عشانه لكن جه الوقت اللى ضحى بيها هى والجرح كان منه وبأيديه....

اسماء: على فكرة قابلت هبه النهاردة، وسألت عنك وعرفت انك تعبانة

فرح: يعنى هو زمانه عرف؟!

اسماء: انتى لسه بتفكرى فيه؟! انتى مجنونة لو لسه بتحبيه؟!

فرح: انا شكلى مريضة بيه، والغريبة بقى انه يبقى الداء والدواء فى نفس الوقت

اسماء: بصى لنفسك ولحالك، وهو مش سأل فيكى اصلا وهيتجوز غيرك

فرح: قلبى بيقولى انه هيرجع، وان فيه حاجة غلط استحالة يكسرنى كده

اسماء: لا مفيش حاجة غلط والغلط انك تكلمى معاه، ويكسرك تانى وعموما الايام بينا وهنشوف هيسأل عنك ولا

فرح: انا متأكد انه هيسأل عليا، قلبه مش هيطاوعه انه يشوفنى كده

اسماء: ربنا يخيب ظنى فيه وانا اكره انكوا ترجعوا، بس بلاش تعشمى نفسك

فرح: مش يمكن العشم ده اللى مخلىنى عايشة ومكلمة فى الحياة

اسماء:لا هتكملى عشان نفسك وعشان اللي بيحبوكى وبس

عدت الشهور على فرح وهى مستنياه يتكلم محتاجه وجوده جنبها عشان يقويها لكنه خيب املها وسابها زى كل مرة...وبدأت فرح حياتها ومثلت على الكل انها نسيته وانها عايشة من غيره مبسوفة حتى لو روحها متعلقة بيه وقلبها بينزف فى غيابه لكن احساس الخذلان والوجع منه قتلها وقوتها كانت بتهون عليها شوية....وفى يوم صحيت على صوت موبايلها وكان رقم غريب ففتحت....

فرح:الو

حسام:الو يا فرح انا حسام صاحب أحمد، الحقى أحمد عمل حادثة وحالته خطيرة وعايز يشوفك

فرح:ايه؟!مستشفى ايه؟!

حسام:مستشفى السلام بالشيخ زايد

قفلت فرح وجريت على المستشفى وطول الطريق وهى بتعيط وصلت المستشفى وكانت منهاره وهناك كان حسام واقف....

فرح:طمنى عليه دلوقت؟!

حسام:هو فى العمليات وكان عايز يشوفك قبل ما يدخل

فرح:يارب بلاش تحاسبه بذنبى ولا على اللي عمله فيا، يارب اشفيه وعافيه، يارب متوجعنيش عليه يارب بعد ساعتين طلع الدكتور من اوضة العمليات وطمنهم ان لو ال24ساعة الجايين عدوا عليه هيكون فى امان.....

حسام:اتفضلى اوصلك للبيت عشان الوقت اتأخر خالص

فرح:لا انا هفضل هنا لحد ما اطمن عليه

قررت تتصل فرح بأهلها عشان تقولهم انها هتفضل جنبه وطبعا الكل كان زعلان منها وانها رجعت ليه لكن مهما عملوا لازم تسمع كلام قلبها....فضلت جنبه واول لما فتح عيونيه كان اول حاجة يشوفها هى.....

أحمد:كنت بتمنى ان اول لما افتح عيونى تكونى اول حاجة اشوفها

فرح:انت عارف انى كنت هموت من خوفى عليك

أحمد: انتى لسه بتحبينى؟!؟

فرح:ايوه انا غبية ومجنونة ولسه بحبك، معرفش ليه وازاى وانت وجعتنى وذلتنى بس اعمل ايه بقى فى قلبى؟!؟

أحمد:يعنى سامحتينى؟!؟

فرح:عارف انت سبتنى فى اكثر وقت انا محتجالك فيه، وانت كنت عارف كده ومحاولتش حتى تقف جنبى وزعلت منك اوى، وقولت لقلبى لازم يقسى عليك لكن اول ما عرفت اللى حصل جريت زى المجنونة على هنا، وقتها بس عرفت ان قلبى لسه حى فيك وده سبب يخلينى اموت فداك، انا لسه قلبى بيوجعنى عليك

أحمد:اوعدك اول ما اقوم من هنا واقف على رجلى هاجى واخطبك

فرح:طيب وبنت خالتك؟!؟

أحمد:انا سبتها معرفتش اكمل معاها، ومقدرتش اشوفك فيها

فرح:وانا هضحى واستحملك، انا اصلا مقدرش اعيش غير بيبك

أحمد:أنا بحبك اوى

فرح:وانا كمان اوى

هنا دخل الدكتور عشان يطمئن على أحمد...

الدكتور:ياه انت بقيت احسن بكتير وعدت مرحلة الخطر

أحمد:الحمد لله، قدر اخرج امتى؟!؟

الدكتور:لا انت هتقعد معانا شوية، عشان رجلك اتأثرت وهتحتاج علاج طبيعى

أحمد:طيب هرجع امشى طبيعى ولا؟!؟

الدكتور:مفيش حاجة كبيرة على ربنا، والحمد لله ان ربنا كتبلك عمر جديد

فرح:الحمد لله، شكرا لحضرتك يادكتور

طلع الدكتور وفضل أحمد زعلان انه ممكن يبقى عاجز ومقدرش يمشى تانى

فرح: لا مش عايزة كلام الدكتور يآثر فيك كده هتعمل العلاج الطبيعى و هتمشى

أحمد: ولو حصل و مرجعتش تانى؟!؟

فرح: انت ليه متشائم كده؟!؟، وحتى لو ده حصل انا مش هسيبك، هكون عكازك و سندك فى الدنيا دى

أحمد: ربنا يخليكى ليا

فرح: جهز نفسك عشان تبدأ العلاج بكره

عدى شهرين و أحمد بيعمل العلاج الطبيعى و فرح جنبه مش بتسيبه لحظة... فرح المجنونة اللى مصدقة حبها و بتجرى و راه، ولما أحمد بدأ يمشى على رجليه....

أحمد: حددى معاد مع اهلك بقى عشان الخطوبة

فرح: انت بتتكلم جد؟!؟

أحمد: طبعا ولا انتى رجعتى فى كلامك؟!؟

فرح: لا طبعا مرجعتش بس انت....

أحمد: انا ايه؟!؟

فرح: انت مش هتكسرنى تانى ابدأ صح؟!؟

أحمد: لا مش هيحصل و هفضل جنبك

فرح: طيب انا هروح ابلغ بابا و ماما

أحمد: وانا هجلكوا الخميس اللى جاى

مشيت فرح و هى طايرة من السعادة انها هتكون مع حبيبها عا طول هتبدأ معاه من جديد و المرة دى مش هيكسر ها.... روجت و وعدت تتكلم مع أهلها و دخلت فى مناقشات كتير لأن أهلها مكنوش موافقين لكن هى دافعت عنه و عن حبها بأستماته و انه اتغير للأحسن و هى تضمن ده و كفاية انه هيسعدها و هى مش هتكون لغيره، و اخيرا اقتنعوا لأنهم شافوا حبها ليه و انها مؤمنة بيه و بأنه اتغير فعلا و عشان كده وافقوا إنه يجى يتقدم، و جه يوم الخميس و الكل كان مشغول، أهلها فى التجهيزات و الترتيبات و اسماء مركزة مع فرح عشان لبسها و الميك أب.... و الكل كان فى انتظار العريس أهل فرح و قرابيه و عدت ساعتين و فات معاده و قرابيه زهقوا و مشيوا.... و حتى أهلها زعلوا منها لأنها خلت منظرهم وحش و طلعتهم صغيرين فى نظر

عمامها وعمتها وخالتها اللي كانوا جاينين من السفر وفي نظر نفسهم انهم واثقوا فيها وفي اختيارها....طلعوا والدها ووالدتها على اوضتهم وفضلت فرح مكانها مصدومة وفاقت على ايد اسماء....

اسماء:تعالى يا حبيبتي على اوضتك ارتاحي

فرح:هو اكيد اتأخر عشان سبب، انا خيفة يكون جواله حاجة، فين الموبايل بتاعى؟!؟

اسماء:اهدى بس انا هجيهولك اهو

فرح:طيب بسرعة

اسماء:الموبايل اهو

فرح:موبايله مقفولا، كيد حصل حاجة انا لازم امشى دلوقت

اسماء:هتروحي فين كده؟!؟

فرح:هروح اشوفه

اسماء:طيب انا هاجي معاكى

طلعوا من البيت ولسه هيركبوا العربية لكن حسام صديق أحمد وقفهم....

فرح:حسام!أحمد جواله حاجة مش كده؟!؟انا كنت حاسة ان مجاش عشان حاجة قوية منعتة جواله ايه قولى؟!؟

حسام:أحمد سافر يا فرح

فرح:سافر...اه تقصد تبع شغل

حسام:لا سافر ومش هيرجع، وقالى اوصلك الجواب ده

مشى حسام وفرح فتحت الجواب تقرأه....

(فرح...انا محبتش غيرك لكن انتى معرفتيش تحبيني زى ما انا عايز، صدقيني انا كنت منبهر بيكى لكن لما قربت منك معرفتش اكمل، انا معاكى بحس بالعجز الشديد مش هستحمل لما نروح مكان سوا انك تكونى انتى اللي بتلغى نظر الكل، ولأنى بحبك بس مش اكتر من نفسى عشان اشوف شخصيتك ونجاحك، واقف تابع ليكى والكل يحسدنى عليكى وعشان محسش بالعجز تنسبى الفضل ليا، انا حتى عاجز انى اشيل

مسؤولية حبك، انا اجبن من انى اقف قدام حبك الكبير وتضحيتك الأكبر عشانى، انا حاولت كثير ابدأ
معاكى واتغير لكن معرفتش اتغير ولا أكون جدير بيكى وبحبك ليا، انا مقدرتش اتحمل وضوحك الشفاف
زى الميه، وكمان احلامنا وطموحتنا مش واحدة، انا جاتلى الفرصة عشان احقق حلمى بالسفر واسف فعلا
يافرح على كل وجع عشتيه بسببى، واتمنى انك تنسينى وتكملنى من غيرى)

فرح:ليه!؟

اسماء:اهدى يافرح ده ميستاهلش

فرح:انا مكنتش عايزة منه حاجة غير انه يحبنى زى ما حبيته، كنت بحلم معاه بكل حاجة لكنه هدمها
ومشى، انا قولت انه هيكون سدى وقوتى ووقت ما الدنيا تضيق بيا، اهرب ليه لكنه هو اول حد دير
ضهره وسابنى وانا محتجاله ومشى

اسماء:مممكن تهدي بس عشان صحتك

فرح:هو انا وحشة اوى للدرجة دى ان يهون عليه وجعى!؟، انا اذيته فى ايه عشان يقتلنى بأيديه!؟ ليه
قدملى وعود وهو مش قدها!؟ليه مجاش ليا وصارحنى انه زهق وانه عايز يمشى!؟انا حاولت اتغير
عشانه واكون اللى بيحلم بيها، انا طلبت بس حبه، انا ذليت نفسى اوى كثير عشانه اعتذرت وانا مش
غلطانه، عملت حاجات مش بحبها عشان ارضيه واكون معاه،ليه عمل فيا كده!؟

اسماء:مشكلتك كلها انك حبتيه، وهو ميستاهلش الحب ده ولا قدره

فرح:وليه جه من الاول وقرب ليا!؟ليه لما اتعوت على وجوده وادمنتته بعد فجأة!؟وليه لما اتعودت على
غيابه بيرجع يلغبطنى وكأنه بيصعب عليه يشوفنى مبسوطه!؟

انا مكسورة اوى من جوه وحتى المواجهة هرب منها، سابنى جوايا اسئلة كتيرة هو الوحيد اللى هيقدر يرد
عليها، بس هو عنده حق هو أجبن من انه يواجه حبى ده، وميستاهلش اصلا حبى ليه ولا البكاء عليه
ضمتها اسماء لحضنها لأن الحزن بيلخص كلام كثير ممكن يتقال وفضلت فرح تعيط طول الليل فى
حزن اسماء لحد ما نامت من التعب والقهرة....عدى شهر وفرح بتحاول تتغير من جواها فعلا....

اسماء:صباح الخير

فرح:صباح النور

اسماء:شيفاكى رايقة النهاردة، بتعملنى ايه بقى!؟

فرح:بمسح كل حاجة ممكن تفكرنى بيه، مسحت صورته ومسجاته ورقمه وحتى عملت ليه بلوك على الفيس

اسماء:المهم انك تمسحيه من تفكيرك، لانى واثقة ان قلبك من كتر وجعه مسحه خلاص

فرح:انا مسحته مش بس عشان مفكرش فيه، قد ما ابعد أى حاجة تفكرنى بوجعى منه، أى كلمة وجعنى بيها فى المسح، وعشان كده مسحتهم والبلوك بتاع الفيس عشان مشوفش ستات بيعرفهم واشوفه وهو عايش مع غيرى، ومش هقدر استحمل ده انا اضعف من انى اشوفه مكمل فى حياته بعد ما دمرنى، بتصعب نفسى عليا اوى وبحس انى رخيصة عنده

اسماء:انا عايزاكى تشغلى نفسك بأى حاجة، وبكده مش هيجى فى بالك ابداء، لو شغلنا وقت فراغنا مش هنحس اننا محتاجين لحد يملئ الفراغ ده، ونتعود عليه فلما يغيب منعرفش مين يملئ الفراغ!؟

فرح:عندك حق وطول ما انا حواليا الناس اللى بيحبونى مش هحتاج لحد، ولا هيسمحوا لحاجة توجعنى خالص، بعدين هو أنانى وفضل احلامه عليا وبدل ما اكون جزء منها بعدنى عنها تماما، وعشان كده انا مفيش مكان للجبان ولا الأنانى فى حياتى، لازم يطلع برا وكل واحد يكمل طريقه اللى اختاره مع اللى يريجه

مرت شهور وشافت فرح الخبر اللى انتشر عن جواز أحمد بيبنت رجل أعمال مشهور فى لندن.....فضحكت فرح ضحكة مكسورة عبرت عن كل حاجة تحس بيها وقفلت الموبايل ونامت....ومن وقتها وهى مركزة فى حياتها ومش بتحاول تعرف عنه حاجة لحد ما شافته بالصدفة ورجع شريط الذكريات بيها يجرى.....

حسن:ياه ده حقير اوى، انه يستغل حبها ليه وضعفها نحيته، ده حيوان

فريدة:الحقيقة أن حبها ليه مقدرش يغيره ولا يحوله للأحسن، واول واحدة دبحها كانت هى اللى ادتله الحياة، الحقيقة انه مكنش حب قد ما كانت حرب نفسية، للى بيضحى دايمًا وبيكون فرسية لذل مشاعره

حسن:بس الظاهر انك تعرفى بطلة الحكاية دى مش كده!؟

فريدة:ليه بتقول كده!؟

حسن:الدموع اللی شایفها فی عیونك دی، والوجع اللی كان باين علیكى ومع كل تنهيدة وانتی بتحكى
ظهرت علی وشك

فريدة:لا ابدأ معرفهاش بس اتفاعلت معاها عشان صعبت علیا اوى، ياه الوقت اتأخر ولازم انام بكره يوم
طویل، تصبح علی خیر

حسن:وانتی من أهله

مشیت فريدة من قدام حسن اللی فضل واقف مكانه وجواه احساس شدید بالفضول وعايز يعرف مین بطلة
الحكاية دی ویاترى ممكن تكون فرح هی نفسها فريدة ولا احساسه غلط!؟

طلع حسن علی اوضته وحاول ینام لكن عقله مسبش لیه فرصة من كتر التفكير لحد ما الصبح طلع علیه
واخیرا راحت عیونه فی النوم....فی الوقت اللی فريدة صحیت فيه علی صوت موبایلها وكان والدها....

فريدة:وحشتنى اوى یا هنوش

هانى:انتی کمان اوى یافرى، هترجعی امتی بقى؟!البیت وحش من غیرك مش لاقى حد یرخم علیا

فريدة:هانت یاهنوش النهاردة الفرح وبكره هتلاقینى برخم عليك، لكن انا سایبة الواد ادم یقوم هو بالرخامة
كلها هو خد اجازة ولا ایه!؟

هانى:ترجعی بالسلامة، لا بیرخم بس وحشتنى رختك انتی

فريدة:طمنى علی ماما و ادم!؟

هانى:اطمنى کلنا بخیر ومستنینك ترجعی

فريدة:طیب خدوا بالكوا من نفسکوا، لحد ما ارجع واطمن و ارحم علیکوا بنفسی

هانى:وانتی کمان خدی بالك من نفسك

فريدة:حاضر یا هنوش

قفلت فريدة معاه وحاولت تنام تانى لكن فشلت فقررت تقوم تحضر لبسها وتجهز نفسها من
دلوقت....صحى حسن وطلب قهوة عشان یفوق ویجهز نفسه للفرح...جهزت فريدة ونزلت علی اوضة
أمانی عشان تكون جنبها فی الوقت ده.....

فريدة:ایه الحلاوة دی قمر یامونى

أمانى:يجد شكلى حلو الفستان والميكب آب وكده

فريدة:كله قمر والله، طيب انتى عارفة لو انا ولد كنت اتجوزتك

أمانى:وانتى لو ولد أنا مكنتش سيبتك

فريدة:طيب يلا بقى هسيبك دلوقت عشان تخلصى نفسك

خرجت فريدة من أوضة أمانى اللى كانت بتجهز...فى الوقت اللى كان زياد مستنى فى الهول عشان ينزلوا
سوا...خرجت أمانى من اوضتها ماسكة فى إيد والدها اللى سلم على زياد وسلمهاله...وبدأ الفرح من
الزفة والرقص لحد مادخلوا القاعة وبدأت اول رقصة للعrsan....كان حسن طول الفرح بيدور بعيونه
على فريدة اللى كانت مشغولة مع أمانى....وأخيرا بعد ما بدأت الرقصة والكل قعد مكانه..شافها كانت
زى الحورية كالعادة فستان بسيط وميكب آب هادى وده اللى بيمزها عن غيرها وهو البساطة فقرر
يروحلها....

حسن:ايه الجمال ده كله، طالعة تاخدى العقل وتسحرى العين

فريدة:انت بقيت شاعر امتى!؟

حسن:من ساعة لما شوفتك

فريدة:اممم شكرا

حسن:هو احنا زعلانين من بعض ولا حاجة؟

فريدة:لا ليه بتقول كده!؟

حسن:يعنى حاسس انك بتهربى منى

فريدة:لا ابدأ أنا بس كنت مشغولة مع أمانى من الصبح

حسن:عقبالك

فريدة:شكرا وعقبالك انت كمان

فضلوا قاعدين مع بعض شوية وحسن عينه مش بتتشال من عليها وجواه فضول كبير وعازية يعرف
الحقيقة...هل هى وفرح واحد!؟ فقرر يسألها....

حسن: انا ممكن اسألك سؤال بس من غير زعل !؟

فريدة: وهزعل ليه!؟ انتفضل اسأل

حسن: هو انتى وف.....

كان لسه هيسألها لكن جات مجموعة من البنات قرايب أمانى شدوا فريدة عشان الرقص وانشغل الكل بالرقص اصحاب العريس اللى كان أولهم حسن واصحاب العروسة اللى كانت أولهم فريدة....والكل كان مبسوط وفرحان بالرقص والأغاني وحتى الناس اللى اتشغلت واتلهت فى البوفيه...وجه الوقت اللى صاحب العروسة بيقفقوا وراها عشان البوكية وهنا الكل كان بيتزاحم عشان يقف وراء العروسة لكن فريدة انسحبت وراحت على الترييزة تقعد وتتفرج على البنات.....قبل ما ترمى أمانى البوكيه بصت للمكان اللى فريدة قاعدة فيه ومشيت لحد عندها وبصوت عالى فى الميكرفون....

أمانى:معنديش اعز منك اديله البوكيه، وبصراحة هموت واشوفك عروسة و اخلص منك بقى

فريدة:ولما تخلصى منى، مين اللى هيرخم عليكى غيرى!؟

أمانى:ياستى المهم اخلص منك

حضنوا بعض والكل صقف ليهم وفرح بصدافتهم اللى بيتمنوا يقابلوا زيهما فى حياتهم و يحافظوا عليها زيهم....خلص الفرحة والكل مشى وفريدة وحسن بيودعوا العرسان اللى طالعين على المطار عشان يقضوا شهر العسل....بعد ما ودعوهم.....

حسن: هتعملى ايه دلوقت!؟

فريدة:المفروض ارتاح شوية، واجهز شنطتى عشان ارجع بكره

حسن:ياه بالسرعة دى

فريدة:وهقعد ليه!؟ انا كنت جاية عشان الفرحة وأهو خلص

حسن:يعنى تغيرى جو شوية، لسه فيه أماكن كتيرة مشوفتيهاش

فريدة:مرة تانية بقى، وتكون اجازة اطول من دى شوية

حسن:وهتحتاجى مرشد زى مش كده!؟

فريدة:اممم، طبعا هلاقى فين احسن منك

حسن: مفيش بقى حكاية كده بدل القعدة اللي احنا قاعدنها دى

فريدة: هحكىلك اخر حكاية فى دولاب الحواديت، وكويس اننا نختم بيها رحلتنا

حسن: والله مش عارف لما نرجع، مين اللي هحكىلك بعد كده؟! اتعودت عليكى

فريدة: هههه، مين عارف يمكن الصدفة تجمعنا مرة تانية، والوقت يكون اطول واحكىلك حكايات اكتر من دى

حسن: وليه نستنى الصدفة هو انا مش هشوفك فى الشغل!؟

فريدة: اديك قولت الشغل يعنى مينفعش نحكى فيه، لكن ده ميمنعش احكىلك فى الأعياد والمناسبات

حسن: يعنى افهم من كده اننا بقينا صاحب خلاص، مش كده!؟

فريدة: اه طبعاً صاحب

حسن: يعنى مش هتهربى منى بعد كده!؟

فريدة: واهرب منك ليه!؟

حسن: يعنى مش هتاخدى جنب وتبقى لوحداك!؟

فريدة: لا خلاص اتفقنا نكون صاحب

حسن: طيب قبل الحكاياه تعالى نلعب لعبه ممكن!؟

فريدة: نلعب، منلعبش ليه يعنى

حسن: طيب هسألك سؤال وتجاوبى عليه بس بصراحة

فريدة: يا سلام اتفضل اسأل

حسن: يعنى كل الحكايات اللي سمعتها منك كانت عن الحب اللي كان ضحية بأسم الحب، أو الجانى وسرق الحب، ايه هو الحب بقى فى رأيك!؟

فريدة: الحب هو كل حاجة فى الدنيا دى وعكسها، هو أكبر حقيقة ممكن تحسها وفى نفس الوقت أطول وهم ممكن تعيشه، الحب صياد شاطر بيخبط على باب اللي مش بيدور عليها ومحاول نفسه بألف سور وساجن قلبه فى قفص، وأول مايتمكن منه ويهدر كل الأساوار ويفتح القفص ويدق القلب ويعرف الحب يسبيك

وسط عاصفة من الأفكار بنسبها الذكريات، لكن عمر الصياد ده ما بيخبط على باب حد مستتبه وفاتح صدره ليه وعائز يواجهه، الحب أكبر عدو لنا ودائما بيكسر اللي قلبه صافى وكل أمله فى الحياة إنه يحب ويتحب بس وملوش اى طلب تانى وده اللي الحب لو سابهم بيكسرهم، لكنه صديق للى بيحب عشان سبب وهدف وبس ولو الحب سابهم بيدوروا عليه تانى

حسن: ياه تشبيهاتك قاسية اوى

فريدة: عشان حقيقة بس، فيه حاجات كتيرة اساس الحب وأهم منه كمان

حسن: وإيه هما بقى!؟

فريدة: الاحترام والثقة والأمان والأهتمام، والحقيقة انهم سلسله بيحجروا فى بعض مينفعش حلقة فيهم تسبب الثانية والإ السلسله هتنبوظ

حسن: عندك حق، هما أهم حاجة بس ترتبهم عند الناس بيختلف، وحتى الحب مفهومه بيختلف من واحد للتانى

فريدة: فعلا، عشان كده اقدر اقولك أن الحب هو حكاية أمانى وزيا

حسن: ايوه كده حمدالله على السلامة، سمعيني بقى اللي فاتتى وانا مسافر

فريدة: طب اسمع يا سيدى

حسن: ها...

(العاشقان)

فى مستشفى الشروق فى أكتوبر....الكل واقف على باب أوضة العمليات الكل مستنى نتيجة العملية اللى
الدكاترة بيعملوها بقالهم أكثر من 3 ساعات...واخيرا خرجوا.... اللمة طفت عشان تبلغهم بانتهاء العملية
وخرج الدكتور..جرى عليه كامل والد أمانى وزىاد حبيبها....

كامل وزىاد:طمنا يادكتور عن العملية!؟

الدكتور:الحمد لله العملية نجحت، وهى هتطلع دلوقت وهتقعد 48 ساعة، تحت الملاحظة معانا لحد ما
الحالة تستقر

بص الدكتور نحية كامل.....

الدكتور:حضرتك والدها مش كده!؟

كامل:ايوه يادكتور

الدكتور:طيب ممكن تيجى معايا المكتب نتكلم شوية مع بعض!؟

كامل:اه طبعاً، اتفضل

وفى المكتب....

الدكتور:اتفضل اقعد

كامل:خير يادكتور بنتى كويسة!؟

الدكتور:الحقيقة الحادثة جامدة، وهى نزفت كتير اوى، وده غير الأصابة اللى عندها فى المخ لما عملنا
الأشعة، بس مستنيين تفوق عشان نعرف الأصابة اثرت عليها ولا

كامل:هى ممكن تعمل ايه!؟

الدكتور:بتعمل حاجات كتير، بس خلىنا لما نشوف يمكن متأثرش عليها

خرج كامل من مكتب الدكتور وهو قلقان على بنته الوحيدة وقرر يروح يطمئن على مراته اللي مستحملتش تشوف دم بنتها واغمى عليها والمرضات نقلوها ترتها، فى الأوضة عند درية أم أمانى.....

كامل:عاملة ايه دلوقت يادرية!؟

درية:أمانى فين!؟طمنى عليها ياكامل!؟، انا عايزة اروحها

كامل:اطمنى طلعت من العملية والدكتور طمنى، وهى فى العناية ممنوعة من الزيارة، ارتاحى بس دلوقت والصبح تكون فاقت اخذك تشوفها

درية:طيب خدنى اشوفها من بعيد واملى عيني منها

كامل:حاضر يادرية

سندھا كامل وفضلوا ماشيين للعناية ولما وصلوا كان زياد واقف برا عمال بيبص على أمانى وبيعط اوى ويبدع لربنا....وقفت درية تطمئن على بنتها ونور عينها وفضلات تعيط لما شافت بنتها متحاوطة بالأجهزة وقبل ما تتعب تانى أخذها كامل....

كامل:درية كفاية كده عشان متتعبيش، يلا عشان تستريحى

مشيوا للأوضة وسندھا للسريير وأول لما نامت فضلت كامل رايح جاى شوية على أوضة مراته وشوية يشوف بنته..لكن كان بيطمئه وجود زياد جنبها وعرف أنه بيحبها فعلا....مشى كامل ناحية زياد وقرب منه، وزياذ كان منهار وأول لما كامل طبطب عليه اترمى زياد فى حضنه وهو منهار.....

زياد:أمانى مش ممكن تسببى ابداء، هى وعدتنى وعمرها ما خلفت وعد

كامل:هتكون كويسة طول ما انت معاها، سامحنى يازياد يا بنى أنا كنت فاكرك هتلعب ببنتى ومتستاهلهاش، عشان كده كنت برفضك دايماء، وده من خوفى ان بنتى الوحيدة تضيع منى، لكن كنت غلطان

زياد:يعنى خلاص وافقت انى اتجوزها!؟

كامل:انا مش هلاقى احسن منك ليها

زياد:يعنى اقدر اتجوزها اول لما تخف!؟

كامل:طبعا تقدر، سامحنى لأن حسام كان مدينى صورة وحشة عنك، وأنا قولت أنه ابن عمها ومن لحمها ودمها هيخاف عليها، لكن طلع حقير وشوه سمعتها ربنا يسامحه بقى

زياد: ملوش لزوم الكلام عن اللى فات، واول لما أمانى تفوق إن شاء الله هتفرح اوى ان حضرتك وافقت

كامل:بس هي تفوق وانا اجوزكوا عالطول

زياد:طيب اتفضل حضرتك استريح، وانا هفضل واقف هنا جنبها، متقلقش عليها

كامل:انا مش قلقان طول ما انت جنبها

مشى كامل وراح يطمن على درية وفضل زياد واقف يبص على أمانى ويكلمها....

زياد:فوقى بقى بلاش تقلقينى عليكى اكثر من كده، أنا عارف ان ده مقلب منك والصبح هلاقيكى واقفة قدامى وبتضحكى ليا، فوقى وانا اوعدك انى مش هزعلك تانى اصلا، فوقى عشان خلاص اخيرا باباكى وافق وهنتجوز، بس انتى فوقى

تانى يوم الصبح صحى كامل وراح يطمن على بنته وكان زياد نايم جنب باب اوضتها....

كامل:زياد يابنى قوم ارتاح شوية

زياد:ها، لا ياعمى انا مش هتحرك من هنا، غير لما اطمن على أمانى الأول

كامل:طيب قولى ازاي هتأخذ بالك من أمانى، وانت مش قادر تأخذ بالك من نفسك!؟

زياد:انا بخير وهكون كويس اول لما تفتح عيونها واطمن عليها

فجأة قطع كلامهم صوت الممرضة اللى كانت عند أمانى بتطمن عليها وطلعت جرى تنادى الدكتور اللى جه عشان يطمن على صحة أمانى...

الدكتور:صباح الخير

كامل وزياد:صباح النور

كامل:خير يادكتور

الدكتور:الممرضة قالت ان أمانى فاقت

زياد:يعنى نقدر ندخل نشوفها!؟

الدكتور: لازم اطمئن على حالتها الأول، واقولكوا لو حالتها تسمح بأنكوا تشوفوها ولا مش دلوقت

كامل: طيب اتفضل يادكتور

اتأخر الدكتور شوية وطلع بعد نص ساعة وعلى وشه علامات الحزن....

كامل وزیاد: طمنا يادكتور!؟

الدكتور: للأسف الأصابة اللي فى مخها أثرت على الذاكرة، ومش بس كده كمان لا دى كمان أثرت على حركة جسمها

كامل: يعنى ايه؟! بنتى لا هتتحرك ولا هتفتكرنا تانى!؟

الدكتور: لا مش كده بالظبط

زیاد: طيب ممكن نسفرها برا يادكتور

الدكتور: السفر برا زى هنا، صدقنى الحالة مش هتتغير ، نفیش غير حل واحد

كامل وزیاد: ايه هو الحل!؟

الدكتور: العلاج الطبيعى، عشان تقدر تتحرك وتقف تانى، هو اه مكلف وهياخد وقت بس مفیش حل غير كده

كامل: مش مهم الفلوس موجودة يادكتور

زیاد: طيب وفقدان الذاكرة!؟

الدكتور: متقلقش ده فقدان مؤقت وغالبا من تأثير صدمة الحادثة عليها، ونقدر نعتمد على جلسات وعلیکوا انكوا تفكروها بنفسكوا، وهى فاكهة بس بسيط

كامل: حضرتك ينفع تبدأ علاج من دلوقت!؟

الدكتور: طبعا ينفع

زیاد: طيب ممكن نطمئن عليها!؟

الدكتور: طبعا اتفضلوا، احنا هنقلها لأوضة دلوقت تقدروا تشوفوها، لكن بلاش تضغطوا عليها فى الكلام

طلعت أمانى من العناية وانتقلت على أوضة عادية وفى الوقت الذى كان زياد رايعين فيه يطمنون عليها.....جات درية الى اتخضت لما شافت العناية فاضية.....

درية:كامل هى أمانى فى؟!حصل ليها حاجة؟!خدوا بنتى فى؟!؟

كامل:اهدى يادرية مش كده عشان صحتك، اطمنى أمانى بخير وفاقت ونقلوها أوضة عادية كمان

درية:يعنى تقدر كمان كام يوم تروح معنا؟!؟

كامل:مش بالظبط كده يعنى، هى لسه تعبانة شوية والدكاترة هيخلوها، لحد ما حالتها تتحسن خالص

درية:يعنى ايه؟!؟

كامل:يعنى تعالى دلوقت نروح نطمن عليها، وهقولك على كل اللى الدكتور قاله

سند كامل درية ومشيو و معاهم زياد راحوا يطمنون على صحة أمانى وهما ماشين كامل كان بيقول لدرية كل حاجة عن حالة أمانى....ودرية اتصدمت لما عرفت حالة بنتها....

درية:يعنى بنتى ممكن متعرفنيش وتفكرنى غريبة عنها؟!؟

كامل:اهدى يادرية والحمد لله انها معنا

وصلوا عن اوضتها عشان يطمنون عليها واول لما دخلوا جريت درية عليها....

درية:حمدالله على سلامتكم يانور عينى

أمانى:الله يسلمك يا ماما

كامل:وانا بابا يا أمانى

أمانى:مالكوا يا جماعة فيه ايه! انتوا بتعرفونى على نفسكوا ليه؟!عارفة انك احن أم فى الدنيا وانك أجمل أب فى الكون

كامل ودرية:طيب الحمد لله

بصت أمانى على زياد بأستغراب...فى الوقت الذى كان زياد يقرب منها عشان يطمن عليها صدمته بكلمتها....

أمانى:مين ده؟!؟

درية: مين ده يعنى ايه؟! ده زياد

كامل: انتى متعرفيش مين ده!؟

أمانى: شكله مش غريب عليا، يمكن نكون اتقابلنا او نعرف بعض

درية: طيب افكرى كويس

أمانى: افكر ايه بس يا ماما!؟، اه انا دماغى وجعانى اوى

كامل: طيب استريحى يابنتى دلوقتى

طلعوا من الأوضة وعلى قد فرحة كامل ودرية أن بنتهم افكرتهم على قد خيبة زياد وحزنه ان حبيبته نسيته....ولما راحوا اتكلموا مع الدكتور.....

الدكتور: أنا قولتلوكوا انها هتفكر حاجات بسيطة اوى، وهتسى بس مش كل حاجة لأنه فقدان مؤقت وجزئي كمان مش كلى

زياد: ايوه بس دى مش فاكراى خالص، يعنى مش فاكراة آخر سنتين ونص فى حياتها!؟

الدكتور: بتحصل يا أستاذ، بس هى فكراك لكن مش قادرة تحدد بالضبط، دماغها زى شريط الكاميرا كده الصور مش هتبان غير لما نحمضها عشان توضح

زياد: طيب وهتفكر ازاي!؟

الدكتور: فكرها بنفسك، لكن اوعى تضغط عليها ولا على حالتها

طلعوا من مكتب الدكتور ودرية راحت تظمن على أمانى وفضل كامل واقف مع زياد اللي كان بي فكر ازاي هيفكرها بنفسه!؟.....

كامل: ها يا بنى ناوى تكمل مع بنتى ولا!؟ ، انا مش هلومك لو مش عايز تكمل معاها وعندك حق

زياد: ايه اللي حضرتك بتقوله ده!؟ انا مستحيل اسيب أمانى مهما حصل ياعمى

كامل: بس يابنى هتتعب اوى معاها

زياد: انا افديها بعمرى كله، المهم انها ترجع زى الأول

كامل: انا مش بس بتكلم على فقدان الذاكرة بس، لكن على حكاية العلاج الطبيعى وانها ممكن مترجعش
تمشى بشكل طبيعى تانى

زياد: وانا ابقى مش راجل لو اتخليت عنها وهى محتجاني جنبها، ونفرض اننا كنا اتجوزنا وعملت حادثة
كنت هسيبها ومفضلش جنبها، لا طبعا لانى بحب روحها ومش مهم شكلها لأن الشكل بيروح ونعجز
ونكرمش لكن الروح بتفضل عايشة، وبعدين لو أمانى كانت مكانى مكنتش سابتنى ابدأ وكانت هتفضل
معايا، وتكون سندی وعكازى

كامل: طيب وناوى تعمل ايه؟!

زياد: ناوى افكرها بالفترة اللى قضناها مع بعض، وارجعها أمانى حبيبتي بتاعة زمان

كامل: ربنا معاك يابنى

تانى يوم الصبح... كانت درية بتأكل أمانى وبتتكلم معاها وهنا دخل زياد....

زياد: صباح الخير

درية وأمانى: صباح النور

أمانى: هو انت مين؟! انا شوفتك قبل كده؟!

زياد: احنا صحاب من زمان بقالنا سنين

أمانى: أنا مش فاكرة خالص

زياد: تحبى احكيلك حكايتنا؟!

أمانى: اه ياريت، يمكن افتكرك

زياد: اول مرة اتقابلنا فيها كانت عندنا فى الشركة، وكنتى مقدمة على وظيفة... بدأ يحكى لها، فى شركة
المقاولات الدولية لصاحبها عبدالله الجمال والد زياد... طلعت أمانى بتجرى على السلم عشان تلحق معاد
الانترفيو بتاع الوظيفة... وهى طالعة خبطت فى واحد ووقع منها الفايل بتاعها....

أمانى: ايه ده مش تحاسب؟!

زياد: اسف مش قصدى

أمانى:اعمل بيها ايه اسف دى؟! هترتب الورق اللى وقع ده!؟

زياد:انا اعتذرت اعملك ايه!؟

أمانى:تتفضل تلم الورق ده بقى

زياد:انتى اكيد بتحلمى،!؟ ، انا اعتذرت وبس غير كده مش هعمل حاجة

أمانى:انت وقح اوى

زياد:وانتى لسانك طويل، وأنا معنديش وقت اضيعه معاكى فعلا

مشى زياد وفضلت أمانى تلم فى الورق وترتبه وبعدها دخلت المكتب عشان تعمل الانترفيو بتاعها....

أمانى:مممكن اقابل مدير الشركة

حنان:فيه معاد حضرتك!؟

أمانى:أنا جاية بخصوص الانترفيو عشان وظيفة مهندسة الديكور، اتفضللى الفايل اهو وفيه كل البيانات

حنان:اه طيب اتفضللى

دخلت السكرتيرة مكتب المدير وطلعت لأمانى تبلغها ان عبدالله الجمال منتظرها.....

حنان:اتفضللى عبدالله بيه منتظرك

أمانى:شكرا

فى مكتب عبدالله الجمال...

عبدالله:اهلا بشمهندسة أمانى

أمانى:اهلا بحضرتك

عبدالله:هو انتى بنت كامل جلال الدين!؟

أمانى:ايوه يافندم

عبدالله:مش غريبة انك تسيبى شركة والدك وتيجى هنا

أمانى: ولا غريبة ولا حاجة، لكن والدى مكنش هيعلمنى حاجة لأنى بنته الوحيدة ودايما يقول انى مش محتاجة عشان اشتغل، وانا بصراحة بقى عايزة اشتغل مش عشان الفلوس لكن عشان اتعلم

عبدالله: انا يعجبني طموحك اوى، وعشان كده يشرفنى انك تكونى ضمن مجموعتنا

أمانى: ده شرف ليا يافندم، اقدر استلم شغلى من امتى!؟

عبدالله: من بكره لو تحبى، تكونى فى مكتبك الساعة 9

أمانى: هكون فى المعاد بالظبط، عن اذن حضرتك يافندم

عبدالله: اتفضللى

روحت أمانى لبיתהا وهى فرحانة لأن جه الوقت اللى هتعتمد فيه على نفسها... بعيد عن فلوس ومنصب أبوها... لكن والدها كان زعلان انها سابته وراحت تشتغل عند حد تانى مش فى شركته...

كامل: يعنى تسيبى شركتنا وتروحى عند الغريب؟! وبعدين تشتغلى ليه اصلا!؟

أمانى: أهو انا سيببت شركة حضرتك عشان انت مش هتعاملنى زى أى موظفة، إنما إنى صاحبة شركة وهتدلعنى

كامل: طول عمر دماغك ناشفة

أمانى: طالعة ليك يا كيكو

كامل: ايه كيكو دى؟

أمانى: بدلعك يا حبيبى، انا هطلع انام بقى عشان الشغل

تانى يوم الصبح فى شركة عبدالله الجمال

أمانى: صباح الخير يافندم

عبدالله: صباح النور، اول مشروع هتشتغلى على ديكوراتاه عند البشمةهندس زياد فى مكتبه، وده المهندس اللى هتشتغلى معاه على المشروع الجديد

أمانى: خلاص يا فندم هروحله المكتب

طلعت أمانى من مكتب عبدالله بيه وراحت تدور على مكتب زياد...ولما لقت مكتبه دخلت على زياد اللي كان بيتكلم فى الموبايل مع عميل...

أمانى:حضرتك البشْمهندس زياد

شاور ليها زياد تقعد لحد ما يخلص...ولما خلص المكالمة دير الكرسي يشوفها....

زياد:انتى!؟

أمانى:هو انت البشْمهندس زياد!؟، لا وايه هشتغل معاك على المشروع الجديد!؟

زياد:مستحيل تشتغلى معايا

أمانى:مين قال انى عايزة اشتغل معاك اصلا

زياد:انا مش فاهم انتى فاكرة نفسك ايه!؟

أمانى:مهندسة شاطرة وانت محتاجنى عشان انقذك

زياد:بقى كده طيب موافق، ورينى شاطرتك بقى ويلا هنروح لموقع المشروع

أمانى:اتفضل يلا

راحوا موقع الشغل واختار زياد اسوأ موقع عشان يعاقبها بالشغل فيه ويأخذ حقه منها لأنها أول واحدة تتكلم معاه كده....

زياد:ها ايه رأيك!؟

أمانى:(بتكلم نفسها):انت عايزنى اقولك وحش وتبقى انتصرت عليا، لا كان غيرك اشطر يا شاطر

زياد:بشْمهندسة انتى معايا!؟

أمانى:اه موقع حلو اوى، هنبداً الشغل من امتى بقى!؟

زياد:يعنى عجبك الموقع!؟ ، طيب من بكره الشغل هيبدأ

مرت الشهور وزياد بيكلف أمانى بشغل صعب عشان يحسسها بالعجز والفشل لكن كل محاولاته بتفشل لأنها بتستحمل الشغل فى البرد والتراب وبتتجح كمان فى كل مشروع تمسكه.....

فى مستشفى الشروق...

أمانى: أنا حاسة انى فاكرة كل اللى بتقوله، وكأنى شايفاه بس الصورة فى دماغى مش واضحة، لكن استنى بس طيب ليه كنا بنعامل بعض وحش كده!؟

زياد: عشان حصل اللى مكنش متوقع

أمانى: ايه هو!؟

زياد: انى حبيتك

أمانى: ازاي ده!؟ واحنا بنا معارك كده

زياد: هكملك الحكاية

فى شركة عبدالله الجمال... وبعد ما أغلب الموظفين مشيوا... كانت أمانى موجودة بتخلص تصاميم للمشروع الجديد.....

زياد: ياه انتى لسه هنا!؟

أمانى: لا مشيت من نص ساعة

زياد: طيب بتعملى ايه!؟

أمانى: بخلص تصاميم المشروع

زياد: طيب كمليه بعدين أو خديه معاكى البيت، عشان الوقت اتأخر أوى

أمانى: ماشى

لمت ورقها واخذت شنطتها ونزلت تحت وكان زياد مستنيها....

زياد: اتفضللى اوصلك!؟

أمانى: معايا عربيتى، شكرا

زياد: العفو، عن اذنك

روحوا كل واحد فيهم لبيته...أمانى نامت من التعب وزياذ كان بيفكر فيها....عدت شهور بينهم من غير أى خلاف وده كان غريب لموظفين الشركة أو حتى للعمال، لحد ماجه اليوم اللى زياذ هزق أمانى قدام كل الموظفين وسابت المكتب ومشيت...كان بيشوف تصاميم المشروع اللى هى عملتها وكانت الصدمة....

زياذ:انتى ازاي تعملى كده!؟

أمانى:عملت ايه!؟

زياذ:ازاي تغيرى تصاميم المشروع والديكورات بتاعته!؟

أمانى:حضرتك مواصفات المكان مش مطابقة لتصاميم المشروع، وكانت هتكلفنا كتير وتعرضنا للمسؤولية

زياذ:تقوى تتصرفى من دماغك، مش فيه مهندس ترجعيله وتأخذى رأيته!؟

أمانى:ده بدل ما تشكرنى انى انقذت الموقف

زياذ:اشكرك على انك بوظتى الدنيا! وممكن ندفع الشرط الجزائى للشركة!؟

أمانى:اطمن انا درست الموضوع، وكلمت صاحب الشركة بتاع المشروع ووافق على التغيير ورحب بيه

وهنا قطع كلامهم صوت التليفون....

زياذ:الو...العفو يافندم والمهم ان المشروع عجب حضرتك، ده شرف لينا، نعم بشمهندسة أمانى هشكرها

حاضر يافندم، مع السلامة

قفل معاه ولسه هيتكلم مع أمانى....

أمانى:انا مستقيله

زياذ:نعم!؟

أمانى:اللى سمعته انا مش هقعده دقيقة هنا فى الشركة دى

طلعت أمانى وكان كل الموظفين ملمومين على صوت زعيق زياذ ليها....جريت على مكتبها اخدت

شنتطتها وجرى على العربية، ولما رجع عبدالله الجمال وعرف اللى حصل من زياذ وموقفه مع أمانى...

عبدالله: ملكش حق فاللى عملته، هى درست الموقف كويس، وانقذت سمعة شركتنا وكان واجبك تكافئها
مش تهزقها قدام كل الموظفين

زياد: انا مكنتش اقصد، واتعصبت لأنها اتصرفت من دماغها قبل ما ترجع ليا

عبدالله: وناوى تعمل ايه بقى عشان تصلح غلطتك دى!؟

زياد: هعتذر لها وقدام كل الموظفين

عبدالله: انت وتعتذر!؟ غريبة دى وخصوصا إنك عمرك ما اعتذرت لحد

زياد: بس انا جرحتها جامد ولازم تسامحنى

عبدالله: طيب انا هكلمها تيجى بكره الشركة على اساس انها تصفى حسابها، وانت تعتذر ليها قدام الكل

زياد: ماشى يا بابا

تانى يوم الصبح اول لما وصلت أمانى على الشركة كان زياد فى انتظارها وجامع كل الموظفين واول لما
شافها....

زياد: بشمهندسة أمانى، انا آسف وبعذر ليكى قدام الكل، ارجوكى تقبلى اعتذارى ومتمشيش لأننا
محتاجينك معانا

أمانى: خلاص سامحتك

دخلت أمانى على مكتبها اللى كان مليان بالورد وعلى كل بوكيه كارت مكتوب فيه آسف
وسامحنى... فرحت اوى بيهم وهنا دخل عليها المكتب زياد...

زياد: ها الورد عجبك!؟

أمانى: اه يجنن ده كله عشانى!؟

زياد: اه طبعاً، وعلى فكرة انتى خلتينى اعمل حاجات معملتهاش قبل كده

أمانى: زى ايه!؟

زياد: انى اعتذر لواحدة وكم ان اجبلها ورد

أمانى: كان لازم تعتذر عشان غلطان

زياد: لا عشان قلبى وجعنى لما زعلتك، وحسيت بحاجة مش عارف اسميها ايه!؟

أمانى: تقصد إيه!؟

زياد: ممكن نكون صحاب ونلغى بينا فكرة المدير والبشمةهندسة دى

أمانى: اممم... موافقة

من وقتها وزياى غير معاملته لأمانى خالص فى الشغل وبقي يعاملها أحسن من الاول وبقوا صحاب فعلا ودايما مع بعض حتى لما بيروحوا... بيفضلوا يتكلموا مع بعض بالساعات بيتكلموا فى أى حاجة وكل حاجة وكل يوم وزياى بيحب أمانى أكثر ويتعلق بيها عن اليوم اللى قبله... لحد ماجه اليوم اللى قرر يصارحها بمشاعره وكانت يوم حفلة عاملها عبدالله الجمال عشان يحتفل بنجاح مشاريعه...

محمد: يعنى قررت تصارحها بمشاعرك!؟

زياد: ايوه يابنى مالك دى 10 مرة تسأل!؟

محمد: طيب مش لما تتأكد من مشاعرها الأول، عشان لو مش بتبادللك الشعور متخسرش حاجة يا ابن عمى

زياد: اسمع يا محمد، انا هعترف ليها بمشاعرى، وده ليه عشان لما نحب مش عيب اننا نعرف اللى قدامنا اننا جوانا شعور ليه، لكن العيب انى اقف مكانى جبان ومعترفش ليها وبعدين مش هخسر حاجة على الاقل هعرف رأيها ايه!؟ وبعدين عيونها قالتلى كل حاجة حتى لو متكلمتش

محمد: زى ما تحب بقى

وصلت أمانى الحفلة والغريبة أنها كانت داخله ومعها راجل.....

محمد: مش هى دى!؟ ومين اللى معاها ده!؟

زياد: مش عارف

محمد: كويس إنك معترفتلهاش

زياد: يابنى يمكن قربها ولا معرفه، انا هروحها

مشى ناحية أمانى.....

زياد: اهلا وسهلا، ورتوا الحفلة

أمانى: شكرا يا زياد، اقدملك حسام ابن عمى

زياد: اهلا يا حسام، انا زياد

حسام: اهلا بيبك، امانى كانت بتكلمنى عنك

زياد: وياترى خير ولا؟!؟

حسام: لا اطمئن كلام كويس

هنا اضطرت أمانى تسيبهم مع بعض....

عبدالله: بشمهندس أمانى ممكن ثانية؟!؟

أمانى: اه طبعاً يا فندم، طيب انا هسيبكوا مع بعض وارجعلكوا تانى

زياد وحسام: اتفضللى

زياد: تحب تشرب ايه؟!؟

حسام: شكرا مش عايز حاجة

زياد: مالك شكلك مش مبسوط؟!؟ ، هى الحفلة مش عجبك ولا انت اللى مش واخذ على السهر؟!؟

حسام: بصراحة مليش فى الحفلات، لكن جيت عشان مسبش أمانى تروح لوحدها

زياد: انا كنت ممكن اوصلها

حسام: لا شكرا دى بنت عمى وخطبتى وانا أولى إنى اوصلها

زياد: ايه خطيبتك؟!؟ او مال مش لابسين دبل ليه؟!؟

حسام: دى كلها شكليات، المهم انها بتاعتى وعلى اسمى

هنا جات أمانى وقطعت كلامهم....

أمانى: معلىش أتأخرت عليكموا شوية لكن الشغل بقى

حسام: ولا يهكم

زياد: الف مبروك يا بشمهندس، بقى كده ينفع تكونى مخطوبة ومتقوليش؟!، وأعرف من أستاذ حسام دلوقت، عموما ابقى اعزمينى فى الفرح، ولا اقولك ملوش داعى عشان مش هقدر آجى

مشى زياد وحمد ربنا أنه معترفلهاش بمشاعره وإنه عرف الحقيقة، فى الوقت اللي عيون أمانى دمعت وطلبت من حسام أنها تروح للبيت...وفى عربية حسام.....

أمانى: انت ازاي تكذب وتقول لزياد إنك خطيبى!؟

حسام: مش دى الحقيقة!؟

أمانى: لا طبعاً، الحقيقة إنك ابن عمى مش أكبحكوانى مستحيل افكر فيك بشكل تانى

حسام: حتى لو كنت بحبك!؟

أمانى: انت اخويا وابن عمى، مش بشوفك أكثر من كده، ياريت منتكلمش فى الموضوع ده تانى

وصلت أمانى للبيت وفضلت مستنية مكالمه زياد عشان يتكلموا فى أى حاجة ولما متصلش عليها... رنت هى عليه لكن زياد مكنش فى الدنيا كان قاعد قدام علبة قطيفة وفيها خاتم الخطوبة اللي كان جايه لأمانى عشان بعد لما يصارحها بمشاعره يتقدم لها عا طول.....

فى مستشفى الشروق....

أمانى: طيب وبعدين ايه اللي حصل!؟

زياد: هحكلك، لكن ده معاد جلسة العلاج الطبيعى دلوقت

دخلت الممرضة ومعها كرسي متحرك وأول لما شافه زياد، شال أمانى وقعدها عليه وفضل يزقها لحد ما دخلت أوضة العلاج الطبيعى وصمم إنه يدخل معاها...وهناك كان والد أمانى ووالدتها.....

دريه: مش هندخل معاها!؟

كامل: كفاية وجود زياد جنبها ده مطمئنى، ولو حصل حاجه احنا جنبها اهو

دريه: سبحان مغير الأحوال، مش ده زياد اللي كان وحش!؟

كامل: ربنا يسامحه حسام بقى، هو اللي ادانى صورة وحشه عنه

دريه: حسام ده سبب المصايب كلها

كامل: ملوش لزوم الكلام ده وأوضتهم اننا عرفنا حقيقته

فى أوضة العلاج الطبيعى كانت أمانى بتتوجع أوى لكن زياد كان معاها ويبأخد بأيديها دايمًا وكأنه أب
بيساعد بنته أنها تمشى وتوصل ليه.... وبعد ما الجلسة خلصت.... راحت أمانى على أوضتها وهناك.....

زياد: اطمنى هتبقنا التانى

أمانى: انت ليه دخلت معايا جوايا؟!

زياد: عشان فيه بينا وعد محدش فينا يسيب التانى، فى اسوأ حالاته قبل حلوها

أمانى: بس انا مش بحب، حد يشوفنى ضعيفة او موجهة كده

زياد: انتى عارفة انى بحترم ضعفك ووجعك، مش ممكن استغلهم ابدأ أو افكر انى ازودهم عليكى

أمانى: ازاي بقى؟!

زياد: لأن اللى بيحب بيحترم فى حبيبه كل حاجة، عيوبه قبل مميزاته وضعفه قبل قوته

انتى مش فاكهة انى لما اتحيوبسفى موقف زى ده رفضت اعمله؟!

أمانى: مش فاكهة

زياد: هفكرك أنا

تانى يوم الصبح فى شركة عبدالله الجمال وبعد حفلة امبارح... قرر زياد انه مش هينجرف وراء مشاعره
لأن ده مش من حقه وإنها ملك لغيره... فقرّر العلاقة اللى بينهم هتكون رسمة اوى وشغل وبس.....

أمانى: صباح الخير، دى رسومات المشروع الجديد

زياد: صباح النور، شكرًا

أمانى: العفو

زياد: بشمهندس أمانى مفيش داعى تتعبى نفسك بعد كده، وتجيبى الرسومات بنفسك تقدرى تديهم
للسكرتيرة توصلهم ليا

أمانى: سكرتيرة؟!، حاضر يا فندم

طلعت أمانى من المكتب وهى مش مصدقة الطريقة الرسمية اللى بيعاملها بيها وفضلوا على كده
شهور... كلامهم عن الشغل وبس.... فى فيلا عبدالله الجمال.....

محمد: ايه يا بنى مالك؟! عمى قال إنك تعبان ومتغير، مش زى عوايدك، فيه ايه؟!؟

زياد: أمانى طلعت مخطوبة لأبن عمها

محمد: طيب وفين المشكلة!؟

زياد: المشكلة إنى بحبها ومش قادر اتخيلها مع غيرى، مجرد التفكير فى ده بيقتلنى، بستغرب هى إزاي
رغم كلامنا مع بعض مجبتش سيرته ولا مرة!؟

محمد: عندى الحل لكل ده بسيطة

زياد: وهتعمل ايه بقى!؟

محمد: ملكش دعوة، قولى انتوا هتبقوا فى المشروع بكره مع العمال!؟

زياد: ايوه، هتعمل ايه!؟

محمد: متقلقش هظبط الموضوع

وتانى يوم فى موقع المشروع... وسط ما كان الكل مشغول وصل محمد ومعاها واحدة حلوة اوى....

محمد: صباح الخير يا بشمهندسة أمانى، أنا ابن عم البشمهندس زياد

أمانى: صباح النور، اهلا بيك

محمد: ممكن طلب!؟

أمانى: اه طبعاً اتفضل

محمد: ممكن تأخدى الانسة توصليها للبشمهندس زياد!؟

أمانى: ايوه بس مش مسموح للعملاء يجوا موقع العمل، خليها تروح الشركة

محمد: اصلها مش عميلة، دى صاحبتة وجاية تعمله مفاجأة

أمانى: ايه!؟ صاحبتة ازاي يعنى!؟

محمد:ايه المشكلة صحاب ويمكن اكثر كمان شوية، وصليتها بقى عشان أنا مستعجل،ولازم امشى

أمانى:حاضر اتفضللى

جيجى:هو زيزو هنا!؟

أمانى:زيزو مين!؟

جيجى:زياد هيكون مين!؟اصله وحشنى

أمانى:لا بجد والله

جيجى:فيه حاجة!؟

أمانى:لا مفيش، اتفضللى وصلنا

أول لما شافته جيجى جريت عليه عشان تنفذ الخطة اللى اتفقت عليها مع محمد.....

جيجى:زيزو وحشتنى اوى

هنا مشيت أمانى قبل ما دموعها تنزل منها لكن عيونها قالت لزياد كلام كثير....

زياد:انتى مين!؟

جيجى:أنا اللى محمد اتفق معاها آجى، أمثل عشان اغيظ البنت اللى بتحبتها، ودلوقتى لازم تشوفنا واحنا

خارجين مع بعض

زياد:اسف انا مش هكمل فى التمثلية البايخة دى

جيجى:يعنى ايه!؟

زياد:يعنى تتفضللى من هنا دلوقت

جيجى:ماشى بس قبل ما امشى أحب اقولك، انها بتحبك وأوى كمان

زياد:وعشان أنا بحبها مقدرش اعمل فيها كده

مشيت جيجى وجرى زياد عشان يشوف أمانى لقاهما بتركب عربيتها وماشية

فى فيلا عبدالله الجمال...

محمد:ايه اللي انت عملته ده!؟

زياد:عملت ايه!؟

محمد:بوظت الخطة كلها

زياد:انت لو كنت تشوف نظرة أمانى، وهى شايفانى مع البنات مكنتش هتقول كده

محمد:اكيد غير مش كده!؟

زياد:مش غير على قد ما أنها لوم وعتاب كبير، إنى وجعتها، وأنا مقدرش اكون سبب فى وجعها حتى

محمد:يعنى ايه مش هنكمل!؟

زياد:لا طبعا، انا بحترمها وبحترم حبيب ليها، مش ممكن اعمل فيها كده ولا أفكر حتى استخدم حد عشان الغير، او الوجد والكلام ده كله، انا بحبها واللى بيحب عمره ما يجرح، او يخون انت فاهم

محمد:وفين الخيانة دى!؟

زياد:لما أكون مع غيرها، وبديله نفس الحقوق اللي المفروض تكون ليها تبقى خيانة، عايزنى ارتكب أبشع خيانة فى تاريخ الحب، وهى إن مشاعرى ليها يشاركنى فيها حد تانى

محمد:ياه انت بتحبتها اوى كده!؟

زياد:فوق ما تتخيل، لدرجة انى على استعداد اضحى بحبى لو هتكون سعيدة مع غيرى، المهم تكون بتضحك وبس

محمد:أنا آسف كنت عايز اساعدك بس

زياد:أنا عارف ومش زعلان

فى فيلا كامل جلال الدين....

درية:مالك يا حبيبتي زعلانة ليه!؟

أمانى:أنا بحب يا ماما

درية:ومين بقى سعيد الحظ ده!؟

أمانى:زياد عبدالله الجمال

درية:ابن صاحب الشركة اللي بتشتغلى فيها ومديرك فى الشغل!؟

أمانى:ايوه هو

درية:طيب واللى يحب يزعل كده!؟

أمانى:اصل الحكاية مش كده بالطبط

درية:وايه الحكاية!؟

حكى أمانى لوالدتها كل حاجة من يوم الحفلة ولحد ما شافته مع البنت....

درية:هههههه

أمانى:انتى بتضحكى ياماما!؟

درية:ااه لأنه افتكرك مخطوبة لحسام، زى ما عرف منه ولأنه بيحبك كان بيبعد عنك، لحد ما جاب واحدة
عشان تغيرى منها

أمانى:بس انا مش مخطوبة لحد، البنت كانت بتتدلع عليه

درية:هو ايه اللي عرفه بقى مش حسام قاله كده!؟

أمانى:يادى حسام وسنينه، اللي مش عايز يفهم أنه ابن عمى وأخويا

درية:قال إيه ماسك فى كلمة أبوكى وأبوه الله يرحمه، لما اتولدتى وقالوا أنكوا لبعض

أمانى:ده مجنون ودايما بيعمل مشاكل

درية:طيب ارتاحى دلوقت بقى

تانى يوم الصبح فى شركة عبدالله الجمال.....

زياد:صباح الخير

أمانى:صباح النور

زياد:هاتيلى تصاميم المشروع على المكتب

دخل زياد مكتبه ومستنى أمانى عشان يتكلم معاها ويشرح ليها الموقف... لكن الغريبة أن السكرتيرة هى اللي دخلتله الورق والتصاميم.... و فى مكتب أمانى.....

زياد: أنا مش طلبت منك يا بشمهندسة، تصاميم المشروع ايه ماسمعتيش!؟

أمانى: لا سمعت، لكن حضرتك قولت اى ورق، ابعته لحضرتك مع السكرتيرة

بدأت معاملة أمانى تتغير وتكون رسمية وزياد هيموت ويفهمها أن كل اللي شافته مجرد سوء تفاهم... وفى يوم فى موقع العمل وكانوا العمال مشيوا... وأمانى بتجمع رسوماتها عشان تمشى....

زياد: مش هحضر خطوبتك بقى!؟

أمانى: لما الاقى صاحب النصيب

زياد: وحسام!؟

أمانى: حسام بالنسبالى اخويا وابن عمى، حتى لو هو فاهم حاجة تانية دى بتاعته هو

زياد: يعنى مش خطيبك!؟

أمانى: حسام ماسك فى كلمة أبويا وأبوه الله يرحمه ، من أول لما اتولدت انى خطيبته وهنتجوز بعض، وبسبب الحكاية دى بيعمل مشاكل

زياد: أنا اسف مكنتش أعرف

أمانى: أنا اللي مكنتش اعرف انك خاطب!؟

زياد: انا ابدأ دى كانت مجرد تمثليه، عملها محمد عشان تغيرى

أمانى: وليه كل ده!؟

زياد: عشان أنا بحبك....

أمانى: تقوم تعمل فى كده!؟ ، تجيب واحدة تدلع عليك بطريقة سخيفة، انا كنت هقتلها

زياد: وليه بقى!؟

أمانى: عشان أنا كمان بحبك

زياد: قولتى ايه؟! قوليهالى تانى

أمانى: لا كفاية بقى

زياد: طيب أنا عايز ارتبط ببيكى رسمى

أمانى: هكلم بابا واحدلك معاد معاه

وصل زياد أمانى للبيت واتفقت معاه انها تحددله معاد مع والدها.....

كامل: مين اللى وصلك ده؟!

أمانى: ده ابن صاحب الشركة، وكمان زميلى فى الشغل وكان عايز يجى يقابل حضرتك

كامل: بخصوص ايه؟!

أمانى: عايز يرتبط بيا

كامل: وحسام؟!

أمانى: حضرتك عارف يابابا أنه ابن عمى مش أكثر

كامل: بس ده بيحبك اوى

أمانى: زياد بيحبنى أكثر، وأنا معجبة بيه فأرجوك وافق بقى

كامل: معنديش مانع اتعرف عليه، بلغيه يجى يوم الخميس الجاى الساعة 8

أمانى: ربنا يخليك ليا يا احن أب فى الدنيا

طلعت أمانى أوضتها تبلغ زياد بالمعاد... وزياد قفل معاها وراح بلغ والده اللى رحب بالموضوع واختياره

جدا... وجه يوم الخميس والعيلتين بيتعرفوا على بعض.....

كامل: اهلا وسهلا شرفتونا

عبدالله: الشرف لينا

درية: انت زياد مش كده؟!

زياد: و حضرتك طنط درية صح

درية:صح، شكلنا هنبقى صحاب

زياد:ده شرف ليا

عبدالله:احنا جايين نخطب بنتنا أمانى لزياد

كامل:وده شرف لينا، خصوصا لما اتكلمت مع زياد وعرفت قد ايه هو بيحب أمانى، ومستعد يعمل
عشانها أى حاجة، وده اللى أى أب بيتمناه أنه يطمئن على بنته

عبدالله:يعنى نقدر نعلن الخطوبة!؟

كامل:موافق لكن أول لما ارجع من السفر

خلص اليوم والكل فرحان ماعدا حسام...يفرح ازاي وأمانى هتضيع منه...عدت الأيام لحد ما رجع كامل
من السفر راح عشان يقابل زياد....

زياد:ازاي حضرتك يا عمى!؟

كامل:ابعد عن أمانى يا زياد

زياد:حضرتك ليه بتقول كده!؟

كامل:انت متستاهلش صفرها، حتى ومش هتقدر تحافظ عليها وهتوجعها

زياد:انا أوجعها مستحيل افكر فى ده

كامل:ولما هو مستحيل، ليه تخونها وتعرف غيرها!؟

زياد:أنا خونتها!؟ ، مقدرش اخونها ولو حتى فى خيالى

كامل:بص للصور دى وانت هتفهم، مش عايز اشوفك قريب من بنتى تانى

مشى كامل وفضل زياد ماسك الصور فى ايديه...فتحتها ولقى نفسه مع واحدة أول مرة يشوفها كان يوم
الحفلة اللى كان عاملها ليه محمد بيحتفل بخطوبته اللى هتم... وشافها هناك

رحمة:هاى مش انت هادى

زياد:لا حضرتك غلطانة

رحمة: اسفة اوى، سامحنى

زياد: ولا يهملك

جات تمشى وكانت هتقع سندها فحضنته... لكن الصور وهو بيحضنها وبس موضحتش غير المنظر ده،
فى بيت كامل جلال الدين....

كامل: مش عايزك تعرفى زياد ده تانى!؟

أمانى: بابا حضرتك بتقول ايه!؟

كامل: اللى سمعته، مش ممكن تتجوزيه طول ما انا عايش

أمانى: لكن أنا بحبه يابابا، وزياد محترم وبيحبنى وحضرتك كنت موافق

كامل: وغيرةت رأى لما عرفته على حقيقته

أمانى: حقيقة ايه!؟

كامل: اتفضللى الصور دى وانتى هتعرفى

أمانى: حضرتك فاهم غلط، فيه سوء تفاهم وانا هشرحها لك

كامل: مش عايز أسمع حاجة، وبطللى تدافعى عنه، من النهاردة مش عايزك تقابليه ولا هتروحي الشغل ده
تانى

طلعت أمانى اوضتها واتكلمت مع زياد وهى منهارة وهو طمنها أنه هيقابل والدها ويحاول يكلمه، فى
مستشفى الشروق....

أمانى: وحصل ايه بعد كده!؟

زياد: هكملك بس لما تأكلى الأول

أمانى: ايه ده انت هتأكلنى!؟

زياد: أنا مسؤل عنك وعن تفاصيل تفاصيلك

أمانى: طيب كمل بقى الحكاية.

عدت الأيام على أمانى وزياذ صعبة اوى أمانى مش بتشوفه وحتى كلامها فى الموبايل قليل اوى....وزياذ كل لما يحاول يكلم كامل عشان يشرحله الموقف يرفض يسمعه او حتى يقابله....وجهه يوم عيد ميلاد أمانى وكان أول عيد ميلاد ليها وهو بعيد عنها...

زياذ:كل سنة وانتى طيبة، والسنة الجاية تكونى فى بيتنا

أمانى:كان نفسى نقضى اليوم ده مع بعض

زياذ:بس كده طيب اطلعى فى البلكونة

أمانى:زياذ اوعى تكون....

طلعت فى البلكونة وزياذ كان متشعلق فيها ومعاه تورته عشان عيد ميلادها.....

أمانى:انت اتجننت، عارف لو بابا شافك

زياذ:متخافيش، حتى لو شافنى فداكى علقه منه وفداكى حياتى كلها

قعدوا احتفلوا مع بعض وكان أسعد عيد ميلاد يمر عليها....

زياذ:نفسك فى ايه بقى!؟

أمانى:نفسى نتعلم عزف الجيتار والغناء

زياذ:موافق جدا، هشوف مكان نتعلم فيه وابقى ابلغك، واهى فرصة نشوف بعض

نزل من البلكونة على الجنينة وهى ودعته ومشى وكانوا فاكرين أن محدش شافهم لكن حسام كان شافهم وقرر ينتقم...

حسام(بيكلم نفسه):ماشى يا زياذ خطتى الاولى فشلت أنها تبعدكوا عن بعض، لكن على الأقل البنت اللى اتفقت معاها تمثل عليك واصوركوا وابتعت الصور لعمى، الصور ساعدتنى أنها تشوه صورتك عنده للأبد، لازم اشوه صورتك عند أمانى، لكن دى بتحبك أوى يبقى الحل أنى اشوه صورتها عندك!؟

وضحك حسام ضحكه، هو وحده يعرف معناها لانه لقى طريقه لخطه جديدة، بعد أسبوع اتصل زياذ بأمانى وبلغها بمواعيد الدروس والعنوان كمان....

زياذ:واخيرا هشوفك بكره

أمانى: احنا هنبدأ من بكره الدرس

زياد: اه عشان نلحق نتعلم قبل فرحنا

أمانى: فرحنا؟! طيب وبابا

زياد: هفضل أحاول معاه لحد ما يوافق

وفعلا بدأوا الدروس مع بعض وكانوا بيقضوا الوقت مع بعض زى الأول... وكل ده وكان حسام بيراقبهم وبيزيد حقه وغله من زياد.... فى فيلا عبدالله الجمال.....

محمد: ايه يابنى كنت فين؟!؟

زياد: فى درس المزيكا

محمد: لسه حكاية الدروس دى يابنى؟! لا صوتك ولا صوتها حلويين، ومحدثش بيعرف يعزف فيكوا

زياد: عارف كده، بس مجرد اهتمامى بالحاجة اللى بتحبتها وبتخليها مبسطة ده فى حد ذاته سعادة ليا، وأنا متأكد ان ايمانها بالحاجة اللى بتحبتها ووجودى جنبها بيخليها تتمرن أكثر و عزفها يبقى أحلى، عشان كده أنا مؤمن بيها وباللى بتعمله، وكمان بنشوف بعض أكثر من الأول

محمد: يعنى الدرس حجة؟!؟

زياد: يمكن، بس أنا لو عايز اشوفها مفيش حاجة تمنعنى عنها

وهما مشغولين فى الكلام جه البواب ووصل ظرف لزياد... فتح الظرف شاف صور لأمانى وهى ماسكة إيد حسام وهو بيأكلها وهما بيرقصوا سوا.... وكان فيه كارت مكتوب عليه لو عايز تعرف الحقيقة كلمنى... عشان انت مضحوك عليك...

محمد: معقولة اللى شايفه؟! اتصل بالرقم

زياد: مين قالك أن الصور دى حقيقية؟!؟

محمد: كلم الرقم عشان تتأكد

زياد: ده لو بشك فيها كنت عملت كده، لكن عشان أنا عارفها كويس وعارف أنها مستحيل تعمل كده

محمد: يعنى مش بتغير عليها؟!؟

زياد: بالعكس أنا بموت من الغيرة عليها، وببقى عايز اخبيها عن عيون الناس، بغير لو حد غيرى كان سبب فى ضحكاتها، او حتى قريب منها أكثر منى أو حد عاكسها أو فكر فيها بس، لكن انا بثق فيها أكثر من نفسى، ولو كلمت الرقم ده ببقى أنا بشك فيها، وانا بكره انى أفكر فيها بطريقة وحشة وبكره ده كله ببقى ذكرى ونضحك عليها سوا

محمد: ايه الثقة دى كلها؟! جبتها منين!؟

زياد: من الحب والعشرة الللى بتعرفك الللى قدامك، فتقدر تعرفه كويس أكثر من نفسك

تانى يوم وبعد ما خلص درس المزيكا... جاب زياد هدية لأمانى وكانت جيتار عشان تتمرن كويس... وهما مروحين فى العربية وقع الظرف كانت بترخم على زياد، وقررت تسمع مزيكا، وقالت تدور على الCD الللى مسجلينه بصوتهم، وهى بتفتح تابلوه العربيه، الظرف وقع....

زياد: هاتى الظرف ده!؟

أمانى: فيه ايه الظرف ده!؟

زياد: حاجة مش مهمة، متشغلش دماغك بيها خالص

فتحته أمانى وشافت صورها واتصدمت...

زياد: قولتلك انه مش مهم

أمانى: الصور دى...

زياد: هتشش مش محتاجة تبررى حاجة، لأنى عمرى ما شكيت فيكى، عارف أنها مش انتى، صدقيني انا بثق فيكى أكثر من نفسى وعايزك تطمنى خالص

أمانى: أنا بحبك اوى يا زياد

زياد: وأنا بموت فيكى

مرت الشهور وأمانى وزياد مع بعض وكل خطط حسام بتفشل، وجه يوم الللى راحت فيه أمانى الشركة عند والدها ومكنش هناك واستقبلها حسام....

حسام: اهلا بيكى، منورة المكان

أمانى: شكرا

جات قطعت كلامهم السكرتيرة....

أميرة:الوفد وصل وحضرتك لازم تستقبلهم

حسام:طيب أنا جاى أهو

فضلت أمانى قاعدة زهقانة وقررت تقرأ كتاب وهى بتختار كتاب من الكتب فيه ظرف وقع ولما فتحتة كان النيجاتيف لصور زياد مع البنت ولصور أمانى معاه....فهمت أمانى أن حسام هو السبب فى كل حاجة بتحصل ليها مع زياد...اتصلت بزياد

أمانى:الو، زياد قابلنى ضرورى فى الكافيه اللى جنب بيتنا

زياد:طيب هكون عندك

وفى الكافيه.....

زياد:انتى عارفة معنى النيجاتيف ده ايه!؟

أمانى:ايوه عارفة أنه السبب فى كل اللى حصل، شوه صورتك قدام بابا ولما شافنا اننا مبعدناش قرر يشوه صورتى قدامك

زياد:حيوان انا مش هسييه

أمانى:بلاش تشغل بالك بواحد زى ده، أنا أول لما بابا هيرجع بكره من السفر هبلغه وبعدها اتصل بيك اقولك اللى حصل

زياد:وبعدها نتجوز بقى

أمانى:اممم أفكر

فى مستشفى الشروق....

أمانى:وبعدين حصل ايه!؟

زياد:مهو أنا للاسف معرفش اللى حصل، انتى المفروض كنتى تتصلى بيا تبليغينى اللى حصل، لكن بدل ما الاقى مكالمة منك، طلعت من المستشفى بتبلغنى بأنك عملتى حادثة وحالتك خطيرة، افتكبرى يا أمانى ايه اللى حصل!؟

أمانى:مش فاكرة....مش فاكرة

وفجأة صرخت واغمى عليها...جرى زياد على الدكتور وجه الدكتور وأداها حقنة مهدئة عشان تنام.....

الدكتور:استاذ زياد، قبل كده قولت لحضرتك بلاش تضغط عليها

زياد:انا بس كنت عايزها تفنكر، هى هتبقى كويسة مش كده!؟

الدكتور:إن شاء الله

فضل زياد جنبها ومعها لحد ما صحيت...

أمانى:زياد حبيبى

زياد:أمانى انتى فكرانى!؟

أمانى:أنا عمرى ما نسيتك يا حبيبى

زياد:ايه اللي حصل لما قررتى تكلمى باباكى عن اللي عمله حسام!؟

أمانى:هقولك

فى بيت كامل جلال الدين...أول لما رجع كامل من السفر كانت أمانى بتحكى ليه كل حاجة عاملها حسام وبتوريه الدليل اللي يدينه...بعدها دخل كامل مكتبه واتصل بحسام...بعد نص ساعة وصل حسام ودخل المكتب عند عمه اللي واجهه بالدليل...

كامل:انت تعمل كده وتشوه سمعة بنت عمك كده، وانت المفروض تقتل اللي يشوه سمعتها، ليه عملت كده!؟

حسام:عشان بحبها وعملت ده كله عشان تكون ليا، ممكن اقتل اى حد يقرب منها ومش مهم اشوه سمعتها، المهم انى عارفها ومتأكد أنها أشرف من الكل

كامل:انت مجنون!؟

حسام:أنا فعلا مجنون بيها وممكن أعمل اى حاجة عشان افوز بيها، وتكون بتاعتى، أنا قتلت القطة اللي كانت بتخربشها واحنا صغيرين، وضربت ابن الجيران كسرت رجله لما كان بيعاكسها، مقدرش اشوفها مع غيرى لانها ملكى أنا وبس

كامل: انت لو مكنتش ابن اخويا كنت قتلتك، وارتحت من شرك وجنونك، امشى اطلع برا مش عايز اشوفك
لا فى الشركة ولا فى بيتى ولا فى حياتنا

طلع حسام من البيت وهو غضبان... ودخلت أمانى على مكتب والدها

كامل: أنا غلطت يابنتى فى حق زياد وظلمته، لكن صدقيني أنا وثقت فى كلام حسام لأنى بعتبره ابنى،
كلمى زياد وقوليله إنى موافق على الخطوبة

أمانى: بجد يا بابا!؟

كامل: طبعا ياروح بابا

أمانى: لا كده انا هروحله المكتب أعمله مفاجأة بنفسى

طلعت أمانى تجرى ومأخذتش بالها من العربية النص نقل وهى جاية فصدمتها.....

أمانى: ده كل اللى حصل يوم الحادثة، هو أنا بقالى هنا كتير!؟

زياد: حمدالله على سلامتكم، أنا كنت هموت من خوفى عليكمى

أمانى: بس انا مش بتحرك زى الأول، هو انا مش هعرف امشى تانى!؟

زياد: مين قال كده!؟ ، الدكتور قال بالعلاج الطبيعى وهترجعى تانى، وطول الفترة دى هفضل شايلك
ومعاكى دايمًا

أمانى: مش هيجى يوم تتعب ولا تمل!؟

زياد: حد بيمل من بنته أو أخته ولا حتى من حبيبته، انتى بالنسبالى كل دول

أمانى: انت ازاي بتحسسنى بكل الأمان ده وانا معاك!؟ ازاي بنسى كل الدنيا و المهم أنك معايا!؟ ازاي كل
حاجة سهلة كده طول ما ايديك فى إيدى!؟

زياد: عشان بنحب بعض، ولازم نستحمل بعض ونطلع عين بعض، بولك ايه شدى حيلك بقى اتفقت مع
عمى نتجوز اول لما تخفى، وانا شايف أنك خفيتى ما تيجى نتجوز!؟

أمانى: يامجنون

فضلت أمانى تتعالج سنة بحالها وزیاد معاها وجنبها مسبهاش لحظة كان بیستحمل عصبيتها اللى من غیر مبرر وتعبها ومزاجيتها لكن عمره ما فكر یسیبها ابدأ...أداها الأمان اللى كانت محتجاءه واول لما خفت قررروا یعملوا الفرع فى أسوان

زیاد:خلاص خفیتی وملکیش حجة، جهزى نفسك عشان نسافر للفرع

أمانى:نسافر على فین؟!؟

زیاد:أسوان

حسن:یاه...أنا فاتنى كثير بقى، لكن فعلا قصة حبهم تستاهل

فريدة:فعلا تستاهل فيها الاحترام لما زیاد مستغلش ضعفها ولا استمر فى التمثيلية بتاعة البنت اللى بتحبه، واحترم حبهم، وفيها الثقة لما كل واحد فيهم وثق فى الثانى، والإ كان حسام فرق بينهم، فيها الأمان وده اللى قدمه ليها فى كل لحظة، من أول قصة حبهم لبداية حياتهم الجديدة، فيها اهتمام بتفاصيل تفاصيلها، والحاجة اللى بتحبها عشان بس تكون مبسوطه وبتضحك

حسن:عندك حق، ناوية على إيه دلوقت؟!؟

فريدة:ناوية اطلع اجهز باقى الشنطة عشان اسافر، وانت هتعمل إيه؟!؟

حسن:هطلع احضر شنطتى وأجى معاكى، هقعد ليه بقى؟!؟، وأنا مكنتش اعرف غيرك وهبقى وحيد بعدك

فريدة:طيب يلا بينا عشان نلحق القطر

طلعوا یجهزوا الشنط وبعد شوية نزلوا فى الهول عشان یسلموا المفاتيح....

حسن:يلا بينا

فريدة:اه يلا، يا خبر نسيت موبايلى فوق هطلع اجيبه واجى، خلى الكتاب ده معاك

حسن:انتى كنتى بتذاكرى ولا إيه؟!؟

فريدة:لا ده الكتاب اللى كنت بقرأ فيه، واحنا جايين اول لما قابلتك ومكملتوش

حسن:طيب متتأخریش عليا

طلعت فريدة أوضتها تدور على الموبايل بتاعها وفضل حسن مستنى ولما زهق فتح الكتاب يقلب فيه واتصدم...شافها معلمة على كل كلمات الوجة اللي فى الكتاب ولما جات كلمة فرح حطتها فى دايرة وكتبت فوقها....(ليس كل ما نحملة من أسماء نمتلكه فأبى منذ ولادتى بينادينى بفرحتى ولم اعيش الفرحة لسنوات...أنا فرحة أبى، انا هى من خدعها الحب، وعشقت انانيا، واصبحت معقدة)..... اخيرا اتأكد حسن أن فريدة هى فرح وأن حكاية المعقدة والأناى دى حكايتها هى... نزلت فريدة للهول....

فريدة:اسفة اتأخرت عليك، مكنتش لاقية الموبايل بس، ايه مالك!؟

حسن:لا ابداء مفيش، يلا بينا

مشيوا من الفندق وركبوا تاكسى ووصلوا المحطة...ركبوا القتر وبدأ يتحرك...

فريدة:الكتاب بتاعى معاك مش كده!؟

حسن:ايوه، اتفضللى يافرح

هنا اتخضت فريدة ووشها جاب ألوان....

فريدة:فرح مين يا حسن!؟ أنا فريدة

حسن:واحد انتى وهى واحد مش كده!؟وبلاش تحاولى تنكرى أن حكاية المعقدة والأناى دى حكايتك، كان باين عليكى وانتى بتحكى، وحتى دلوقت لما ناديتك بالاسم ده بان عليكى التوتر والقلق

فريدة:ايوه أنا هى فرح، وحكاية المعقدة والأناى حكايتى

حسن:وليه مقولتيش ليا كده!؟

فريدة:صدقنى مكنتش هتفرق فى الأسامى، المهم الوجة اللي عشته سواء فرح ولا فريدة

حسن:وده اللي خلاكى تقفل على نفسك، وتجري زى العيل الصغير لو حد قرب منك!؟

فريدة:بخاف من الفراق، من الوجة، نن إنى اضحى وفى الآخر اتساب من غير مبرر، بخاف اتوجع وعشان كده ببعد

حسن:بس مش كل حد هيدخل حياتك هيخرب قلبك، بالعكس ده ممكن ينور الضلمة اللي جواكى ويأخذك لدنيا جديدة

فريدة:وايه اللي هيعجبه فيا؟!، انا اتسابت عشان واضحة فى كل حاجة، اتسابت عشان صريحة ومش بنافق، اتسابت عشان عندى شخصية وطموح، عشان حبيت بجد و عافرت لآخر نفس فيا عشان اكمل فى الحب ده، لكن اكتشفت انى حاربت الظروف عشانه، وهو سابنى عشان الظروف ومشى

حسن:بس غيره بيحب الوضوح والصراحة دى، غيره بيحب فيكى كل حاجة ومش عايز يشكلك على مزاجه، وكل اللي عايزه بس أنه يكون جنبك

فريدة:صدقنى اللي بتقول عليه ده لما يقرب منى ويعرف إنى فاضية هيبعد

حسن:لا مش هيبعد عنك، لو بيحبك، لأنه هيعرف يصلح الخراب اللي جواكى ويزرع فيكى أمل جديد، وتحسب إنك معاه بتلاقى نفسك

فريدة:وفين الاقى اللي هيظمن خوفى من الحياة؟!واللى لما اقع هسند عليه، فين الاقى اللي يحب فيا الوحش قبل الحلو!؟

حسن:موجود على فكرة

فريدة:فين؟!؟

حسن:تقدرى تقولى العريس اللي بيتقدم ليكى من سنة ونص بترفضيه ليه؟!؟

فريدة:وانت عرفت منين؟!؟

حسن:عشان أنا هو العريس ده، شوفتك اول مرة فى صورة مع أمانى يوم خطوبتها سحرتنى ضحكتك وبدأت اراقب بروفايلك، بحبى إيه وتكرهى إيه؟! حسيت بيكى بتكبرى جوايا كل يوم عن اللي قبله، حسيت إنك معايا فى كل مكان بشوف صورتك وبس، اشتغلت مصدقتش الصدفة وقدر ربنا إنه جمعنا، بقينا زمايل فى الشغل وفى مكتب واحد، لكن كنت لما بحاول اقرب منك كنتى بتبعدينى عنك، وحتى لما اتقدمتلك ورفضتيني من قبل ما تعرفى مين العريس؟! مستسلمتش وفضلت أحاول

فريدة:معقولة عملت كل ده عشانى؟!، هتفضل تحاول لحد امتى؟!؟

حسن:لحد ما توافقى إنك تدينى فرصة أكون موجود فى حياتك، واعرفك أن فريدة تستاهل تتحب وإنها بتعرف تحب اوى كمان

فريدة:هتتعب اوى أنا طريقى كله شوك صعب حد يكمله للآخر

حسن: وأنا راضى تكونى وجعى، لكن مش هسيبك تهربى منى تانى

فريدة: انت عارف أنا كنت بهرب منك ليه!؟

حسن: لا، وده اللي استغربته

فريدة: عشان كنت عارفة من اول يوم شوفتك فيه فى المكتب أن فيه حاجة هتحصل بينا، احساس غريب حسيته نحييتك، وعشان كده خوفت وهربت منك، مع ان نظرتك ليا بتصلح بس كل الكركبة اللي جوايا، لكن بعدت وجريت، لحد ما قابلتك فى القطر اول مرة وبدأنا نتكلم وارتحت لىك، حكيت لىك عن كابوسى اللي محدش يعرفه، بعدها حلمت لأول مرة إنى لحقت القطر لما انت أخذت بأيديى، كل يوم كان بيمر معاك كنت بطمئن لىك أكثر، وكنت حاسة أن فيه حاجة هتحصل بينا

حسن: افهم من ده إنى ممكن اتقدم تانى وتدينى المرة دى فرصة، ونكتشف الحياة مع بعض من جديد!؟

فريدة: موافقة طبعا

حسن: خلاص يوم الخميس الجاى، جهزى نفسك عشان هاجى ازوركوا، مش هترفضى المرة دى وحتى لو رفضتى مش هزهق وأفضل اعافر عشان حبى

فريدة: وأنا مش هرفض

وصل القطر... ووصلت معاه أحلام فريدة للنور وزى ما كانت الرحلة دى رحلة نسيان رجعت منها وهى هتبدأ حياة جديدة....

الحب...كلمة صغيرة وبسيطة لكن معناها كبير اوى....الحب والماء وجهان لعملة واحدة فيهم الحياة بكل ما فيها من بهجة وسعادة وفيهم الغرق والوجع والتعاسة...الحب هو كل حاجة و عكسها...الحب ليه معانى كتيرة وصور أكثر لكن بنتمنى نعيشه....لو سألنا حد عن حلاوة الحب هيشرحه من وجهة نظره لكن لو سألنا حد عن وجع الحب هتلاقيه بيحكى خيبتك ووجعك فى الحب وكأنها مأساة وبتتكرر زى الكأس الداير اللى الكل لازم يدوقه ويعيشه...ورغم وجعنا ده بس لسه بندور على الحب....أى تجربة حب بنخرج منها لازم نتعلم ومفيش حب حقيقى بينتهى

الحب الحقيقى فيه احترام أن اللى معاك يحترم خوفك ويطمنك...يحترم ضعفك فيقويك مش يدور على عيوبك عشان يكسرك بيها....الحب الحقيقى فيه ثقة إنك تنام وانت مطمئن إن مش هيجى اليوم واللى معاك هيسيبك ويمشى...إنه مستحيل يوجعك أو يكسرك....الحب الحقيقى يعنى اهتمامنا بتفاصيل التفاصيل ومع الوقت هتلاقى نفسك بتأخذ من شكل وروح وكلام اللى معاك وكأنكوا روح واحدة فى جسدين....الحب الحقيقى يعنى أمان اللى هو لما اروح للى بحبه وأنا عاملة مصيبة عارفة إنه هيساعدنى ويقف معايا...عارفة إنى قبل لما احتاج له واطلبها منه هيكون جنبى ويقوينى... ابقى عارفة أن مهما عجزت وكرمشت هيفضل معايا لأنه حب روحى....عيش الحب بالطريقة اللى انت عايزها وبس وامشى لو حسيت إنك مش بتتحب...أو عى تشوف نفسك ناقص واللى جاى ده هيكمل اللى ناقصك لا تبقى غلطان وطول ما اللى معاك حاسس إنك ناقص هيسيبك...لكن حبيبك مختلف عنك واختلافكوا ده اللى بيخليكوا تكملوا مع بعض وتعيش حاجات اول مرة

تعيشها....انا متأكدة أن كل واحد هيقراً الرواية دى هيحس نفسه فى شخصية من شخصيتها أو يحس نفسه فى أكثر من شخصية لأننا فى النهاية جينا وبنعيش فى الحياة بوجه من وجوه الحب



فصلة

للنشر والتوزيع

Fasla Publishing & Distribution

01067000701

**E-mail -: Fasla .Pub@Gmail.
com**

Facebook .Com/Fasla .Pub